





EE

III

44

12.145-18





IACOBI PRIMEROSII  
*Doct̃oris Medici*  
DE VULGI  
ERRORIBVS  
in MEDICINA,  
LIBRI IV.

- I. *De Erroribus circa Medicos:*
- II. *De Erroribus circa Morbos quosdam, & eorum cognitionem.*
- III. *De Erroribus circa Viſtus rationem sanorum & agrorum.*
- IV. *De Erroribus circa Remediorum uſum.*

*Publici & M. Scholae Piar. J. Pandalm.*



*ex hereditate Jan. de Rubij*

AMSTELODAMI

Apud IOANNEM IANSSON  
Anno M. DC. XLIV.



I V D I C I V M  
ZACUTI LUSITANI  
de hoc libro.

**A**micissime IANSSONI , Vidi  
hunc librum excellentissimi Viri Sa-  
cobi Primerosii , qui de vulgi in me-  
dicina erroribus graphice disceptat, aureolus est,  
nervosus, varius, jucundus, & utilis, dignus ut  
in ore medicorum perpetuo versetur. Affabre  
differit, acute dissolvit, subtiliter objicit hic per-  
doctus auctor. Eja age, mi Ianssoni , eum ex  
tempore prælo committe, ne recrastines, nullus  
emunctæ naris vir. hunc salutiferum partum tor-  
vè spectabit, sed in doctorem amplexu, semper  
erit delitio, & ornamento, virentiumque instar  
rosarum in dies magis, ac magis effloreat sem-  
per. Pseudo enim medicorum inscitiam, & erro-  
res detegit, qui alienis periculis sibi sumptus fa-  
ciunt, & rudem, ineptamque plebeculam falsis  
pollicitationibus alliciunt. Hi contra præcepta  
Sacrosanctæ Medicinæ insolentes insurgunt, &  
detestantur eos, qui agris mirâ diligentia succur-  
runt, suavissime medentur, & citò manus adhi-  
bent auxiliares; Hos, Herculeâ veluti clavâ, hoc  
est, Hippocratica methodo instructus solo aequat,  
& eorum erroneas opiniones ex toto profligat,  
vanam Medicætorum arrogantiam refranat,

lividam proterviam coërcet, & superbos blateronum conatus strenuè retundit. Vnum enim molestissimè fero, quod gregarii, & inepti homunculi, imò male feriatì empirici hanc prerogativam eruditorum instar sibi vendicent; ita ut venatici canes, & villatici eodem modo ferinam olfacere videantur, velintque capraë Rhinocerotì nasuto videri similes. At hæc faciamus missu. Tu bonarum artium sanctor integerrime, strenuam repone operam, ut hic liber politus, & tersus præto citò gemat, & lucis usura fruatur: nam applausu erit exceptus in nostro Belgio, in Europa, imò in orbe toto. Vale, & me te amantem, redama. Amstelodami. 4. Junii 1639.

Zacutus Lusitanus M.D.

IN LIBRVM  
DE  
VULGI ERRORIBUS.

---

PRÆFATIO.

**R**ECTÈ scripsit *Hippocrates Libro de Lege, Medicinam omnium artium esse prestantissimam* : Id enim illius antiquitas, necessitas, & subiecti, corporis scilicet humani, nobilitas, satis indicant. Verùm addit, *propter eorum qui eam exercent, & eorum qui temerè de illis iudicant, ignorantiam, reliquis artibus inferiorem videri.* Quibus verbis, duas videtur innuere causas errorum omnium qui in medendo contingunt. *Prima* Medicos ipsos spectat, *secunda* verò reliquos omnes qui de Medicis & Medicina iudicant. Medicos quidem quod spectat, plurimos ait esse histrionibus ὑποκρίταις similes, qui personam repræsentant, quam tamen non sustinent. Ita Medici φήμην μὲν πολλοί, ἔργον δὲ πάγχυ βαιοί. Quod sicut *Hippocratis* temporibus; Ita & nostro sæculo verum esse ostendit experientia. *Secunda* causa eos spectat qui de Medicis malè iudicant, optimos quidem semper quisque sibi optat. Verum quis ille est, qui bonos à malis probè distinguere norit, quum multi iis sæpe utantur, quos vel audacia, vel amici cuiusdam favor, vel petulantis linguæ

## P R Æ F A T I O.

jaſtantia, non ſolida, Medicinæ cognitio extulit; quod vitium etiam *Plinii* tempore fuit familiare. *Cuiſibet*, inquit, *Medicum ſe dicenti ſtatim creditur*. Cum tamen nullâ in re peccatum ſit gravius, majus enim ſæpe à Medico, quam ab ipſo morbo impendit periculum. Ex duabus hiſce cauſis omnes populi errores proficiſci diximus. Nam plurimi Medicinam facientes, parçè tamen ac tenuiter Medicinæ præceptis imbuti, plurima populo perſuaſerunt, quæ altè adeo animo infixæ hærent, ut vix ullis rationum momentis inde poſſint evelli, & eradicari. Pauciſſimi enim graſſantur errores, quibus olim Medicus quiſpiam non dederit originem. ex malè intellectis quibuſdam Medicinæ theorematibus, & præceptionibus. Neque id mirum eſſe debet, cum etiam inter ipſos Medicos doctos, & probè inſtitutos maxima opinionum diſſenſio, nondumq; plenè compoſita varietas reperiatur. Verùm hoc libro non de Medicorum controverſiis agere propoſitum mihi eſt, ſed populo tantùm errores quorſdam indicare, qui veram medendi rationem interturbant. Scripſerunt de hoc argumento pauci, *Laurentius* quidem *Ioubertus* apud Gallos, ſimile quid ineditatus erat; ſed opus imperfectum reliquit, paucos tantùm errores explicavit, nec illos admodum, graves parùmque ad pòpulum meo iudicio ſpectantes. Cũ igitur quorſdam hic errores obſervaviſſem, etiam

iam satis notabiles, de illis sententiam meam placuit breviter exponere. Occasionem huic operi dederat olim familiaris illa consuetudo vaticinandi ex urinis, quam etiam hodie Medicorum plurimi foveant, & sequuntur, de quâ cum opinionem meam quidem jam pridem à me postulasset, eam scripto ipsi indicavi. Postea verò animadversis etiam alijs erroribus, de iis aliquid in usum primum meum descripsi. Tandem cum centuriam perfecissem, atque liber hic in aliquem molem excrevisset, finem imposui, forsitan olim ut sese occasio offeret, plures annotaturus, maximè si tractatio hæc probis doctisque Medicis grata utilisque videatur; Illorum enim judicio hæc omnia submitto. Non unius tantum regionis, sed & plurium errores hoc libro complexus sum, ut quæ in genere hic scribuntur, quisque sibi adaptet, si in suâ regione eosdem inveniat. Erit autem istius scriptionis hic ordo, ut liber Primus errores circa Medicos complectatur, id est circa omnes eos qui falcem suam in hanc messem injiciunt. Secundus verò circa morborum quorundam naturam, & signa versabitur. Tertius verò circa victus rationem tam sanorum quam ægrorum. Quartus & ultimus de morborum quibusdam remedijs à populo malè intellectis tractabit. Sed jam opus hoc aggrediamur.

# INDEX CAPITVM

## LIBRI PRIMII.

|   | Cap. |
|---|------|
| <b>D</b> E Medicis in genere,   | I.   |
| De doctoribus Medicis,  | 2.   |
| De Medicorum famulis, & Pharmacopœis Medicinam facientibus,             | 3.   |
| De Theologis Medicinam facientibus,                                     | 4.   |
| De mulieribus Medicinam, & Chirurgiam facientibus,                      | 5.   |
| De Agyrtis,   | 6.   |
| De Antidoto Agyrtarum,  | 7.   |
| De Balsamo, & unguento Agyrtarum,                                       | 8.   |
| De iis qui se Professores vocant artis Paracelsicae,                    | 9.   |
| Medicum debere esse Chirurgia peritum.                                  | 10.  |
| Medico licere sua medicamenta componere,                                | 11.  |
| De iis qui Secreta habere dicuntur,                                     | 12.  |
| De iis qui creduntur esse fortunati,                                    | 13.  |
| De iis qui creduntur experti,   | 14.  |
| De multis qui Urinas inspiciunt, pulsus tangunt, catharica præscribunt, | 15.  |
| De iis qui facilem luis Venereæ curationem pollicentur.                 | 16.  |

## LIBER II.

|  | Cap. |
|--|------|
| <b>D</b> E fallaci urinarum Iudicio,                               | I.   |
| Sexum & graviditatem ex urina non posse cognosci,                  | 2.   |
| Solutio rationum Herculis Saxonie, quæ Onroscopia favere videntur. | 3.   |
|  | Vri. |

# I N D E X.

|   |     |
|---|-----|
| <i>Vrinam in morbis turbari, quod Angeli dicunt breake, non semper esse bonum signum,</i> | 4.  |
| <i>Consumptionem ex urina non posse cognosci,</i>   | 5.  |
| <i>De Consumptione,</i>   | 6.  |
| <i>De Peste an sit contagiosa,</i>  | 7.  |
| <i>An liceat tempore pestis fugere.</i>   | 8.  |
| <i>Quodnam mortis genus artis Medicæ ope possit præcaveri,</i>                            | 9.  |
| <i>An possint febres intermittentes, quas Agues populus vocat, curari,</i>                | 10. |
| <i>Ex calore volæ manuum hepatis calorem non posse cognosci,</i>                          | 11. |
| <i>De iis qui jecur calidum, ventriculum frigidum accusant,</i>                           | 12. |
| <i>Maritum loco uxoris gravida non agrotare,</i>  | 13. |
| <i>An Medici peregrini incolarum alterius regionis temperiem cognoscere possint,</i>      | 14. |
| <i>De iis qui morbos ferme omnes ad refrigerationem referunt.</i>                         | 15. |

## L I B E R III.

Cap.

|   |    |
|---|----|
| <b>D</b> <i>E bonitate aquarum,</i>                         | 1. |
| <i>Ægrorū lintea sæpius esse permutanda,</i>                | 2. |
| <i>De libro dietetico Lestii,</i>                           | 3. |
| <i>Ægris non plenum, sed tenuem victum convenire,</i>       | 4. |
| <i>De qualitate ciborum in ægris,</i>                       | 5. |
| <i>De tempore utendi cibis,</i>                             | 6. |
| <i>De potu dicto Posseto.</i>                               | 7. |
| <i>Insulum galli veteris ad nutritionem malè præscribi,</i> | 8. |

*ANRUM*



# I N D E X.

- Aurum frustra incoqui jussulis tabidorum.* 9.  
*Lac cum aqua permistum tabidis convenire,* 10.  
*Falsam esse illud proverbium, Lac à jecore esse*  
*abluendum,* 11.  
*Cerevisiam fortiorem non esse manè à jejunis*  
*bibendam,* 12.  
*Malè ad coctionem promovendam post crassio-*  
*res cibos aquas stillatitias assumi,* 13.  
*Obstetrices malè puerperis nil nisi calidos potus*  
*dare,* 14.  
*Errores duo circa Nutricum electionem,* 15.  
*Pueris generosos potus malè concedi,* 16.  
*Pueris cibos solidos ante dentium eruptionem*  
*non esse dandos,* 17.  
*Licere sanitatis causa largius bibere,* 18.  
*Pannos rubicundi caloris ad variolarum excre-*  
*tionem non esse aliis preferendos,* 19.  
*Quod malè plurimi laboribus incipientem mor-*  
*bum abigere student.* 20.

## L I B E R IV.

Cap.

- D***Eiis qui remedia Chymica contemnunt,* 1.  
*Metallicorū usum nō esse improbandū,* 2.  
*De iis qui remediis Chymicis nimium tribuūt,* 3.  
*Non esse mutanda remedia etiam si curatio sta-*  
*tim non succedat,* 4.  
*De iis qui remedia omnia rejiciunt, si statim*  
*non curentur,* 5.  
*Remedia ob ingritudinem non esse statim re-*  
*jicienda,* 6.  
*An domi nata remedia cuilibet regioni sufficere*  
*possint,*

possint,

De iis qui vena sectionem, & purgationem re-  
formidant, ne assuescant, 8.Ad vena Sectionem & purgationem Astro-  
rum rationem non esse habendam, 9.De ridiculis Calendariographorum observatio-  
nibus Medicinam spectantibus, 10.

Diebus Canicularibus purgationem esse licitam, 11.

Purgationes saepius esse repetendas, 12.

Non esse Pilulis purgantibus utendum statim à  
cœnâ, 13.Medicas Potiones non solum calidas, sed etiam  
frigidas sumi posse, 14.Die Purgationis non esse piaculum frigido potu  
uti, 15.De iis qui in solo veris principio purgari vo-  
lunt, 16.Purgationem non esse rejiciendam, etiamsi ager  
cibos non sumat, 17.Non esse malè sentiendū de purgatione, etiamsi  
vomitu interdum rejiciatur, 18.Etiamsi alvus fluat, non esse formidandam pur-  
gationem, 19.

Clysterum usum esse innoxium, 20.

Clysteres minùs cōmodè infundi per vesicas, 21.

Post vomitoria nō esse statim possetis usēdū, 22.

Venam in senibus secari posse, 23.

Venarum in brachio delectum esse inutilem, 24.

Minùs commodè sanguinis quantitatem ponde-  
ribus potiùs quàm mensuris æstimari, 25.Post vena Sectionem malè somnum & potum  
prohiberi, 26.

|   |     |
|---|-----|
| <i>Gravidis vena sectionem &amp; purgationem non esse noxiam,</i>             | 27. |
| <i>Puerperis etiam remedia convenire,</i>                                     | 28. |
| <i>Mercurium innoxie assumi posse,</i>  | 29. |
| <i>Mercurium etiam absque præparatione esse innoxium,</i>                     | 30. |
| <i>De suffitu Tabaci,</i>   | 31. |
| <i>De recto usu Tabaci,</i>   | 32. |
| <i>Fumum Tabaci non pervadere ad Cerebrum,</i>                                | 33. |
| <i>An fumus Tabaci præservet à Peste,</i>                                     | 34. |
| <i>De Importuno Cardiacorum usu,</i>  | 35. |
| <i>De lapide BeZaar,</i>  | 36. |
| <i>De temperie &amp; dosi lapidis BeZaar,</i>                                 | 37. |
| <i>De Cornu Unicornis,</i>  | 38. |
| <i>De quibusdam aquis distillatis ad febres curandas molè institutis,</i>     | 39. |
| <i>Iulepos magna dosi esse exhibendos.</i>                                    | 40. |
| <i>Calculus Vesicae remediis ore sumptis non posse dissolvi.</i>              | 41. |
| <i>Lambricos in febris non esse statim occidendos,</i>                        | 42. |
| <i>Ad sistendos mulierum fluxus Cinnamomum malè præscribi,</i>                | 43. |
| <i>Opium rectè præparatum non esse formidandum,</i>                           | 44. |
| <i>De Somniferis capiti applicatis,</i>                                       | 45. |
| <i>Fotus per vesicas esse minùs efficaces,</i>                                | 46. |
| <i>De applicatione Catulorum &amp; Columbarum plantis pedum,</i>              | 47. |
| <i>De unguento Armario,</i>   | 48. |
| <i>De curatione Strumarum quæ dicitur fieri per contactum septimi factus.</i> | 49. |
|   | DE  |

# DE VULGI ERRORIBUS

LIBER PRIMUS,

Qui Medicos spectat.

C A P. I.

*De Medicis in genere.*

**E**U igitur ( ut in Præfatione diximus ) tantus sit Medicorum numerus, explicandum primum est, quibus Medicinam propriè loquendo, facere liceat. Eam enim faciunt Medici in Academiis instituti, ipsorum famuli, Ministri, Agyrtæ, circumforanei, mulieres quæ chirurgiam facere dicuntur; de quorum singulis quædam dicenda sunt.

Medicum vult *Hippocrates* esse virum probum, solertem, ingeniosum; & *Libro de Arte* vult esse à pueritiâ institutum, in loco idoneo, & convenienti, laboris amantem. *Galenus* peculiari libro docuit debere esse Philosophum, scribitque *Hippocrat. ἵατρος φιλόσοφος, ἰσχύειος*. Scribit *Aristoteles* nō debere in Geometriâ desiderari cognitionem alterius disciplinæ quæ aliena est à Geometriâ. Sic pariter à Medico tantum debet expectari exquisita artis suæ cognitio. Vnde multiplex populi error deprehenditur. Primo quod Medicum vocent interdum Medicum doctum & eruditum, \* scilicet eum qui forsan Latinè loqui, aut Græcè quædam intelligere potest, non autem eum qui probè arte suâ instructus est, atque id etiam sufficere

\* *A great Scholler.*

A

quidam

quidam putant ad sustinendam medici personam. Et novi nuper quendam, qui cum se medicum profiteretur, quamvis levissimè eà disciplina tinctus foret, talis tamen habitus est ob quandam latinæ linguæ cognitionem. Verum inter hæc maxima est differentia. morbos enim rectè dixit Celsus Latinorum medicorum princeps, eloquentia non curari. Quamvis igitur linguarum cognitio, cujus ambitu pars maxima vulgi totam complectitur eruditionem, aditum faciat ad disciplinas omnes percipiendas, illæ tamen non nisi novo labore, cura & industria acquiruntur. Propter doctum medicum illum deinceps populus censeat, non qui prædicta, aut aliam à medicina disciplinam quandam noverit, sed qui benè præceptis medicis institutus, probè in Galeni, & Hippocratis lectione versatus, morborum diagnosin, prognosin, & therapiam probè callet. Nam qui hæc aut omnino non novit, aut parcè tantum ac tenuiter, probus medicus vix haberi potest. At quotus quisque ille est qui de his iudicabit? non pauci, namque sunt famam inter populum aliquam adepti, & quodam eruditionis nomine insignes, qui *Galenum & Hippocratem* legerunt nunquam, parum admodum student, nec etiam quando maximè licet, novitios quosdam scriptores vix lectione dignos sectantur. Sed quoniam plurimi etiam sunt probi medici diligentes, docti, laboriosi, plura non addemus. Rectè igitur scribit Æschylus Poëta *οχησιμ' ἰδὼς, ἔχ' ὁ πῶμα' ἰδὼς σφῶός*. Qui utilia, non qui multa novit, sapit.

## CAP. II.

*De Doctoribus Medicis.*

**G**alenus duplex facit medicorum ignorantium genus, unum illorum qui merè empirici sunt, aliud eorum qui famam aliquam sapientiæ habere volunt, & tamen eà probè non sunt instructi: Tales sunt quam plurimi, qui ut  
 majo-

maiores sibi auctoritatem concilient, honores Academicorum, quos gradus vocant, levi pretio redimunt, nihilò tamen inde redeunt doctiores. Universitatum autem approbationes sapienter à maioribus institutæ; elegantes sunt quidem & necessariae, sed deberent diligentius observari. At jam omnia negliguntur, nam quibuslibet quantumvis sciolis gradus exhibetur doctoratus, unde fit ut ex quibusdam Academicis redeant Doctores parum docti, nihil minùs quam apti ad medicinam aut docendam, aut faciendam. Paucaeque supersunt Academiae quas abusus ille non occupavit. Vnde in Italia & Gallia magnam auctoritatem non conciliat Doctoratus, nec licet in splendidis civitatibus cuiquam medicinam facere, quantumvis doctori, qui non iterum prius fuerit à Civitatis magistratibus approbatus, examinantibus medicis, quorum etiam quidam forsitan non sunt doctores. Pariter qui in una Academia Doctor est, in alia medicinam facere nequit, nisi iterum in eadem doctoratum adipiscatur. Vnde rectè & prudenter fuit idem constitutum Londini, ne ullus Academicorum Doctor illic artem suam exerceat, antequam à Societate medicorum novis examibus approbetur. In plurimis enim Academicis etsi medicina satis diligenter doceatur, in gradibus tamen istis conferendis sunt negligentiores, & nemini fermè eos denegant. Vnde optimum foret, si nemini extra propriam regionem hos gradus & honores assequi liceret, ut eruditionis suae testes habere possit populares suos, quos forsitan postea curaturus est, sicut & idem fit in Gallia. Andreas Laurentius insignis ille & elegans Anatomicus interpres, cum regio diplomate Monspelii medicinam docendi munus obtinisset, admitti tamen non potuit, donec iterum factus fuisset primum medicinae Baccalaureus, dein Licentiat, postmodum Doctor, & toties iterum de medicina respondisset, quoties ex Academia illius insti-

instituto opus fuit. Pariter Burdigalæ, ubi educatus fui, non licuit *Iulio Casari Scaligero* viro tam docto & erudito, commorari, quod nollet ab illius urbis Medicis examinari. Noluit autem, non quòd urbis institutum improbaret, quale in tota Gallia observatur, sed quia famam suam quodlibetariæ quæstioni Iunioris forsitan Medici, noluit exponere, quâ de re mutuas inter ipsum & Manialdum doctissimum Medicum Burdigalensem epistolas habebat Manialdus filius ejusdem postea urbis Medicus senior. Hæc sunt, quæ quoniam plurimi non observant, statim cuilibet se doctorem proficienti, tam leviter & facile credunt. Viro quidem docto ejusmodi honores gratiam quandam addunt, doctrinam tamen non tribuunt. Non solet enim qui hodie Doctor non est, cras scilicet futurus repente propterea fieri doctior, neque si eo gradu abstineat, fiet Doctore quodam indoctior. Sicut igitur istas Academiæ constitutiones non improbo, sed veneror; abusus tamen tam multos probare nemo potest.

Plurimi enim medicastri hujus artis ignari aut eâ levissimè imbuti, empto in peregrinis Academiis Doctoris titulo, aut saltem se emisse simulant, & sic e mentito honore superbi domum redeunt ut civium sanguine, & divitiis saginentur. In genere autem notandum erit, majus impendere ægrotantibus periculum, ab omnibus Medicinam profitentibus, qui eâ leviter sunt imbuti, quam ab iis qui nihil omnino nōrunt. Fiunt enim audaces, garruli, melioribus obgannunt, resistunt, atque illis sese præferre, aut saltem æquare gestiunt. Observavi in quibusdam hanc malam consuetudinem, ut quicquid probè Medicus quispiam dixerit, contradicant, ut famam aliquam ex alieni nominis ruinâ possint aucupari.

## CAP. III.

*De Medicorum famulis, & Pharmacopœis  
Medicinam facientibus.*

**F**Requens satis hic est error, ut qui Medicorum fuerunt famuli, quamvis nullis disciplinis imbuti, post mortem Domini, aut etiam antea sese accingant ad Medicinæ praxin, quales ego non paucos novi, & aliquid etiam nosse creduntur, quia per annos plures Medico inserviērunt, præscriptiones illius, quas notas & receptas vocant, descripserunt, successum observârunt. Idem dicendum est, de quibusdam Pharmacopœis, quibus Medicus aliquis diu usus est: verum hæc non sufficiunt ad medendum, neque potest ars Medica tam facili labore addisci. Nam Hippocrates in eo qui medicus esse cupit, requirit præter promptum ingenium, institutionem à puero, locum studiis aptum, laborem, disciplinam, & tempus idoneum, & alia qui illis desunt, tum quasi medicum sectari sufficiat ad discendam Medicinam, aut quasi medici illi quibus famulantur, sint præstantiores aliis, qui scriptis suam eruditionem, & experientiam posteris rati commendarunt. Non quod absurdum putem pauperem studiosum Medico famulari, & ab eo discere quicquid potest, sed quod absurdum sit nebulones quosdam & mancipia temerè & audacter Dominos suos imitari: nam cum nemo adeo exactus Medicus sit, cui plurima non desint ad eam perfectionem, quæ Medico necessaria foret, qui poterunt prædicti tam facili fieri Medici? Et tamen, sicut alii plurimi, feruntur à populo, & laudantur.



## CAP. IV.

*De Theologis Medicinam facientibus.*

**I**Nter Ecclesiastici ordinis homines, qui se totos Deo & Ecclesiæ utilitati consecrarunt, sat multi reperiuntur, qui satis seriò, & avidè, & cum maximo lucro, non solum animarum, sed etiam corporum curam habent, & quantum possunt corporeis morbis medentur, etiam ubi Medici sunt quam plurimi. Scio id factum non probari à quàm plurimis medicorum, præsertim illis qui omnes lucro inhiant: sed cum plurimi levioris notæ Medici vix alios se meliores patienter ferant, non mirum quoque si minus probent istud religiosorum virorum institutum. Verumptamen illud non est novum, siquidem Marsilius Ficinus, magnus ille Platonis interpres, medicus simul fuit & Sacerdos, atque id licere probat, quia ad pium Sacerdotem pertinent singularis charitatis officia: Quare qui sacerdotio jungit Medicinam, efficit, ut mens sana in corpore sano stabuletur. Quod si in sacerdote requiritur hodie, non solum Theologiæ, sed & aliarum disciplinarum cognitio, cur excipietur Medicina? Quot sunt qui spinosas legum quæstiones probè norunt, quidni etiam Medicinam? Objiciet quispiam τὴς ἐκ τᾶυτᾶ ἰατρῆς; Videtur enim ars medica tam salebrosa, tam difficilis, & longa, ut non possit ab ullo homine ita probè addisci, quin totum illum postulet, & rapiat ad sese: Quare damnandus videtur Theologus, qui relicta & neglecta nobiliori disciplina, cui nomen dedit, & indelebilem adeptus est characterem, sese alteri addicit tam lubricæ, tam difficili, tam inconstanti: necesse enim est, ut alterutrius disciplinæ sufficiens ipsis cognitio desit. Verum plurima habent illi quibus eximiam illam erga proximos charitatem, si quam habent, tueri possunt. Et primò sanatio & morborum depulsio contraria non

non est, nec adversa studio Theologico, & prædicationi verbi divini; Nam & Apostoli, & primi Christiani morbos sanabant, & etiam concionabantur. Quamvis enim miraculosa fuerit ejusmodi sanandi ratio, tamen colligere possumus morborum depulsionem ex sese & natura sua non repugnare officio Ecclesiastico, sed probe & amicè cum eo consentire. Si ergo finem assequi licet, licebit pariter & mediis ad finem tendentibus uti, qualia sunt remedia, quæ Deus ad hunc usum creavit. Sed forsan dicet quispiam, sanationem ipsam ex parte rei non repugnare officio Theologorum, sed tantum, quoniam supponit cognitionem alterius disciplinæ, cui simul & Theologiæ incumbere non est facile. Verum respondere poterunt, non esse eadem omnium ingenia, nec eadem Dei dona. Quosdam forsan ingenio promptos, memoria valentes, & laborum amantes, utrique arti posse cum fructu maximo animum adhibere. Imò hodie pauci sunt qui Theologiæ studio alteram quandam non addiderint disciplinam, ad quam ipsorum genius inclinabat. Quosdam detinet mathematicæ studium, aut Astrologiæ, aut legum, aut aliud simile, neque unquam quisquam in illis reprehendit. Possibilemque esse utriusque disciplinæ cognitionem, ostendit ipsorum medicorum exemplum, quorum plurimi parum student, & tamen eo ipso quod medici creduntur, studioso Theologo præferri cupiunt, sed qua ratione ignotum est: nam si tempus illud quod medicaster forsan quidam miserè prodigit, aut nihil agendo, aut malè agendo, aut ludendo, Presbyter in studio medicinæ impendit, quid prohibet illum tandem futurum medicinæ peritum? Nec est novum, quosdam medicos etiam Theologiæ studio dilectari, & sanè rationem non video quare nostro hoc seculo, ubi omnia ferè corrumpit abusus, non possint quidam Theologi quibusdam medicastris esse doctiores, cum

plurimi Medicorum, aut saltem qui tales haberi volunt, adeo leviter studio Medico incumbant, ut facile sit levi labore plura in Medicina nosse, quam ipsi norunt. Refert Volaterranus, Trusianum dictum plusquam commentatorem, cujus admirabile & ingeniosissimum extat in artem Galeni commentum, factum fuisse Monachum Ordinis Carthusianorum; Si igitur quispiam Theologus laboris patiens, & ingeniosus tantam sibi Medicinæ cognitionem comparavit, ut eâ possit uti, quare ipsam bona conscientia non exercebit? Relinquendum igitur est ipforum conscientia num artem hanc probè calleant, ipsi viderint. Benedictus Arrias Montanus referente Arceo Chirurgiam docebat in Hispania: Verum paucos Arria Montano similes fert hæc regio. Neque hæcenus ullum Ministrum (multos autem novi) Medicinam facientem videre mihi contigit, qui eam probè nosset, vixque etiam forsan decimam partem, ne gravius quid dicam, eorum quæ Medicum scire necesse est.

Quamvis igitur possibilis sit utriusque disciplinæ cognitio, rarò tamen ea contingit, & Medicinæ praxis à studio Theologico animum prorsus avertit, studium pariter Theologicum præfertim, in prædicaturis, medicinæ exercitium interturbat, unde probabilius multò est non posse salva conscientia exerceri Medicinam ab ullo Theologo, qui curam habet animarum. Neque exempla citata me commovent. Marsilius Ficinus ingeniosus quidem fuit, sed πολυπράγμων, neque ipsius libelli de medicina, magnam in eâ disciplina cognitionem arguunt, magisque circa nugæ & somnia Platoniorum occupatus fuisse videtur, quam circa seria: Trusianum autem tadium cœpit Medicæ praxeos, eamque prorsus abiecit, & cucullum induit. Sic & Chirurgiam reliquit, nec eam fecit amplius Arrias Montanus: Et clara est hæc de re decreti constitutio variis in locis; Secunda

cunda parte, causa 21. Quæst. 3. & dist. 88. In genere omnia negotia prohibet Ecclesiasticis, maximè lucri causâ, quæ à sacris officiis avertunt. Hi qui in Ecclesia Domini ad ordinationem clericam promouentur, in nullo ab administratione divina avocentur, nec molestiis, & negotiis secularibus avocentur, sed die & nocte cœlestibus rebus, & spiritualibus inserviant, & rationē paulò ante reddit, quia nemo militans Deo; implicat se negotiis secularibus. Et alibi, ista opera exhibeant sibi invicem vacantes Laici. Sed pariter quod medicinam spectat. Ext. tit. 50. lib. 3. Decr. c. 3. Non magnopere antiqui hostis Invidia, &c. Inde nimirum est, quod in angelum lucis se solito more transfigurans, sub obtentu languentium fratrum consulendi corporibus, & ecclesiastica negotia fidelius, pertractandi, regulares quosdam ad legendas leges, & confectioes Physicales ponderandas, è claustris suis educit. Vnde ne occasione scientia, spirituales viri, mundanis rursus actionibus involvantur, statuimus, ut nulli omnino post votum religionis, & post factam in aliquo loco religiosam professionem, ad physicam, legesve mundanas legendas exire permittantur. Si verò exierint, & ad claustrum suum infra duorum mensium spatium nō redierint, sicut excommunicati ab omnibus evitentur, &c. Vbi docet non esse sub obtentu charitatis & pietatis legendam à religiosis medicinam, tum ab hoste generis humani, scilicet à Diabolo proficisci, si quando religiosi operam dant medicinæ. Clarius est decretum Concilii Turonensis, relatum eodem loco c. 10. Contrareligiosas personas de claustris exeuntes ad audiendum leges, vel physicam, Alexander prædecessor, noster olim statuit in Concilio Turonensi, ut nisi intra duorum mensium spatium ad claustrum redierint, sicut excommunicati ab omnibus evitentur, & in nullâ causa, si patrocinium prestare voluerint, audiantur. Reversi autem in choro, & mensa, & capitulo & ceteris, ultimi fratrum existant, & nisi fortè ex misericordia sedis Apostolicæ, totius spem promotionis amittant. Verum quia nonnulli ex talibus, propter quendam

*opinionēs diversas, excusationis aliquid assumebant. Nos volentes ut de cetero ipso facto sententiam excommunicationis incurrant, districte precipiendo mandamus, quatenus tam à Dioecesani, & capitulis ipsorum, quàm à ceteris Episcopis, in quorum dioecesibus ejusmodi student, tales excommunicati, prædictis pœnis obnoxii publicè pronuntientur. Quia verò Theologia studium cupimus ampliari, ut dilatato sui tētorii loco, funiculos suos faciat longiores, ut sit fides Catholica circumcincta muro inexpugnabili bellatorum, quibus resistere valeat ascendentibus ex adverso, ad Archidiaconos, decanos, plebanos, præpositos, cantores, & alios clericos personatus habentes, nec non presbyteros ( nisi ab his infra spatium præscriptum destiterint ) hoc extendi volumus, & mandamus, & appellatione postposita firmiter observari: Et cap. 9. prohibetur. Ne ullam Chirurgia artem subdiaconus, Diaconus, vel sacerdos exerceat, quæ ad uestitionem, vel incisionem inducit, quæ tamen facillima pars est Chirurgiæ, ut venam secare, &c. Quod si hæc faciliora prohibet, multo difficiliora haud dubiè complectitur. Sed nostri ministri medicinam audaciùs quàm par est facientes, & sub fucata pietatis lenocinio populo imponentes, negligent forsitan veteris Ecclesiæ censuram: Quapropter Dei judicio illos relinquo, cui de omnibus perperam dictis factisve & rationem olim sunt reddituri.*

## CAP. V.

*De mulieribus Medicinam & Chirurgiam facientibus.*

**P**Opuli, vel saltem ordinarios plurimorum errores explicaturus, lubenter Ecclesiasticis quàm potui favi maximè. sic etiam mulieribus idem faciendum putavi. Nec res est adeo magni momenti: Nec enim medicus quispiam alicujus notæ aut Chirurgus pejus de scœminis sentire debet, quæ ad curam & virorum obsequium nata sunt, si omnem suam in generis humani sub-

subsidium operam impendant, namque & lectum probe sternere, jussula, colatitia, hordea, amygdalata probe decoquere sciunt, & plurima ad varios morbos remedia norunt. Sed maximè circa Chirurgiam sunt occupatæ, illamque chirurgiæ partem, quæ tumores & ulcera curat. Verum tamen curatio ulcerum, & vulnerum maximam artem requirit, ut prius cognoscantur omnes eorum differentia, an scilicet simplex sit vulnus, corrodens, contusum, cum ossis carie, sordidum, nomodes, fistulosum, &c. Deinde remediorum & circumstantiarum in curando varietas, artem reddit fallacem, incertam, & conjecturalem; Quæ omnia cum non nisi à perito medico cognosci possint, non debent mulieres temerè & audacter hisce rebus se immiscere. Demum remedia solent ex libris quibusdam vernaculè scriptis depromere, aut etiam ab aliis communicatis uti, & tunc se rara ad omnes morbos remedia habere putant. Docet tamen *Galenus in libro methodi*, varianda esse remedia ratione personarum, loci, partis affectæ, & aliarum circumstantiarum: nam in quibusdam remedium detergens erit suppuratorium, ut thus, in aliis idem remedium carnem generabit, & dat *Galenus* exemplum chirurgi qui in ulcere quodam, cum magnam putrefactionem videret, quotidie applicabat valentius detergens, ut æruginem; & quò sapius id faciebat, eò major putrefactio succedebat, quia fortius erat morbo remedium. Idem ulcus in crure, aliud remedium postulat quam in pectore, aut alia parte, ob variam partium naturam. Si ergo omnes ulcerum differentias & causas probe norunt, tum etiam rectam methodum, & rectum usum suppurantium, detergentium, sarcoticorum & epuloticorum, & variandi rationem secundum naturam partium, ætatum, temperamentorum, & reliquarum circumstantiarum, concedam

facile, & credam posse illas hanc artem exercere. Verum cum prædicta non nisi labore magno & studio addiscantur, vix adduci possum ut credam posse illas aut intelligere, aut præstare quod pollicentur. Sed quoniam parum sollicitus esse debet Medicus, quinam & quot sint qui Medicinam faciunt, de mulieribus nihil amplius dicemus, sufficit populo errores suos indicasse. Ideo pauca tantum de reliquis dicemus.

## CAP. VI.

*De Agyrtis.*

**E**st aliud hominum genus ad ludibrium artis natum, qui sese empiricos vocant, Angli & Itali Montinbancos, Galli Charlatanos, aut cæretanos, quorum unus Angliam nutricem optimam suam nuncupabat. Et mirum est cum plurimi in medicorum electione admodum cauti sint, ut si medicus quispiam alicubi sedem fixerit, non nisi post longum tempus ipsi sese credere audeant accedenti tamen Montinbanco per aliquot hebdomades commoratur, statim confidunt, & quod sæpe observavi infimæ notæ viri qui paupertatem suam, & rei familiaris tenuitatem medicis obijciunt; pecuniæ interdum satis magnam quantitatem istis Agyrtis obtrudunt. Notandum *primò* in reliquis orbis terrarum partibus, esse viros nullius notæ, & quantumvis distendant nullius in Republica honoris esse capaces. Hic autem dum peragrant regionem, in satis magno sunt honore, medicis ipsis interdum æquantur; & quoddam genus medicorum esse creduntur. *Secundo* notandum vocare sese Empiricos, quod tamen falsum est. Empirici olim erant viri valde docti, & remediorum periti, quos *Galenus* noster alicubi præceptores suos agnoscit, & non tantum remedia, sed etiam præcepta medica probè norant, morborum signa diagnostica, &

pro-

prognostica, methodum quandam aut potius ordinem in medendo sequebantur, sed nec causas morborum nec præceptionum medicarum rationem inquirebant. Sufficiebat illis ea fuisse olim aut à majoribus, aut à seipsis observata. Tales Empiricos si haberemus ferri illi, possent. Nec enim medici empiriam adversantur, (cum medicina dogmatica illam complectatur.) Sed præterea addiderunt rationem, & causarum cognitionem, non ut absolutè mederi, sed ut certius mederi possint. Nostri autem Agyrtæ nunc faciunt histrioniam, & multum abest ut sint Empirici, cum præter tria quatuorve remedia, nihil norint. Si autem ad lepram, podagram, quartanam febrem, aliosve graves affectus remedia haberent, viso successu, experimenta laudaremus. Verum omnes ad unum in Italia, Gallia, Anglia, tria tantum habent remedium genera, Antidotum ad venena, balsamum ad vulnera, unguentum ad ambusta, quibus interdum addunt globulum odoratum. Domi autem empta à Pharmacopœis vulgaria remedia purgantia, satis magno pretio vendunt. De istis autem remediis quædam dicemus, si prius monuero, me ab illorum numero eximere chirurgos operarios, qui calculum secant, quos Hippocrates vocat *σπυγγῆτας*, tum qui cataractam deprimunt, tum qui herniam secant: sunt enim legitimi artifices, quamvis Agyrtarum qui Angliam circum-eunt, quidam hæc etiam audeant.

## CAP. VII.

*De Antidoto Agyrtarum.*

**P**Ræcipuum & laudatissimum illorum remedium est ad venena, de quo mira pollicentur. Verum illius remedii primò inutilitatem demonstramus, secundò abusum, tertio facilitatem.

Inutilitas in eo consistit, quod omnium morborum qui humano corpori accidunt, rarissimi



apud nos sunt morbi ex veneno aut admoto, aut assumpto geniti, unde minor illius remedii necessitas adest: nam si ad magis familiares morbos haberent pharmaca, ut lepram & arthritidem, tolerari possent. Deinde nulla est Medicinæ pars, quæ remediis magis abundet, quam hæc quæ de venenis agit. Si quis enim libros legerit eorum qui remediorum descriptiones collegerunt, quantum illorum copiam & varietatem inveniet, apud VVeckerum, Andernacum & alios, qui de venenis tractatus ediderunt. Sed præterea nullum est remedium quod possit omnibus venenis adversari. Imò dico haustum lactis vaccini adversus arsenicum, & sublimatum, quæ sunt venena nobis magis formidanda, plus præstare quàm omnia Agyrtarum antidota. Prostant etiam in Officinis Pharmacopularum multò præstantiora, ut antiquissima illa & omnibus seculis probatissima theriaca Andromachi, tum mithridatium Damocratis, antidotus Matthioli, quæ omnia fermè simplicia complectitur quæ huic usui inserviunt. Demum facile est Medico cuilibet materiam Medicam, & artem componendi medicamenta propè cognoscenti, similia statim præscribere. Nam notandum non desumi ea medicamenta ex iis, quæ singulorum venenorum generibus adversantur, nam neque lac, nec butyrum, nec oleum, aut alia quæ arsenico & septicis adversantur, subeunt illorum antidoton, sed ex materia medica cordialium desumuntur: scilicet volunt solummodo cor tueri adversus malignitatem pharmaci, non autem ipsius pharmaci vim restringere. Sicut pestis venenum scribunt doctissimi quidam Medici ejus esse naturæ, ut illius proprium antidoton nondum fuerit cognitum. Vnde quæcunque adversus pestilens istud venenum præscribuntur, solum cor roborant adversus causæ morbificæ vim. Vnde falsitas antidoti Agyrtarum deprehendi potest, & non posse esse universalem, ut ipsi prædicant.

Idem

Idem ex pretio quispiam suspicari posset. Quomodo enim impensas comitum suorum, & Itineris, quæ sunt satis grandes, possent illi sustinere si Antidotus esset alicujus pretii, quam cum unguento, & balsamo, duodecim tantum denariis vendunt ut sæpius vidi. Ut autem remedii efficacia probetur, (hic enim fraus maxima est, possunt enim sese adversus veneni vim antidotis officinarum præmunire) ista cautio foret notanda. Serve-  
tur canis absque cibo & potu per noctem, neque lac ipsi manè aut quidquam pingue offeratur, quod veneni vim frangat, sed detur arsenicum, eoque sumpto, antidoti quantum libuerit Agyrtæ, sumat, sic probabitur remedii efficacia. Idem de hominibus dicendum: nam in seipsis experiuntur venena, eaque coram populo assument. Si autem cum prædictis cautionibus sumpserint, tunc laudabimus effectum viso remedium. Verum in scenam prodeant, ut plurimum post meridiem, post cibum, & usum pinguium, lenientium, lactis, & forsan etiam antidotorum. Omnis enim usus ciborum, & præcipue pinguium, & lactis, roborat stomachum, venenum debilitat, unde non mirum si tunc audacius illud assumant, quod post parvam temporis moram domi evomunt. Sic omnia redeunt ad nihilum.

Est aliud ipsorum experimentum, quod populus valde admiratur. Viperam Agyrta pectori circa mammam sinistram applicabit, sumpta antidoto nihil mali sentiet. Ad id stupet populus. sola narratio mira est. Fraus autem hic varia est. *Primo* quia ut docet Matthiolus, habent isti homines varias artes cicurandi aspides & serpentes suos. *Secundo* sunt in Anglia viperæ ob temperiem aëris, minus venenatæ quàm in calidis regionibus. Unde Galenus valè curat in compositione theriaca, ne summa ætate quæ apud illos calidissima est, sumantur viperæ, sunt enim tunc venenatissimæ & dipsades multò minùs venenatæ erunt  
apud

apud nos; quibus summa ætas verno tempore Italorum non respondet. Tertiò male credit populus veneni vim citius communicari cordi, si peccatori venenatum animal applicetur, ob cordis viciniam. Verùm id falsum est, nam venenum communicatur per venas, & arterias, ut patet quod eorum qui à vipera demorsi fuerunt, sanguis totus in virorem commutatur. Cum igitur mammarum venæ sint admodum exiles, & non nisi per varios amfractus longissimos ad cor pervenire possint, Dico, estque probabilius, si pedibus qui à corde remotissimi sunt, vipera applicetur, citius inficiet cor quam si mammis, citius autem si brachiis. Mihi nunc in mentem venit historia Cleopatrar. *Petrus Victorius, lib. 4. variar. Lectio.* reprehendit pictores, qui pingunt Cleopatram apponentem aspidem mammis, cum constet ex Plutarcho in vitâ Antonii, & Plinio apposuisse brachiis. Refert Zonaras nullum mortis signum apparuisse præter vibices duas in brachio. Cæsar quoque in ipsius statua quam in triumpho ducebat, apposuit aspidem brachio. Illic enim sunt venæ & arteriæ magnæ quæ cordi venenum citò & recta via communicant, cum in mammis sint vasa exilia, quæ tantum per varias ambages ad cor ducunt. Ideo in D. Paulo miraculum paulò majus fuit, quod nihil mali senserit ex vipera quæ brachium invasit, quam si invasisset pectus, dedisset enim inducias satis longas ad sumendum antidotum quoddam, quod in brachio non potuisset.

## CAP. VII.

*De Balsamo & Unguento Agyrtarum.*

**V**identur etiam mira præstare in curandis vulncribus, ope balsami sui; Vbi notandum, vulncria illos curare simplicia, quibus sola unio sufficit absque futura, unde in vetustis vulncribus irritum est ejusmodi balsamum. Cura autem

autem hæc non est valdè difficilis ; Sæpe enim ad ejusmodi simplicia & recentia vulnera, sola deligatura sufficit, natura, sanguine intermedio , tanquam balsamo, partes divisas uniente. Plura quoque sunt apud authores remedia illius naturæ ; quorum duo valdè bona describuntur à Riolano. Vnum describitur etiam à Fabritio ab Aquapendente, quæ apud illos videri possunt. Ut sciat populus nihil esse in ejusmodi remediis admirabile, nihil quod Medici & Chirurgi multò melius facere non possint.

Vnguentum præterea ipsi habent ad ambusta, ut plurimum ex pomata, aut butyro loto in aceto cum sale Saturni. Sed quoniam aliqui eo usque procedunt, ut fervente oleo aut plumbo liquefacto manus suas abluant, de eo aliquid dicendum, ne populus credat Medicis hæc etiam ignota esse. Albertus Magnus varios id faciendi modos tradit ; *Primò sumit glutinis piscis, & alumin. Anà partes aquales. Fundantur super acetum vini, line, inquit, cum hoc linimento, & non comburetur igne. Secundo, Sume calcem dissolutam cum aqua fabar. Et aliquantulum Mandrag. & Althea. Misce benè, unge palmam tuam, & exsiccetur, adeo valet ut quis tangere ignem possit, Tertiò. Recipe succum Althea, album ovi, semen psylli, calcem, & succum raphani. Misce cum albo ovi, & hac confectio illine manum tuam, non nocebit ignis ullo modo, non etiam si sulphur vivum super manū tuam accendas. Cardanus refert, si quispiam urina propria lavet manus, ignis non nocebit. Multaque sunt alia ad id remedia, quæ substantia lenta & frigida perfundunt manus, ut non possit oleum aut plumbum, aut aliquid ardens facere impressionē, sed statim delabitur, aliàs si permaneret, haud dubiè tandem combureret. Addamus hic Andreæ Laurentii Medici insignis auctoritatem, *Lib. 1. de strumib. cap. 4. Qui carbonēs ignitos. inquit, innoxie tangunt, manus primum succis quibusdam illinunt, quibus ab igne per aliquod tempus se timentur.**

Ovi candido, ait Plinius, vis tanta est ut lignum ovo perfusum non ardeat; ligna alumine illita invicta ignibus manent, cujus rei experimentum dedit Archelaus Mithridatis praefectus, in lignea turri contra Syllam, quam frustra comburere conatus est. Succum mucilagenosum altheae, malvae, portulacae, mercurialis, contra ignem valent. Propterea scripsit Albertus, si quis succo altheae, albumine ovi, alumine ex aceto oblinat manus, posse ignem sine laesione pertractare. Argento vivo aceto albumine ovi restincto, si quis manus abluerit, ab igne non laeditur, qui verò venena in conspectu, & oculis plebecula hauriunt, oleo prius & butyro interiores ventriculi tunicas incrustant, aut Alexiteriis utuntur. Ita impostores hi rudioribus imponunt. Hæc Laurent. Verum quia Agyrtæ isti sua remedia vili pretio vendunt, nec fermè unquam veniunt in usum, etsi emanant, & parum medicis nocent, de ipsis plura non dicemus.

## CAP. IX.

*De iis qui se Professores vocant artis Paracelsicæ.*

**P**Rædicta revocant mihi in memoriam me vidisse Londini programmata quorundam, qui profitentur artem Paracelsicam, & multa mira pollicentur quæ peregrinando didicerunt, cum tamen industrius & studiosus vir possit domi plura ex sedula librorum lectione expiscari. Isti autem homines technas suas Paracelsi nomine tegunt, cujus forsitan libros legerunt nunquam, multo minùs, quod certissime credo, intellexerunt. Post Paracelsum siquidem nemo fuit absolute ipsius sectator. Tandem res eò redit quòd isti homines sunt, aut volunt haberi chymistæ. Igitur quæ differentia sit inter Paracelsitam & chymicum aperiam paucis. Chymia non est ars sui generis, sed est præparatio medicamentorum, & propterea propriè loquendo pertinet ad artem pharmaceuticam, nec nisi in Pharmacia de eâ tractari debet.

debet. Non fuit inventa à Paracelfo, sed pluribus, ante illum natum seculis, exulta à Raimundo Lullio, Villanovano, & aliis quamplurimis, quorum habemus multa laudanda remedia chymica, aquas, quintas essentias, stillatitia balsama, & alia ejusmodi, qui tamen eandem cum Galenicis profitebantur medicinam. Vnde præparationem istam remediorum chymicam medici non improbant, quamvis sub eo nomine multæ fiant fraudes, & ferme omnes impostores hoc pallio technas suas occultent & tegant. Paracelsica autem hæresis, quamvis maximè utatur remediis chymicis; vulgari tamen modo præparata, quæ Galenica vocantur, non respuit, ut videre licet in multis apud Paracelsum locis, & conciliis in quibus sæpe remediis utitur chymicè non præparatis, imò integris tantummodo inter se varie permixtis. Ita ut quoad hanc medicinæ partem, quæ medicamentorum præparationem spectat, non magis unam, quàm aliam affectasse videatur Paracelsus. Nihilominus tamen omnem Galeni medicinam evertere conatur, novam Physiologiam inducit, multa portenta dicit de rerum principiis, hominis generatione, novas morborum causas adducit, quæ est ipsius pathologia, & novam medendi methodum, in quâ non parciſ nec spiritibus, nec verbis, nec magicis actionibus, nam morbos qualibet arte curari debere docet, sive Dæmonum, sive naturalium agentium ope, sive remedia chymicè præparentur, sive non. Nam revera Paracelsus fuit magus, ut ex multis illius operibus pater. Cum autem ars ejusmodi longa sit, & intellectu difficilis, vix mihi persuadebunt se esse Paracelsistas. Quæ autem Petrus Severinus Danus, Quercetanus, alique de hac disciplina scripserunt, non sunt Paracelsica, sed propria ineptorum hominum commenta. Sed de his satis.

*Medicum debere esse Chirurgiæ peritum.*

**N**escio quâ ratione, quave de causâ facilius credatur Chirurgus Medicinam, quàm Medico Chirurgiam facienti. Solent enim plurimis in locis Chirurghi Medicorum munus & officium sibi arrogare. Medicum autem debere esse Chirurgiæ peritum facile ostendam; Sed primùm distinguenda res hæc est, qualis est in sese, ab usu vel potius ab usu nostri seculi. Medicinæ curatricis partes tres statuuntur, una est quæ victu, altera quæ medicamentis, tertia quæ manu curat, diætā, Pharmaciā, & Chirurgiam vocant. Singuli morbi aut plurimùm tribus hisce opus habent, In febre ardenti, quæ omnium consensu ad medicorum artem spectat; potissimum remedium est venæ sectio, est tamen Chirurgicum. Idem de aliis morbis dicendum; In tumoribus præter naturam, & ulceribus, quæ ad Chirurgos pertinere creduntur, purgatio, & victus ratio, sine quibus curari nequeunt, spectant pharmaciā & diætericem, & si pertinent ad Medicum, non ad Chirurgum. Sic nullus fermè morbus est internus externusve, qui Chirurgicam artem non desideret, & simul Medicam. Hic autem loquor ex vulgi opinione, qui Medicinam à Chirurgia distinguit; cum tamen revera Chirurgia sit pars Medicinæ. Quicquid manu fit chirurgicum est, unde propriè loquendo solæ operationes Chirurgicæ constituunt chirurgum. Et sic olim erat. Nunc autem, usus nostri seculi longè diversus est. Hodie enim Chirurgia quinque genera morborum sibi arrogat, tumores præter naturam, vulnera, ulcera, luxationes & fracturas; quorum tria priora proprio jure sunt Medicæ considerationis, in iisque rationalis medendi methodus maxime relucet. Vnde Gal. methodum suam medendi ab ulcerum curatione  
ne au-

ne auspicator, eandem finit in tumorum curatione. Et quamvis olim chirurgi distincti forent à Medicis, has tamen Medicinæ partes sibi non vendicabant. Esse autem Medicinæ contemplationis apparebit, si consideremus ejusmodi morbos non tantum externis, sed etiam internis partibus accidere. Tumores præter naturam omnis generis in partibus internis fieri possunt, phrenitis est phlegmone, vel erysipelas cerebri, pleuritis phlegmone aut erysipelas pleuræ, Iecur & splen affici possunt phlegmone, erysipelate, scyrrho. Pariter in omnibus partibus internis ulcera pullulant omnis generis, inter quæ maximè notabile est illud in thorace, quod phthisin vocamus. Qui autem tractatus chirurgicos descripserunt, ulcera & tumores explicant absque ullius partis determinatione. Quod si Medicus generalem ulcera, & tumores curandi rationem non novit, nec eorum differentias, causas, signa, prognostica, quomodo ea in partibus interioribus genita curare poterit? Necessè est igitur ut hæc norit. Si novit autem, idque præstantius quàm sæpe chirurgus ipse ob eruditionem & doctrinam, quæ in chirurgo hodie non desiderantur, cur non exercebit eodem modo quo Medicinam facit, scilicet remedia præscribendo, non autem adhibendo? Hinc fit ut quicumque aliquid laude dignum de Chirurgia scripserunt ab Hippocratis temporibus ad nostra hæc secula semper Medici fuerint, præter paucos quosdam recentissimos scriptores, qui nil nisi recitam crambem nobis obtulerunt. Imò tractatus illius qui operationes chirurgicas complectitur, Medicus debet esse peritus, quoniam absque Medici consilio operationes illas Chirurgus exerce-re non deberet, quod in multis regionibus ultramarinis observari solet. In alijs quibusdam nullus chirurgiam exercet, nisi qui Medicinæ doctor est, quæ optima & laudabilis est consuetudo.





## CAP. XI.

*An liceat Medico sua Medicamenta  
componere.*

**D**Ebet præterea medicus maxime peritus esse artis pharmaceuticæ, quæ consistit in electione, præparatione & compositione medicamentorum simplicium. Sunt enim hodie plurimi Pharmacopœi satis ignari artis istius, & operationum quæ ad eam pertinent, & tamen audaces satis ut medicinam faciant, quoniam ubi fecerint tyrocinia sua, forsitan sub magistro satis imperito, sibi videntur esse aliquid, & si aliquas medicorum præscriptiones asservarunt, nimis audacter iis utuntur. Futant autem quidam indignum esse medici majestate medicamenta præparare; ideo Pharmacopœos esse publico Iure constitutos, ut medicis laborem hunc adimant. Ejusmodi consuetudo jam à Galeni temporibus invaluit, qui *septimo de Medic. Secundum locos*, c. 3. Meminit Pamphylî Pharmacopolæ & Horat. in satyris. Idem *Galenus* 60. *Epidem.* medicum separat ab herbariis, venam incidentibus, unguentariis, & aliis quos medici ministros vocat. Verum tamen olim medicos composuisse sua medicamenta ostendit historia Philippi medici Regis Alexandri: *Galenus* ipse theriacam componebat; *Pachius* hieram. *Horatius Augenus* valde laudat medicum, qui sua componit medicamenta. Plantius in vita Fernelii refert magnum illum medicum Lutetiæ propria manu sua remedia componere solitum. Ideo credo distinguenda esse tempora & loca: nam *Galenus* Romæ non componebat, quia distincti erant artifices, sed tantum Pergami. Cum enim primum olim utrumque medici præstarent, tandem ob ægrorum multitudinem, eam curam famulis suis relinquebant, sicut hodie ipsi Pharmacopœi servis suis & tyronibus eam committunt,

tunt, sic sensim facta est professio sui generis. nihil tamen obstat quin medici possint quando libuerit, etiam sua parare. neque id medico indignum esse non solum prædicta exempla ostendunt, sed etiam ratio. Remedia siquidem absque medico curant, non autem medicus absque remediis. Præstantior igitur medico erit remediorum natura. Quare ea præparare & componere medicum non dedecet, qui naturæ tantum minister est. At quoniam dandum est aliquid loco, & consuetudini, quæ Pharmacopœos à medicis sejunct, venalia quidem medicus non habebit, sed quædam sibi particularia componere potest, reliqua Pharmacopœi viri boni, & diligentis curæ committenda.

## CAP. XII.

*De iis qui Secreta habere creduntur.*

**Q**uoniam autem nihil est ex omni parte occultatum, fieri potest, ut vulgaria remedia, & forsitan inepta, pro magis secretis à multis prædicentur, quæ nemini revelare volunt, prudenti sane consilio, quia nihil habent quod secretum dici debeat. Igitur dicamus aliquid de ejusmodi arcanis, nam qui ea se habere profitentur, facile populo imponere possunt, & si quippiam vulgare remedium omnibus cognitum, tanquam sibi proprium vendicet, vix poterit argui mendacii. Considerandum igitur primò, ad curationem necessariam esse morbi cognitionem, medendi methodum, & usum indicationum, sine quibus nullum remedium convenienter adhiberi potest. Sunt enim remedia manus Dei, & gladius in manu furiosi, bona scilicet benè utenti, periculosa verò ab illo administrata, qui nec morbum, nec curandi methodum probè novit. Secundò morbo cognito materiam remediorum, & methodum  
compo-

componendi cognoscere debet Medicus, ut Indicationibus satisfacere possit. Hæc quatuor si bene noverit, morbum, methodum medendi, materiam remediorum, & componendi rationem, istis secretis non eget, nam remedia non minùs bona præscribere poterit; forsan etiam meliora quam sunt ista secreta, tam magnificè jactata. Legi alicubi historiam Capi vaccii, in Epist. Scholzii, qui à Germanis rogatus ut sua secreta communicaret, aptissimè respondisse fertur, Legite meam præxim, & invenietis mea secreta; In quo libro nihil secretum, nihil arcanum est. Memini me audivisse Varandæum in Academia Monspeliensi Professore Regium, dicentem remedia esse optima quæ minimè sunt secreta, sed notissima, utpote certiori experientia confirmata, & rectè sanè. Sed jam videamus secretorum naturam. Sunt ea vel simplicia, vel composita. Fateor quidem simplicium vires omnes nondum integrè notas esse, plurimæ adhuc ignotæ latent: Si quispiam igitur simplicis cujusdam medicamenti vires, nondum cognitæ experientia adinvenit, laudandum illud erat artis incrementum, & meritò secretum dicendum, ut qui primus vim Antimonii vomitivum, qui pulveris pyrii compositionem & efficaciam invenit, qui lalapam primus in usum intulit secreta valdè laudanda habuit, qualia si quis habet, laude dignus est, nec alia ego secreta admittenda puto. Quæ enim composita sunt ex ordinaria simplicium materia, ut plurima solent, ea quantumvis sibi servet Medicus, nec nota esse cupit, secreta tamen dicenda non sunt. Quilibet enim Medicus doctus & peritus, similia ad libitum ex re præsentī componere potest. Ideo observavi nihil esse infelicius illis Medicis, qui ex libris describunt medicamenta, multosque ignaros valde astutè sua occultare, nec si aliis Medicis innotescerent, risum moverent. Hinc patet quantum fallantur multi tum viri, tum mulieres hîc in

Anglia,

Anglia, ubi toti sunt in colligendis receptis ut vocant, quia sæpe ejusmodi remedia sunt nullius pretii, sæpe etiam à Medico primum profecta, qui ipse secretum nihil habebat; Quod si bona sint, tamen secreta nec sunt, nec dici debent. Talia enim & sæpe meliora à Medico docto & perito, ex materia Medica variè inter se composita, possunt concinnari, sicut ex litteris variè coalescentibus voces diversæ fiunt. Habebat quidam descriptionem purgationis cujusdam, quam, ut ajebat, Medicus quidam valdè doctus, sed jam mortuus ipsi dederat, non potui continere risum ob ineptiam compositionis; eam tamen pro uxore sua ipse composuit, sed irritò conatu. suasi ut Pharmacopœo traderet, & tertiam demum partem daret, qua sufficienter & abundè purgata fuit. Sic alios vidi qui cerevisierum purgantium sibi communicant descriptiones, quas meliores sæpe esse credunt, quàm quæ à Medicis præscribuntur, quamvis res non ita sese habeat.

## CAP. XIII.

*De Medicis qui creduntur esse fortunati.*

**P**Lurimi eorum qui faciunt Medicinam, etiam si interdum non adeo docti esse credantur, tamen à populo censentur fortunati. Sane quidam valde fortunati sunt, qui opes & divitias congerunt ex arte quam probè non intelligunt. Sed tamen infortunati sunt qui illis confidunt; Arte enim non fortuna morbi curantur, cum ad curationem præcedere debeat morborum cognitio, & certa prognosis, qui fieri potest, ut qui hæc parcè tantum, & leviter novit, probè unquam curet, nisi Andabatarum more cum morbis pugnet. Fieri quidem potest ut morbi sese offerant curatu facillimi, quos natura sola vincere potest, quorum si spectator tantum sit Medicus: nihil minùs tamen curabuntur, & tunc fortuna-

tus ille Medicus est , cui tale quippiam contingit. Fieri quoque potest ut in declinatione morbi accersatur , aut postquam præcipua jam remedia ab alio prudentiori fuerunt administrata. Fortunam causam per accidens eorum quæ fiunt, vocat Aristoteles. Morbi autem curantur legitima administratione remediorum , quæ legitima administratio non à fortuna pendet , sed doctrinæ & iudicio Medici innititur. Aliter qui remedium adhibet, artis tamen sufficientem cognitionem non habet , is haud dubiè tanquam cæcus collimat ad scopum;quem si attingit , id sanè planè fortuitum est, unde sæpe fit ut huiusmodi homines morbos aliàs curatu faciles , indocta medicatione reddant deteriores. Rectè scribit Hipp.lib.de loc.in hom. *Si morborum medicamenta certa sunt, quorsum fortuna opus, aliàs tam medicamenta, quam non medicamenta cum fortuna exhibita proderunt.* Verum dicet quispiam , id quod fortunam vocamus Dei esse providentiam , qui ad salutem hominum dirigit Medici quamvis non adeo docti remedia. Sed id dicere non sufficit. Quamvis enim singula à benedictione divina pendeant , & sint expectanda , non solet tamen immediatè operari , sed per usum remediorum. Creavit enim altissimus de cœlo Medicinam , & medicum probum , doctum, & fidelem honorandum esse ait. Vnde non solet benedicere remediis pravis, ignoranter & intempestivè adhibitis. Sed contra, si Medicus quilibet , sive bonus vir, sive malus, probè remediorum & morborum naturam cognitam habeat , & singula probè , id est loco , tempore, ordine, & secundum artis legem administret , foelix eventus expectandus est, soletque Deus ejusmodi mediis benedicere , ex pacto quod inivit cum natura. Aliàs etiamsi malè quis mederetur , successus tamen foelix à Dei benedictione esset expectandus , quod miraculum foret , si mala media quæ naturaliter finem propositum assequi non possunt , præter ordinem à Deo

Deo in natura constitutum , ex ipsius immediata benedictione, ad scopum tamen dirigerentur. Id quamvis Deus possit quando lubet : non solet tamen nisi rarò ejusmodi miracula facere , ad majorem sui gloriam. Igitur concludendum fortunam potius ex hominum & vulgi opinione aestimari, & sæpe contingere , vel quia morbi sunt natura sua salutare , etiamsi forsan interdum prima facie videantur periculosi , solentque ejusmodi homines morbos interdum dicere graviores quam sunt , ut curatio majorem ipsis famam conciliet aut si mors succedat , etiam eam illos prævidisse notum sit , ægrumque non Medici errore , sed morbi magnitudine victum occubuisse rumor spargatur. Sæpe quoque ad curationem levissimi morbi remedia multa præscribunt inutilia , quasi gravissimus ille foret , cum noxa ægrotantis , cui sæpe melius foret morbum pati , quam remedium.

## CAP. XIV.

*De Medicis qui creduntur experti.*

**S**Vnt etiam alii, qui etiamsi non adeo docti esse credantur , quia tamen diutius hanc artem professi sunt, censentur experientiæ plurimum acquisivisse , ideoque illis lubentiùs quàm aliis populus interdum credit, etiamsi Chirurgi tantum sint, aut Pharmacopœi. Experientia quidem valdè laudabilis est , & omnibus Medicinam facientibus utilissima. Verumtamen nisi quispiam doctus sit, eruditus , & judiciosus, eam acquirere admodum difficile est. Vnde videre licet ejusmodi homines , qui per aliquot lustra Medicinam fecerunt, nullius tamen rei certam habere experientiam. Est autem experientia ejus quod sæpe eodemque modo fieri vñsum est, memoria & observatio. Ità deprehensæ sunt medicamentorum facultates, sicut agaricum pituitam , rhabbarum

vacuare bilem sola experientia notum fecit. At hoc non sufficit ad medendum, nam præterea experientia versatur circa morborum naturas, signa & curandi ordinem. Propterea sola experientia absque doctrina & ratione incerta est, & conjecturalis; Qui enim novit rhabarbarum purgare bilem, nescit tamen quando, quibus, & cui morbo prosit, nisi sit Medicus doctus & peritus. Vnde rectè scribebat *Hippocrat.* experimentum esse periculosum, ob subjecti, humani scilicet corporis dignitatem. Thus carnem generare docent omnes qui de materia medica scribunt; At docet *Galenus* pro natura partium diversas esse illius facultates. In una parte esse suppuratorium, in alia detergens. Idem scribit empiricum quendam cum haberet detergens emplastrum quod ulceri admovebat, cumque magis in dies sordidum ulcus fieret, valentiori semper utebatur, sicque sordidius semper ulcus evadebat, cujus rei rationem cum ignoraret & solam remedii vim cognitam haberet, non mirum si sine suo frustabatur. Non est igitur fidendum iis medicis qui à principio malè instituti, circa remedia tantum sunt occupati, reliquas Medicinæ partes negligunt; & certum est eos nunquam expertos fore, cum medici experientia non solum ad remedia, sed ad alia omnia quæ illorum rectam administrationem spectant, extendatur. Certum quoque est Medicum doctum & eruditum cum ad artis usum se accingit: plus experientiæ uno anno comparaturum, quàm indoctus quispiam integro seculo. Quod ut facilius etiam populus cognoscat, scilicet experientiam non nisi à perito & docto acquiri posse. Sciendum est, fieri eam duplici modo, vel per historiam, quando aliorum experientiæ credimus, ea sequentes quæ ipsi probarunt, eamque studendo quilibet acquirere potest, vel per autopsiam, quando propria nostra observatione rerum cognitionem quandam acquirimus. Prior autem absque

absque hac nihil certi habet. Ut autem experiamur aliquid, multæ requiruntur conditiones. *Primò* res eadem non in uno tantum, sed in pluribus debet observari, una siquidem hirundo non facit ver, sicut de thure supra diximus, quod in omnibus non est sarcoticum, sed pro varietate partium, temperamentorumque, varias vires possidet. *Secundò* distinguenda sunt ea quæ sunt actu talia, ab iis quæ sunt potentia talia, tum quæ agunt per se, ab iis quæ agunt per accidens. *Tertiò* applicatio remedii fieri debet in certo individuo cujusdam speciei, quia quod uni speciei venenum est, potest alteri esse alimentum, propterea quia hic loquor de experientia quæ fit in corpore humano; illi soli remedia applicari suppono. Debent igitur primò temperato, dein intemperato, demum ægrotanti applicari. Ideò cognoscere temperiem debet, qui experitur. *Quartò* in ægrotante morbus considerari debet, sitne simplex, vel compositus, nam experientia fieri debet in affectu simplici, non composito, ideoque exacta morborum cognitio necessaria est. Nam si febris adsit cum obstructione viscerum, eaque medicamentis cesset, calida sint, an frigida nondum constat, an obstructionem, an febrem primò curarint. *Quintò* medicamentum, cujus vires experimur, solum est exhibendum, nam compositione vires alterantur. Spiritus Vitrioli calidissimus est, quo tamen ad refrigerationem febrium utimur, sed aliis admisto, unde fit ut qui ex aliorum libris composita remedia describunt, nullius rei experientiam consequantur. *Sextò* in remediis considerari debent, substantia, quantitas, qualitas, ætas, locus natalis, remedii bonitas, & tempus actionis. hæc enim omnia medicamentorum vires alterant. Ex quibus patet non nisi à docto, perito, & judicioso viro certam experientiam acquiri posse.



## CAP. XV.

*De multis qui urinas inspiciunt, pulsus tangunt, cathartica præscribunt.*

**Q**uoniam jam loquuti sumus de variis hominum generibus qui Medicinam faciunt, operæpretium est errorem omnibus communem hic indicare. nam arteriarum pulsationes observant, urinas inspiciunt, cathartica præscribunt. Idem etiam mulierculæ faciunt. Quis risum continere potest, cum mulieres pulsum tangentes vident. Vbi notandum ejusmodi observatores unicam tantum pulsus differentiam observare, celeritatem scilicet, & tarditatem. Sed tamen plurimæ sunt aliæ pulsus differentię Medico necessario considerandæ, simplices, compositæ, absolutæ, relativæ, in unica pulsatione & in pluribus. Quæ omnes si ad Galeni & antiquorum mentem considerarentur, plusquam bis mille differentię forent. Nobis autem qui superflua plurima rejecimus, plusquam centum supersunt observandæ; sed nec sufficit differentias cognovisse, singularum præterea causæ sunt cognitu necessaria, ut certum de morbis judicium fiat. Sed & demum cognoscendi modus difficilis est, nam singulæ differentię peculiarem habent cognoscendi modum, quem qui ignorat, pulsus nunquam probe investigabit. Sola nomina pulsuum si multi audirent, sponte ab arteriarum contactu abstinere terrorem enim ignavis, sicut & magica verba inferre possent, ut pulsus arhythmos, ecrythmos, pararythmos, mejouros in una vel pluribus pulsationibus, caprifans, imparcitus, æqualis inæqualiter, æqualiter inæqualis, aliæque sunt differentię hoc loco non recensendæ, ex quibus morborum cognitionem, & prognostica desumimus. Idem de urinis dicendum, quarum plurimæ sunt differentię, simplices, compositæ, in colore, consistencia,

flentia, contentis, & earum causæ pariter sunt cognoscendæ, vix autem res adeo difficiles à quolibet imperito, aut muliercula possunt tractari. Præterea solent cathartica & purgantia remedia administrare. Sciendum autem facilimum esse ventrem solvere, multa enim simplicia & composita id præstant, verum id secundum regulas artis facere solus potest, qui artem probè novit. Sunt enim purgantia ut plurimum naturæ adversa, & propterea nunquam nisi magna cum cautione, & prudentia debent administrari. Propterea male faciunt qui indiscriminatim, modo alius ipsis abundè, liberaliterque solvatur, quocunque demum remedio id fiat, illud laudant. Idem pariter de aliis remediis dicendum, quorum magna suppellex ubique descripta est. Non remediorum copia, sed utendi ratio Medicum facit, quæ supponit Medicum in morbis cognoscendis exercitatum, naturæ corporum, & methodi medendi peritissimum, quod plurimi de seipsis, nec alii de iisdem possunt polliceri. Vtinam quoque quidam, quos Academiae comprobarunt, in eundem errorem non inciderent, & temerè remedia ex ineptis libellis non describerent. Non improbo tamen lectionem plurimorum librorum, qui nobis ingenia recentiorum exprimunt, eorumque in medendo artificium, maximè eorum qui observationes suas scriptis mandarunt. Sed omnia Medicis docti iudicio relinquo. Ignavum fucos pecus à præsepibus arceo, & tantum de Medicastro quibusdam hic ago, qui per mortes agunt experimenta, & Medicos bonos ac peritos imitari quidem volunt, assequi autem non possunt.

## CAP. XVI.


*De iis qui luis Venereæ facilem curationem pollicentur.*

**V**Ltimum istius libri caput illi morbo dicabimus, quem aliis semper tribuunt, etiam qui illo tentantur, & affliguntur maximè, lumen Veneream vulgari nomine vocabimus. Morbus quidem fœdissimus, variis horrendisque symptomatis stipatus, de quo varii extant Doctissimorum Medicorum tractatus, quibus veram, tutam & citam morbi curationem investigant. Sed erupit hominum quoddam genus, qui quod difficillimum omnibus Medicis hætenus visum fuit, facillimum prædicant, & methodum quandam programmatis suis se habere profitentur, quâ intra dies paucos decem, duodecimve, morbum hunc quantumvis inveteratum, radicitus se extirpare posse profitentur, nec vitæ rationem ullam curiosè observant, sed ægrum sibi ipsi relinquunt, facilis scilicet & grata hæc est medicandi ratio. At quot hodie creduntur Medici minùs apti ad hujus morbi curationem, quæ Chirurgorum & Agyrtarum munus esse creditur; quum tamen hujus morbi curandi ratio à Medicis profecta sit, & magnam industriam postulet, tam circa sudorifica quàm circa inunctiones, suffumigia, & alia hujus morbi alexipharmaca. Cujus curationem etsi non negem à Chirurgis peritis & doctis perfici posse, in eâ tamen arte plurimi imperiti ægrotantibus multa mala, forsan etiam inviti, sed inscii moluntur. Imò certò scio. quosdam, quasi lue hac laborantes, multis remediis exagitatos fuisse, qui tamen ejusmodi morbo nunquam laborârunt: quamvis enim non adeo difficilis sit ejusmodi morbi cognitio, tamen plurimos artuum, capitis aliarumque partium dolores venereos, sed perperam fuisse creditos à quibus.

à quibusdam imperitis certò scio. Hic monendū sunt omnes ut à scortis primum, dein ab ejusmodi impostoribus sibi caveant. Non est enim hic morbus adeo curatu facilis, & relictus in corpore, diutiusque hærens, viscera adeo labefactat, & corrumpit, ut alios morbos incurabiles accersat, etiam elephantiasin. Hujus quidem morbi non nego facilem satis in principio esse curationem, sed quæ tamen medentis curam, ægrotantis obedientiam & patientiam, in victu sedulam diligentiam postulat; Morbus sanè levissimus ille esse debet, quem brevi tempore curare quispiam potest, nulla observata vivendi ratione, liberè & hilariter convivendo, deambulando, aliisque animi recreationibus utendo. Attamen remedia quæ huic morbo debentur, non quamlibet vivendi rationem sustinent. Talis enim esse potest quæ remediis adversatur, & eorum vim frangit. Deinde sicut in aliis morbis temperaturarum diversitas spectanda est; ita & in hoc morbo, & sic remediorum delectus est faciendus. quæ si quis non consideret, non mirum si plurimos ægros pessundet. Quare qui hoc morbo laborat, non nisi Medico artis perito confidat, nisi & operam, nummosque perdere cupit, quos sæpe nebulonibus istis plures promittunt & largiuntur, quam Medico docto & fideli. Sed de his satis, nam morbum hunc aliumve quemlibet curandi rationem, hoc libro tradere non mihi fuit consilium, sed solummodo populo errores suos ita indicare, ut semper medico opus habeat, si ægrotet. Quamvis sæpe majus ex Medico quàm ex morbo periculum impendeat, & cuilibet se Medicum profitenti statim credatur. Ipse ego qui hæc scribo nihil curo nec quī, nec quot sint quī Medicinam faciant, docti, an indocti, perinde enim est ægrotantibus modo quendam nomine tenus Medicum consulant, quisnam demum ille sit, modo aliquid Latinè blaterare sciat, & se Medicinæ doctorem

etiam falsò profiteatur, principia medicinæ ignoret, Galenum, Hippocratemque nunquam legerit. Si igitur quorum maximè interest, scilicet ipsi ægrotantes, medicorum non faciunt delectum, quare id medici curabunt, ideo pauca tantum de medicis hoc libro scripsi. Quibus relictis ad magis seria progrediamur.





D E  
VULGIERRORIBUS

LIBER SECUNDUS,

De erroribus circa morbos quosdam, & eorum cognitionem.

CAP. I.

*De fallaci Urinarum Indicio.*



Am convellendus est error maximè familiaris, qui huic tractationi primum occasionem dedit. Vix enim Medicus esse is creditur qui ex urinis, morbos, eorumque, circumstantias dignoscere nequit, quem etiam errorem Medici nimis patienter sœvent. Familiare olim id erat Arabum sectatoribus, eratque hæc consuetudo Vallesci, & Gordonii temporibus etiam in Gallia vulgaris. Refert *Plantius* in vitâ *Fernelii*, excellentissimum illum Medicum Parisiis urinas aliunde allatas inspicere solitum, quem tamen ab usum ipse non probat, eosque reprehendit qui tanquam Arioli multa de absente agroto ex sola urina inspectione vaticinantur. Fraudemque adfuisse maximam, ostendunt libri de cautelis urinarum, quos *Gordonius* aliique descripserunt, in quibus docetur Medicus, quomodo populo fraudem facere possit, & ab illius astutiis sibi cavere. Hodie adhuc inter *Germanos* obtinet hæc consuetudo, etiam Medicis invitis, quorum plurimi acriter hunc morem reprehendunt, *Hearnius*, *Forestus*, *Sennertus*.

*Sennertus*, alique sed elegantissimè *Fuchsius* in principio capitis de urinis, Medicos urinæ inspectores, asinos vocat; impostores, ἑρπύρας, indignos quibuscum rixentur boni viri, quum pluris quæstum urinarium quàm veritatem ipsam faciant. Hodie autem in Gallia & Italia abjecerunt à se Medici importunum hunc vaticinandi morem. *Primò* urina serum est eorum qui in venis sunt humorum. Sunt autem humores plurimorum morborum causæ; Illos igitur urina indicabit. Sed morbi non sunt in venis, omnes sunt in substantia partium. Non igitur morbos, sed saltem causas tantum indicabit. At ab eadem causa plures morbi. Febris ardens, phrenitis, icterus, erisipelatum & herpetum omne genus à bile fiunt, Oblata urina valdè biliosa, quisnam horum morborum fatiget, an dicere poterit uromantis. Forsitan conjiciet bilem prædominari. *Secundò* sicut in diversis morbis, ut jam diximus, & diversis ægris, eadem urina apparere potest, ità in uno eodemque agro varia est, & singulis diebus immutatur, ut si hodie urina ægri Medico offeratur, iterumque die sequenti, nisi aliunde morbum cognoscat, vix ejusdem morbi urinam esse pronuntiabit. Imò alia est in principio paroxysmi, alia in augmento, alia est in statu. *Tertiò* eadem urina in contrariis morbis apparere potest, quamvis à contrariis diversisque omnino causis pendeant. Exempli gratia, dicat uromantis: Si offeratur urina alba & limpida, sanusne, an æger est qui urinam reddidit? Poteest vir sanus, qui vini vel cerevisiæ plurimum hauserit, talem reddere urinam, sicut quotidie fieri solet. Poteest æger laborare ardentissima febre cum phrenitide, bile sursum rapta in caput; Poteest laborare diabete, vel obstructione viscerum, vel jecoris, aut ventriculi imbecillitate, vel calculo, vel aliis morbis; At quemnam horum morborum adesse suspicabitur? An judicabit phrenitidem esse intemperiem frigidam?

dam? Pariter biliosa urina potest fieri in morbis pituitosis, ex obstructione meatus deferendis bilem in intestina. *Quarto* morbi, quorum causa non continetur venis, non possunt cognosci ex urinis, nam multi morbi urinam ipsam non alterant. Tales sunt externi, luxationes, partium asperitates, lævitates, ipsa febris quartana quæ morbus internus est, etiam si sit humoris melancholici soboles, nulla tamen ejus indicia in urinis exhibet, nec in paroxysmo, nec extra paroxysmum. *Gilbertus Anglicus* in suâ praxi capite de febre quartana, & *Richardus* quidem vir doctissimus, referente *Arculano*, commentariis in *Avicenna* quarti Canonis sens. primam tract. 20. c. 65. Sanctè professi sunt se nunquam potuisse ex urinis quartanam cognoscere, nec epilepsiam, nec mulieris graviditatem: Vtinam nostro tempore tam ingenui forent Medici. Verba hæc sunt *Arculani* Medici doctissimi, cujus tempore maximè vigeat hæc per urinas divinandi consuetudo. Non credo, inquit, per urinam solam posse comprehendere quartanā, propter convenientiam magnā quartana cū phlegmatica, in urinā, & maximè in principio; Cujus opinionis maximè fuit *Gilbertus Anglicus* primopractica, capite de quartana, reprehendens quosdam inscios, loquaces, qui se profitentur cognoscere omnes agitudines per urinam, sicut multi Medici *Lombardi* hoc tempore hominum illusores, qui ut ajunt omnes agitudines cognoscunt per urinam, etiam putridam, qui tamen cum sunt presentes, & omnia signa considerant, pauca cognoscunt. nam ut dicit *Magister Richardus* omnium doctorum doctissimus, & expertissimus, aspiciens garrulos, & in ludicio urinarum gloriosos, in multiloquio facundos, in ratione exiles & mutos, in urinarum suo excellentissimo tractatu, cujus doctrinam singularem & nulli comparabilem in plerisque dicit se sequutum, his verbis redarguit. Quidam garruli & arrogantes ultra metam debitam excedunt, variantque doctrinam cum regulis propria authoritate inventis; Sed Deum testor, & numina Cæli, quia



*nec cura, nec arte, de conceptione mulieris, nec de epilepsia, nec de quartana, potui invenire cognitionē certam per urinam solam, est enim fallax nuncius, & equivocus.* Quæ sanè nostris temporibus maximè conveniunt. Vidi interdum, idque non rarò, viso ægro mutatam fuisse sententiam, quam ex urina Medicus tulerat, & quod magis est, plurimos nebulones qui Medicinam impudenter faciunt, accersitos ad ægrum, ex cujus urina morbum antea plenè explicaverant, non solum sententiam mutasse, sed nec amplius morbum dignoscere potuisse, etsi & ægrum & urinam haberent præ manibus. *Quintò* urinæ ipsæ ex cibis, potibus, exercitiis, aëre, somno, vigilia, aliisque variis de causis alterantur, & diagnosin reddunt conjecturalem. unde post sex horas *Avicenna*, post duas autem alii urinam nolunt esse inspiciendam; *Quanto* pe-  
 re errant qui de urinis per plura milliaria allatis temerè judicant? Hinc fit ut qui Medici non sunt quamplurimi, ad fallendum populum compositi, plura polliceantur, quam Medici ingenui præstare possunt. Nec Ministros Medicinam facientes, qui omnium sanctissimi esse deberent, excipere possum. *Sextò*, *Galenus* 2. *Proreth. textu* 2. rectè docet in urinis nulla esse signa quæ phrenitidem capitisque affectiones certò portendant. Nam hæc inquit, hepatis, renum & vesicæ affectiones significant, affectionum verò cerebri, alia sunt signa & symptomata. *Actuarius* tamen cerebri, hepatis, colli, pectoris, imo & artuum morbos ex urinis dignosci posse tradit, & *Hippocrat.* urinas quales sunt jumentorum, dolorem capitis ostendere scribit. Pariter totius corporis excrementa ad alvum & urinam confluere docent Medici, à quibus immutari potest, sic pituita ex capite defluens spumosas urinas reddit, & tormina intestinorum ac hypochondriorum urina multa solvi posse existimat *Hippocrates* 4. *aphor.* 73. Verùm hæc prognosin tantum spectant, nam ipsa tormina ex urina cognosci

gnosci non possunt. *Actuarium* autem meritò ridet ingeniosissimus *Argenterius*, qui cerebri, thoracis, & artuum laborantium signa in urina ostendere conabatur. Quamvis enim totius corporis excrementa per urinas vacuari possint, id tamen semper non contingit, sed plurimæ partes valdè affectæ urinam non alterant; Quin etiam excrementa sunt tantum causæ morborum, non morbi ipsi. Quod igitur de dolore capitis, & phrenitide dici potest, solvit *Galenus ad text. 4. Sect. 1. Prorhet.* Vbi ait phrenitica signa esse, quæ perpetuò, & solis insunt, tum quæ perpetuo quidem, sed non solis, tum quæ nec perpetuò, nec solis, sed interdum adsunt, interdum non, sed superveniunt; Vnde demonstratum est, inquit, nec in urinis, nec in dejectionibus, nec in sputis, nec in vomitibus, phrenitica signa esse: Nec enim turbatæ urinæ, nec enæorema habentes, nec spumosa, perpetuò prædictos affectus indicant, sed etiam ex aliis causis oriuntur, & si quando aliquid horum indicant, id cum aliis signis faciunt, nam prædicti affectus sine huiusmodi urinis esse possunt: Vnde concludi potest, signa quæ nec perpetuò morbo adsunt, nec soli, non posse morbum ullum indicare: Tales autem sunt urinæ. Nam docet *Galenus* eas dilirium casu demonstrare, quod flatuosiorrem sanguinem indicant, sed non per se & propriè. Itaque, inquit, loco citato, quæ de urinis dicta sunt, à phrenitide separata sunt, sed ad inspiciendum utrum salubriter an periculosè ager habuerit, conducunt. Itaque in omnibus morbis urinam considerare utile est, ut periculum dignoscatur. Docet *Galenus* multis in locis, excrementa esse indicia partis affectæ, & affectus, dejectiones quidem alvi, sputa thoracis, mucum narium cerebri, urinas jecoris & venarum indicia esse, scilicet coctionis quæ in illis partibus fit, raro autem affectuum ipsorum. Omnes igitur morbos urina indicare nequit; Verbi gratia pleuritis cognosci-

40 DE VULGI ERRORIBUS  
tur ex dolore lateris, febre, pulsu duro, spirandi  
difficultate, tussi, sine urinis & sputis. nam si hæc  
accedant, causam, & prognostica indicant morbi  
jam per alia signa cogniti. Etsi igitur pleuritis &  
phrenitis ex urina dignosci non possint, tamen si  
valdè mutata appareat, malum est, ostendit enim  
non tantum partes vitales, & animales, sed etiam  
naturales laborare; quando autem plures partes  
sunt in vitio, è periculosius ager decumbit. Præ-  
terea urina interdum ostendit, num affectus febrili  
sit conjunctus an non; Docet siquidem *Galenus*  
*2. de crisib. cap. 7.* In affectibus ventris si absque fe-  
bre fuerint, sola alvi excrementa inspicienda; si  
cum febre etiam urinas, sed non ut ipsum affectum  
dignoscamus, verum ut cogniti jam morbi even-  
tum judicemus.

## C A P. II.

*Sexum & graviditatem ex Urina dignosci  
non posse. ubi de fabula quadam.*

**Q**ui urinas afferunt sæpe Medicos rogant.  
sitne viri, an mulieris, tum an gravida mu-  
lier sit. Mirum est quam cautè hoc in casu  
à quibusdam populo imponatur. Sed neque se-  
xum, neque graviditatem dignosci posse clarissi-  
mum faciam; etsi enim alia sit juvenis, alia senis,  
alia viri, alia mulieris urina, id tantum in colore  
est & consistentia, quæ cum à variis aliis causis  
possint etiam immutari, non propriè indicabit, an  
viri sit, an mulieris: nam mulier biliosa post exer-  
citia, & calidorum ciborum usum urinam reddet  
coloratorem, quam vir pituitosus; Pariter quæ  
febricitat, aliove morbo laborat, dubium non est  
quin pro morbi natura urinam immutet. Qui er-  
go quamlibet urinam temerè inspicit, quomodo  
sexum dignoscet, cum temperiem non noverit  
illorum qui urinam reddiderunt. Igitur si sanus  
cum sana, biliosus cum biliosa, ager cum ægra  
compa-

comparentur, nihilque externum accesserit, quod urinam immutet, forsitan urina mulieris ab urina viri discerni quodammodo poterit, aliàs nequaquam, cum unde urina ad Medicum afferatur, sæpe ignotum sit. Et sic intelligendum est quod scribunt Medici quidam de discrimine urinæ muliebris, & virilis, quia enim viri dicuntur calidiores, exercitiis sunt dediti, urinas reddunt tenuiores, coloratiores, cum paucioribus contentis. Mulieres verò, quia sunt frigidiores, eas reddunt pallidiores, cum copiosiore hypostasi. *Color*, inquit Fernelius, *ex albo livescens non solum cruditatis, sed etiam sexus est index*. Sed potest in viro etiam calidissimo talis fieri, ex causis urinam alterantibus. Quare nihil hâc in re certi est, & tale quid ex urina pronuntiare, temerarium est.

De gravidis majus dubium est, solentque sæpe mulieres hac solum de causa urinas Medico inspiciendas offerre. *Avicennas* ex sedimento gossipio carminato simili, aliisque conditionibus id dignoscere docet. Sed cum id experientiæ non respondeat, meritò reprobandum est. Non est necesse quamlibet mulieris urinam habere sedimentum, sed tantum eam quæ probè cocta est. *Primo* Hippocrates qui conceptionis signa exactè perscrutatus est, nunquam meminit urinarum. *Secundò* urina non ex ipsa graviditate permutatur, sed tantum ex suppressione menstruorum, quæ fatendum est urinas posse alterare, ex sanguinis & excrementorum in venas refluxu. Sed urinarum illa mutatio etiam in virginibus ex suppresso sanguine menstruo apparere potest, imò etiam in omnibus morbis ex ejusmodi suppressione natis, tum etiam in aliorum viscerum obstructionibus. Sic urina nihil proprium & peculiare hic indicabit. Videmus urinas interdum decolores, ut in obstructionibus frequenter cōtingit. interdum valdè coloratas, interdum sanis simile, cum gravis ipsa sana est, interdum tenues, interdum

dum crassiores, quales etiā in aliis affectibus cer-  
nere licet. Quod si mulier ægrotet, vi morbi adeo  
permutatur urina, ut omnia graviditatis signa, si  
quæ adsunt, obliterentur. Tertiò non adeo facilem  
esse graviditatis cognitionē ostendit Hippocrates,  
qui postquam plurima probabilia illius signa at-  
tulisset, tanquam illa minus certa sint, ad empiri-  
ca quædā confugit, *Aphoris. 41. lib. 5. Si scire velis, an  
mulier conceperit, cum dormitura est aquam mulsam  
potendam dato, si alvi tormina patiatur, concepit, sin  
minus non.* Et libro de Sterilibus, mel & anisum  
tenuissimè terito, aqua dilue, exhibe, dormiat, si  
tormina sentiat circa umbilicum prægnans est, sin  
minus non. Ut hinc pateat quàm difficile sit co-  
gnoscere prænantem ante motum infantis, cum  
præter signa alia quamplurima, ad ejusmodi em-  
pirica recurrat *Hippocrates*; Quam ineptiunt qui  
id ex urinis tam facile divinare se posse profiten-  
tur. Refert *Avenzoar* inter Arabes primariæ notæ  
**Medicus**, se in propria uxore deceptum fuisse, etsi  
illius urinam videre potuisset, haberētque alia signa  
quibus graviditatem cognoscere poterat, si tam fa-  
cilis fuisset illius cognitio. Refert *Saxonia* se à Me-  
dicis pro mola judicatum fuisse, matremque ejus  
multis agitatam medicamentis, non potuisse ta-  
men foetum corrumpere. Et huic opinioni assen-  
tiuntur recentiores omnes Medici qui de mulie-  
rum morbis scripserunt.

Hic addenda est fabula quædam, quæ mihi  
tanquam historia à viris etiam bonæ notæ relata  
fuit. Ea autem ejusmodi est, Ancilla quædam Do-  
minæ suæ urinam ad Medicum deferabat, cum-  
que forte spargeretur, ignara denuum quid factu-  
ra esset, vacca quæ tunc forte mingeat, urinam  
vase exceptam deferat ad Medicum; Respondet  
ille, ægotantem nimium vesci herbis & graminibus.  
Laude dignissima sanè Medici solertia, qui id  
potuit divinare: Fabulam hanc esse dico, quia  
eandem variis in locis de diversis Medicis audi-  
vi, tum

vi, tum quia semper defuncto cuidam Medico, cui similis, si Diis placet, superstes non extat, nunquam vivo ascribitur. Et rectè sanè, nemo hodie superstes est, nec fuit olim, qui jumentorum urinam ab humana certò dignoscere possit. Si urina sit quasi subjugalis, dolor capitis vel adest, vel aderit, inquit, *Hippocrates aphor. 70. lib. 4.* Innuens urinam ab homine reddi posse brutorum urinæ in colore, & consistentia similem. Vnde hætenùs dubitatum fuit, quibus modis urina humana ab aliis liquoribus dignosci possit. Scio regulas quasdam & notas, ab Avicennâ & aliis constitui, quibus ab invicem discernantur, sed omnes falsæ sunt & incertæ. Nihilque facilius est quàm Medicum, quantumlibet cautum ostensis aliis liquoribus & urinis decipere; Quod si igitur homo urinam similem Iumentorum urinæ reddere potest, qui poterit Medicus ignarus unde urina accedat, unam ab alia internoscere?

## CAP. III.

*Solutio rationum quæ Ouroscopia favere videntur.*

**Q**uidam qui Ouroscopiam istam nimium probant, autoritate utuntur, & rationibus *Herculis Saxonix Medici olim apud Italos doctissimi*, qui videtur voluisse aliquantulum Ouroscopiæ patrocinari. Vult enim non tantum morborum causas, sed & illorum ideas, magnitudinem, mores ex urinis posse cognosci, non in genere tantum, sed etiam in specie, cujus sententiam breviter complectemur. *Primo*, inquit, urinæ demonstrant morbos in intemperie sine materia, & cum materia. Calida intemperies immaterialis, vel est universalis, vel partis determinatæ, quæ interdum est sine febre, interdum cum febre; Intemperiem calidam communem ostendunt urinæ rufæ, crocæ, virides, atræ, pingues, sedimentatæ, atomosæ,

atomosa, furfurea, squamosa, urinæ acres. Verùm tamen hæc non ostendunt intemperiem absque materia, sed cum materia: nam hos colores urina non habet, nisi humorum permissione. hinc in ipsa ephemera 1. ad *Glaucōn. capit. 2. & 3. methodi c. 2. & 10. de crisi bus c. 12.* Urinas subrufas reddi scribit Galenus ob bilis permissionem. Præterea hæc tantum ostendunt calidam intemperiem, non autem ullam illius speciem, nam calida intemperies potest esse synochus, ardens, tertiana; potest esse phlegmone, cresipelas alicujus partis. Idem consentitur intemperiem partium calidam ex iisdem urinis cognosci; Quid igitur prædicet Vaticinator, si urinæ tantum morbum in genere, non autem in specie indicant, cur potius renum quam jecoris, aut totius corporis calorem ex urina cognoscet? *Secundò* objicit, urinam esse serum humorum, qui in partium substantiam sunt distributi, unde cum recedit serum, secum defert excrementa earum partium, ideo illarum affectus poterit ostendere. Sed alteratio seri est tam varia, ut dignosci non possit, quænam pars illud præcipuè alteraverit. Deinde plurimarum partium excrementa sunt eadem, & nisi extraordinaria sint urinæ contenta, ut pus, sanies, partiumve quarundam substantia, serum nihil peculiare demonstrabit, neque etiam quando hæc adsunt, nisi alia signa adjungantur, cognoscere vix poterimus, unde defluant, nisi ex vesica ipsa, sicut furfures vesicam affectam arguunt. *Tertiò* docet meo iudicio rem valde vanam, scilicet quomodo distingui debeat serum jecoris à sero venarum, quasi jecur ullum haberet serum sibi proprium, aut quasi venarum serum non primum in jecore conficiatur. Dignoscere autem id docet ex copia, & substantia, quia serum venarum copiosius est & crassius quam serum jecoris. quod est falsum, nam copia seri est à materia humida quæ assumitur, quæ prius ad jecur, quàm ad venas pertransit; Quod si urina as-

sumpto.

sumpto potu copiosior sit , aliquid aliud ipsi admisceri necesse est. *Quartò* ait *Galenum* velle ut urinæ etiam in pleuritide, & affectibus pulmonum inspiciantur. Sed diximus supra, in ejusmodi morbis non diagnosi, sed prognosi urinas inservire. Idem dicendum de intemperie frigida, quam in genere dignosci posse ex urina fatemur; nunquam autem in specie, nam in diabete, in principis accessionum, in cachexia, hydrope, lethargo; aliisque affectibus, quamvis urinæ possint esse crudæ non demonstrant tamen affectus harum partium potius quam aliarum. Vnde malè addit, utrum frigidum ex urina deprehendi possit; quia ob viciniam intemperiem communicat lotio. Verum tamen urina cruda cur potius utrum quàm Iecur ostendet? Deinde si urina in vesicam descendat colorata à causa quapiam calefaciente, uterus quantumvis frigidus, illi non adimet colorē, quem à bilis permissione habet, & quamvis uterus fervidior urinæ colorem aliquem tribuere forsitan possit, frigidus tamen colorem tollere non potest, quem aliunde serum contraxit. *Quintò* ait, humores à singulis partibus redire posse in vesicam. Ergo illarum affectus urina demonstrabit. Respondeo primò, humores secundarios dictos non redire, nisi fiat corporis colliquatio. *Secundò* humores semel elapsi è vasis, rarò iterum redeunt in venas, sed expurgantur per habitum corporis. Verum, inquit ille, sudoris & urinæ eadem est materia, sudoris autem materia extra venas est. Vnde cum defectu sudoris multa fit urina, redit serum in venas. Sed tamen falsum est, sudoris materiam esse extra venas, nisi cum actu sudamus. non autem cum tantum sudaturi sumus. At nemo sponte sudat, nisi male habeat. Deinde quamvis humores in venas redeant, partium tamen peculiare affectus non ostendent, sicut si urina effluat purulenta, pus quidem expurgari ostendet, sed an ex thorace, aliave parte promanet,



net, non urina, sed alia partis affectæ signa demonstrabunt. Demum utitur auctoritate *Avicennæ*, qui scribit urinas quæ crassam & viscidam continent materiam, esse indicia doloris articularis. Quod tamen falsum est, nam crassius humor aliunde esse potest. Et hoc fatis.

## CAP. IV.

*Vrinam in morbis turbari, non semper esse bonum signum.*

**N**ihil est magis ordinarium, quam audire populum de ægris benè sperantem, cum videt urinam quæ limpida & clara mingitur postea turbari, quod tamen non est perpetuò verum, quin potius contrà malum signum esse potest. Vbi notandum urinas vel mingi claras, & tales permanere; vel mingi claras, & postea turbari; vel turbidas mingi, & tales permanere; aut postea clarescere, vel igni admotas vel deponendo aliquid crassum, quod in fundo subsidet. de quarum urinarum causis multa dici possunt, quæ non sunt hujus loci. Vrina quæ optima est, mediocris est colore & consistentia, quæ ab hac recedit, mala est. Igitur si naturali tenuior sit, cruditatem indicat; Quæ verò clara mingitur, & post turbatur, in sanis metum facit futuri morbi, quia humorem crudum indicat quem Natura aggreditur unde clara mingitur, sed amisso calore suo & spiritu turbatur, nam calor æquat omnia. In ægris autem significat morbi incrementum, maxime si substantia, quantitas, color, ceteraque signa malè sese habeant, si in sanis ejusmodi urina morbi metum facit, quomodo in ægris ostendet coctionem? Quum sanus quispiam in morbum incidit, non necessariò ipsius urina evadit naturali tenuior, dein crassior, & turbata, sed potius à principio turbatur, & morbum futurum ostendit. Perturbatio igitur urinæ nunquam est bona; nam  
ab urina

ab urina tenui ad mediocrem quæ naturalis est, non fit transitus per turbidam, magis enim accedit tenuis ad mediocrem, quàm ad crassam. Si igitur urina flava & tenuis, fiat flava & crassa, ac turbida, non coctionem, sed periculum ostendit, ob putredinis incrementum, ut rectè advertit *Montanus*. Ideo damnandi sunt qui urinas turbatas & crassas pro bono signo habent, quia videntur obstructions operiri, & humor morbificus vacuari; Id sanè interdum contingit in calculo, in criticis vacuationibus, & vi medicamentorum. Sed quando absque morbi imminutione excernuntur, crudum & pertinacem morbum arguunt, humorumque fervorem & cruditatem, nam coctio omnis claras urinas facit. Sed omnium pessimæ sunt quæ turbatae minguntur, & tales manent, ob maximam humorum in venis agitationem, & magnum naturæ cum morbo certamen, & in Hippocratis observationibus, capitis dolorem, delirium, convulsionem, & mortem prænuntiant. Polyphantus cum ejusmodi urinis mente motus est, & convulsus interiit. 7. *Epidem.*

## CAP. V.

*Consumptionem ex urina non posse cognosci.*

**F**AMILIARE est etiam plurimis, quum urinas ad Medicos ferunt, eos interrogare, num credant ægotantem laborare consumptione. In quo errant dupliciter. *Primò* quod veram consumptionem ab aliis affectibus non distinguant, sed quamlibet corporis contabescentiam, quacunque demum de causa fiat, consumptionem vocent, ut dicemus sequenti capite. *Secundò* quia nec ulcus pulmonis, nec febris hætica; quæ propriè consumptiones sunt, possunt ex urinis cognosci. Nec *Galenus* & *Hippocrates*, ullum ab urina de his morbis signum desumpserunt. Ratio est, quia nullum, nec proprium, nec inseparabile signum

gnum consumptionis, vel ex substantia, vel ex colore, vel ex contentis desumi potest, quia urina serum est humorum in venis contentorum, unde ab humorum diversitate urinæ permutatio dependet. In phthisicis autem pulmones primùm, deintotum corpus sicut in hecticis afficitur. Diximus autem supra, affectus pulmonum ex sputis, non ex urinis dignosci, & quamvis urinas inspicere utile sit, non tamen ad cognitionem morbi, sed tantùm ad prognosin. nam si parvæ apparent, augent periculum; Sed *Arabes* dixerunt, urinas esse pingues & oleaginosas, quos etiam recentiorum plurimi sequuntur, quamvis inter se non consentiant, ut plurimùm autem fatentur in principio hecticæ, nihil certi ex urinis cognosci, sed succedente tempore cum adiposa humiditas consumitur, apparere urinas quales jam supra diximus. Verum *Alexander Trallianus*, non urinas pingues proponit, sed tenues, flammeas, & crudas: cum enim coctiones fiant à partibus solidis, si hæ malè se habent, urinæ non possunt esse probè concoctæ, sed tenues flammeæ, crudiores, quales in sicca & calida intemperie. Verumtamen inde concludi non potest, posse Medicum ex urinis agro non viso cognoscere febrem hecticam, nam ejusmodi urinæ apparent in aliis affectibus, & variis de causis contingere possunt: & propterea nisi alia signa accesserint, nihil certum indicant. Idem dicendum est de urinis quas vocant oleaginosas, de quibus multa dici possent, cum hujus nominis varia apud Galenum, aliosque Medicos sit acceptio. Hoc tamen loco intelliguntur illæ in quibus pinguedo supernatat, quas Hippocrates malas esse pronuntiat, 2. Prognost. textu 35. *Si pinguedo aranearum telis similis supernatet, damnandum est, colliquationem enim significat.* Has autem urinas consumptionem non indicare inde patet, quod in sanis sæpe videntur ejusmodi urinæ, ut docet *Galenus* 4. de sanit. tuenda. Cum n. adeps & pinguedo  
ex san-

ex sanguine probè cocto fiant , non mirum est si portio quædam illius urinæ innatet , qualis in iusculis refrigeratis reperiri solet. Præterea fieri potest ex supino in dorsum decubitu, pinguedine renum incalescente. & hi casus duo valdè sunt ordinarii , paucique sunt qui ejusmodi urinas in seipsis non possint observare. Quæ autem fiunt à causis præternaturalibus in malignis & ardentibus febribus , quas synteëticas vocamus , apparent rarò in consumptione & heëtica , in quibus non apparet ejusmodi colliquatio, sed absuntur humores per insensilem transpirationem. Hin *Gal. 10. methodi cap. ultimo* , hanc inter synteëticas, & heëticas ponit differentiam , quod in his quod colliquatur, vaporis specie digeritur ; in illis vero defluit in ventrem : nam calor heëticæ exiguus est & mitis , adeo ut se febricitare ægri non sentiant. Ideo nec *Hippocrates*, nec *Galenus*, nec Antiquiores Medici qui ejusmodi urinas observarunt, eas unquam heëticis attribuerunt , sed ardentibus & pestilentibus tantùm. Quod si ulla in heëticis cum urina defluit pinguedo , alia febris heëticæ conjungitur , maligna scilicet, vel ardens, qui casus valde est perniciosus. Habeo ego nunc cum hæc scribo heëticum quendam curandum in quo nunquam ejusmodi urina apparuit , quam, in aliis sæpe vidi nequaquam ægrotantibus. Et quamvis concederemus in consumptis ejusmodi urinas apparere, tamen quia aliis etiam ex causis proficisci possunt, quomodo Medicus, qui solam urinam inspicit , ægrotantem ipsum forsan non cognoscit, poterit certò morbum investigare ? Sed de fallaci urinarum judicio sat multa diximus. Addam hic tantùm , prudenter à Collegio Medicorum Londinensium prohibitum fuisse , nequis Medicorum fallacem istam divinationem profiteatur. Verba constitutionis illius hæc sunt. *Ridiculum quidem est & insulsum ex urinarum solummodo inspectione sive de morborum genere atque natura, sive*

C

de ægro-

*de agrotantium statu ac conditione aruspicum & conjectorum more velle quicquam certi solidique divinare. Monemus itaque omnes Medicos, ut hac in re multò cautius posthac se gerant, quam antehac solitum est à plerisque factitari; Et hanc ob causam omnibus Medicinam exercentibus interdictum volumus, ut Idiotis istis & mulierculis agrotantium matulas circumportantibus, ne quicquam in Medicina præscribant, nisi aut ipsum agrotum benè prius noverint, aut viderint, aut saltem ab illis qui consilium petunt, de toto illo morbo quo laborat ager, morbiq; circumstantiis, & planè, & plenè, & sufficienter instructi fuerint. Hac enim ratione, & dignitatem Medici melius tuebimur, & multò etiam aptius & scientius excogitabimus ea remedia quæ sint homini periclitanti maxime profutura.*

## CAP. VI.

*De Consumptione.*

**Q**Voniam in hac regione familiare nimis & formidabile malum est Consumptio dicta, de ea paucis agemus, à multis enim non satis benè intelligitur. Nam populus eo nomine quamlibet corporis extabescentiam comprehendit; Hic igitur notandum est, si generalem hujus vocabuli significationem retineamus, nullum ferè morbum esse, cui consumptio dicta succedere non possit: Errat siquidem populus quando de Consumptione loquitur, tanquam de morbo ab aliis distincto: Non est enim morbus, sed accidens aliis variisque morbis quamplurimis succedens, præsertim si longi sint. Cum enim corporis nostri substantia assidue depereat, nisi alimento reparetur, per morbos labefactata caloris nativi, & viscerum coctioni dicatorum virtute, corpus probè nutriri nequit, unde ipsius moles necessariò concidit. Contingit igitur ejusmodi consumptio, *Primò* ex causis externis ut ære æstuoso, inædia, curis, sollicitudinibus, vigiliis,

liis, nimis vacuationibus, aliisque causis vacuantibus. *Secundo* contingit ætatis decursu in marasmo dicto senectutis; Calor enim natus in senibus hebetatur, humidum primigenium absumitur, cujus jactura est irreparabilis. *Tertio* quibusdam naturalis est corporis macies, ut in corporibus calidis siccis, qui facile ex causis resolventibus extenuantur, & ejusmodi corpora crassis diutius vivunt. 2. Aphor. 44. *Qui natura crassi sunt, citius moriuntur, quam qui graciles*, quod tamen intelligendum est de immodicè crassis, quorum venæ sunt exiles, sanguisque paucus. *Quarto* sequitur febres ardentes, quæ alimentarios humores, corporisque substantiam calore suo absumunt. Scribit Hippocrates lib. 1. de morbis. *Qui ex febre ardente moriuntur, omnes ex siccitate moriuntur. Extrema, manus pedesque primum ipsis resiccantur, deinde verò partes sicciores*; Et referunt authores quidam sanguinem totum fuisse absumptum, ut scribit Argenterius, ad cap. 2. libr. primi ad Gaucon. de Mutio Medices, arcis Fisanæ præfecto, in cujus cadavere ne gutta quidem sanguinis reperta est. Et quamvis æger non intereat, corpus tamen à vehementi febre solet extenuari, unde passio calida sicca dicitur, ideoque Hippocrates victum humectantem præscribit aphorismo decimo sexto libri primi, ut prohibeat exsiccationem illam quam febris inducit. Huc quoque referri debent febres quæ dicuntur colliquativæ. *Quinto* sequi potest affectus lienis, & tumores; Hippocrates libr. de locis in homine, & Galenus 2. de facultat. natural. cap. ultimo, & Averrhoes 4. Colliget. 56. Dicunt, ubi lien floret, corpus emaciari, unde lienem fisco Imperator comparabat, nam sicut populi divitias fiscus exhaurit, ita & lien corporis substantiam. Idem dicendum foret de jecore, & aliis visceribus; quorum mali affectus corpus absumunt; Indurato spleni sæpe succedit hydrops ascites, aut tympanites, in quo affectu familiare est, vide-

re abdomen turgidum , cum tamen partes superiores summa extenuatione laborent , ex penuria prohi sanguinis, tabemque æmulatur. sic vidi ægro-  
tantes hydropicos , quos consumptione laborare populus judicabat , & reverà facile unus affectus alium inducit : nam , ut diximus, macilentia , & corporis extenuatio, non est morbus sui generis, sed accidens à plurimis tum internis tum externis causis profectum. Non omnis igitur corporis extenuatio consumptio dici debet. Igitur ad rem propiùs accedentes dicimus, *Sextò* consumptionem sumi propriè pro febre hætica , in qua corporis substantia sensim & sine sensu absimitur : nam in hac febre calor blandus & mitis primo tactu videtur, postea sentitur acer & mordax, æger nec febrem, nec alium affectum percipit , sensim tamen sibi vires imminui sentit. *Septimò* illud nomen atrophix convenit , quæ pariter est variorum morborum soboles , & in genere etiam per atrophiam intelligi potest quæcunque corporis contabescencia. Verum magis propriè illa est, quando nec alimenti penuria, nec vacuatione immoderata , nec aliarum causarum evidentium vi, nec acuto morbo, nec febre hætica, nec phthisi corpus emarcescit , sed quando lentè ac pederentim corpus etiam sumpto alimento alitur, vel quia alimentum malè trahitur vel male retinetur, vel malè concoquitur, vel demum superflua malè expelluntur, quamvis plurimi qui de atrophia scripserunt , omnes causas quæ corpus macilentum reddunt, adduxerint. *Octavò* demum maximè propriè consumptionis nomine intelligi debet phthisis , quæ est ulcus pulmonum corporis substantiam cum febre lenta, & continua depascens. Estque affectus valde deplorandus & curatu difficilis, forsan etiam impossibilis, ob tres causas à *Galeno allatas* 5. *Meth. 4, de locis affectis*. Primò quia curatur ulcus excretionem puris , excernitur autem russiando, at russi

russi ulcus amplificatur. *Secundò* quia remediorum vis vix ad pulmonem, nisi multum hebetata per-tingit, perit enim virtus illorum in ventriculo, hepate, vena cava, & aliis viarum ambagibus. *Tertiò* quia ad curationem opus est quiete: at pulmo-nem assiduè moveri necesse est: Adde quod ulceri conjuncta est febris quæ refrigerantia & hume-stantia postulat, ulcus autem exsiccantia: omnis enim ulceris curatio exsiccatio est. Præterea no-tandum est hunc affectum esse contagiosum, ut *Hippocrat. 3. Epid. & Galenus 1. de differ. Febr. c. 2. a-*liique authores observarunt, & id auget periculū. Ne autem populus multum decipiat, scire de-bet non esse adeo reformidandum hunc morbum in pueris & in senibus: nam secundum regu-lam *Hippocratis aphorismo nono libri quinti, Phthisi-*is maximè ætatis fit, quæ sunt à decimo octavo ad *tricesimum quintum. & 3. Aphor. 29. In juvenibus, in-*quit, accidunt sanguinis sputa, tabes, quoniam cum juvenes & adolescentes copia sanguinis fervidi, & biliosi abundant, minusque tunc sit corporis incrementum, fit ut & copia & caliditate sangui-nis fervidi, & pituita falsa ex bile orta, corrodan-tur & frangantur vasa; tum etiam ob immodera-ta exercitia, & alia in victu errata. Rarò autem pueris & senibus hæc contingunt, illis ob blan-dum, halituosumque calorem, nisi naturalis cor-poris conformatio ad hunc morbum inclinēt, vel alterius phthisici contagium morbum acceleret, his verò quia minor est in corpore senili humo-rum copia & caliditas. Vnde erravit *Celsus*, qui hunc aphorismum latinum faciens, pro decimo octavo duodecesimum posuit, forsan mendosè pro duodevigesimo, ut advertit *Mercurialis*. Erravit quoque *Avicennas*, qui senibus maximè fieri phthisin voluit, nisi intelligatur de marasmo sene-ctutis, qui omnibus fermè ratione ætatis contin-git, non de vero ulcere pulmonis. Quamvis enim senibus & branchi & coryza inemendabiles



contingant, humor tamen adeo acris non est, ut pulmonem ulcerare possit. Ideo qui in juventute malum hoc non contraxit, in senectute ratione proprii temperamentum illud formidare non debet: quamvis non negem posse aliunde accidere, ex pleuritide, peripneumonia, empyemate, aliisque morbis, non autem ratione propriæ constitutionis senum. Quæ addenda putavi, ut si quando è populo quispiam Medicum roget, an æger consumptione laboret, sciat varias consumptionis acceptiones distinguere, nec præcipuam illius differentiam in senibus & juvenibus reformidet. Scio *Cornelium Celsum* inter tabis species referre cachexiam, in qua habitus corporis potius intumescit, quàm concidit, & credo, si ipsam rei naturam spectemus, id verum esse, tamen quia visui contrarium potius apparet, propterea hanc etiam significationem omittere volui. Horum autem omnium affectuum causas, signa diagnostica, prognostica, & curandi rationem si addidissem, quod semel mihi exstat constitutum, excrevisset liber in nimis magnam molem, nec id necessarium esse puto, qui errores solummodo indicare, Medicinam autem docere non constitui; Potest populus Medicos doctos & probos consulere. Ad alia properemus.

## CAP. VII.

*De Peste an sit contagiosa.*

**Q**uidam sunt morosi, & plane Stoici homines ac obstinati; quorum nonnulli à Peste omne contagium, omnemque infectionem adimere cupiunt; Alii etsi contagium admittant, nefas tamen esse putant homini Christiano, malum metuere, aut fugere. Primos quod attinet, ostendit experientia, magnorumque virorum autoritas confirmat, pestem esse contagiosam. Imo illa vera non est pestis quæ contagio caret, nam  
etsi

etſi quidem morbi more peſtis interficiant , ſi abſit contagium , peſtis tamen non ſunt, ſed maligni morbi & peſtilentes ſine peſte. Scabies morbus aliàs leviffimus , tinea , lepra , rabies, phthiſis, ophthalmia, lues venerea, vicinos inficiunt , quidni peſtis ? Et niſi eſſet contagioſa , ex una civitate in aliam deferri non poſſet , quod tamen ſape contingit, abſque ullo præcedente aëris vitio. *Galenus* quidem, *Hippocrates* , & veteres apertè contagii non meminerunt; Refert tamen *Thucydides* peſtem illam quam deſcripſit , fuiſſe maximè contagioſam, unde & fugam maturam , tardumque reditum ſuadet. cujus conſilii memor *Galenus*, Roma ſe ſubduxit , nec tutam eſſe cum infectis converſationem, 1. *de diff. Feb.* 2. obſervavit. Cum enim invitis nobis aër hauriendus ſit , nulla illius evitandi ratio eſt , niſi procul ab infectis locum aliquem ubi optimus ille fuerit , conceſſerimus , à quo non niſi tradiſſimè redeundum. Nil refert igitur , quod *Petrus Salius* Medicus , aliàs doctiſſimus , aſſert ad probandum non ſemper in peſte aſſeſſe contagium. Primò quod *Hippocrates*, *Galenus*, & veteres, nec illius meminerunt, nec illud reformidarunt. Secundò quod Turcæ aliæque gentes nefas eſſe putant vitare conſuetudinem peſte laborantium. Terriò quia plurimi inter agros verſantes peſte tamen non inficiuntur. Nam *Galenus*, *Thucydidem*que cognoviſſe vim illam inficiendi, patet ex ſuperioribus. Sed ſanè fatendum eſt, illos non adeo exactè illius naturam, modosque inveſtigaviſſe ; nam *Ariſtot.* in *problematis* pauca quædam & ſatis obſcura dixit. *Galenus* quoque 1. *de diff. Feb.* loquutus quidem eſt de illo , ſed non clare, & apertè. Sed veteres omnia non cognoverunt: reliquerunt poſteris plurima addenda , plurima clariùs explicanda. Nec pariter exemplum Turcarum nos commovere debet, ſælices ſunt illi errore ſuo; quos ille malorum *Maximus* haud urget lethi metu. Vnde quoties inter illos vagatur peſtilentia,

tam immaniter favit , ut unica in urbe hominum interdum centena millia perimat. Paulò majus est quod sequitur : nam videmus plurimos superstites , qui sine noxa cum infectis conversati sunt qui haud dubiè periissent , si contagii vis ulla fuisset. Verum tamen si tot hominum millia, quos communicata hæc labes abstulit , & familiæ in integrum deletæ quasi postliminio redderent, quàm facile paucorum superstitem sententiam refellerent. Ad imprimendam actionem tria requiruntur, dominium agentis supra patiens , ipsius patientis præparatio, & debita mora, siquidem nihil agit in instanti. Ad dominium agentis non solum efficax illius virtus , sed etiam quantitas debita requiritur. Nam in minima quantitate deleteria parum agunt, ignis scientilla parum urit. Patientis præparatio vel manifesta est , vel occulta, ex innata naturæ proprietate. Hinc Marfi & Pfylli à serpentibus non lædebantur , digitus Pyrrhi non fuit ab igne crematus. Hinc quoque est quod quidam etiam in favissima peste ab omni læsione manent immunes , alii ex levissima occasione inficiuntur. Ex eadem occulta vi contingit ut venerum unius sit alteri salutare, & medicamentum , ac etiam interdum alimentum. Cum igitur corporum naturæ dissimiles sint , ac multiformes , quidam facile vincuntur, & statim patiuntur , alii autem non nisi difficulter. Nulla enim causa absque patientis dispositione agere potest , aliter omnes sub eodem sole commorantes pariter febricitarent, aut aliter afficerentur. Differt, inquit *Hip. lib. de flat.* corpus à corpore, natura à naturâ , temperamentum à temperamento. Propterea omnibus eadem non sunt commoda , aut noxia. Accedit ad hæc moderata diætâ, corpus sanum, & humorum corruptione vacans, benè spirabile, temperatum, siccum potius quàm humidum, frigidum potius quàm calidum ; ideo senes rarius quàm pueros hoc morbo laborare observavit *Plin. lib. 7. cap. 50.*

ob cor-

ob corporis frigiditatem, maximè si moderatis  
tùm cibus, tum laboribus utantur.

## CAP. VIII.

*An liceat tempore Pestis fugere.*

**S**ECUNDUM erat, an liceat fugere, & periculo se-  
se subducere, quantumvis Pestis contagiosa  
statuatur. Turcæ, ut refert *Prosper Alpinus, lib.  
primo de Medicinis Egypt.* Pestem negligunt, quo-  
niam unicuique suum pereundi modum Deum  
destinasse credunt, quem effugere nemo potest,  
ita ut qui in bello periturus est, à peste interiimi  
nequeat: quæ vanà opinio etiam Christianorum  
quorundam animos obsidet. Theologorum est in  
id diligentius inquirere, An Magistratui, an Patri-  
familias, an liberis, & illis qui aliis vel naturali,  
vel civili jure sunt devincti, id liceat, & quate-  
nus. Id tantum addam, videri sanctos homines  
mortem reformidasse, quia nemo unquam car-  
nem suam odio habuit: Nam & Elias, & Moses  
fugere, Abraham maluit uxoris pudicitiam,  
quàm vitam suam periculo exponere. Imo & pe-  
ricula omnia licet evitare. Famem licet Deus im-  
mittat in facinorum nostrorum supplicium, eam  
tamen fugere licet, imo necesse est; propria ete-  
nim necis conscius censeretur, qui sese præ-  
senti periculo objicit. Quis savientes hostes, quis  
flagrantem ignem non devitabit? quis ille qui na-  
tatione à præsentis submersione si possit, sibi non  
præcavebit? An etiam frigora, quia Dei supplicia,  
nemo vestibus & foco arcere debet, aut vulnera-  
tus, vel ager Medici opem implorare? Vitam  
quam longissimam Deus nobis in benedictio-  
nem pollicetur. Licebit igitur eam omni arte ab  
imminente periculo præservare. Ideo ratio homi-  
ni data est, ut non immediatum Dei auxilium sibi  
polliceatur, sed mediis quæ constituit, & creavit,  
prudenter, & cum ratione utatur. Quis prudens  
vagienti

vagienti Leoni sese objiciet, nec sibi fuga, aut alio modo consulat? At pestis, ut docet *Galenus lib. de Theriaca ad Pisonem*, immanis quasi fera est, civitates interdum totas depascens. Quare si commodè per officia licet, nemo se induci patiatur, ut inter peste affectos moretur. Quod consilium video plurimos prudenter sequi, neglecta quorundam temeraria pietate. Nam quod mortem Christiani reformidare non debeant, intelligendum est, non esse despondendum mortis metu animum, neque ut mors eviteretur peccata admittenda, & demum in morte, si declinari ullo modo nequit, non esse desperandum. Ideo *Hippocrates* tutissimum remedium esse ait, citò & procul fugere, tardè redire. Non tamen expedit omnes abire, quidam enim constituendi qui ægrotantium curam habeant. Verùm quibus fugere non est datum, alteratione aëris, & antidotis sibi præcaveant.

## CAP. IX.

*Quodnam mortis genus ope artis Medicæ possit præcaveri.*

**T**VRCA, ut jam supra diximus ex *Alpino*, audaces in omnia ruunt pericula, quod certò persuasum habeant, certum singulis destinatum esse pereundi modum, aut fame, aut bello, aut aquis, aut suspendio, aut morbo, aut ætate. Sunt etiam inter nos quidam superstitiosi, talesque audiui plurimos, qui singulis certum dierum numerum ita præscriptum volunt, ut ulterius vita prorogari non possit, & si quispiam etiam forsan Medicorum, aut adstantium errore perierit, illos excusant, quod impossibile sit hominem servare quem Deus ad se vocat. Ita ferme ad verbum sententia ipsorum exprimitur. Quæ absurda sententia favet plurimum Medicastriis quibusdam, qui susque deque absque ulla arte, curationem morborum aggrediuntur. Sic enim  
& Me-

& Medicorum, & medicamentorum delectus tollitur, nec refert cuinam docto an indocto, experto an rudi, vita hominis committatur, cum moriendum necessario illi fuerit, quem Medicastorum, aut adstantium temeritas, vel ignorantia, aliufve casus sustulit. Potest Deus quicquid ipsi lubitum est. At quoniam causarum secundarum ope & mediis solet operari, nisi illis quispiam utatur, præmaturam sibi mortem accersit, sicut qui sese suspendio, veneno, aliterve peremit, vitam sibi fecit breviorē, quæ diuturnior esse potuerat. Non pollicetur ars Medica perennem vitam, tandem enim fati cedendum est. ita volente Naturæ ipsius conditore, qui ideo corporis nostri principia fecit patibilia, ut tandem vincatur à causis internis & externis: Nec tamen excusat Medicum, cujus culpa æger interit. Sed imminentes vitæ nostræ casus avertit, ne ante tempus, & maturam senectutem pereat; Quis nescit morborum efficacia corpus concuti, quassari, & elanguescere, idem remediis resarciri, remediorum neglectu, vel eorundem importuno usu tandem succumbere? Quis nescit posse hominem casu, ictu, aliove modo vulnerari, eundemque nisi probè curetur interire, qui alias vixisset diutius? naturalis quadam mors est ab exhaustis vitæ principiis in ultimo senio succedens, quam Deus omnibus constituit, quam ideo prohibere nulla ars potest. Suntque ejusmodi termini vitæ varii, propter temperamentorum & aliarum causarum diversitatem; unde quidam longius, quidam diutius vivunt, quidam tardius, quidam citius senescunt, singuli tamen absumpto calido innato, suo tempore à natura præstituto moriuntur, sicut absumpto oleo ellychnii flamma extinguitur. Omnium enim natura constantium ordo est, & omne tempus ac vita circuitu mensuratur, ex *Aristotele 2. de generat. & corrupt. cap. 10.* cui omnes

eum Philosophi tum Medici consentiunt. Alia mors est violenta, & præmatura, quam febres, morbi innumeri, aliique casus accersunt, & huic prudens Medicus, peritus & fidelis vadit obviam, & salutaribus præsiidiis legitimè adhibitis, vitam jam fermè abeuntem revocat in præcordia. Quid enim aliud est à pernicioso morbo ægrum liberari, quam differri mortem. Nam angina, apoplexia, pleuritis, febris pestilens, & alii ejusmodi acuti morbi: mortem natura sua inferre possunt, nisi remediis arceantur? Quid aliud est morbos præcavere, quam senectutem, & mortem quæ in ea contingit retardare? Quam variaz causæ calorem nostrum labefaciunt, ut prava vivendi ratio, crapulæ, inediæ, vigiliæ, sollicitudines, curæ, quæ præmaturam senectutem accersunt? At his proba vivendi ratio ex arte Medicorum instituta succurrit, ne nimium citò corporis substantia dissolvatur, sed ut ad extremam usque senectutem perveniat, quæ senectus suos habet in natura definitos terminos, soli Deo cognitos, qui anticipari quidem variis de causis possunt, sed tamen semotis omnibus causis calorem alterantibus, ulterius non possunt prorogari, talisque mors in extremo senectutis gradu contingens rarissima est. Quis enim unquam ita exactè vivendi habuit occasionem, ut nunquam sex rerum, quas Medici vocant non naturales, usus, sibi noxam non intulerit? Nam qui salubrem vitæ rationem non servant, citius quam pro naturæ lege moriuntur, ut dicit *Galen. 6. de Sanit. tuenda.*

## CAP. X.

*An possint febres intermittentes, quas  
Agues Angli vocant, curari.*

**P**utant etiam plurimi adversus febres intermit-  
tentes, quas *Agues* vocant, nullum esse reme-  
dium, easque artis Medicæ vim superare.  
Illud autem cum experientia falsum esse ostendat,  
quandoquidem eas sæpius à Medicis curatas videre  
licet, multa hac de re dicere non oportet. Pendent  
autem illæ ex variis humoribus, biliosis, pituito-  
sis, melancholicis; Biliosæ autem si sint exquisi-  
tæ faciliè curantur, nam ex aphor. 59. lib. 4. *Tertianæ*  
*exquisita in septem periodis judicatur longissima*, mul-  
tò igitur brevior futura est, si remediis tempesti-  
vè adhibitis juvetur. Et ratio suffragatur: Cum e-  
nim alii morbi ab iisdem humoribus geniti curen-  
tur, quidni & intermittentes febres? Id tantum  
vulgo imponit, quod quædam admodum chroni-  
cæ & valdè longæ permaneant, ut sunt tertianæ  
quædam nothæ, & quartanæ. Attamen id non tol-  
lit curandi possibilitatem, cum sæpe ejusmodi  
morbi curati fuerint, quamvis non semper in o-  
mnibus ægris; alias dicendum foret etiam febres  
continuas omnes esse exitiales, quoniam quidam  
ex iis perierunt. Morbi à quibusdam Medicis rectè  
dividuntur in *Salutares*, qui natura sua ad salutem  
terminantur, qualis est febris ephemera; in *perpe-  
tuos & incurabiles*, qualis est, verbi gratia, elephan-  
tiasis; & in *incipites*, qui interdum curantur, inter-  
dum occidunt, quales sunt plurimi alii, inter quos  
etiam febres intermittentes reponi debent, quas  
in quibusdam brevi curari contingit, in aliis verò  
diutius permanere; Non enim omnes ejusdem  
speciei morbi, eadem semper habent tempora, e-  
undemque exitium, sed quidam citiùs, alii tardiùs  
terminantur, quidam curantur, quidam occi-



dunt, pro varia humoris peccantis dispositione, in copia, crassitie, tenacitate, acrimonia, malignitate, pro ægrotantis habitu, viribus, anni tempore, regione, cœli statu, victus ratione, partium nobilium constitutione, ipsorum medentium solertia, aliisque circumstantiis, quas explicare hujus loci non est. Scribit *Hippocrates 4. aphorif 43. Febres quocunque modo intermiserint minimè esse periculosas.* Sunt igitur à prudenti & docto Medico curabiles, quamvis forsan inepti medicantes præpostera medicatione illas reddant incurabiles. Sic æstivæ quartana dicuntur breves, Autumnales verò longa, maxime qua hyemem attingunt, *aphor. 25. lib. 2.* Quod igitur in quibusdam multi morbi narrantur incurabiles ob varias causas, non est tamen credendum tales esse natura suâ, nec in Medicinæ dedecus concludendum, non posse ab arte vinci & superari. Non tamen fidendum gloriosis quorundam Medicastrorum verbis, qui nil metuunt tentare, nihil promittere parcunt, pauca tamen præstant. Si fortè difficilem morbum ab ipsis non probè cognitum ancipiti remedio profligarint, quo sermone tanti miraculi gloria prædicari, quo munere compensari poterit? Sin minùs successerit curatio, culpam non in se, sed ægrotantis adstantiumve incuriam, aut ægri contumaciam rejiciunt.

## CAP. XI.

*Ex calore volæ manus, hepatis calorem non posse cognosci.*

FAMILIARE est quamplurimis cum manuum vola incalescit, credere se hepatis calore præternaturali affici. Quod tamen non est valde certum, quamvis etiam Medici quidam id crediderint. Quis enim major est consensus hepatis eum manibus, quàm cum qualibet alia parte? Scribit *Galenus in arte parva, totum corporis habitum*

tum incalescere si jecur sit calidus, nisi cor obstiterit, & pariter totum calefieri à corde nisi Iecur obstiterit. Non igitur manibus solis id debet attribui; Deinde calor ille insuetus manuum potius erit à corde, qui spiritus calidiores, sanguinemque fervidiorem toti corpori communicat, quam Iecur. Præterea probat *Galenus libro adversus Lycum* nullum esse inter ventriculum & manus consensum, quoniam triplex est sympathiæ ratio, prima vicinitatis, secunda familiaritatis operis, tertia per communionem vasorum. Quod jecori & manibus possumus applicare. Inter has enim partes nulla est vicinitas, nulla operis familiaritas. Siqua igitur sympathia est, ea erit tertii generis, per communionem scilicet vasorum. At vasa quæ à jecore proveniunt, non ad solas manus, sed ad totum corpus deferuntur. In manibus ipsis præter venas sunt arteriæ quæ à corde majorem calorem deferunt. Non igitur ex manibus calidis potius jecoris quàm cordis calor inferri debet. Insuper jecoris calor est perpetuus, aut saltem diutissimè perdurans, sed manuum ille ardor fugax est, sæpius abit, reditque. Demum licet id attribuunt alii authores, si scilicet lien sit ἀνάρπρον, nam si sit κατάρπρον inferiores partes calere dicuntur. 6. *Epid. Sect. 2. textu 32. Avicenna* quidem *Fen. 13. lib. 3. tract. 1. cap. 3.* vult longitudinem digitorum indicare magnitudinem hepatis, & ejus calorem. Sed rectè illum ridet *Averrhoes 4. Colliget. cap. 4.* Et homo quem tu scis, dicit quod brevisitas digitorum significat parvitatem hepatis, & hic apparet quod nescivit bene ubi esset virtus informativa, & non consideravit nisi in materiis, & dimittamus istum cum aliis, quæ sunt verba *Averrhois*, qui non credidit ex manibus signa temperiei, aut conformationis hepatis desumi posse, cum nullus sit inter has partes major quàm inter alios consensus peculiaris. Vnde etiam *Galenus in arte parva* cum signa Iecoris calidi explicat. Istud de calore manuum

manuum signum omisit, sicut & Gracj reliqui *Aetius, Aegineta*, & alii. *Argenterius* com. ad prædictum locum artis Medicæ, Galenum reprehendit, quod hoc signum omiserit. Sed rectius alii Galenum tuentur, quia signum istud vanissimum est populi commentum, nam non solum manus, sed & totum corpus necessario redditur calidum, nec calor ille manuum *μόρμος* est, sed instabilis & incertus.

## CAP. XII.

*De iis qui Iecur calidum, Ventriculum autem frigidum accusant.*

**V**ulgare quoque est, & valdè ordinarium, quamplurimos de Iecoris calore & Ventriculi frigiditate conqueri, quoniam in ventriculo cruditates flatusque persentiunt, interdum simul quosdam in corpore ardores fugaces, in facie, manibus, pedibusque. Sunt autem hi de quibusdam monendi. *Primò* certum est ventriculum quia pars est spermatica, membranosa, exanguis, alba, temperamenti esse frigidi, sed credere hepatis calorem ipsi nocere absurdum est; Docet enim *Galenus* eum undique calidis visceribus à natura fuisse munitum, ut felicius suas obiret functiones, medius inter Iecur, lienem, omentum, colon intestinum consistit, iisque undique cingitur, ut instar lebetis inter plurimos focos ab his incalescat, unde non putat esse probabile *Riolanus in Anthropog.* Iecoris calorem ventriculi calorem imminuere, cum potius illum augeat. *Secundò* observari debet, prædicta symptomata sæpe contingere in sanis, viscerum calidiori temperie præditis, sed prava victus ratione utentibus. Ex crapula enim sive illa vini fuerit, sive cerevisiæ, cruditatum in ventre maxima copia succrescit, fluctuationes fiunt, ructus, inflationes, sputationes; nam familiare admodum est etiam ex calidis

fidis potibus nimia copia haustis , frigidus affectus proficisci , qui non ex partis intemperie , sed ex sumentis vitio contingunt Interea jecur calidius primum spiritus horum potuum tenuiores allicit , unde inflammatur , sanguinemque fervidiorem toti corpori suppeditat. Inde simul percipere sibi videntur in corpore fervorem, in ventriculo cruditatem. Et sic male partium contrarias intemperies , non autem sua errata accusant. Quod si sobriè viverent , aut temperatis potibus uterentur, illud non experirentur. *Tertiò* quibusdam id consuetum est etiam si sobriè vivant, & tales sunt hypochondriaci quibus hypochondria fervida sunt, sicca, & obstructa , quod malum in hac regione frequentissimum est , & sæpissimè ex supradicta causâ , inordinata scilicet vivendi ratione, proficiscitur ; In his autem non fit ventriculus frigidior ex vicinia ferventium hypochondriorum sed quia multus humor melancholicus & flatuosus in stomachum mittitur, qui coctionem vitiat, unde ventriculum sibi videntur habere frigidiorrem, quam habent. Inde quarunt Medici, unde fiat, quod hypochondriaci , quum affectu calido tententur , tamen cruditatibus & flatibus abundant. Cujus rei causam quamvis etiam quidam Medici referant ad ventriculum frigidum , satius tamen est, ut diximus , referre ad humores pravos ventriculi tonum labefactantes , unde cruditates non tantum acidæ, quæ sunt à frigore , sed etiam nidorosa caloris soboles proveniunt, maximè si alimenta nidorosa ut ova frixa , & similia assumantur. Hinc rectè ait quidam symptomata in hypochondriaco affectu multa sunt frigida , sed causa calida.

## CAP. XIII.

*Maritum loco Vxoris gravida non agrotare.*

**I**Nter errores quamplurimos maximè ridendus hic esse videtur, quod vir credatur agrotare, iisque affici symptomatis, quibus ipsa mulier prægnans solet, illudque experientia confirmatum plurimi esse volunt. Habebam ægrum febre laborantem, cum urina valdè accensa & turbida, qui agrotationis suæ nullam causam agnoscebat, quam uxoris suæ graviditatem. Nullibi terrarum quam in Anglia id observatum memini me audivisse, aut legisse unquam. Certum autem est plurimis variisque symptomatis, gravidas mulieres primis gestationis mensibus affici solere, maximè quæ corpore sunt cacoehymo, & impuro. Solent autem oriri ex retentione menstruorum. Cum enim ejusmodi fluore soleat natura uti, non tantum ad sanguinem superfluum, sed etiam ad vitiosos humores expurgandos, retento & cohibito ejusmodi sanguine, illi etiam retinentur; Sanguis ipse retentus, quia ob foetus parvitatem, principio imprægnationis, in nutritionem totus non absumitur, putrescit, & vel ad nobiles partes confluit, vel saltem tetros ad illas vapores transmittit, unde prædicta symptomata in ventriculo, visceribus, abdomine, capite, totoq; corpore emergunt, vomitus, cibi fastidia, picæ, malaciæ, tormina; capitis vertigo, & similia. Cum igitur vir causas ejusmodi affectuum in seipso non habeat, sed sola uxor, ipsam solam agrotare rationi conveniens est. Nec si quis maritus, cum uxor gravida est, agrotat, ab uxore infectus fuit, sed potest ex peculiari proprii corporis vitio id pati. Sicut dum hæc scribo pluit, non est tamen pluvia aut causa scriptionis, aut scriptura pluviae. Res nova non est, viros & mulieres etiam simul agrotare. At mirum est hætenusque ignotum, graviditatem affectum

affectum esse contagiosum , & non alias mulieres , sed viros, quos natura immunes ab hoc labore fecit, solos infici. Præterea observatum est non omnibus mulieribus ejusmodi symptomata, aut saltem non omnia singulis contingere , & tamen accidit sæpe ut cum mulier bene valet , ægrotet maritus , etiam absens per aliquot millaria. At si ex gravitate uxoris id patitur , cur ipsa eodem tempore simul incolumis permanet? Causæ enim naturales prius agunt in proximum, quam in remotum. Et propterea quum noxios ejusmodi humores mulier secum ferat, prius ipsa & gravius ægrotabit. Scio quædam dici posse de sympathia, antipathia, contagio, fascinatione, aliisque nugis. At si hæc ita se habent, cur virgines , viduæque, quæ sapissimè ex suppressione menstruum ejusmodi symptomatis infestantur , contubernalis familiarisque suos suasque non inficiunt, cum eadem causa sit, & haud dubiè cum quibusdam sympathiam habere possunt. Ad inferendum contagium non solum agentis efficacia , sed etiam in patiente dispositio requiritur, & analogia. At quis non credat, aliam mulierem ad ferenda & suscipienda graviditatis symptomata esse viro aptiorem , cum ad proles generationem creatæ fuerint omnes , & propterea una mulier ab alia sibi maximè cavere deberet. Præterea contingere potest mulierem pallidis coloribus laborantem , graviterque afflictam, viro nubere , quem tamen, etiamsi suppressi sint menses, nunquam inficiet. Cur igitur cum eadem gravida fit , nec nova ulla ægrotandi ratio præter mensium suppressionem accedit , maritus ægrotabit ? Malè cum viris ageretur, si quoties uxoribus supprimuntur menses, toties non ipsæ sed illi laborarent. Sed quoniam ex sola relatione absurditas hujus erroris patet, plura non addam. Iupiter Bacchum in formore , Palladem in cerebro gestavit. Sed hoc illi esto proprium.

## CAP. XIV.

*An Medici extranei & Peregrini, agrotantium alterius regionis temperiem cognoscere possint.*

Cognoscere agrotantium temperaturam maximè confert ad morborum cognitionem, & curationem, resque hæc longam & difficilem postulat tractationem. Id tantum addam, quorundam hanc esse opinionem, non posse peregrinos cognoscere temperaturam hominum alterius regionis, ut Gallos Anglorum; Verùm id repugnat naturæ artis Medicæ, cujus præcepta generalia sunt, & facilè applicari possunt cuilibet regioni. Ars enim omnis est universalium non singularium, unde hic in *Anglia* secundum Galenū & Hippocratis præcepta, Medicinam omnes qui benè medentur faciunt, quæ si quis probè intellexerit, potest hominum diversitatem secundum ætates, regiones, variamque cœli faciem dignoscere, & quamvis illis medicamenta convenient. Eâ de re scripsit Hippocrates *librum de aere, aquis, & locis*, valde elegantem; Docet enim ars Medica ubicunque doceatur, signa quæ petuntur à regionibus, ad morborum tum diagnosis, tum prognosin, & indicationes quas ad victus rationem instituendam, venæ sectionem & purgationem faciendam, aliaque remedia administranda regionum diversitas suppeditat. Aliter ars non feret, si tantum loco cuidam præcepta sua accommodaret. Galenus in Græcia natus, & educatus, Romæ faciebat Medicinam, unde Hippocrates 3. prognost. ait suam doctrinam posse applicari cuilibet regioni, tam calidæ quam frigidæ, Libyæ, Delo, Scythiæ, aliisque. Arabes quoque à Græcis mutuati sunt sua medendi præcepta, quæ eadem sunt cum Galenicis, quæ nos promiscuè sequimur. Ideo pr-

prudentissime factum est, quod legi institutum fuisse ab Hispanis & Lusitanis, ut Medicina apud Indos, ubi ipsi dominantur, fieret eodem prorsus modo quo in Europa secundum Galeni & Hippocratis doctrinam. Scio multa dici posse de varietate illa temperiei quam regiones dant incolis, nam etiam in uno eodemque regno diversitas magna est incolarum, pro vario regionum situ, soli natura, ventorum perflatu, aliisque de causis quas omnes explorandi rationem ars Medica tradit. Et tamen quacunque demum illa regio sit, etiam in maxime borealibus, sunt omnis temperiei homines, calidi, frigidi, biliosi, pituitosi, sanguinei, melancholici. Quidam qui sine licentia Medicinam exercebat, Chirurgus professione, nec tamen valde peritus, ut mihi invidiam faceret, saepe id dicere solebat, non posse Gallos Anglorum naturam, & constitutionem intelligere. Rogatus semel à me fuit, quamnam esset illa Angli constitutio qua differt à Gallo, quibus signis illam cognosceret, cum ubique omnis temperiei homines reperiantur. Quæ cum non nisi à docto Medico cognosci possint, non mirum est si quilibet de trivio Medicaster ea ignoret. Est enim res difficillima cognitu. Ideo dicebat *Galenus* si ægrotum temperiem perfecte cognoscere posset, se *Æsculapio* parem fore. Id nunc addam, quod vulgo fertur de temperamento variorum populorum à paucis probè intelligi, nam singuli homines propria sua habent, & ab invicem discrepantia temperamenta, à principiis generationis innata. Non possunt igitur commune aliquod habere, in quo omnes conveniant. Illud igitur est tantum assuetudo quædam, & naturæ inclinatio ad aërem patrium, & victus consuetudinem, quæ sine mutatione proprii temperamenti, & ingeni, quod à parentibus habemus, à nobis sensim acquiritur, unde fit ut quidam in aëre patrio, quantumvis insalubri, melius degant quam in alieno. Scribit

*Avicenna*



70 DE VULGI ERRORIBUS  
*Avicennas* agrotaturum Indum, si esset in regione Sclavi. Quamvis etiam id non sit perpetuum, sed fieri possit ut quidam Anglus salubrius etiam in Hispania, quàm in aëre patrio degat.

C A P. XV.


*De iis qui morbos ferme omnes ad refrigerationem referunt.*

**R**Es est satis frequens & ordinaria, ubi in morbos quispiam incidit, aut non satis bene valet, accusare frigus externum, à quo non satis curiosè sese tutatus est. Et sanè sèpissimè hæc potest esse multorum malorum causa. Aër enim à nobis continuo inspiratione & transpiratione attrahitur, suasque nobis qualitates imperitur, qualescunque tandem illæ sint. Nocet autem maximè quando apertis calore poris repente frigidus accedit, eos enim statim obstruit, unde retentis fuliginibus in corporibus cacochymis febres faciliè succedunt, aliis autem dolores, lassitudines, spirandi difficultates. Inspiratus aër frigidus pulmonum bronchia rigida facit, unde vix potest pulmo dilatari. Sèpissimè inde rumpuntur vasa pulmonum, aliarumq; partium, sanguis in capacitatem quandam defluit, putrescit, & corrumpitur, & prava suscitatur symptomata. Verum circa rem hanc quædam monere oportet. Primò non omnes qui hanc causam accusant, inde tamen agrotare, aliæ enim sunt & variæ morborum causæ externæ. Vnde sèpissimè in aëre frigido degentes, nihil inde mali patiuntur; iidem verò etiam æstate media, pannisque benè cooperti, ab eo tamen se affectos & læsos fuisse queruntur. Idem de reliquis externis morborum causis est sentiendum. In una eademque civitate plurimi sunt qui eodem utuntur aëre, iisdem exercitiis, eademque victus ratione, tamen cum in morbos incidunt,  
variis

variis omnino , discrepantibusque morbis afficiuntur. Si horum quispiam ex crapula , aut cibo pleniori agrotare sese dixerit. At forsitan centies antea eodem modo , & innoxie largius sese invitaret: quod pariter de aëre frigido , & nimio labore dicendum, cum sæpius frigidiores aërem, sine noxa pertulerit , & eundem laborem perfecerit, mirum quomodo inde jam agrotaret. Sic videmus sæpe ultimum cibum , aut exercitium illud quo quispiam ante morbum usus est , aut ultimum frigus quod perpeffus est , accusari, sicut & ultimum remedium creditur etiam sanitatem attulisse. Vbi notandum est , has causas dici externas, nec semper & quolibet tempore corpus afficere, sed tantum quando interna in corpore latet dispositio, & morbosus apparatus, quem ejusmodi causæ suscitant. *Secundo* monendum, ejusmodi causas abire , nec remanere , ipsarum tamen effectus, morbos scilicet ab internis causis suscitatos in corpore permanere , unde causarum externarum contemplatio non semper ad morborum cognitionem aut curationem necessaria est , sed solum internarum quæ morbum concitant & fovent. Nam videmus ab aëre frigido inchoasse morbum, nec, etiamsi temperies aëris mutetur , illum curari, sed sæpe persistere curatu difficilem. Vnde etiam *Tertio* monendum est , non esse remedia ex causarum externarum natura metienda , nihil enim indicant. Nam si iis quibus frigus initium morbi attulit , convenire semper calefacientia , quod tamen non est perpetuò verum, nam sæpe refrigerantia profunt ; Ex aëre frigido, ut diximus , sæpe febres , eæque ardentissimæ oriuntur , sicut & ex balneis nimium frigidis, stipatis scilicet corporis poris , & retentis fuliginibus, à quibus sanguis accenditur. Hic si populus ut solet , calefacientibus pugnet adversus morbum, tantum abest ut illum profliget, quin potius augebit maximè. Conveniunt in hoc casu interna re-

72 DE VULGI ERRORIBUS LIB.II.  
na refrigerantia, &, ut sæpe docet *Galenus*, maxi-  
mum remedium est venæ sectio, 8. *Methodi* in  
diaria ab obstructione cutis genita sanguinem  
mittit, ne putredo sequatur. Etsi enim externa  
causa frigida sit, interna tamen cui soli curatio  
debetur, sæpe calida est, & retentis fuliginibus ta-  
lis evadit.





# D E V U L G I E R R O R I B U S

L I B E R T E R T I U S .

De erroribus circa victus rationem  
tam sanorum , quàm ægro-  
rum.

## C A P . I .

### *De bonitate Aquarum.*



Quæ potum in morbis adeo com-  
mendant *Hippocrates, Galenus, Avi-*  
*cennas*, aliiq; Medicorum principes,  
ut maximas post venæ sectionem  
in febribus ardentibus curandis par-  
tes illi tribuant , estq; etiam plurimarum gentium  
potus ordinarius. Verumtamen quidam hodie ab  
ejus usu ita abhorrent , ut præsentaneum ferme  
venenum esse putent. Credunt autem illi ob re-  
gionis frigus , aquas in Anglia crudiores esse, mi-  
nusque tenues & salubres, quam in Gallia, Hispa-  
nia , & regionibus fervidis. Et sanè de bonitate  
aquarum maximè sollicitus debet esse quilibet.  
Dignoscitur autem optima odore, calore , sapore,  
hypochondriorum levitate , facili caloris & fri-  
goris receptione ; ita ut optima illa sit, quæ visui  
limpida, & pellucida , nullius rei saporem , vel o-  
dorem refert , tum quæ levissima est, tenuissima,  
hypochondria celeriter pertransit. Talem aquam  
cum reperire ubique liceat , in regionibus etiam  
gelu adstrictis , talemque sæpe in hac regione in-  
venerim,

venerim, plurimum errare illos conicere licet, qui generaliter aquas patrias damnant. Error autem hic est, quod ex regionis frigore aquæ bonitatem, vel insalubritatem æstimant, nam immoderatè frigidam eam esse credunt, & propterea crudam, coctuque difficilem, quam ἀτέραμνον vocat Hippocrates. Quod tamen non est admittendum: nam bonitatem suam aut cruditatem, aqua à sole non mutuatur, quia ejus calor aquam calefacere non potest in terræ visceribus, etenim eo usque non pénétrat, qui vix ad nos per ædium tecta pervadit. Id docent cellæ subterraneæ, quæ summa æstate frigidiores sunt. Quod si Sol hujus rei causa non est, pariter nec Mundi partes causa esse possunt, quæ tantum ob Solis propinquitatem, vel remotiorem firum calidæ fiunt. Rectius igitur alii subterraneum frigus, vel calorem accusant, nam si mitis est terræ calor, cocta est aqua, si verò adsint incendia, aut calida, aut tepida erumpit, ita ut omnis generis aquæ in quaslibet Mundi partes effluere possint: quod maximè verum est, si de ipso fonte hauriantur, antequam ab aëre frigidiori fuerint alteratæ. Adde transcolationis modum: Ea siquidem purior est, non quæ solem aut aversum habet, aut spectat orientem, sed quæ magis percolata est. Est enim corpus natura sua simplex, quod nisi alienæ cujuscpiam rei permissione inquinetur, æqualis semper erit bonitatis, ubique terrarum. Propterea quæ magis percolata, sicque defæcator reddita est, melior erit, quantum ad naturæ suæ integritatem magis accedit, & ab alienæ rei permissione libera est. Ideo cum percolatio rem hanc totam perficiat, dubium non est, ubique posse & bonas, & malas aquas scaturire, prout percolatio aut melius, aut pejus fit. Hoc autem opus ex natura terræ dependet. Ex hoc errore dependet alter, quod ex aqua satis impura cerevisiam tenuem leviter tantum decoquant, nam levi coctione non potest emendari,

darî,nec cruditas tolli. hinc contingunt mala quæ aquis crudioribus attribuunt authores , quod crassæ sint, ventri graves , diutiùs hæreant in præcordiis, fluctuationes efficiant, facile corrumpantur, nec alimentum probè distribuunt. oportet enim potum esse levissimum,& facile meabilem; Pejus faciunt, qui eam bibunt recentissimam , ut multi solent , præsertim in Borealibus Angliæ regionibus,sic enim nec palato sapit, nec corpori salubris est.nam gravis hypochondriis est ob facum multitudinem,& obstructions parit. Optima igitur erit mediocris,bene decocta,probè defæcata.

## CAP. II.

*Aegrorum lintea sæpius esse permutanda.*

**L**Intea sæpius ægris permutare piaculum plebi esse videtur. Inde siquidem credunt ægros reddi imbecilliores,hunc errorem apud suos indicârunt, & reprobarunt,*Holler.cap.de Febre ardente,Rondelet.cap. de Febre Synocha* , sed rationem non reddiderunt. Iubent autem ut sæpiùs ægro- tantibus lintea permutentur. Nam ex diutina illorum retentione tria incommoda ægris contingunt : corporis transpiratio impeditur , sudores & sordes in indusiis retinentur,putrescunt ,fœtorem contrahunt , sordes & sudores corpus obstruunt , sicque calorem ingeminant , quæ tria quantum ægris sanisque incommoda sint,Medici omnes norunt. Iubet *Hippocrates* circa ægros omnia munda esse debere,& *Galenus* omnibus modis transpirationem liberam servare studet, ut aër frigidus attrahatur , & fuligines excludantur, maximè in febribus continuis , in quibus ut plurimum ex pororum cutis obstructione febris contingit. Itaque iis obstructis tum à sordibus, tum à sudoribus, vaporum & fuliginum retentio consequitur,inde febris , quæ prius erat, augetur, aut

nova accenditur. Contrà ; vix fieri potest, ut ille, cui corpus optimè transpirat, liberum ac patens est, in morbo incurrat graves & periculosos. Veteres qui linteis non utebantur, frequentem habebant tum balneorum, tum frictionum usum, quibus corpus aperiebatur, & mundabatur. Adde quod retenta putrescunt excrementa, sudores malè olent, unde febrilis calor succedit incrementum, nec vacuatio ista per poros cutis commodè sequitur. Optimum est igitur frequentissimè lintea ægrotantibus permutare, & cum sudârint, corpus diligenter abstergere.

## CAP. III.

*De libro diætetico Lessii.*

**L**Essius Societatis Iesu Theologus, vir doctissimus, eleganti sanè libro diætetico, ita singulorum hominum victus rationem conatus est metiri, ut voluerit sufficientem cibi quantitatem esse unciarum duodecim ; potius verò quatuordecim, quam qui observabit, nullum cibi genus recusare debet quo populus utitur, nec facile in morbos ex plethorâ, vel cacochymia incidet, semperque corpore vegeto & animo alacri præditus erit. Quæ sanè omnia de sobrietate in genere vera sunt. *Sanitatis enim studium est, non satiari cibis, & impigrum esse ad labores. 6. Epidem. Sect. 4. aph. 20.* Sed quantitas illa cibi potusque non mihi videtur admodum Medicorum placitis consentanea ; Quantitas enim alimentorum omnibus hominibus eadem esse nequit, sed diversa pro temporum & locorum ratione, ciborum genere, exercitationibus, laboribus, & natura sumentis. Videtur autem præcipuè religiosi viris accommodasse illud vitæ institutum ; Æstate minor, hyeme major cibi quantitas convenit, quoniam *ventres hyeme sunt calidiores, somnique longiores, ex Hippocr. 1. Aphorism. 15.* Quoniam igitur differt corpus à corpore,

corpore, natura à natura, & differunt regiones, anni tempora, ætates, variæque sunt alimentorum naturæ, certa mensura præscribi nequit. Quædam alimenta sunt polytropa, quorum exigua sufficit quantitas, quædam oligotropa, quæ maiore copia debent exhiberi. Vnde libro de veteri Medicina, rectè scripsit Hippocrates, nec modum, nec pondus, nec numerum cognosci posse, nec aliam certitudinem reperiri, quàm corporis sensum. sic docet Galenus 2. aphor. 27. Eam quantitatem esse exhibendam, quæ ventriculum non gravet; Et manifestè scribit Hippoc. 1. aphor. 5. *Sanis periculosiorem esse tenuem victus rationem, quam plenior.* Cui assentitur Celsus cap. 1. libri primi, qui suadet bis die, potiùs quàm semel, & semper quàm plurimum, assumere, dummodò hunc concoquat. Idem scribit hominem sanum, & qui suæ spontis est, nullis obligare se legibus debere, modo etiam largiùs sese invitare. Victus indicatur à viribus, vires autem indicant sui conservationem; At victus ejusmodi vires non conservat, sed imminuit, calorem nativum exhaurit. Victus rationem triplicem faciunt Medici, tenuem quæ vires imminuit, mediocrem quæ conservat, plenam quæ easdem auget. Tenues autem nunquam sanis, sed ægris tantum competit, nam sicut *cibus sano robur est, ita agrotanti morbus.* ephor. 65. libri 7. & *impura corpora quo plus nutrities eo magis lades,* aphor. 1. d. lib. 2. In sanis verò servandum semper est natura robur, aut augendum alimentis: non frangendum; At vires quidem auget cibus plenior, tuetur & conservat moderatus, imminuit tenuis. hunc igitur in secunda valetudine semper fugere oportet. At reliquorum alterutro siue sit plenior, siue reficiendus, tuendisque viribus respondeat, uti conveniet, prout præsens status postulare videbitur, ut docet Galenus comment. Ad aphor. 4. lib. primi. Quod reperi sint inter sanctos Patres qui ad centesimum ætatis annum, continuis jejuniis & extrema cibi potusque abstinentia pervenerint, id po-



tius tribuendum est miraculo , quàm ulli causæ naturali, inquit *Mercurialis, ad aph. 4. lib. 2.* Ipse tamen Lessius rectè docet , non fuisse rem hanc miraculosam, sed naturæ possibilem. In genere victus ejusmodi spiritus paucos , minusque vivaces & agiles reddit , corpusque ad externas aëris injurias ferendas , & labores , minus aptum facit , *nam ubi fames, laborandum non est, aphor. 16. lib. 2.* Potest forsan corporibus humidis, assuetis, senioribus, vitam contemplativam agentibus convenire , *nam fames corpora siccant, 7. Aph. 59. & senes facile jejuni-um ferunt, aphor. 13. libri primi.* Quamvis igitur librum hunc doctissimi Lessii maximè probem , & religiosis cōtemplativam vitam degentibus commodissimum censeam , minùs tamen aliis convenit, aliud vitæ genus sectantibus ; in genere tantùm ex eo quilibet discere potest , sobrietatem virtutem esse maximè laudandam , & corpori admodum proficuum ad sanitatem corporis & animi tuendam, morbosque præcavendos.

## CAP. IV.

*Aegris non pleniorē, sed tenuem victum  
convenire.*

**R**ECTÈ scripsit Hippocrates , *Primo Aphorismo*, non solum Medicum , sed & adstantes , & ægrum officio suo fungi debere, aliàs remedia commodè nequeunt administrari , si quæ rectè Medicus præscripsit , adstantes aut omittunt, aut intempestivè adhibent, aut inconsulto Medico aliquid circa ægrum moliantur , quod postea ipsi futurum est nocivum. Ideo capite hoc loquimur de adstantibus. Solent enim mulieres illæ quæ ægrotantibus inserviunt , tum etiam affines, & amici ægrum invisentes , cibos obtrudere quâ plurimos, & sæpius, ad vires ut ajunt sustinendas, veriti semper ne ægri fame pereant. Optima sane illis mens est, virium siquidem integritas totius ani-

animantis conservatio est. Viſtus autem ratio omnium maximè virtum incolumitatem ſpectat, per accidens verò curationem, quatenùs morbo illiusque cauſæ reſiſtere debent. Solent autem poſſiſſimum peccare in quantitate, qualitate, & tempore, quibus non ſolum ciborum, ſed & omnium remediorum circumſtantiæ concludi ſolèt. Quantitatem quod ſpectat, nam ab ea faciemus exordium, notandum eſt, agrotantes habere latitantes intus cauſas morbiſicas, quæ viribus vim inferunt, cibus autem etſi vires natura ſua conſervare ſoleat, cauſas tamen morbiſicas non debellat, unde fit ut cibum morbus ſæpe reſpuat, quem vires poſtulant. *Unde corpora impura quò plus nutrit, eò magis lædes,* ſcribit Hipp. aphor. X. lib. 2. Qued obſervare deberent omnes qui dum agris opem ferre geſtiunt, in certam perniciem illos detrudunt, & ſive medicus quippiam aut imperarit, aut prohibuerit, ex arbitrio tamen faciunt quicquid lubet; Familiare autem eſt agris, præſertim febricitantibus, quibus poſſiſſimum cuſtodes adhibentur, cibos averſari ob humores pravorum ventriculorum obſidentes, à quibus, ut docet Galenus in comment. corrumpitur cibus, ſicque augentur humores pravi, nec eorum qualitas emendatur, hinc tantùm abeſt ut augeantur vires, quin potius magis labefactentur, nam ut rectè idem Galenus alibi ſcripſit, non nutritur corpus ab iis quæ ingeruntur, ſed ab iis quæ ingeſta probè coquantur, & digeruntur, quod in agrotantibus fieri non ſolet. Ventriculus enim languidior cibum probè non concoquit, ſed potius ab humorum vitio ſorum copia & contagione corrumpitur, ſicq; morbiſicæ cauſæ fomentum præbet; Vnde rectè ſcripſit idem Hippocrates. 7. aphor. 65. *Si quis cibum febricitanti dederit, ut ſano robur, ſic laboranti morbus.* Hippocrat. temporibus ſicut & noſtro ſeculo in viſtus ratione peccabatur, ut libro de viſtu Acutorum conqueritur. Ex ipſius igitur conſilio tenni

viſtu uti ſatius eſt. qui ſi ſanis ſufficere poteſt , ut ſuperiori capite diximus, multò magis ægris ; His igitur non plus dandum eſt, quàm vires ſuſtinere poſſunt. Obſervanda quoque hic eſt morborum natura : quidam enim ſunt diuturni , in quibus plenius nutrire licet, alii acuti , quibus tenuior viſtus ratio predeſt, ut 1. aph. 7. *Vbi morbus peracutus eſt, ſtatim extremos labores habet , & extrémè tenuiſſimo viſtu utendum eſt, ubi verò non, ſed leniorem viſtum contingit adhibere, tantùm cibi indulgendum eſt, quantum morbus extremis eſt mollior. & ſequentè aphoriſmo, quando morbus in ſuo vigore conſtiterit, tunc viſtu tenuiſſimo eſt utendum , quia ut dicit Galenus in comment. Non eſt natura ab humorum coſtione ad cibi coſtionem diſtrahenda. Cum igitur ex virium robore & natura morbi , viſtus quantitas æſtimanda ſit , ſitque in alimento tempeſtivè exhibitum magnum remedium , non debent adſtantes importunè illud adminiſtrare, præſertim mulieres , quæ verentur ſemper ne ægri fame pereant. Cibus tamen omnino non improbo, eo ſiquidem ſolo vires conſervantur, ſed quantitatem, qualitatem, utendi tempus , non niſi ex Medicorum conſilio & arbitrio præſcribi debere hoc capite inſinuavi.*

## CAP. V.

*De qualitate ciborum in ægris.*

**F**Amiliare eſt pariter non ſolùm in quantitate , ſed etiam in qualitate peccare. Offerre enim ſæpe ſolent ægris etiam febricitantibus cibos varios, quos roborantes vocant , ut alamcum ovis, macere, nuce moſcata, cinnamomo decoctum , alioſque quos variis nominibus appellant. Imò & urgent interdum ad ſolidos cibos ſumendos : Sed hæc omnia ſatis imprudenter. Et quidem primò certum eſt, ſolidos cibos ægris eſſe valde importunos , cum à Ventriculo probè concoqui

eoqui nequeant. At quæ sorbentur à ventriculo faciliùs vincuntur, & citiùs alunt, unde sorbitio- nibus potiùs quam cibis solidis alendos ægro- tantes suadet *Hippocrates* variis in locis. Ejusmodi enim diætâ natura citiùs roboratur, nec revoca- tur à pugna quam inivit cum morbo. *Facilius est repleri potu quam cibo.* Aphorismo 11. lib. 2. ubi per potum quicquid sorbendo sumitur intelligit, ut advertunt interpretes. *Secundò* observandum est in sanis quidem similes debere esse cibos, quia servari naturalis status postulat. Vnumquodque autem servatur similibus: In ægris verò ciborum qualitas morbo debet adversari, ut sit in cibo me- dicamentum, unicuique enim morbo suum con- trarium adhibeatur. *Calida natura refrigeratio, aqua potus, quies,* 6. *Epid. sect. 6.* Vnde contingit, ut qui ægrum roborare ejusmodi victus ratione cupiunt, sæpe magis lædant, causamque morificam ma- gis augeant, & sic vires magis affligantur. Igitur semper Medici prudentia adhibenda est, nec de- bent temere adstantes quælibet exhibere quæ a- liàs sanis proficua sunt, eadem enim ægris maxi- mè nocere solent; Et hæc hoc loco monuisse satis est. nam doctrinam hanc fusiùs explicare pertinet ad Scriptores rei Medicæ. Hic autem non Medi- cinam docere, sed errores suos populo indicare constitui, ut alibi dixi.

## CAP. VI.

*De tempore utendi cibis.*

**E** Tiam quo tempore commodè cibi possint exhiberi, consuli debet Medicus, aliàs error ægro perniciosus contingere potest, estque hodie error hic nimium familiaris: Solent enim adstantes, & præsertim mulierculæ, cibos ægris offerre quando minimè oportet. Vbi sciendum in morborum accessionibus à cibo esse prorsus ab- stinendum, ut docet *Hippoc. apheris. 11. lib. 1.* In ac-

cessionibus abstinere oportet, nam cibum dare nocuum est. Et quibus per circuitum sunt accessiones, in ipsa accessione abstinere oportet. Et 19. ejusdem libri. His qui per circuitus accessione habent nihil dare oportet, neque cogere, sed subtrahere adjectioni ante judicationes. Quae in re forsan tempore Hippocratis non parum peccabatur, sicut & hoc nostro, in quo pauci sunt qui indiscriminatim non alant agrotantes, nulla observata temporum ratione. Hic autem non solum prohibet cibum dare in accessione, sed & ægrum cogere, ut sumat. solent enim multi urgere agrotantes ad cibum capiendum: Natura autem dum in accessione adversus morbum decertat, conficiendo alimento minus intenta est, quo fit ut ille incoctus morbum ejusque symptomata augeat: Quae autem damna ex importuna cibi oblatione succedant, docet idem Hippoc. 4. de acut. Primum est caloris suffocatio, redit enim in paroxysmo morbificus humor in præcordia, calorem gravat, multò magis si cibus accesserit: secundum est paroxysmorum morbiq; incrementum & productio, non possunt enim simul materia morbifica & cibus probè concoqui, & evinci, proinde excrementa necessario cumulantur, quae inflammationes, æstus, aliaque symptomata, morbumque postmodum augent. At quoniam casus quidam est in quo ægros alere in paroxysmo non solum licet, sed necessarium est, quando scilicet æger calidæ admodum est & siccae naturæ; os ventriculi habet imbecillum, & sensus exquisitissimi, ita ut à quolibet humore faciliè offendatur, & syncopes periculum afferat, tunc nutrire iis rebus quæ ventriculum roborant, utilissimum esse judicat Galenus, 10. methodi cap. 3. ubi historiam narrat juvenis cujusdam, qui æstate tertiana laborans, nisi in accessione cibum capiebat, incidebat in syncopen. Verum casus ejusmodi rarus est, & non exiguam in Medico solertiam judiciumque expostulat, & vulgi captum superat, ideo non sine consilio prudentis

dentis Medici factum hoc licet imitari. Quæ à me dicta sunt ut seriò cogitent omnes, non esse temerè utendum iis remediis quæ aliàs naturæ maximè familiaria esse videntur. nam in singulorum exhibitione plurima considerata sunt, quæ solus peritus Medicus novit; Ea autem plurimi qui temere Medicinam faciunt, ignorant, qui tantum id curant ut popularem captent aurum, & populo placeant, & videantur esse de viribus ægrotantis esse solliciti, quarum tamen conservatio non ex verbis, sed commoda remediorum administratione dependet. Meminerint ergo omnes, non semper ægris esse obtemperandum, ut si noceat id quod æger expetit. *In his autem agris obtemperandum est, inquit Hippoc. 6. Epid. sect. 4. textu 7. Ut scilicet cibus & potus purè conficiantur, grata etiam sint quæ viderint, & mollia quæ attingunt, sed non admodum ladant, & faciliè reparabilia sint, veluti frigida exhibitio ubi ea opus fuerit, & alia. Sic rectè vult Avicennas seu. tertia primi, quæ expetuntur ab ægris concedi posse, modo detrimentum corpori non accedat; & Hippoc. aphor. 38. lib. 2. Parùm deterior cibus & potus, suavior autem, melioribus quidem, sed minus suavibus est præferendus. Vbi non prævos cibos, sed tantum paulò deteriores concedit, modò æger admodum iis delectetur, & præfert illis quos æger omnino abhorret, quales nunquam ægris sunt concedendi, sic Galenus 1. ad Glaucon. concedebat febricitantibus ut fructus gustarent. Sicut igitur nimis austeros Medicos non probo, pejoris tamen sunt nimium indulgentes, qualis olim erat Romæ Asclepiades, qui ægris concedebat balnea, vinum, carnes, & quicquid ægris gratum erat, & optatum, sicque mentes hominum mirabili artificio ad sese trahebat, haud dubiè non sine insigni multorum perniciæ.*

Ex prædictis error alter observari potest. In febribus enim intermittentibus, quando toto corpore frigescent ægrotantes, potus & actu calidos

& multum calefacientes propinant, ut molestum illud frigus abigant, quod repugnat Hippocratis, veterum & recentiorum Medicorum auctoritati, qui in accessionibus nihil præbere jubent, suadent potius demere de cibo & potu. Hinc jubet *Hippocrates* 1. *acut.* cum frigidi pedes fuerint, tum à sorbitione tum à potu abstinendum, potus enim præsertim calidus faciliùs corrumpitur, & febrilem æstum exasperat; in principio igitur nihil omnino dare satius est; sed cum calor ad pedes descenderit, ut idem ait *Hippocrates*, aliquid dare licet, sed tale quod morbo non sit noxium, quales calidi isti potus esse solent.

## CAP. VII.

*De potu quem Angli possetum vocant.*

FAMILIARE est ægris in potu possetum dictum præscribere, est autem ex lacte concreto factum. quod non improbo, habet enim vim feri quæ aperiens est. Sed tantum abusus hic aliquos notare volo; Primò malè interdum coagulari lac admistione cerevisiæ fortioris, aut vini sive Gallici, sive Hispanici, tunc sanè sicut commodè, utiliter, & cum voluptate sanis præberi potest, ita ægris febricitantibus, & in quolibet morbo bilioso nocet, nam corpus calefacit, causas febriles auget, jecur inflammat, ob dulcedinem, & magnam penetrandi vim, caput tentat, & eadem mala infert, quæ vini potus febricitantibus inferre dicitur. Secundò potus hic ægris semper calidus præbetur, attamen febricitantibus frigidi potus magis placere solent, & prodesse, sitientibus enim calidos & calefacientes potus addere non est adeo consentaneum, unde etiam Galenus aquam frigidissimam præscribit ad ardorem temperandum. Sicut igitur in quibusdam hunc potum non improbo, ita in febribus acutis & biliosis minùs idoneum sentio. Si quando igitur ejusmodi ægris præbere

præbere illum volunt adstantes, aut si ægri ipsi illud postulent, coaguletur lac fervens, vel cum succo limonum, aut paucō aceto, addendo aliquid sacchari; Quod concretum est rejiciatur, sic solum remanet serum succis acidis admistum, ad refrigerandas febres, & obstructions solvendas optimum remedium. Sani autem possunt quolibet modo præparato uti ad libitum. Quod si ex tenuiori cerevisia lac coaguletur, etiam proderit ægrotantibus, nam refrigerat, aperit, & plurima corpori bona afferre potest, ejusmodi enim cerevisia vires habet aquæ hordei affines, quam tantopere laudant Avicennas & alii. Invenio apud Dioscoridem adumbratam posseti conficiendi rationem, sub nomine lactis scissilis. *Lac fissili novo*, inquit, *feruet, ramque ficulneo recenti movetur, inspersis, postquam bis aut ter efferbuerit, totidem acetī mulsi cyathis, quot sunt hemina lactis, ita enim serefcens liquidum ab eo dividitur, quod in caseū concrevit. Quamvis enim nunc tantum non adhibeatur artificium, tamen eadem est parandi ratio, lac enim primū effervesceat semel aut bis, dein vel vini vel cerevisiæ affusione fit separatio feri à crassiori substantia, & hunc potum probat Dioscorides, cui assentitur Paulus Aegineta libro primo c. 88. & Aëtius cap. 96. lib. 2. tetrabib. primæ. Sed clariùs Galenus comment. 4. de rat. victus in acutis, meminit feri per oxymel præparati, quod febricitantibus ad ejiciendam bilem, & alvum solvendam præfert, illiusque conficiendi rationem docet; Meliùs igitur foret si Dioscoridis, Galeni, & veterum imitatione, potus hic hodie in Anglia omnibus familiaris, ope succorum acidorum, aut etiam oxymelitis præpararetur, sic enim febricitantibus & biliosis magis conveniret.*



## CAP. VIII.

*Decoctum & jusculum Galli veteris ad nutritionem male præscribi.*

**Æ** Grotantibus alimenta & concoctu facilia, & boni succi, facileque nutrientia præscribi debere omnibus est in confesso, unde rectè gelatinæ, juscula consummata, & restaurantia dicta illis præparantur. Sed sæpe carnes minùs aptæ & convenientes eliguntur. Inter alias familiare est usurpare gallum pinguem & annosum, ex cujus decocto ejusmodi juscula parare solent. Id ex male intellectis Medicorum placitis primùm profectum est, apud quos celebratum est decoctum galli veteris. Ejus enim antiquissimus scriptor Dioscorides meminit, & in ordinario apud recentiores Medicinæ scriptores usu est. Verùm non ad nutriendum; Carnes enim omnes vetustiores concoctu difficiles sunt, crassum succum gignunt, probi succi & alimentalis minimum possident, ideo ægrotantibus nequaquam conveniunt, quibus nil nisi eupepton, & euchymon offerri debet. Id docet Dioscorides lib. 2. c. 43. *Ius, inquit, è veteri gallo alvum deficit, crudos humores, crassosque, atram bilem, & strigmenta elicit, prodest longis febribus, suspiriis, articularibus morbis, & inflationibus stomachi, modumque præparandi docet.* & Galenus xi. simpl. scribit jus gallinarum habere vim alvum retinendi, velut gallorum veterum subducendi, ubi pariter obiter monendum est ne juscula gallinæ iis qui purgationem sumpserunt, ante completam vacuationem præbeantur, quamvis enim nutrant, alvum tamen remorantur. Junioris autem galli jusculum nutrit optimè, humores contemperat, & propterea ægrotantibus optimè convenit. Legitur in antiquis Dioscoridis exemplaribus, & aliis præter Ruellii versionem, referente Matthiolo, *jus galli junioris maxime datur ad contemperandos*

*perandos humores vitiosos , & in ardoribus stomachi simpliciter paratum. Sed Mesues rem istam optime declarat cap. 23. de simplic. purgant. ubi postquam gallorum & gallinarum juvenum carnem inter optima alimenta numerasset , addit , interprete Sylvio , Decrepitorum autem præcipue gallorum caro nitrosa, & salsa, cibo inepta, medicamentosa est , jura suo maxime , potissimum vero gallorum ruforum qui ad motum sunt alacres , ad coitum ardentes, ad dimicandum fortes, obesorum & macrorum mediæ , quoque vetustiores, eo magis sunt medicamentosi Galeno. Id jus ob nitrosam, & salsam substantiam calidum est, lavat, terget, tenuat, flatum dissipat, cum semine anethi , vel dauci, & polypodio, & sale gemma coctum, & dolorem ventriculi, coli, ilium, renum, à flatibus ortum sedat, obstructa aperit, purgat pituitam cum turbith & Cnico, ob id confert arthriticis doloribus ex hac natus , &c. Ex quibus patet non ad nutriendum , sed ad medicamentosas vires veterem gallum usurpari; Quare in posterum melius facient, qui ægris ad alendum juniorum juscula præbebunt. Constans enim est Hippocratis, Galeni omniumque medicorum sententia , carnes omnes vetustiores minùs esse ad alendum idoneas , propterea ægrotantibus minùs convenire concludendum est.*

## CAP. IX.

*Aurum frustra incoqui jusculis tabidorum.*

**F**AMILIARE etiam est quibusdam, jusculis ægrotantium maxime tabidorum & consumptorum aurum addere, quod etsi noxium & perniciosum esse non credo, puto tamen esse inutile. de virtutibus quidem auri inter Medicos non parva est altercatio. Multi siquidem præstantissimi Medici cordis affectibus inservire statuunt, visum recreare, palpitationem, syncopen, lepram, epilepsiam curare, vino extinctum splenis doloribus mederi, melancholicis conferre, putredinem cohibere;

hibere. *Avicen.fen.5.cap.7.* In auro inquit naturæ sunt absconditæ quæ profunt veneno, si puer nascens teneat in ore, non timebit Dæmonem, si prægnans biberit, abortum non faciet. At *libro de Medic.cordialibus* aurum ponit inter argentum & hyacinthum, vultque esse argento præstantius, sed inferius hyacintho. Limatura ejus ingreditur medicinas melancholicas. Addit autem; argentum aliquantulum est frigidum & siccum, & ejus affectus est similis hyacintho, nisi quod debilius est. Hyacintho autem tribuit vim cor latificandi & roborandi ac veneno resistendi, quas vires ait ab hyacintho manare, ut à magnete virtutem trahendi ferrum, nec dissolvi & superari à calore nostro, sicut vegetabilia solent. id enim, inquit, substantia ejus non patitur, sed tantum calor naturalis ipsius penetrationem juvat. *Fernelius* ipse maxime commendat quod non sit malignitatis metallicæ particeps; *Paracelsus* quoque omnes morbos, lepram etiam, & podagram illius usu sanari posse contendit. Eosque plurimi recentiores sequuntur, aurumque variis medicamentis admiscunt; Verum hæc omnia alii negant. *Antonius Musa Brassavolus, Andreas Baccius de thermis, Fallop. Erasmus Rondeletius, Duretus*, aliique gravissimi viri. Præfert *Savanarola* aquam vitæ omni auro, quod ex vegetabili, cardiaco humanæ naturæ familiari eliciatur. Hanc ego litem hoc loco meam non faciam, quamvis enim cardiacum excellens, roboransque medicamentum aurum esse videatur, illud jussulis incoquere etsi innoxium, inutile tamen est, ab eo enim nihil dissolvitur, nec transit in liquorem, præter sordes quasdam ob substantiam plurimum compactam, quæ nullis ignibus, nulla coctione dissolvi potest; Deinde non est nobis *ὑπερβορυστον*, à calore nostro superari nequit, nec facessit in sanguinem, nec spirituum jacturam reparare potest, cum sit à natura nostra alienum, nec in eam converti possit: est enim metallo-

tallorum substantia adeo aliena ab humana natura, ut quovis modo præparata nunquam possint fieri alimenta, propterea aurum nec lepram, nec hæticam, nec tabem, aut morbos ab inanitione curare unquam poterit, qui non mera alteratione, sed substantiæ alicujus repositione indigent, qualem suppeditare nullum metallum potest. Cum igitur hætici non roborari qualitate sola, sed reparari humido substantifico postulent, frustra aurum illorum jussulis incoquetur, si quidem humidi radicalis jacturam refarcire nequit, cum non vertatur in alimentum, & quale assumptum, aut decoctum fuit, nulla ponderis imminutione excernatur. Hæc tamen non adimunt ipsi vim cardiacam, quæ forsan ipsi adest, ad venena morbosque melancholicos edomandos, sed nulla ad nutritionem. Non ita pridem vir bonus *Daniel Sennertus præfatione libri de consensu Chymicorum*, deceptus à sycophanta Germano scripserat gallinam per mensem auri foliis saginatam ita perfectè aurum in suam substantiam convertere, ut in pectore tres lineæ purè aureæ quasi ab artifice inductæ cerni possint, quæ sanè extraordinaria est nutriendi ratio, scilicet assumptum alimentum, etiam ad tertiam usque coctionem ita naturam suam retinere, ut prorsus immutatum, hoc est omnino à natura nutriti alienum, in ipsius tamen substantiam convertatur. Sed hoc experimentum etiam falsum fuisse qui periculum fecere testari possunt, ut de seipso profitetur vir doctissimus, & olim mihi notissimus Montalbani Petrus Laurenbergius (sub quo Philosophiæ tunc operam dabam) in examine aphorismorum Angli Salæ. Sed hæc non est unica fraus Chymicorum Impostorum, qui uni vero experimento falsissima multa addere solent, & vires extollere rerum quæ nuspiam comparent.

## CAP. X.

*Lac cum aqua permistum tabidis convenire.*

**Q**uoniam inter tabidorum, de quibus superiori capite diximus, remedia non postremum, sed præcipuum locum lac obtinet, de eo pauca dicemus, est enim ad hoc opus auro multò præstantius: nutrit enim, refrigerat, ulcera consolidat; & ad alia plurima utile est. In illius tamen exhibitione variaz cautiones sunt observandæ, quas Medicus considerare debet, ne potius noceat, quàm prosit, nam faciliè in stomacho corrumpitur. Quibusdam enim vertitur in nidorem, interdum acescit, vel concrevit in stomacho. Quum acescit, incoqui potest aliquid mellis, vel sachari: Aciditatis enim ventriculi frigiditas causa est, sed si vertatur in nidorem à calore corrumpitur, tum aquam etiam satis multam admiscere utile est. At populus hanc misionem aquæ non probat. Præstantissimi tamen Medici eam comprobârunt, nam fervorem temperat, lacti ipsi non nocet, hæsticis & tabidis refrigerando & humectando prodest, maximè si bubulum lac sit, quod hodie est omnium maximè familiare. Hippocrates 7. Epid. lac. exhibet bubulum cum aquæ sexta parte, tum quia ejusmodi lac natura sua crassius est, tum quia faciliè vertitur in nidorem. Et 5. Epid. textu 56, recenset historiam Pythoclis qui lac multa aqua permistum ægrotantibus exhibebat. Πυθοκλῆς τοῖς κάμνονσι γαλὰ πολλῶ ὕδατι μιγνύς ἐδίδδεν. Et sanè eadem ratio est cur Avicennas, alique lac detracto butyro exhibent, quia tunc magis aquosum redditur, ideoque magis refrigerat. sic pariter Galenus Asininum lac commendat, quia tenuissimum est, sero abundat, coaguli minimum habet, unde ad siccitatem emendandam, caloremque temperandum maximè est idoneum. Verum si ejusmodi lac desit, commodum

dum erit bubulum ad Asinini temperiem & consistentiam deducere, quod commodissimè aquæ permistio præstat. Id non tantum veteres, sed etiam recentiores advertunt, *Gordonius, Ioubertus, Hollerius* aliique. Scribit *Hollerius cap. de Phthisi & febre hectica: Si ructus sit nidorosus, parum aqua incaui debet cum lacte.* Quod consilium si plurimi sequerentur, majus ex lactis usu emolumentum perferrent, quam solent.

## CAP. XI.

*Falsum esse illud vulgare proverbium, Lac à jecore esse abluendum.*

**P**ROVERBIUM hoc multis valde familiare & ordinarium, quia non est magni momenti, de eo pauca tantum dicemus. Plurimi cum lacte vescuntur cerevisiam statim, vel vinum potant, dicuntque, lac à jecore esse abluendum, cujus dicti nulla est ratio. nam tunc nondum ad jecur lac pervenit, sed adhuc in stomacho continetur, quare non est cur à jecore abluatur. Potius ergo expectandæ forent horæ tres quatuorve à lactis sumptione, tunc enim prima ventriculi coctione peracta, lac in jecore continetur ut vertatur in sanguinem. *Secundò* lac potius quàm alios cibos à jecore abluere nulla ratio cogit. eadem enim est omnium ciborum ratio, quos aliquamdiu in jecore contineri ut in sanguinem mutantur, necesse est. *Tertiò* certum est, hoc modo lac in stomacho coagulari, & sic faciliùs postea corrumpi, tardius concoqui, stomachum gravare. Lac enim in stomacho concretum inter venena recensetur, & hominem novi qui hoc modo subito interiit. Observent igitur qui lacte utuntur, ne temere vinum aut potus alios lac dissolventes assumant; facile siquidem illorum usu lac in ventriculo corrumpitur, aëscit, & noxium evadit.

CAP.

## CAP. XII.

*Cerevisiam fortiozem non esse manè à jejunis bibendam.*

**H**Æc est usitatissima omnium fermè consuetudo, ut manè, postquam surrexerint, haustus habeant suos, ut vocant, matutinos ex cerevisia fortiori, interdum quoque etiam ex vino. Scio à quamplurimis Medicis nullo modo probari morem illum mane bibendi quemlibet potum, quia humectatio illa ventriculi robur dissolvit, laxum facit, & enervat, unde cruditatibus postea corpus repletur. Sed hæc absolurè à me non probantur, nam potus ille matutinus, modo cerevisia fortior non bibatur, cibi distributionem promovet, ventriculum expurgat, & ut rectè dicunt, abluit, calorem nativum temperat, corpus humectat, & quod credo verissimum, calculi generationem impedit, renes siquidem temperat & humectat, sicut veteres recentioresque plurima juscula ex butyro, malva aliisque ejusmodi præscribunt ad renum temperationem, quidni pari ratione imbecilliozem cerevisiam, quæ refrigerat, humectat, & diuretica est. Sed tamen unice cavendum est, ne manè ventriculo jejuno & vacuo cerevisia generosior, aut alii ejusmodi potus ingerantur, nam nervosis partibus nocent, unde podagra, arthritides, viscerum inflammationes, alique maximi morbi oriri possunt, nam propter subtilitatem, & vim magnam spirituum, ejusmodi potus sese insinuant in nervosas partes, unde arthritici fieri solent qui ejusmodi potibus impensè delectantur, & vino podagricis seriò interdicitur. Sed tamen etiam hic considerata est naturarum diversitas, nam qui temperamento sunt humidiori, quoniam exiguo potu egent, ne manè quidem jejuni bibere debent; Qui autem sunt sicciores jejuni quidem possunt & debent, sed non-

Non generosos potus , citius enim illis nervosæ partes offenduntur , & exsiccantur. Id confirmat *Gab.com.ad aphor.21.lib.2.* ubi docet , si ante ciborum usum liberaliore vini potu quispiam usus fuerit,illum maximè offendi , convulsionibus ac deliriis corripitur,& *com.ad aphor.28,lib.6.* Inter causas quare plurimi podagra & arthritide laborant, eam refert,quòd nullo præsumpto cibo vina fortia potent,*hac enim nervorum substantiam promptissimè offendunt,sicut & coitus.* Plutarchus quoque in symposiacis disputans , an novi morbi oriri queant, hanc novorum causam affert , quòd vina generosa nullo præmissa cibo potare soleant. Eadem de cerevisia fortiori ratio est,quæ eadem & majora mala inferre potest. Itaque sicut tenuioris cerevisiæ potum non improbo , quamvis etiam omnibus non conveniat,ità à fortiori censeo abstinendum, metu quamplurimorum morborum.

## CAP. XIII.

*Malè ad coctionem promovendam post crassiores cibos aquas vitæ stillatitias assumi.*

**H**ic pariter mos est quamplurimorum , ut si quando cibus utuntur difficilis coctionis, quales sunt carnes ferinæ , bubulæ , pisces falsi,aut facile corruptibiles , ut sunt fructus æstivi,horæi dicti, statim superbibant aquas generosiores stillatitias , 'ut aquam vitæ , cinnam. rosam solis dictam, aliasque ejusmodi , ad coctionem scilicet juvandam. Sed id non sine periculo sanitatis fieri solet. Cum enim prædicti cibi non nisi longiori in stomacho mora concoqui soleant , aquæ ejusmodi penetrante & permeabili virtute præditæ, cibos hos nondum probè concoctos in venas deducunt, unde cruditatum & obstructionum proventus. Sic rectè vetant Medici ne diureticis



94 DE VULGI ERRORIBUS  
 reticis simul cum cibis , aut statim post cibos utamur , ne ad vias urinæ stomachi cruditatem vehant, malumque pejus reddant ; Sic quoq; iisdem uti vetant , quando humor vitiosus aut copiosus est, aut in primis viis stabulatur, antequam purgatio præmittatur , alioqui metus est ne obstructions in urinæ meatibus, aut in visceribus, vel fiant, vel augeantur. Eademq; est ratio aquarum, quæ ad concoctionem promovendam assumuntur, ob magnam qua pollent aperiendi vim. Idq; plurimi aucthores Medici observârunt. Rondelet. c. de Paralyfi describit aquâ ad Paralyfin quam vult sumi vacuo ventriculo. *Qua multum calida, inquit , & tenuantia sunt , debent sumi vacuo & prius purgato ventriculo, nec commiscenda sunt cibis , nam cogerent cibos nondum concoctos secum descendere, & sic parerent obstructions.* Et c. 31. recenset historias duorum Medicorum , quorum primus cum vellet provocare menser usu aperiensium & attenuantium syruporum , deduxit mulierem ad paralyfin , quia crudi humores & glutinosi , qui erant in viis ductuum , vi ejusmodi medicamentorum deducti sunt ad partes , & nervis impacti paralyfin concitarunt. Alter cum vellet curare pallidos colores , eadem ratione deduxit puellam ad paralyfin crurum. Sed clarissimè capite de palpitat. Ad intra, inquit, dentur illa qua calefaciunt ventriculum, & flatus discutiunt. Cui rei est animadvertendum. Nâ tribus aut quatuor horis ante pastum dare possumus qua fortiter calefaciunt, & flatus discutiunt, modo jecur non sit præcalidum, qualia sunt diatrion pip. diacym. dianis. aromat. ros. diagalanga & similia. Hæc non debent dari immediatè post, nec ante pastum , quia sua caliditate & tenuitate secum statim ad primas vias alimentum semicrudum raperent. Hinc patet illos errare, qui pulveres maximè calidos à pastu exhibent, qui debent esse mediocriter calidi. Quod consilium etiam ab aliis probatur, ut quæ digestionem promovent cibos præcedant , non sequantur , ut docet Riolanus , Gordonius in praxi , Fuchsius capite de cruditate.

ditate. Videntur aquæ prædictæ primum valde calefacere , sed tamen postea , præsertim si familiaris illarum usus est , multum nocent. Savanarola Medicus suo tempore insignis refert historiam Francisci Gonzagæ Marchionis Mantuæ, qui cum ad stomachi imbecillitatem curandam, aqua vitæ ex consilio Medicorum uteretur , in tantam venit debilitatem , ut omne alimentum in ventum verteret , & nisi optima victus ratione in sex rebus non naturalibus usus fuisset , citius periisset , & recte advertit *Rubeus capite 2. sect. 2.* pejus facere illos qui cum sibi ab hesternâ crapula stomachum gravari sentiunt , aquas ejusmodi potant: hinc enim paralyseis , tremores aliaque mala pullulant , cum enim tenuis sint substantiæ , & facile penetrent , leviores humorum partes statim in caput rapiunt , & in principium nervorum insinuant , unde paralyseis , tremores interdumque apoplexiæ : unde rectè consulit idem , ut quum assumuntur , nequaquam multa cruditate stomachus refertus sit , tribusque saltem horis earum potus cibum præcedat, quod aliis etiam ad coctionem juvandam remediis convenire potest. Ejusdem opinionis est quoque Aëtius , libr. 3. Serm. 1. cap. 24. in quo describit remedia ad cruditatem. *A cibo, inquit, nunquam neque hoc, neque aliud quoddam pharmacum quod vehementem penetrationem facit , accipiatur. Distribuitur enim ac digeritur cum ipso aliquid crudorum ciborum , & obturationem facit; Usus ejus convenit post matutinam fricationem , duabus ante exercitium balneumque horis.* Hæc Aëtius. Quod de dyspeptis diximus , convenit etiam iis quæ facile corrumpuntur , ut sunt fructus horæi dicti , malè enim ejusmodi calida & aperientia post assumuntur , ut rectè explicat vir Doctissimus Valleriola locorum communium libr. 2. cap. 7. *Nec post fructuum esum , malorumque ciborum ingerendus potus , præsertim multus , & generosus vini.*

vini. Efficit enim præcipiti lapsu vitiosus succus in vasa permeet, & incoctus putredinem & malum morem recipiat; Dein addit, si à cibo malo, fructibus præsertim bibendum sit, aqua quam vino uti salubrius duxerim, ne vim potu fervor & exbullitio accedat, præcoxque cibi in viscera transitus, & putredo, obstructio, cruditas & corruptela sequantur, quod facere vinum haustum solet. Pariter errant illi qui cum in ventriculo flatus cruditatesque persentiunt, ejusmodi aquas bibere solent ad ventrem calefaciendum, & roborandum. Hi sanè videntur inde aliquid percipere emolumenti, quamdiu ejusmodi aquæ orificium ventriculi calefaciunt; Verum tenuitate suæ substantiæ facilè penetrant in viscera, eorum intemperiem augent, unde postea affectus increscit, & quò sæpius ac copiosius ejusmodi aquas bibunt, videtur magis magisque venter refrigerari, & debilitari. Nam quæ nimium calefaciunt tantum abest ut ventriculum calefaciant & robovent, ut potius refrigerent rarefaciendo, vel ex alto trahendo calorem internum ad circumferentiam, ut vult Rondelet. cap. de palpitatione. Propterea rectè monet *Mercatus*, maxima cum cautione utendum esse præsidiis quæ coctionem augent, aut flatus discutunt. Fallimur enim, inquit, non rarò ob flatus nimis turgentes, & cogimur ipsos discutere non sine magno laborantium malo. Et hæc præcipuè observanda sunt iis qui hypochondriacis flatibus abundant, quorum viscera æstuant, ventriculus autem videtur frigidior. Forsan dicet quispiam Medicos præscribere piper crasso modo contusum, *Aëtium* commendare usum absynthii ad ejusmodi flatus hypochondriacos. Verum ut observat *Amatus Lusitanus Medic. peritissimus*, piper crasso modo contusum prodest, quia ad viscera non pervadit, sed solum ventrem roborat, jecur ideo non calefacit. Deinde ipsius calor in primis viis extinguitur & citò dissipatur. Demum humores acres deterget & educit. Absynthium quoque prodest, quia do-

cente Galeno ventriculum adstringit, non pituitosis, sed biliosis humoribus qui huic morbo fomentum præbent, deterfione sua opitulatur, eosque per alvum & urinam educit.

## CAP. XIV.

*Obstetrices malè puerperis nil nisi calidos potus dare.*

**A** Vdivi sæpe puerperas conquerentes de insigni siti & ardore, quoniam ex mala observatione receptum est, ut nihil refrigerans assumant, sed tantum calidos potus & calefacientes, ut vinum cum aromatibus coctum actu calens (qui potus in Anglia est nimium familiaris) aquâ cinnamomi, & similes, scilicet ut roborentur, nam semper adstantes de ejusmodi roborantibus solliciti sunt, tum ne frigus ipsas lædat, vi enim frigoris sapissimè tormina in alvo contingunt, præcipuè à partu. At sanè gravis hic error est, & puerperis sæpe perniciosus, semper autem valde tardiosus. Puerperarum autem variae sunt sortes, quædam enim morbosum in seipsis habent apparatus, & partus laboribus agitati humores morbifici varios in illis morbos procreant, aliae autem inculcata sanitate fruenter statim ad sese redeunt, & sensim absq; ullo gravi symptomate convalescunt. Prioribus ejusmodi generosi potus & calidi valde noxii sunt, nam viscera calefaciunt, humores morbificos non emendant, sed augent, magis accendunt ac corrumpunt; Posterioribus autem quæ aliàs bene valerent, febres ejusmodique morbos alios accersere possunt. Quamvis autem valde frigidus potus non probem, sed potius quodammodo tepidos, calidos tamen probare non possum, ob rationes dictas. Et quidem si febris adfuerit, Medici alterantes & refrigerantes syrupos præscribunt, quidni etiam potus? Sæpe ideo puerperis hac de causa æstuantibus & supra modum sitientibus concessi potus non adeo ge-

98 DE VULGI ERRORIBUS  
nerosos, & subfrigidos, à quibus multum recreatas se senserunt, multò magis potus illi convenient si febricitare illas contingat. Pariter malè faciunt, quæ pluribus cibis & polytrophis illas nutriunt. nam in principio tenuis victus esse debet & parvus, ut in illis qui magna vulnera passi sunt, natura enim infirmior magnam cibi quantitatem conficere nequit, & ut docet Hip. 2. acut. à conferta vacuatione ad pleniorum victum non est statim properandum. hinc metus est ne humores excrementitii multiplicentur, febris accedat, aliaque symptomata contingant. Parcè ergo nutriantur, ut iusculis, donec metus febris, aliorumque symptomatum abierit, & probè fuerint à lochiis repurgatæ, tunc sensim ad pleniorum victum transeundum est, & sic absque ullo periculo vires in ipsis redintegrantur. Hunc errorem animadvertunt ferme omnes qui muliebres morbos descripserunt. Rodericus à Castro cap. 1. lib. 4. *Molestum, inquit semper fuit tolerare fæminas, quibus enixam moderari cura est, nisi enim epulis & vino liberalius indulgeant, nihil boni prestare existimant, habent enim nescio quas leges, & statuta misericulis vehementer noxia, ipsis verò sacra quibus neglectis prudens Medicus ea providere jubeat, quæ necessaria fore judicabit.* Petrus Salius diversus eundem errorem apud Italos maximè reprehendit. *Quod ad victus rationem, inquit, sciendum est communem esse ferè omnium mulierum errorem, existimantium à parva statim optimi alimentii reficiendas, & nutriendas esse puerperas, unde ad jura caponum, ad eorundem carnes, ad aromata, ad vina vinosa statim deveniendum esse opinantur, nisi prudens assistat mulier, vel diligens advocetur Medicus, qui talia errata animadvertat. Iubet igitur, ut abstineant à carnibus, vino, aromatibus, & cæteris, quæ febrem vel inducere, vel augere apta sunt.*

## CAP. XV.

*Errores duo circa Nutricum electionem.*

**N**obiles mulieres quæ tacta nutritionis ferre nolunt, ex consilio interdum Medicorum nisi maxima necessitas urgeat, eas nutrices rejiciunt quæ lac vetustum habent, id est, quæ per longum tempus, annum scilicet, unum vel alterum lactaverunt. Lac enim vetustum non adeo salutare infanti recens nato sibi persuadent. Vnde nutricem interdum præferunt, quæ non diu lactavit quamvis seniore, illi quæ diutius lac præbuit, etiamsi junior sit. Verum credo ego hallucinari eos omnes qui lac vetustum ullum esse credunt, cum singulis diebus novum & recens nutricum mammæ suppeditent. Supponendo igitur nutricem juvenem esse, benè moratam, benè temperatam, probis & euchymis alimentis utentem, viri consuetudine abstinentem, nihil referre credo quamdiu ipsa lactaverit. Cum enim lac referat causæ materialis & efficientis naturam, & ab his tantummodo causis generetur, si nutrix prædicta benè temperata sit, & benè morata, nullis scilicet animi pathematis, ut mœrore & iracundia agitata, & probis ac euchymis alimentis nutriatur, dubium non est quin semper & quolibet tempore probum lac non suppeditet. Lactis enim natura sequitur naturam sanguinis ex quo fit; Sanguis autem in corpore probè constituto ex probis alimentis, semper bonus generatur. Ex bono sanguine malum & improbum lac generari non solet, si omnia probè in corpore sese habeant. Nec ipsa lactationis actio lac alterare potest, & vitare, quia Natura nihil malum instituit, & cum puero malè ageretur, si indies pejus nutriçis lac ex solo lactandi actu redderetur. Experientia ostendit in tenuioris fortunæ mulieribus, quæ tantas circa lactis electionem cautiones non adhibent.

bent, pueros probè nutritos, & boni habitus inveniri. Quando igitur nutricem eligendi occasio datur, tantummodo illius temperies, incolumitas ætas considerentur. Hæc enim si probè se habeant, ex laudabili diætâ bonum semper lac suppeditabit, & semper recens, quia singulis diebus semper novum generatur, eademque habet generationis suæ causas post annos quinque, quas primo mense habuerat.

Alter error est quorundam non minùs supersticiosus, non solum populi, sed etiam Medicorum quorundam, qui scilicet nimis cautè observant, an nutrix marem vel foeminam pepererit, lacque illius quæ marem peperit, magis idoneum esse nutritioni puellæ, & contra lac illius quæ foeminam peperit, magis puero convenire volunt, quia lac illius quæ masculum foetum enixa est calidius creditur, atque ideo puellæ quæ temperatura frigidior censetur, magis esse idoneum, quia frigiditatem ejus acuit; & contra, quia mas calidior perhibetur, lac nutricis quæ femellam peperit, ipsius calorem temperat. Verum hæc omnia falsa sunt. Nam *primò* malè supponunt foeminam mare semper esse frigidior, cum tamen ostendat experientia, quasdam foeminas quibusdam maribus esse frigidiores, nec mulier biliosa viro pituitoso frigidior absque errore censi potest, quod alibi variis rationibus demonstrabo, quamvis tamen etsi id concedamus, nullum sententiæ nostræ accedet detrimentum. *Secundo* malè supponunt, puerum lactantem lactis temperiem immutare. Cum enim, ut diximus, lac efficientis, & alimentorum ex quibus generatur naturam sequatur, quid adversum hæc puer potest? Nam dum lac fugit, non potest contactu solo matris constitutionem immutare, nec alimentorum quibus ipsa vititur temperiem. Forsan credet quispiam, foetum quamdiu utero continetur suam temperiem matri communicare, eam calefaciendo, si mas est, aut

aut refrigerando, si foemina. Verum id valdè dubium est. Nam foetus foemineus potius matrem calefaceret, quia semper infantes adultis sunt calidiores. Sed praeterea scimus, quàm difficile sit nativam constitutionem imminutare, ita ut vix alimentorum, aut medicamentorum longo usu ita labefactari possit, quin ad pristinam facilè naturam revertatur. Et videmus matrem edito foetu antiquam temperiem retinere, nec ulla superesse vestigia ullius temperiei quam à foetu acquisierit. Quod si ulla adesset, facilè tamen temporis decursu, & vario alimentorum usu perire posset, & aboleri. Certius igitur est, non ipsius foetus, sed nutricis tantum constitutionem & alimentorum quibus ipsa uti solet, naturam considerare.

## CAP. XVI.

*Pueris fortes & generosos potus malè concedi.*

**M**ulta circa puerorum educationem peccari certum est, unde tam multis gravibusque malis afficiuntur, & tam multi moriuntur, quorum non minima causa est prava vitæ ratio. Vidi autem sæpe & vinum & cerevisiam fortiorem quosdam pueris indulgere, quod tamen valde noxium est, & repugnat placitis veterum Medicorum. Galenus 1. & 5. de sanit. tuenda vinum ante annum 14. pueris non concedit, quia nimium calefacit, & humectat, caput vaporibus replet, unde non corpori modo, sed etiam animo damnum accedit. Paulus quoque ante 21. ætatis annum denegat, quia calefacit, exsiccatur, ad iram & iracundiæ genus debilitat, unde facilius postea tætantur convulsionibus, podagra, aliisque ejusmodi nervorum affectionibus, interna viscera præcipue jecur labefactat, cerebri bonam constitutionem evertit, nervorum imbecillitatem inducit, frigida



vitia accersit, & hæc omnia facilius in pueris, quibus nervi sunt natura imbecilliores. Platonis porro decreto 2. de legibus, vinum illis non competit, quia furiosos eos reddit, mentem hebetem turbidamque facit. Cum enim pueri temperamento calidiori sint, humida victus ratio & temperatior illis convenit, ne exsiccante ejusmodi potu præmatura senectus accersatur, & plurimis acerbis in cerebrum sublati vaporibus convulsiones, & prævi cerebri, nervorumque affectus consequantur. Quod si necessitas quadam illud præbendi sese offerat, non nisi paucum & dilutam præbeatur, consilio Hippocratis lib. de victu idiotar. textu. 23. Idem quoque dicendum est de cerevisia fortiori, eadem enim & graviora ex illius usu quam ex vino mala proveniunt, ob liquoris crassitiem, spiritusque impuriore. Sed tenuior & imbecillior cerevisia probè cocta & defæcata illis convenit.

## CAP. XVII.

*Cibos solidos infantibus ante dentium eruptionem non esse dandos.*

**O**bservavi etiam sæpe, infantibus ante dentitionem, offerri carnes comedendas, aliosque ejusmodi cibos solidiores, quod tamen pariter noxium est; rectè siquidem docet Galenus cap. 7. lib. 15. de usu part. naturam tunc primores dentes pueris dare, cum ipsis cibo solidiori opus est, quod pariter eleganter explicat 1. de sanit. tuenda, cap. 10. pueros non esse nisi lacte alendos, antequam primores dentes emittant, & revera cibi solidiores in ipsorum ventriculis præve commissione sua corrumpunt, gingivis tenentibus innocent, unde clamant pueri, & inquieti redduntur. Et ratio favet, natura enim nunquam deficit in necessariis. Quare si ejusmodi cibi pueris essent utiles,

utiles, non denegasset ipsis dentes ad masticandum. Quia autem per aliquot menses dentes denegavit, indicio est ipsis non nisi sorbiles cibos convenire, & præcipue lac, quod omnibus animalibus tanquam familiarissimum alimentum natura suppeditavit. Primis igitur mensibus solo lacte utatur infans, post paulo grandior factus etiam pulicula, cujus tamen in Angliâ non est familiaris usus, quæ tamen ab aliis nationibus, tanquam solum & utilissimum puerorum alimentum usurpatur. Emissis autem primoribus dentibus sensim masticationi assuescat, & carnibus minutissimè concisis, & pane utatur, quæ sensim masticando liviter deglutiat. Observandum hic est, quando infantes cibis assuescere incipiunt, optimum esse ut per horam unam à succionem lactis abstineant, ne lac in ventriculo aliis cibis permixtum, diutiusque retentum corrumpatur. Advertunt plurimi authores puerulos vix unquam lumbicis tentari, quamdiu solo lacte utuntur, quod tamen non credo esse perpetuò verum.

## CAP. XVIII.

*Licere largius sese invitare sanitatis causa.*

**N**on cupio hic censeri patronus ebrietatis quam odi maximè, sobrietatem dignam homine virtutem laudo & probo. Scio enim quot mala ebrietas corpori & animo afferre soleat. Nec veterum quorundam probo consuetudinem, qui semel in mense inebriari, utile corpori esse censuerunt. Sed tantum id monebo, dari quosdam casus in quibus largius sese invitare, & copiosius merum bibere, ex Medicorum sententia, sumè prodest. Ebrietas quidè ordinaria, quæ multis nimium est familiaris, & si ab antiquis laudatur. Græcis scilicet, qui amabant compotationes, periculosa tamen est, & inter morbificas causas non immeritò recensetur. de ea hic non loqui-

mur, sed de vini usu extraordinario ad morborum curationem utili. Quærit *Aristoteles 1. Problem. 2.* cur morbi curentur ubi quis abundè excessit, & rationem loco citato reddit, unde putant scribuntque plurimi meracioris vini potu sanari posse quartanam, quod verum esse interdum confirmat experientia, quia causæ morborum & remedia inter se contraria sunt. hinc fit ut per unius excessū alterum reduci possit ad temperiem. Causam præterea reddit *Amatus Lusitanus*, quia natura excitatur, & materiam jam coctam, per vomitum, sudorem, alvum ejicit. Sed præterea scribit *Hipp. aph. 21. lib. 2. famē caninā meri potione solvi*, θύνην vocat, quo nomine significatur interdum sola vini generosi potio, tum etiam copiosior ad ebrietatem usque. & *Galenus in comment.* ejusmodi morbum secuisse scribit, propinato liberaliùs vino, voluntque hinc deduci vocem hanc, quod vino liberalius sumpto incalescit pectus, sicut dicitur & magni Catonis sæpe mero caluisse virtus. *Ἀκρόβατοι* illi sunt qui largius sese invitarunt, nondum tamen sunt ebrii, sed memoriæ, rationem, vimque discernendi adhuc liberam habent. *Clemens Alexandrinus 2. Pedag.* Senibus Christianis vinum indulget, modo non excedant terminos *ἀκρόβατοι*. Prædicto igitur aphorismo præscribit *Hippocrates* generosi & meraci vini paulò copiosiorum potum, quia calefaciendo famem à frigida causa profectam curat, spiritus viresque reficit. Et *aphor. 48. lib. 7.* idem de stranguria scribit, *stranguriam & dysuriam thorexi & venæ sectio solvit*, quando scilicet à flatu, aut intemperie frigida, aut obstructione aliqua generatur. Et pluribus in locis copiosam vini potionem ad varios morbos commendat. *Paulus Aegineta* eam probat, quoniam urinam & sudores promovet, *lib. 1. cap. 95.* Sed dicit *Moralis Philosophus* id bonis moribus adversari, & esse contra leges Christianas. Verum hic temulentiam non commendo, quæ  
 si sequa-

si sequatur, id erit per accidens ob variam naturam fumentis. Si enim duobus agris eodem morbo laborantibus amphoram vini Medicus præscribit, unus forsan ebrius fiet, alter minimè: nam ebrietas sequitur per accidens ratione Medici, cum inter homines quidam uno aut altero haustu inebrientur, alii verò non nisi pluribus repetitis. Ebrietatem igitur Medicus non imperat, quamvis vini liberaliorem potum interdum suadeat. Sed præterea ejusdem artificis est præscribere remedium illiusque quantitatem, quod si remedium legitimè & sine peccato potest usurpari, pariter illius quantitas erit sine peccato, aliàs remedium irritum foret, nec proficuum. Denique qui non animo peccandi, nec voluptatis, sed sanitatis tantùm causa, ejusmodi remedio utitur, vix peccatum admisisse videtur.

## CAP. XIX.

*Pannos rubicundi coloris ad excretionem variolarum aliis non esse præferendos.*

**I**N variolis & morbillis naturæ conatum humores in habitum corporis excernentis, adjuvandum esse, constans est Medicorum sententia, & docente natura etiam quilibet ex plebe indotissimus novit. Propterea diligenter ambientis frigus evitandum est, ne à corporis habitu ad interiora humor noxius retrocedat. Ideo plurimi ægros pannis rubicundi coloris operiunt, affinitate siquidem coloris sanguinem allicere creduntur, aut saltem vi phantasie id fieri quidam existimant. Nec tantùm populus, sed etiam plurimi Medicorū illis utuntur. Verùm superstitiosus mihi videtur esse color ille pannorum. Color etenim non operatur nisi per accidens, quatenus visum & phantasiam movet, quæ postea similitudine coloris concitata, sanguinem ad exteriora impellit. At si sufficeret colorem ejusmodi oculis objicere,


106 DE VULGI ERRORIBUS  
anni cum corpori adherent, & noctu, & sub lecti  
lintheaminitus non videntur. *Secundò* panni non  
educunt humores, nisi quatenus corpus calefa-  
ciunt, poros aperiunt, ab externo aëre tuentur,  
quod non solum rubri, sed & omnes panni cufus-  
libet coloris præstare possunt, omnium optimè al-  
bi. *Tertiò Amatus Lusitanus, Valetius*, alique qui  
ejusmodi pannos ex vulgari consuetudine pro-  
bant, id sedulo monent, ne corpus ipsum contin-  
gant, quia ex tinctura & aluminis admiftione ali-  
quam habent adstringendi vim. Ideo quamvis eos  
non improbem, frustra tamen puro fieri colorum  
discrimen. Imò potiùs candidissimos probarem,  
quia color ille visum disgregat, spiritus evocat ad  
exteriora, & consequentia quadam humorum in-  
cuto efflorescentiam promovet.

#### CAP. XX.

*Quod malè plurimi laboribus incipientem  
morbum abigere student.*

**P**LURIMIS est in more positum, quādo se minùs  
benè valere sentiunt, ut ambulationibus, ex-  
ercitiis, laboribusque morbum excutere co-  
nentur. *Tu ne crede malū, sed contra audentior ito.* Id-  
que interdum ipsis bene succedit, sed non sem-  
per, nisi levissima sit causa morbi. Nam ægris mo-  
lesta est & noxia exercitatio ob humorum mor-  
bificorum agitationem. *Prodicus 6. Epid. sect. 3. textu  
23. febricitantes multis obambulationibus, πρὸς δὲ ἵπτι,  
lucta, & siccis fomentis conficiebat:* Sed repre-  
henditur ab Hippocrate. *Nam febris fami, lucta, ob-  
ambulationibus, cursibus, frictionibus est inimica.* Inde  
*venarum rubor, pallor, laterum dolores molles contin-  
gebant.* Hunc ambulandi morem per periodos tri-  
buit Plato Herodico in principio Phædri. sic Ascle-  
piades in recenti & ardenti febris gestatione uten-  
dum esse voluit, qui reprehenditur à *Celfo lib. 2.  
cap. 4 & 15.* Convellendas, inquit, ægri vires puta-

vit labore, luce, vigilia, siti ingenti, sic ut ne oſ  
quidem primis diebus elui ſineret. Non eſt igitur  
ſemper tutum ejuſmodi exercitiis adverſus mor-  
bum decertare, ſape enim poſtea deterius ſolent  
ægrotaſe.



D E  
VULGI ERRORIBUS

LIBER QUARTUS.

De erroribus Populi circa reme-  
diorum uſum.

CAP. I.

*De iis qui remedia Chymicè præparata  
contemnunt.*

**R**æcipua Medicinæ pars uſum reme-  
diorum ſpectat, eſt enim ars ad mor-  
bos proſtigandos comparata. Pellun-  
tur autè morbi, commoda remedio-  
rum adminiſtratione. Ideo hoc libro  
quorundam populi errores notabimus circa reme-  
diorum quorundam adminiſtrationem, & uſum.  
Et primò duplex eſt hominum opinio circa reme-  
dia. Quidam remedia omnia chymicè præparata  
negligunt; & reformidant. Alii contra, ea ſupra  
modum extollunt, Galenica autem quæ vocant;  
id eſt vulgari, & jampridem recepto modo præpa-  
rata vilipendunt, & contemnunt. De utriſque  
autem agemus, medium ſiquidem tenuere beati.  
Et ſicut ferme quicunque inter populum graſſan-  
tur errores, à Medicis olim primùm profeſſi ſunt,  
quorum placita populus non probè intellexit, ita

& de hoc sentiendum. Itaque de prædictis pauca dicenda sunt. Ostendam igitur hoc capite non esse negligenda remedia chymica, à prudenti Medico, & viro bono administrata. Hac enim medicamenta præparandi ratio, non à Paracelso inventa est, ut alibi diximus, sed multis ante Paracelsum natum seculis exulta fuit, ab iis etiam Medicis qui Galeni doctrinam sectabantur, ut Raimundo Lullio, Villanovano, aliisque quamplurimis, qui remedia quadam laudatissima nobis reliquerunt chymicè præparata. Et post Paracelsum natum plurimi inter Medicos doctissimi chymicam medicamentorum præparationem à Paracelsi doctrina judiciosè distinguentes, illam sequuti sunt, hanc autem improbârunt. *Fernelius* recentiorum Medicorum princeps artem istam excoluit maximè. Spiritu vitrioli & antimonio chymicè præparato *Matthiolus* utebatur, & *Epistola ad Andream Blavv qua ultima est lib. 4. Epistolarum*, non solum hanc artem probat, & opera ipsius mirifica celebrat, sed censet neminem absolutum Medicum esse posse, & ne mediocre quidem, qui in hac nobilissima scientia non sit exercitatus. *Crato trium Imperatorum Medicus* in consiliis à *Scholtzio* editis, chymica admodum commendat, iisque se uti profitetur. Ipse *Eraustus Paracelsica hæreseos debellator*, in præfatione operum *Antiparacelsicorum*, fatetur se non improbare chymicam hanc præparationem, quam laudat & probat maximè. *Iohannes Riolanus* Medicinæ elegantissimus interpret, dum Paracelsistarum machinas omnes jussu scholæ Parisiensis delevisset, rectè scribit, scholam hanc quæ præstantissimos Europæ Medicos habet, liberum relinquere usum chymicorum, modo vetus medendi ratio secundum Galeni & Hippocratis præcepta, maneat. Erat quidem ars ista temporibus Galeni ignota & inculta, non respuenda tamen. Licuit enim posteris & licebit, arti jam probè constituta, addere

dere quædam ad usum & ornatum. Sic remediis multis utimur, quæ ignorabat majorum ætas, ut senna, rhabarbaro, cassia, tamarindis, aliisque peplio, colocyntidi, similibusque præferendis. Sed præterea in vulgari medicamentorum præparatione apparent chymicæ artis rudimenta. Præparantur autem secundum illos omnia medicamenta, vel additione, vel detractiōe, vel immutatione. Desiderantur enim medicamentorum vel materies, vel facultas & virtus à materia secreta. Materies quidem in medicamentis incrassantibus, adstringentibus, siccantibus. Virtus sola in attenuantibus, diaphoreticis, purgantibus, quoniam illorum efficaciam materiæ crassities obstat. Ad id *Mesues* quatuor facit operationum genera, coctionem, lotionem, infusionem, triturationem. Quid est infusio, quam extractum inchoatum? quid coctio, præcipuè assatio quam principium calcinationis? Verum in hac separandi ratione quam exoptabant, necessariamque veteres existimârunt, ars chymica excellit. nam variis modis purâ ab impuris separat, sicque medicamentorum varias vires elicit, & aperit, quæ aliàs sopitæ fuissent, nec à calore naturali unquam educi potuissent, ut præcipuè apparet in mineralibus. Præterea substantias terrestres coquit, attenuat, malignas & venenatas alienasque qualitates alterat, aut prorsus tollit, virtutes auget, plus enim virium est & efficaciam in aqua cinnamomi adversus syncopen, aliosque affectus, quàm in integro cinnamomo. Idem de oleis distillatis, & extractis censendum est, efficacius est oleum thymi, aut sulphuris, aut caryophyllorum, simplicibus iis ex quibus extractum fuit. Demum plurima naturæ magis familiaria, & amica efficit, variasque vires in exiguum molem contrahit; ut in extractis, aquis, oleis distillatis, salis variis generibus & aliis. Cum igitur Medici officium sit ut citò, tutò & jucundè



curet, haud dubiè id melius faciet instructus chymicis medicamentis, quorum efficacia major, citius operatur, quantitas minor, & præparationis elegantia ad-jucunditatem faciunt. Sed dicet forsitan quispiam: Caruit Majorum ætas chymicis medicamentis qui melius quàm nos medebantur, & contingit adhuc quotidie, ut absque illorum usu mira plurima Medici perficiant. Id quidem non est negandum, sic vessebantur olim homines glandibus, & diu vivebant, inventis tamen frugibus glandes contemnimus, & porcis relinquimus. Quod si veteres ipsi (quorum antiquissimus suo tempore novus fuit) nihil majorum suorum inventis addidissent, inchoatas tantùm haberemus artes singulas. Deinde si eas perfecerunt curas tardius tamen & minùs jucundè. Additæ igitur fuerunt operationes chymicæ, ad ægrorum solatium, artis decus & ornatum, non quidem ut absolutè, sed ut melius & commodius Medici mederentur. Quædam tamen deterrent plurimos ægrotantes ab horum remediorum usu. Primum est, quod putent omnia Chymicorum remedia esse valentissima, curare statim, vel occidere, & esse remedia, ut vocant, desperata, citò quidem & jucundè opus suum perficere, sed minùs tutò, & quandam post sese labem in visceribus relinquere, quæ nunquam, aut vix postea eluatur. Savius autem esse putant, tardius curari, modo tuta, & secura sanitas succedat. *sat citò*, inquit vulgare proverbium, *si sat benè*. Vèrùm hæc ex ignorantia istius artis originem habent, & quorundam nebulonum audacia, qui solum vehementissimis utuntur, & præpostera operatione præparatis: non enim quælibet chymica præparatio cuilibet medicamento convenit. Mercurio dulci utimur innoxie, eodem sublimato, aut præcipitato, non nisi cum vitæ discrimine. Plurima enim habent chymici medicamenta valde benigna, minimumque violenta. Eadem siquidem est materia medica-

pharmacopœi chymici & vulgaris, ex vegetabilibus, animalibus, mineralibus, & omnibus tam benignis quam violentis, quæ in usum medicum venire solent. Præparatio autem chymica in violentis quæ noxia sunt, emendat, aut tollit, securiora ea gratioraque efficit. Quin etiam Cardiaca & roborantia habent chymici quamplurima, vulgaribus sæpe elegantiora. Sed sæpissimè plurimi morbi vehementiora postulant, qui imbecilliorum vim contemnunt, & eludunt, validioribusque utebantur *Hipp. Galenus, Aëtius*; alique veteres, quàm plurimi Chymici solent. *Extremis enim morbis extrema exquisitè remedia conveniunt*, ex Decreto *Hippocratis, aphorism. 6. lib. primi*. Et Galenus ipse *5. meth. cap. 15. reprehendit Erasistratum*, qui levioribus solum utebatur, quod noxium esse in gravibus & periculosis morbis contendit, in quibus si occasio quæ præceps est elabatur, vel pereunt ægri, vel inemendabiles ægritudines fiunt. Magis igitur familiare est Medicis, qui Galenici dicuntur, id est veterem sequuntur disciplinam, validissimis uti medicamentis, quæ Chymici aut raro in usum adhibent, aut saltem melius præparata. Nec verum est à Chymicis omnia valentissimo ignis calore præparari, sæpissimè mitissimus calor adhibetur; Sed præterea ipse *Galenus* docet, igne valido pharmaca plurima acrimoniam, & mordacitatem omnem deponere. Et certum est arte hæc *spagirica* dictâ, & ferocissima medicamenta edomari, & plurima aliàs venenata, ademptis deleteriis partibus, evadere cardiaca.

## CAP. II.

*Metallicorum usum non esse reprobandum.*

**C**Ausa etiam altera est, cur plurimi Chymica hæc reformident, quia creduntur scilicet uti Metallicis. Et sanè certum est plurimos nebulones, qui hoc pallio technas suas tegunt, metallicis

tallicis sæpe, & malè præparatis, & malè adhibitis uti. Verùm, ut jam supra diximus, eadem est materia & subiectum operationis, Pharmacopœi utriusque tam chymici, quàm vulgaris, nec minùs vegetabilibus utitur Chymicus, quàm qui dicitur Galenicus, facileque erit illi ægris suis, si mineralia nimium adversantur, sola vegetabilia adhibere. Sed tamen magis erat familiaris usus metallicorum veteribus Medicis, ante Chymicæ inventionem, quàm nunc est. Plurimos enim chymicos novi qui rarò iis utuntur, sola vegetabilia fermè in usum revocant. Fidem siquidem faciunt veterum libri, illos uti solitos *chalybe*, *are usto*, *aris squama*, aliisque ejusmodi, aut nullo modo, aut leviter saltem præparatis. Squama æris integra purgat vehementissimè. *Farina subactam*, inquit Dioscorides, *quidam dant in catapotio*. *Æs ustum*, inquit, *vomitum ciet cum hydromelite potum*, *flos æris quatuor obolorum pondere datus crassum humorem extrahit. libr. 5.* Armeno lapide utuntur quamplurimi minimè præparato. Nonne maximè probanda est ars illa quæ si quando iis utitur, variè & eleganter præparata, non integra exhibet. Dioscorides argentum adversus venenum aconiti conferre scribit. Avicennas verò vult cordis tremori adversari. Si igitur veterum autoritas apud nos alicujus est pretii, non est Chymicis vitio dandum, quod interdum metallicis utantur, cum idem vitium, si ullum est, Galenici dicti admittant: in eo autem superentur à Chymicis, quod eadem elegantius ita præparent, ut minori cum noxa possint exhiberi. *Matthiolus Epistola citata*, rectè scribit, graves chronicosque morbos, vix absque metallicis superari posse & evinci, eadem autem absque Chymicæ cognitione non esse administranda. Et familiaris est usus aquarum thermalium, quæ omnes vim metallicam in sese possident. Sed objiciet forsan quispiam, metallica esse omnino venenata, & inimica natura, &

in actum non posse deduci; Et si autem hæc quodammodo de pluribus mineralibus vera sint, non obstat tamen quin eadem bona fieri possint remedia in contumacibus morbis, qui valentiora præsidia postulant, estque hæc omnium medicamentorum natura, ut nostrum corpus alterent, nam ut diximus, *extremis morbis extrema remedia competunt*. Hinc contingit interdum, ut Empirici quidam temeritate sua morbos ab aliis relictos, cum Medicorum dedecore curent. Si igitur minus scrupulosè veteres iis integris urebantur, quàm foelicia sunt nostra tempora quibus eadem tam eleganter præparare, solvere solemus, unde facilius à calore nostro in actum deduci possunt: quamvis, ut verum fatear, plurima sunt, quæ non magnam postulant deductionem ad actum, ut squama aris integra, sicut eam veteres præscribebant, à calore nostro indomita, purgat tamen vehementer. *Avicenna* ubi aurum statuit medium inter argentum, & hyacinthum, illis tribuit virtutem cortoborandi, loetificandi, & veneno resistendi, quas vires ait ab hyacintho promanare, sicut à magnete vim trahendi ferrum, nec dissolvi ac superari à calore nostro, sicut solent vegetabilia: id enim, inquit, substantia ejus non patitur, sed tantum calor naturalis illius penetrationem juvat. Non videtur igitur ex sententia *Avicennæ* in actum reduci hyacinthus, nec aurum, nec Argentum, & à calore nostro nec transmutari, nec dissolvi. Multa quoque sunt similia quæ etiam solo contactu juvant, ut pœoniam *Galenus* commendat collo appensam: lapidem nephriticum *Monardes* etiam brachio alligatum, sola scilicet qualitatibus diffusionem luminis instar, plurimæque ejusmodi à variis observata fuerint, quæ recensere foret tædiosum. Frater ea non sola metalla, sed etiam vegetabilia quædam venenata existunt, quæ salutariter tamen exhibentur, eâ saltem dosi  
cui

cui natura resistere potest. Cum igitur certum sit à Chymicis præparari mineralia, eorumque olea, essentias, tincturasque extrahi, certum quoque esse debet posse commodè, & sine periculo à calore nostro edomari, & intus assumi.

## CAP. III.

*De illis qui remediis Chymicis nimium tri-  
bunt.*

**Q**Uamvis supra in genere probaverim chymicam remediorum præparationem; sciendum tamen, non quolibet quovis chymico artificio permutata, esse bona; & salutaria: nam plurima haud dubie præparantur pessimè, quæ forsàn aliud genus præparationis postulabant. illam igitur philautiam qua sua innumeris prædicant encomiis & omnibus aliis præferunt, retundere oportet. Non sunt enim in promittendo parci, miracula se edituros nobis persuadere cupiunt, remedia obtrudunt, quæ si fides illis habenda est, ad omnis generis febres, ad varios morbos, quos etiam omnino contrariæ causæ produxerunt debellandos; Quos illorum non prædicat auri solutionem, quam potabile auxum vocant, varias conficiendi rationes, docet, extollit, admiratur? Sanè si omnes hoc unicum remedium præparandi rationes simul describerentur, justum fieret integrumque volumen, & sunt tamen falsissimæ, omnesque meræ imposturæ, & tamen audacter remedia nondum inventi efficaciam prædicant, idemque de aliis multò facilioribus sentiendum. multa enim obtrudunt pro tincturis, oleis, sale, quæ tamen aliud quippiam sunt, quam id quod esse dicuntur, ~~ut de plurimis in specie ostendi pos-~~  
~~set, sed foret hæc tractatio nimis longa, & tardio-~~  
sa. Rationes tamen illorum audiamus, quas primo capite tetigimus, eas hic breviter repetemus. Vulgaria, inquiunt, venenata esse solent, ut cathartica

thartica fere omnia, & alterantia quamplurima, crocus, cicuta, coriandrum, si quantitate nimia assumantur. Chymica autem à veneno sunt omnino libera, & ab impuritate omni, quæ vim remedii frangere potest. In vulgaribus autem manet hæc eadem impuritas, quæ aliorum permissione non magis emendatur, quàm si aves cum nidis, intestinis, stercorebus, sed adjecto cinnamomo, vel saccharo coquerentur. Sic pilulæ, electuaria, tabellæ, opiatæ, omnem tum noxiam, tum utilem vim remediorum habent, quæ ideo commodè à calore in actum deduci nequeunt. In chymicis contra pugnantes rerum vires noxiæ ab utilibus separantur, faciliùs ad actum deducuntur, majoris sunt efficacix, & certitudinis. Mel & saccharum, quæ variis adduntur remediis, quia spiritus acutos continent, acres, terrosque foetores, malè admisceri videntur. Coctionem pariter improbant, quia sic plurimæ vires pereunt, saporis ingrati remanent, & vires alieni humoris permissione retunduntur. Sua igitur commendant ob puritatem, securitatem, efficaciam, saporis gratiam, minoremque dosin. Et sanè in plurimorum, maximè mineralium, præparatione hæc omnia locum habent, & sunt verissima. Non tamen semper in omnibus. Et primò, falsò supponunt omnia venenata esse, malè enim quicquid crassius est, venenum vocant. Vix enim ullum corpus mixtum est, quod non sit heterogeneum, variisque constet partibus, quarum singulæ seorsim varias obtinent facultates salutare, & utilissimas, ut ipsa resolutio chymica demonstrat. Fatendum quidem est, multa venenata chymico artificio fieri innoxia. At quicquid impurum est, aut videtur, statim vocare noxium, & venenum temeritas est, jussimodi variarum rerum naturæ providentia edocent cibi & potus, quibus non sine causa Deus partem utilem inutili admiscuit, ad usum humani cor-

ni corporis. Annon commodius vino utimur, quam spiritu ejus, cujus potus ordinarius nocet potius quàm juvat, at vinum integrum utilem, jucundum, roborantemque potum corpori suppeditat. Igitur, ut rectè dicebat quispiam, quibus partes terrestres adeo suspectæ sunt, spiritibus alendi forent, spiritu vini, oleo frumenti, carniū extractis. Non quòd præparationem necessariam esse negem, sed saltem non semper eam quæ chymica est. Sic triticum ad panis confectionem præparamus molendo, furfures secernendo, pinsendo, coquendo, sic & carnes lavando, coquendo, quæ si chymicè præpararentur, evaderent noxia, & funditus perderentur. Cur enim data est corpori secretrix facultas, nisi ad secretionem inutilium? Vnde mihi recentior quidam scriptor *Faber*, Chymico more magnus pollicitator, Injurius in naturæ aulicorem esse videtur, qui & puri & impuri, hoc est variarum partium permistionem, in uno eodemque misto, ex Creatoris maledictione profectam scribit, propter peccatum. Quasi si nunquam homo peccasset, solus spiritus Deus creasset, non corporeæ creassamenta, oleum cinnamomi, non autem cinamomum, quod absurdum est. Vnde pessimè idem medicamentum definit purum Naturæ, quod naturam nostram læsam & morbo afflictam alterando *saccurrat*, & juvat, & vult solum purum esse medicamentum, quod solum sit actionis capax, & virtutis. O lepidum capitulum! Annon in face rerum, in excrementis, in carie, in rebus minimis, obsoletis, ac propè nullis, remedia condita sunt? Quis denegavit excrementitiis etià illis partibus vltm agendi & corpus alterandi? Quis Chymicorum non utitur excrementis ad Medicinam? Quæ vires aliquas non possideat humano corpori salutare, sive ad internos, sive ad externos usus. Sed ad pensum nostrum redeamus. Non solum alimentis utilis est mistio

hæc

hæc crassiorum partium, & subtiliorum, sed etiam medicamentis. Rhabarbarum sæpe damus integrum innoxie ad purgandum, sed pulverizatum, & hæc est præparatio quædam; sapius infusum, ubi crassiore parte non egemus, siquidem in infusione servatur virtus ejus. In extracto autem, quod chymicum est inventum, & in multis rebus utilissimum, virtutis portio exhalavit. Infusio ergo Galenicorum, extracto chymicorum præstantior est. Idem rhabarbarum præparato chymicè, distillando, sal educendo, spiritus eliciendo, nihil inde boni succedet, purgandi virtus omnino peribit, etiamsi eam in sale Chymici collocent. Præterea, ut primo capite diximus, in medicamentis incrassantibus, adstringentibus, roborantibus, siccantibus, materia & substantia medicamenti consideratur, sic ostendit experientia, tutius sæpe dari conservas, condita, pulveres Galenicorum, quam olea & spiritus chymicorum: nam sæpe integris medicamentis opus est, nec debent omnia chymicè præparari. Vnde sæpe coguntur Chymici medicamenta hæc sua quæ à proprio ante corpore separaverant, alieno induere. quis enim ausit oleum origani, sulphuris, vitrioli, per se absque alterius liquoris permissione degustare, unde opiatas, tabellis, julepis, apozematis, minima dosi hæc eadem addunt, aliàs vix innoxie operarentur, sed solum partem illam quam primum tangerent, non sine insigni damno alterarent. Non qualibet ergo secretio partium crassiorum à tenuioribus corpori salutaris est, sed sæpe perniciofa. Non est igitur quod hæc ratione sua præferant Chymici, præterquam in quibusdam medicamentis, nec est eadem virtus in integris quæ est in solutis.

*Secundo*, non solum populo, sed etiam forsan sibi ipsis imponunt, dum adeo commendant partium crassiorum à tenuioribus separationem, suorumque remediorum securitatem; non enim  
semper



semper Chymica præparatione pars noxia fecer-  
nitur, sed augetur sæpissimè, dum tota in parvam  
molem contracta fortius operatur. Consideren-  
tur quæso extracta omnia purgantia, & reliquæ  
cathartorum præparationes Chymicæ, an ullæ  
sunt innoxia. Imò sæpe peiores, quamvis etiam  
ejusmodi præparationibus vires suas sæpe amise-  
rint. Virtus enim noxia non semper est in crassa-  
mento, sed etiam sæpe in tenuiori illa substantia,  
quæ extrahitur. Trochisci alandel commodè pur-  
gant. Extractum non minùs noxium est, magma  
autem quod ab extracto superest, maleficam co-  
locyntidis vim totam fermè amisit, quoniam vis  
hæc noxia simul cum purgante tota abiit in illum  
liquorem, quo virtus extrahitur, quem mēstruum  
inepto, ut solent in cæteris, vocabulo appellant.  
unde Chymici extractis ejusmodi non minùs  
corrigentia & roborantia admiscunt, quàm Gale-  
nici. Nobile apud illos extractum est Laudanum  
dictum ex opio, sed variorum admistione præpa-  
rato, ad correctionem opii, quod postquam omni  
arte immutârunt, non audent tamen exhibere  
absque correctivis, ut vocant. An igitur præpara-  
tio hæc Chymica vim à purgantibus, aut opio no-  
xiam separavit?

Quantitatem autem quod spectat, & saporis  
suavitatem, non semper Chymicis hæc succedunt.  
Exempla dabimus in extractis purgantibus, aliis-  
que quæ majori dosi exhibentur, & non minùs  
sunt ingrata, vis enim purgatrix aliquantulum  
exhalavit. Si quædam quantitate nimia noxia  
sunt, id habent cum omnibus alimentis, & medi-  
camentis etiam chymicè præparatis commune,  
nec si cathartica vehementiora noxia sunt, ideo  
propterea rejicienda, cum omnia remedia malè ad-  
hibita nocere possint. Iucundiora igitur non sem-  
per sunt Chymica, extracta colocyntidis, rhabar-  
bari, aloes, non minùs amara sunt & ingrata,  
quàm integra esse solent, & majori tamen dosi  
exhi-

exhibentur, vixque si ingratus sapor em habet medicamentum, chymica ulla operatione tolli poterit sapor, absque virium jactura. Tolle amaro-rem ab aloe & absynthio, perierit simul vis illo-rum. Quid quæso est extractum chymicorum quàm infusio Galenicorum, nam quando infusio coctione quantumvis lenta ad extracti consisten- tiam reducitur, tenuiores partes quibus vis de- je-ctoria inest, exhalant, unde melius evacuabit in- fusio drachmarum duarum rhabarb. quam extra- ctum drachmarum quatuor. Sic succus rosarum purgat eleganter, aqua distillata nequaquam. Ex- tractum colocyntidis amarissimum est, quamvis sit hæc præparatio chymica, & tamen majori dosi exhibetur, quàm solent trochisci ex colocyntide dicti alhandal. Et sanè quatenus vegetabilia ca- thartica spectat, chymica præparatio ordinariæ & vulgari cedere debet, sed in purgantibus minera- libus, præcipuè vomitivis, superior est Chymica. Sola autem dosis parvitas, qua gloriantur chymi- ci, sæpe suspecta esse debet, cum semper non re- quiratur, & venenatam quandam arguat qualita- tem, aut saltem non adeo beneficam, ut apparet in oleis prædictis vitrioli, sulphuris, caryophyllo- rum, origani, & aliis ejusmodi, quæ an sola inno- xiè assumi possint, testari poterunt qui stultè vo- lent experiri, unde guttulas tantum aliquot alio- rum permissione dilutas exhibent. Satiùs igitur est quædam copiosiori mole cum tota substantia præbere, quàm minima dosi eorundem spiritus, quamvis in multis rebus non improbemus con- tractionem bonarum virtutum in exiguam mo- lem, modo cum recta ratione veniat in usum, ob- servatis scilicet iis quæ ars Medica Galenî & Hip- pocratis observare docet.

Coctionem autem illi temere improbant, quia scilicet plurimæ vires pereunt, ingrati sapor em re- manet, viresque alieni humoris immixtione retun- duntur. Verùm evitabitur primum incommodum,  
si fiat

si fiat coctio in duplici vase, ne spiritus evanescent, saporibus autem illi non magis corriguntur quam Galenici, & pariter etiam aquis utuntur ad spirituum vehiculum. Certum autem est decocta aquis stillatitiis & extractis saepe esse praestantiora, quoniam virtus simplicium absque ulla temperiei destructione transit in liquorem. Sic observat *Heurnius* decocto anisi se foelicius colicos dolores sanasse, quam ejus spiritu, vel oleo. Idem quoque saepe observavi, quoniam decoctum vires anisi omni sui parte imbibit, olei autem guttulae tres vel quatuor partem quam primum tangunt, afficiunt potentissime, sed vires suas ulterius non diffundunt, nec si in juscule, aliove liquore exhibeantur illi omnifariam possunt admisceri. Distillatione solet plurimarum rerum crasis amitti, & saepe *Paracelsus* ipse id fatetur, quadam scilicet distillando noxia evadere, mellis exemplo, quod ter distillatum ait fieri venenum. Medicamenta infunduntur, quando tenuiorum virtutum ope indigemus, si iis non sit opus, tunc aut integra, aut alio modo praeparata exhibentur, nec in aqua solum, sed etiam in variis liquoribus sunt infusiones. Nimis quoque vereri videntur sacchari & mellis permissionem, quia spiritus iniqui habent venenatos. Id *Paracelsus* de melle ter sublimato prodidit. At integra haec assumpta spiritus non exhibent adeo noxios, unde cognoscimus non esse similes naturae & Chymicorum separationes. Quis crederet ferventissimum tritici spiritum elici à calore, sicut & ab arte. Natura ex cibis chylum, sanguinem, bilem generat, ars verò spiritus, olea, & essentias, quae à natura, crasque materiae suae longissime recesserunt. Quamvis igitur non credam similes esse naturae & chymicae operationes, sufficit tamen si quae ex operatione chymica resultant, corpori humano reddantur idonea, ad morbos ejus propulsandos; & laudabilis ars meo judicio censeri debet, quae natura

turæ imitatione corpora tam variè immutat in usum hominum. Ex prædictis ergo patet, non semper chymica esse reliquis præferenda, Galenici igitur etsi Paracelsi doctrinam jure merito repudient, chymica tamen remedia non improbant, iis suum in Medicina locum relinquunt. Chymici ipsi vulgari modo præparatis carere nequeunt, ut patet ex Quercetano, & aliis, ipsoque Paracelso, qui multa præscribunt decocta, infusa, multis utuntur integris nullo chymico artificio corruptis. Vtrisque ergo sua laus debetur, quòd interdum Chymicis uti necesse sit, interdum & sapiùs aliis. Ideo æquissimi sunt Galenici, qui chymica non repudiant, sed reprehendendi chymici qui nunquam aliis quàm suis utuntur, unde contingit, ut mira sæpe polliceantur, quæ falsa esse ostendit experientia. Imperiti est semper essentiis uti velle. Thus integrum vulnera curat, quæ ipsius oleo nequeunt curari. Conserva rosarum id præstat in roborando, & adstringendo, quod spiritus, aqua, vel sal ipsius nunquam præstiterit, solentque olea distillata & spiritus acres calidum nativum nimis potenter & celeriter afficere. Ratione igitur variarum circumstantiarum, interdum spiritu & extracto utendum est, interdum conserva, & electuario, & decocto. Non enim omnia chymicam præparationem postulant, sed ab ea omnino destruuntur. Quædam autem non nisi chymicè præparata in usum venire commodè possunt, præcipue metallica, quædam forsan uno modo præparantur, quæ aliter præparari debuissent. In genere notandum, in remediis chymicis siquando peccatur, graviùs id fieri quàm in vulgaribus. Quæ dicta sint non ad artis spagiricæ contemptum, sed ob empiricos, multosque alios, qui audacter nimis, & sine judicio, remedia ex libris mendacibus deprompta usurpant, & modo aliquid chymicè præparatum fuerit, etiamsi forsan pessimè, nimis patienter illud laudant & admirantur.

## CAP. IV.

*Non esse mutanda remedia etiamsi curatio  
statim non succedat.*

**Q**Uoniam, ut diximus, plurimi sunt morbi contumaces, curatu difficillimi, qui remediis non cedunt, nisi sæpius repetitis, quidam curationis tardio affecti, alia remedia cupiunt experiri, quæ aliis profuisse audiunt, aut omnino remediorum usum abjiciunt, sed utrumque malè, nam ut rectè scribit Hippocrat. 2. aphor. 52. *Omnia secundum rectam rationem facienti, si secundum rationem non succedat, non est ad aliud trans-eundum, quamdiu id manet quod ab initio visum fuit*, quod etiamsi de Medico ipso primùm intelligatur, ne leviter & sine causa medicandi rationem mutet, potest tamen etiam ægrotantibus accommodari. Nam, ut rectè ait Galenus in Commentario, non mediocris prudentiæ est, ab iis non recedere, quæ recta sunt visa. Sicut enim gutta non nisi longissimo tempore lapidem cavat: sic in crudis, & coctis difficilibus morbis, si quis quod factum est opus invenerit, ab eo recedere non debet. Prudenter autem operari censetur ille Medicus, qui morbi diagnosi, & prognosi, plenè cognita, remedia adhibet convenientia in quantitate, tempore, modo, & loco. Quod si in morbi cognitione aberraverit, sicut interdum fieri solet, non solum remedium, sed & Medicum ipsum mutare licet, aut saltem alium simul accersere, ut conjunctis consiliis morbi naturam planè investigent, quæ demum probè cognita; in usu remediorum persistere debet, qui sese illis commisit æger. Ut autem ipse cognoscat, quando mutanda sint remedia, hoc erit notandum. Primò si adhibita remedia aliquantulum juvant, signum est morbi naturam fuisse plenè cognitam, nec illa esse permutanda: signa enim morborum etiam Medici petunt à  
juvan-

juvantibus, & lædentibus. *Curationes*, inquit *Hippocrates*, morborum naturas ostendunt. Scribit *Cornelius Celsus* in principio libri tertii. In acutis morbis statim mutanda esse remedia quæ non prosunt, in longis autem (de quibus hoc capite loquimur) non ita. nam tamdiu in usu remediorum persistendum est, donec sæpe illorum operatione frustrata, animadvertamus non fuisse probè cognitam morbi naturam. *Secundò*, si ex remediorum administratione symptomata exacerbentur, signum est ea fuisse morbo contraria, & proinde mutanda, in chronicis scilicet affectibus, nam in acutis exacerbatio symptomatum si cum signis coctionis contingat, morbi ad crisin tendentis indicium est. Sic *Antonius Musa* Medicus Augusti Cæsaris cum animadverteret Cæsaris stomachicum dolorem calidiorum usu graviores fieri, frigidis usus est, illumque sanavit. Dicit quispiam, assiduo usu remedia fieri tandem naturæ familiaria, sicque inutilia reddi. Respondeo, mutari quidem posse remedia, eorumque quantitatem, sed non medendi rationem, quamdiu morbus idem manet, easdemque indicationes suppeditat. nam si morbus ipse mutetur, ut si ex tertiana fiat quartana, aut vires debiliores fiant, aut humorum, ab una parte ad aliam, metastasis, aut quid simile fiat non solum remedium, sed etiam medendi methodus permutanda. Caput igitur istud hoc loco addendum putavi, quia non raro contingit ægrotantem, qui bono forsitan Medico utitur, si statim eventus non succedat, Medico ablegato empiricos, mulierculasque consulere. Ejusmodi autem Medicastri, Andabatarum more, cum morbis pugnant, varia remedia tentant, nec unquam in illo quiescunt, in quo standum fuerat. Sæpe ultimum remedium commendatur, & nullius apud populum sunt pretii, quæ præcesserunt, ut venæ sectio, purgatio, alteratio, & similia, quæ tamen morbum maxima sui parte edomuerunt. Tum etiam con-

tingit ut Medicus ipse importunitatibus & querelis ægrotantium & adstantium victus, sæpe cogatur remedia præcipitare, & præter rationis dictamen permutare. Quare debent ægrotantes patienter tempus curationis expectare, quòd in omnibus morbis idem esse non potest.

## CAP. V.

*De iis qui remedia omnia rejiciunt, si statim non curantur.*

**A**Lii verò, ut præcedenti capite diximus, omnino rejiciunt usum remediorum, si statim uno aut altero remedio non curentur, qui præterquam quod naturæ ipsi faciunt injuriam, quæ omnia cum tempore fieri vult, sibi ipsis tamen nocent maximè. Neglecti siquidem morbi altas in corpore agunt radices, fiuntque tandem omnino incurabiles, omnique remediorum virtute superiores. Aut alii qui natura sua salutare esse solent, quales sunt febres intermittentes, quas vult Hippocrates non esse periculosas. *Febres enim quocunque modo intermiserint, periculum abesse significant, aphor. 43. lib. 4.* tamen ejusmodi morbi perseverantes & neglecti, tantam visceribus labem infligunt, ut periculosos post se morbos relinquant, etiamsi forsitan ipsi sponte cessarent. Docet Galenus variis in locis fomitem tertianæ esse in hepate, quotidianæ in ventriculo, quartanæ in liene: nec mirum esse debet, si partes quarum œconomia totum corpus administratur, tandem labefactentur, unde sæpissimè morbi pessimi in ejusmodi partibus, febribus neglectis succedunt, obstructions contumaces, putredines, scyrrhi, scorbutus, hydrops, alique qui postea viscerum tono jam prorsus everso curari amplius nequeunt, sicut nimium frequens experientia docet. At hæc est artis medicæ præstantia, ut etiamsi curatio forsitan statim non perficiatur, viscera

scera tamen conservet, morborum causas adeo imminuat, earumque vim ita retundat, ut partes nobiles ab iis minùs afficiantur, sicque ejusmodi morbi adeo graves & periculosi omnino præca-  
veantur. Prædicta autem sic intelligi non debent, quasi intermittendus nunquam sit usus remedio-  
rum: prudenter enim Medici in morbis valde diuturnis, postquam per dies aliquot præparanti-  
bus, vacuantibus, roborantibus aliisque quæ ido-  
nea videbantur, usi sunt, naturæ quasdam conce-  
dunt inducias, & postea iterum ad curationem  
redeunt, sic viribus meliùs consulitur, quæ assi-  
duo remediorum usu atteri potuissent.

## CAP. VI.

*Remedia ob ingratitudinem non esse  
rejicienda.*

**S**ANÈ cum veterum Medicorum, qui Pharma-  
scorum vires, & medendi præcepta nobis reli-  
querunt, opera legere contingit, mirari subit,  
& copiam remediorum quibus ægros suos oner-  
abant, eorumque ingratitudinem, tam amara,  
foetida, omnibusque sensibus ingrata, sæpe etiam  
ruditer præparata sunt illorum plurima, & fami-  
liare ipsis fuit, ea dissolvere, & potanda præbe-  
re, quæ nos pilulis excipimus ad gustum fallen-  
dum, & elegantius præparamus: Medicus enim  
quantum potest, citò, tuto, ac etiam jucundè cu-  
rare debet. Quid igitur dicemus de morositate  
ægotantium nostri sæculi, quibus etsi gratiora &  
jucundiora quàm majoribus nostris præcantur,  
abhorrent tamen à remediis ob ingratitudinem,  
& potiùs morbum diutiùs ferre sustinent, quàm  
paucissimis remediis curari. Sanè fatendum est,  
jucundiora quidem & elegantiora recentiorum  
diligentia & cura, pharmaca plurima facta fuisse,  
non omnem tamen ingratitudinem ipsis fuisse  
ademptam. In qua re summam admirari licet  
Creatoris providentiam. Si enim similem medi-



camentis , quam alimentis gratiam indidisset , illorum usu jampridem humanum genus sese ipsum aut perdidisset , aut multum labefactasset. Pharmaca enim omnia naturam habent corpori nostro quodammodo adversantem , quoniam illud alterant , alias non forent medicamenta , & sic quoque ledere possunt. Illis quidem utimur ut corpus à statu præternaturali ad naturalem reducamus. Sed si ægri aut præposterè , aut diutius , aut sæpius quam par sit illis utantur , ex salutaribus causis tandem morbificæ fieri possunt , & suas , alienas scilicet à corporis natura , qualitates imprimunt , sicque corporis temperiem evertunt , unde rectè vulgari proverbio fertur : *Misere illos vivere , qui Medice vivunt*. Quare hortandi sunt plurimi tum viri , tum mulieres , ut parcius medicamentis utantur , valetudini enim vim inferunt , & fermè perpetuò remediis opus habere videntur , qui perpetuò & indefinenter iis utuntur. Pariter etiam hortandi sunt alii , quibus minùs firma valetudo contigit , ne ob saporis , & forsitan odoris aliquam gravitatem à salutaribus remediis , à Médico prudenti prudenter administratis , morosè & protervè nimis abstineant.

## CAP. VII.

*An domi nata remedia cuilibet regioni sufficere possint.*

**O** Prandum sanè foret , ut sicut ad victum & amictum sufficere sibi potest Anglia , ita etiam ad remedia. Fuerunt olim , suntque etiamnum hodie plurimi , qui ad popularia , & domi nata remedia , universam Medicinam reducere conati sunt , aliunde allata rejiciunt. Id *Plinius Medicis infensissimus scripsit lib. 24. cap. 1.* Medicosque reprehendit , qui Indos , Æthiopes , Arabes vocant in auxilium. Postea , inquit , fraudes hominum , & ingeniorum capturz officinas inve-

nere istas , in quibus sua cuique homini venalis promittitur vita , statim compositiones , & mixturæ inexplicabiles decantantur , Arabia , atque India in medio æstimantur , ulcerique parvo Medicina à rubro mari importatur , quum remedia vera quotidie pauperrimus quisque cœnet. Verum nondum id perfici potuit , nec unquam ulla gens adeo fœlix fuit , ut suis contenta esse potuerit , præter Indos. Cum enim in variis regionibus eadem sæpissimè nascentur , certum est non posse ubique ejusdem esse bonitatis & præstantiæ. Licet igitur eadem repetere ex regionibus ubi præstantiora nascuntur. nam vires plantarum variant secundum naturam locorum : quasdam enim plantas Arabes in tertio gradu calidas dicunt , quas Græci in 2. Germani tantum in primo tales esse asserunt. Vnde Galenus qui in temperatissimo solo vivebat , non credidit tamen patriæ remedia sufficere , sed terram Lemniam ex Insula Lemno advocabat , Dictamnium Creticum probabat , petroselinum Macedonicum , pluraque ejusmodi. Et in purgantibus remediis id maximè patet , quæ domi non nascuntur , sed ea aliunde afferri necesse est , ut sennan , rhabarbarum , aliaque plurima , quorum quædam etsi transplantata , in hortis quodam mangonio crescant , non tamen absque insigni virium labefactione , neque eâ copiâ quæ toti regioni sufficere possit ; Sic utimur quotidie saccharo , pipere , aromatibus , vino , quæ ab aliis regionibus nobis suppeditantur. Lybica iris , inquit *Gal. antid. lib. 1. cap. 23.* non aliter differt ab Illyricâ , quàm corpus mortuum à vivo , nullo odore ex Lybica exeunte , ex Illyrica verò multo gratoque. Noluit Deus quamlibet regionem singulis abundare , nec semper , ut humana servetur societas. Sicut enim in singulis regionibus urbes variæ sibi necessaria suppeditant ; sic regionibus integris aliæ regiones. Si una urbis alterius ope indiget ; quidni una regio alterius de-

fectum sublevabit? At credunt majorem habere affinitatem cum incolarum temperie domi nata remedia. Attamen experientia ostendit nos aliunde advectis aromatis, & vino commodè uti, & innoxie. Medicamenta autem non sunt similia naturæ, sed quodammodo adversa, quoniam illam alterant, unde necesse est Medicum iis uti, quæ id præstare commodissimè possunt, & propterea cum idem medicamentum in eadem etiam regione, pro locorum situ & natura, facultatum suarum immutationem patiatur, colligi illud debet ubi optimum nascitur, & propterea sæpe aliunde repeti. Quod si pari cum utilitate fieri id possit, semper domestica peregrinis præferantur.

## CAP. VIII.

*De iis qui purgationem, & Venæ sectionem reformidant, ne assuescant.*

**P**urissimi sunt qui satis libenter anniversariis purgationibus, & venæ sectionibus utuntur, Vere scilicet & Autumno ad humores pravorum evacuandos, ne postea Æstate scilicet, & Hyeme morbi succedant, quod suadet Hippocr. aphor. 47. lib. 6. *Quibus vena sectio, vel purgatio prodest, his verè purgatio aut vena sectio convenit*, quod etiam repetit aphor. 53. lib. 7. Quidam tamen sunt adeo formidolosi, ut etiam si his remediis opus habeant, ea tamen detrectant, ne in consuetudinem trahant. Credunt enim si semel iterumve illis usi fuerint, fore ut si postea eorum usus intermittatur, vel necessario ægrotent, aut sanitate minùs firma fruantur: quorum errorem hoc loco indicare constitui, quamvis etiam quidam Medici ejusdem fuerint opinionis, qui vetant ne temerè magnis remediis, venæ sectioni & purgationi quicquam assuescat, ne intermissa hac consuetudine graves incurrat morbos. Verùm minùs rectè hæc dicta sunt. Nam axioma est Medicorum unum ab uno

uno indicari. Et consuetudo ipsa propriè non indicat, sed tantum coindicat; refertur enim ad naturam, dicitur enim altera natura. Quicquid indicat vel sui conservationem, vel ablationem indicat. conservationem quidem si sit secundum naturam, ablationem verò si sit præter naturam, ut morbus, & causa morbifica. Cum igitur causa morbifica sola vacuationem indicet, vel per phlebotomiam, vel per catharsin, non possunt pariter hæc remedia à consuetudine indicari. quia consuetudo refertur ad naturam; at unum idemque remedium non potest à diversis indicari. Si in quopiam homine copia sanguinis aut alia quæpiam simili causa venæ sectionem postulat, ne in gravem aliquem morbum labatur, sequenti anno nisi eodem vitio laboret, non necessario ejusmodi remedium natura postulabit, ad quam refertur consuetudo, quoniam sola causa morbifica indicat ejusmodi remedium; non natura. Si igitur mittendus iterum sit sanguis, id fiet propter vitium causæ morbificæ, non propter consuetudinem. Nec sequitur si hoc anno tantum est in Socratis corpore sanguinis vitium, ut vacuationem postulet, fore ut Vere sequenti adsit simile vitium, nam & hominis, & aëris temperies, & victus ratio possunt immutari. Aliàs nunquam fieret morborum curatio perfecta, si qui semel abunde fuit vacuatus, necessario eundem morbum pateretur. Consuetudo igitur ipsa remedium non exposcit, sed permittit, quia vacuationes consuetæ minùs molestæ sunt, & confidentiùs vacuari debent consueti. Ad futuras tamen vacuationes, nisi simul præsens adsit causa morbifica, sola consuetudo nihil facit, sed si quidam morbi singulis annis repetere solèant, ut podagra, arthritis, melancholia & similes, quoniam horum morborum causæ intus latent in corpore, optimum est remediis idoneis ejusmodi morbos præcavere, ut se fecisse Galenus scribit *in comment. ad aphor. prædictum*, quæ

remedia patienti conveniunt, non ob assuetudinem, sed ob causarum morbificarum præsentiam, quæ quoties adsunt, ejusmodi remediis debent emendari. At omnes morbi non sunt ejus naturæ ut singulis annis eorum metus impendeat, propterea verendum non est, ne quispiam remedio assuescat, nisi morbus quoque reddatur consuetus & familiaris. At remedium quod morbum curat, causa non est cur idem morbus postea redintegretur, quod tamen foret, si usus remedii ipsius necessitatem faceret, quia sola causa morbifica vacationem postulat, unde necesse erit ut adhibita vacuatio causam morbi deinceps augeat, ad administrationem similis medicationis.

## CAP. IX.

*Ad Venæ sectionem & purgationem Astro-  
rum rationem non esse habendam.*

**N**imiùm familiare est quamplurimis, in usu remediorum observare situm signorum, an scilicet Luna sit in hoc illove signo, quod parti huic vel illi præesse creditur. Alii concursus & oppositiones Astorum considerant, cum purgandum est, aut sanguis mittendus, ut quando Luna cum Solè conjungitur, piaculum esse censent hæc remedia adhibere. Scribit Avicennas fen. 4. lib. 1. *Quidam præcipiunt ne ventosa in principio mensis apponantur, quoniam humores nondum ebullierunt; nec in fine mēsis, quia humores tunc sunt minuti, sed in medio mensis cum humores sunt ebullientes, Luna augmentum sequentes, & augetur cerebrum in cranio, & aqua in flaminibus, accessionem, & recessionem habentibus, quod ipsius interpretes ad alias vacationes majores transferunt, cum eadem causa sublit. Hic considerandæ sunt duæ sententiæ, quarum una est Hippocratis & Galeni, alia est Astrologorum. Hippocrates libro de aëre, aquis & locis, jubet observare magnas temporum mutationes, & solstitia, ut*  
neque

*neque medicamenta in illis exhibeamus, neque uramus  
qua circa ventrem sunt, neque secemus, priusquā pra-  
tereant decem dies aut plures, sed potissimum decem.*  
Per magnas autem mutationes intelligit caloris, &  
frigoris variationes, quæ in solstitiis, æquinoctiis,  
sub cane, & ante canem, & ex quorundam syderum  
ortu & occasu contingunt. Addit enim: *Periculosissi-  
ma sunt etiam ambo solstitia, maximè verò æstivum,  
periculosum etiam æquinoctium utrumque, magis verò  
Autumnale, syderum quæque ortus observandi, præcipuè  
Canis, Arcturi, & Plejadum occasus*, quia illis tem-  
poribus morbi finiuntur, vel immutantur. Hæc  
igitur ex sententia Hippocratis cognoscenda  
sunt, propter mutationes repentinas aëris, quæ  
orientibus quibusdam Astris fieri solent. Quidam  
etiam syderibus prædictis addunt Lunam, cujus  
maxima vis est in hæc inferiora, eamque humori-  
bus maximè dominari experientia constat, idem-  
que agnoscit Galenus 3. de diebus decretoriis. Astro-  
logi autem ulterius processerunt, nam signa Zo-  
diaci singulis corporis partibus attribuunt, & quum  
Luna, vel Sol in ejusmodi sunt signis, nefas esse  
putant, illis uti remediis quæ partes illas spectant,  
quibus ejusmodi signa præesse creduntur, & po-  
pulus lectione calendariorum, quæ singulis annis  
nova prodeunt, ejusmodi nugas observat nimis  
curiosè, de quibus dicemus plura capite sequen-  
ti. Verum si omnes hæc Hippocratis, & Galeni ob-  
servations veræ sunt, vix supererit remediis lo-  
cus. nam in singulis æquinoctiis, solstitiis, circa  
ortum & occasum Arcturi & Plejadum, quiescen-  
dum erit per decem dies, ante Canem, & sub Cæ-  
ne, per dies ad minimum quadraginta, sic in om-  
nibus Lunæ oppositionibus, conjunctionibus,  
quadratis, aspectibus abstinendum erit secundum  
Astrologos. Quæ omnia si superstitiosè observen-  
tur, nullus relinquetur remediis locus, etiamsi ea  
negligamus sydera quorum vires nondum sunt  
observatæ, quorum quædam forsan etiam non

minùs nocere possunt. Astra in curatione morborum spectanda non sunt, quatenus sunt in cœlo sed propter vires suas, & alterationes eas quas in aëre faciunt, sicut sub Cane vetat purgationes Hippocrates, solummodo ob aëris fervorem. At quæcunque demum sit aëris alteratio, ea neque pariter omnibus utilis esse potest, neque noxia ad evacuationem, sed quibusdam proderit, aliis nocebit, prout varia est hominum constitutio, neque ea unquam fuit cœli facies, quæ nulli fuerit salutaris, aut etiam noxia. *Naturarum alia quidem ad æstatem, alia ad hyemem benè malève se habent, aphor. 2. lib. 3. sic quoque morbi alii ad alia benè se habent, vel malè, & quadam ætates ad tempora, & loca, & vitus genera, aphorismo 3. libri prædicti, quoniam syderum vires, quæ semper sunt universales, eodem tantum modo agunt, & quibusdam nocent, aliis prosunt, secundum variam morborum & agrotantium naturam, ætatem, regionem, anni tempus, aliasque ejusmodi circumstantias, quæ causarum universalium virtutem determinant. Deinde Astriorum concursus causa tantum est procatartica, & universalis, quæ internas suscitât, & agitât. Hæ autem ex propriis suis signis cognoscuntur, nec opus est Astra considerare, sed tantum motiones causarum internarum, quæ tempora morborum constituunt. Verum Astrologos ipsos quod spectat, vano illi commento singulas corporis partes astris attribuunt, tum planetis, tum signis Zodiaci. Et quoniam Planetarum, signorumque Zodiaci non est unus idemque motus, quorundam Planetarum celer, aliorum tardissimus, signorum autem idem, semperque æquabilis, raro continget ut Planeta cum signo eidem parti dicato simul concurrant. Luna quidem omnia signa singulis mensibus peragrat, ideo sæpius cum omnibus illis conjungitur. At Saturnus, quem spleni præficiunt, rarissimè cum signo eidem parti dicato copulatur. Astra igitur quæ*

quæ singulas partes regere dicuntur, vel influunt in substantiam partis, vel in conformationem: non in substantiam, quia nulla pars organica est in corpore quæ variis partibus naturæ adversæ non constet, ut pedes & manus constant ossibus, nervis, arteriis, musculis, quæ non possunt æquè primò subjici huic vel illi syderi. Deinde cum similes secundum substantiam partes sint etiam in aliis organis, ut ossa sunt in pedibus, manibus, thorace, capite, cur unum idemque sydus omnibus hisce non dominabitur? Restat igitur ut influant astra in conformationem solam, quæ singulis partibus est accidentaria. nam partes singulæ seorsim. possunt esse absque ejusmodi conformatione, ut ossa non minùs possunt esse incurva, quàm recta, & tamen benè nutrirî. Conformatio partis cujuslibet pendet ex numero, magnitudine, situ & figura. Non potest influxus fieri in numerum partium, quia numerus ratione sui non est ens reale, tum quia una particula ablata, vel addita, non mutatur tamen influxus in partem, ut si à manu digitus unus desit, non desinit tamen influxus. Pariter nec in magnitudinem, quia aliud foret influxus in infantem quam in adultum. Non in situm, quia sic mutato situ mutaretur quoque influxus, ut in manum extentam, capiti, aut pedibus impositam. Demum nec in ipsam figuram, quia pariter mutata figura non mutatur vis & efficacia signorum in partem. Patet hinc vires ejusmodi in unam potius partem, quam in aliam falsas esse & commentitias. Forsitan si quicquam simile datur, virtus ejusmodi extendet sese solum ac illas partes, quæ proprium habent parenchyma ab aliis diversum, ut cor, cerebrum, jecur, &c. Non autem ad manus & pedes, similesque alias partes, quarum similes partes sunt eadem secundum substantiam, sed tantùm conformatione distinguuntur. Revera plurimi Medici parum curasse videntur Astrologicas istas observationes. In



solstitiis & æquinoctiis plurimos vidi ægrotantes, quibus salutariter administrata fuere prædicta remedia; quæ si omiſſa fuiſſent, forſitan æger prius periſſet. In urgentibus igitur morbis, ut in apoplexia, angina, pleuritide, febre ardente, periculoſum eſt propter cœli diſpoſitionem, neceſſaria remedia vel omittere, vel differre. nam morborum tempora, naturæque actionem potiùs ſpectare oportet, & ex ejuſmodi obſervatione, remedia modo hæc, modo illa, quæ varia variis temporibus morbus exigit, præſcribere. At cum præcautionis gratia, vel catharſin, vel phlebotomiam Medicus imperat, licebit obſervare quatuor Lunæ quadras, & primis potiùs quàm poſtremis prædictis uti, quoniam Lunæ in humores manifeſtum eſt imperium, eâ crescente augmentur, decreſcente minuuntur. Poterunt pariter æquinoctia & ſolſtitia vitari. At in ægris abſque periculo prædicta nequeunt obſervari, cum morbi tantas moras non patiantur. Sed ſemper rejicienda ſunt Aſtrólogo- rum placita de dominatu ſignorum in ſingulis corporis noſtri partibus, cum abſurdum ſit unum ſyduſ huic, aliud illi parti præeſſe, quoniam omnia ſydera omnibus partibus præſunt, nec agunt immediatè, ſed per aeris alterationes, à quibus totum corpus immutatur.

## C A P. X.

*De ridiculis Calendariographorum obſervationibus Medicis.*

**Q**Vis præterea non rideret cautiones illas, quas ſingulis annis populo præſcribunt Aſtologi in ſuis calendariis, circa uſum remediorum, inter quas non minima illa eſt, de quâ jam ſupra diximus, quod partes corporis ſingulis Zodiaci ſignis attribunnt; Reliquas jam perſequemur. *Primò* dicunt commodiſſimum ad purgationem tempus eſſe, quando Luna in aqueis ſignis

signis movetur, scilicet in Cancro, Scorpio, & Piscibus. *Secundò* quando Luna est in tali signo, fiat purgatio per electuaria, in alio signo per potiones, in alio verò per pilulas. *Tertiò* in tali signo purgetur bilis per electuaria, in tali per pilulas; in tali per potiones, & sic de reliquis humoribus. *Pariter* bonū esse dicūt venam secari pituitoso, cum Luna est in Ariete, vel Sagittario; melancholico quando est in Libra, vel Aquario; bilioso quando est in Cancro vel Piscibus; sanguineo pariter quando est in alterutro horū. Sed notandum est *quoslibet morbos quolibet tempore fieri posse, & exacerbari* ex Hippocrate aphor. 19. lib. 3. Quoniam ut docet *Galenus* in comment. non solus aër causa est morborū, sed etiam propria ægrotantis temperies, & victus cujusque ratio peculiaris, unde fieri potest ut etiam æstate frigidis & pituitosis morbis quispiam corripiatur. Cum igitur uno eodemque tempore variis morbis simul plurimi affligantur, nec omnes simul eodemque modo purgari possint, debeantve, & in morbis quando sunt acuti, periculum sit in mora, dum expectamus donec Luna hæc vel illa signa percurrerit, interea occasio ægrum juvandi, quæ volucris dicitur *primo aphorismorum*, amittetur, nunquam forsitan amplius reditura, quia ut docet *Galenus* in commentario, occasio dicitur præceptus, quoniam corpus nostrum assiduè immutatur, non tantum ab externis causis (quales sunt aër & astra) sed etiam ab internis. Vnde fit ut qui eodem simul tempore decumbere incipiunt, diversis tamen diebus purgari debeant, siquidem etiamsi iidem sint syderum & Lunæ aspectus, interna tamen corporis virtus humores variè alterat, concoquit, & expellit, quod Medicum, qui naturæ, non Astrorum minister est, considerare oportet, ut singula suo tempore ægris administret. Morborum enim curationes secundum diversa illorum tempora variantur. Cum autem tempora morborum in aliis sint longiora,  
in aliis

in aliis breviora, si Lunæ & syderum aspectus expectamus, amittimus interea salutarem illam indicationem, quam morbi tempora suppeditant. In quibusdam enim non nisi concocta materia putgamus, in aliis verò etiam in principiis, in quibusdam autem morbis principia citò pertranscunt, & statim ad statum perveniunt, in aliis verò sunt longissima. Quapropter non potest omnibus idem esse purgandi tempus quod tamen foret, si Lunæ syderumque aspectus esset considerandus, sic enim contingere potest, ut quando natura purgationem postulat, Luna repugnet, sic omnia forent irrita, unde rectè, præstantissimi tam antiqui, quàm nostrorum temporum Medici istas observationes summo cum judicio neglexerunt. Sed absurdum magis est, quod de remediorum forma addiderunt. Cum enim eodem numero remedia possint à Medico potionis, electuarii, pilularumve forma præscribi, frustra Lunæ vis imploratur. Facile enim est Medico, electuarius *Hameeh, diasennam, catholicon, &c.* Electuarii forma ægro concedere, vel juscule, aquis stillatitiis, aliove liquore dissolvere, ut fiat potio. Videntur sanè ignorare Astrologi isti, quid sint electuaria, vel potiones, quamvis enim omnes potiones ex electuariis non fiant, possunt tamen electuaria in potiones transformari, imò fermè semper iisdem purgantibus simplicibus, ut senna, rhabarbaro, polypodio, &c. utimur, & ad potiones & ad electuaria. Formam autem remediorum Medici variam præscribunt, interdum ut agris placeant, quorum alii solida lubentius assumunt, quam liquida, alii verò contrà. Interdum propter partium expurgandarum situm profundiorē, materię tenacitatem, aliasque intentiones. Idem dicendum est de pilulis. nam etiam antiqui Medici Aëtius, Paulus, alique aloen, colocyntiden, & quicquid demum pilulis excipimus, quantumvis ingratissimum sit, liquore solvebant, & agris propi-

propinabant, quæ nos solida forma exhibemus, ob nimiam amaritudinem, & ut diutius in stomacho maneant, quando à capite, vel longinquis partibus est attrahendum. Demum observare oportet, quæcunque solida forma assumuntur, antequam vires suas in corpore exerant, in stomacho prius liquescere, quod perinde est, ac si à Pharmacopœo fuissent antea liquore aliquo soluta, idem enim tum natura, tum ars facit. Imò quæ liquida exhibentur, citius operationem suam incipiunt, quia jam ipsorum compages ab arte soluta, naturæ negotium non facit, unde & pilulas cochias valde amaras in apoplecticis, aliisque frigidis morbis, dissolvunt Medici in aqua vitæ, aut alia convenienti, ut citius vim suam exerant. Pariter quæ de phlebotomia dicuntur ab Astrologis vanissima sunt, nam pituitoso, aut morbis à pituita laboranti, nunquam convenit venæ sectio, quæcunque sit Lunæ constitutio, nisi sanguis cum pituita simul redundet. Melancholicis pariter prohibet *Galenus* venæ sectionem, nisi sanguis qui vacuatur, melancholicus appareat. Solis biliosis & sanguineis convenit, in quocunque demum signo Luna fuerit, si morbus, ætas, viresque consentiant, ob rationes dictas, unde rectè *Galenus libro de vena sect.* ait quolibet morbi tempore posse mitti sanguinem, si illius mittendi indicationes adfuerint, etiamsi vigesimus ille dies à morbi principio foret. Sunt autem illæ, morbi magnitudo, & vires, non autem syderum constitutio, quam si observemus, forsan, ut jam diximus, agendorum occasio cum certo agri detrimento peribit.

## CAP. XI.

*Diebus Canicularibus purgationem non esse  
neciam.*

**F**orsitan reperientur non adeo pauci qui prædictas observationes negligent, & ridebunt, sed quis ille est hodie, qui dies istos caniculares ignoret, eoque tempore purgationem non reformidet, ex antiquo Hippocrati decreto, libro 4. aphorism. 5. *Sub Cane, & ante Canem difficiles sunt medicationes.* Vnde multi etiam si eo tempore morbos patiantur, qui venæ sectione aut catharsi opus habent, iis tamen remediis uti detrectant qui duo non observant. Primò morbos tunc naturæ soli curandos illos tradere, quando maximè ipsa remediis, & auxilio indiget. Secundò si sub Cane absque remediis possunt morbi profligari, quidni pariter quolibet alio tempore, sic illorum usus posset omnino à morborum curatione ablegari? Videamus autem rationem quare Hippocrates difficiles purgationes dixerit esse sub Cane, quæ videtur ex Galeni commentario triplex esse. Prima, quia corpus Æstatis ardore nimis incalescens, ferre non potest acrimoniam medicamentorum; Secunda quia tunc jam satis debilis natura, purgatione redditur imbecillior. Tertia quia aëris fervor purgationi obstitit, humores enim trahit à centro ad superficiem corporis, pharmacum verò eosdem in centrum retrahit, sic fiunt duo motus contrarii, sic vel nulla, vel molesta fit purgatio. Attamen hæ rationes in regione frigidiori, nostroque tempore minùs valent, quia non tantus sentitur ardor in Anglia sub Cane (maximè in Borealibus Angliæ regionibus, ubi hæ scribo, ubi tamen non minus verentur Canis hujus morsum quàm in Hispania) & propterea non est verendum, ne corpus nostrum magis quam par est accendatur, debilius fiat, aut humores nimis rapidè in cutem trahantur. Deinde mitiora sunt nostra  
medi-

medicamenta iis quibus Hippocrates utebatur, ut sunt cassia, tamarindi, senna, rhabbarum, & similia, quæ nec corpus valde accendunt, nec humores admodum exagitant: & demum quoniam etsi fortioribus uteremur, ita tamen præparari possunt, & eâ quantitate exhiberi, quæ corpori parum noceat. At regio Hippocratis, cum sit fervidissima, neq̃ alia quam valentissima & calidissima pharmaca in usum ipse adhiberet, minùs mirum esse debet, si tempus illud formidabat. His autem in regionibus non sunt hi dies adeo fervidi. Præterea non dixit absolutè *Hippocrates*, non esse purgandum sub cane, sed tantum purgationem esse difficilem, non autem impossibilem, unde cum hoc tempore morbi fiant acutissimi, qui absque phlebotomia & catharsi nequeunt curari, rectè calidissimarum regionum, ut Hispaniæ, Italiæ, Galliæ Narbonensis, Medici purgantibus utuntur, sed minùs frequenter, & minùs validis. Quidam tamen non ob caloris tantummodo vim, sed ob syderis malignos effectus à purgatione censent abstinendum, & veteres tantum huic astro tribuebant, ut per excellentiam *astrum* vocarent, quasi præ cæteris vim quandam excellentem habeat, non tantum in corpus, sed etiam in animum, ita ut homines & bruta, sed præsertim canes, tunc magis quàm aliis temporibus laborent, & canes ipsi efferari credantur. Vnde etiam venæ sectionem Galenus hoc tempore improbat; Verùm omnia maleficia quæ Flinius recenset, non sunt perpetuæ veritatis, & rarò. aut nunquam hic in Anglia observantur, & absurdum est credere, ullas stellas esse maleficas, cum omnes beneficiæ sint, & salutare, & quæ veteres de hoc sydere scripserunt experientiæ non respondent; Videmus singulis annis varios esse caloris gradus, nec semper singulis annis eosdem, quæ syderum virtus ex varietate conjunctionum & aspectuum solet alterari, unde maligni ejusmodi effectus Syrii (siqui sunt)

possunt

possunt ex aliorum syderum aspectu impediri. Nec necessario si hoc anno quum hæc scribo maximus ardor est, talis erit anno sequenti. Quare non est quod purgationem sub Canē semper formidemus, nec omnibus diebus quibus Canicula viget, nam si hodie impensè calet, cras forte erit cœlum temperatius, tantum hoc tempore, & minùs frequenter, & minùs validis est utendum, nam etiam ea quæ Hippocrates olim agris suis administrabat, vix unquam à nobis ne hyeme quidem præscribuntur. Opinioni huic nostræ assentiuntur Ioubertus in vulgi erroribus, Mercurialis, Argenterius, Hollerius in commentariis ad prædictum aphorismum, Fernelius, Fuchsius, Valleriola, Claudinus, Vallesius, aliique omnes qui hac de re scripserunt. Sufficiet nobis Iacobi Hollerii viri gravissimi testimonio caput hoc concludere. Hoc præceptum, inquit ille, locum habet in Hippocratis regione calidissima, & similibus, sed non item in his regionibus (loquitur autem de Lutetia Parisiorum, in qua vivebat Hollerius) nam præterquam quod habemus benigna & levia medicamenta, quibus utamur, qualia sunt, cassia, catholicon, lac Asninum, &c. Hic nullum tempus salubrius magisque temperatum (præsertim quum flant Etesia) experimur, quàm dies Caniculares, adeo ut experientia constet morbos Iunio & Iulio mense natos solvi solere mense Augusto, & sub Canicula. Quare si in hosce dies incidat morbus, non veremur sæpe venam aperire, & fortiora medicamenta imperare. Veruntamen si exoriatur vehemens ardor & Canicularis, ut sæpe in Gallia, mense Majo, & Iunio, utemur consilio Hippocratis, tum in Phlebotome, tum in purgationibus præscribendis; Vbi ostendit non ipsos dies numerandos, sed æstum esse observandum, qui si contingat etiam mense Majo, ante Caniculam, imò quocunque tempore contigerit, Hippocratis regula est observanda. Adde-rem hoc loco varias esse de ortu Canis sententias, cum priùs apud antiquos oriretur, quàm  
nunc

nunc facit, & propterea ortus illius incidit apud nos in ea tempora, in quibus minùs calere solet, quapropter minùs eo tempore formidanda est purgatio, qua de re videri potest vir doctissimus *Dionysius Petavius*.

Vt autem pateat quanta sit inter Angliam & Graciam Hippocratis regionem differentia, observandum est quod scribit *Hesiodus libro secundo Operum & dierum*

Πληιάδων Ἀτλαγχεῖον ὅπι τελλομένηων  
 Ἀρχαὶ δ' ἀμήτε: ἀρότοις δ', δυσολομένηων.  
 Αἱ δὴ τὶ νύκτας τε ἔμματα πεισασέονται  
 Κεκρύφαται, αὐτὶς δὲ περιπλομένη ἐνταυτῇ  
 Φαίνονται, τὰ πρῶτα χαρσαομένοις σιδήρε.  
 Οὗτος τοι πεδίων πέλειται νόμος, id est,

*Pleiadibus Atlante natus exorientibus  
 Incipe messem, arationem occidentibus.  
 Ha quidem noctesque & dies quadraginta  
 Latent: rursus vero circumvolvente se anno  
 Apparent, primum ut acuitur ferrum.  
 Hac utique arborum est regula.*

Vbi messem dicit esse incipiendam orientibus Pleiadibus, quo tempore ver apud nos vix incipit. Oriuntur enim Pleiades mense Aprili, veteri stylo, aut non longè post principium Maji.

## CAP. XII.

*Purgationes sepius esse repetendas.*

**Q**Uoniam remedia, ut diximus, sunt tadiofa, plurimi ex unico purgante remedio perfectam expectant curationem, morbumque credunt superare Medici captum, & industriam, si semel assumpto cathartico non cedat, nec lubenter audiunt illud esse iterandum, qui parum norunt quibus de causis Medici purgationes repetere



repetere cogantur. Optandum quidem foret, ut morbi unico propinato cathartico cessarent, quod etiamsi interdum contingat, non solet tamen esse perpetuum, & sanè pharmacum plenam perfectamque faciens purgationem, absque summa consideratione exhiberi non debet, quoniam vehementia omnia cathartica naturæ sunt adversissima; Ideo tantum præscribi debet ejusmodi perfecta vacuatio, ubi vires ferunt, materia pauca est, & tenuis, & natura seipsam ducem ostendit, quando humores sunt planè concocti, viæque omnes in alvum patentes sunt. Sed si humores non sint simul omnes concocti, pluribus vicibus sunt vacuandi, factò à levioribus initio. Idemque faciendum si vires sint imbecillæ, humor copiosus, quis enim potest in cachexia totum humorem peccantem una vice in alvum deducere, unde plurimum, & repente vacuare periculosum esse censuit *Hippocrates, aphor. 51. libri 2.* Si enim empyi & hydropici cum uruntur aut secantur, si pus & aqua universum effluxerint, moriuntur, *Aphorif. 27. lib. 6.* Si sanguinis missio quæ fit ad lipothymiam, humorem noxium totum non vacuat, quandoquidem ex octavo methodi sequuntur alvi dejectiones, bilis vomitus, sudores, quanto minùs per purgans medicamentum, totum id quod noxium est, vacuare licebit? Tutius igitur paulatim sunt purgationes prout se habent ægrotantis vires, partis affectæ conditio, humoris peccantis natura & situs, quia rarò totus humor eodem modo est in corpore, sed per varias partes diffusus. Sæpe illius pars una cocta est, alia cruda, una tenuis, alia crassa, una quieta, alia turgens, & in motu; quæ omnes unica vice nequeunt evacuari. Melius est igitur tutò, quam citò & cum periculo purgare. Non debent ergo amplius morosi esse ægrotantes, si Medicus prudens & doctus, purgationes repetere suadet, nam etiam morbo curato utiles sunt, ad morbi reliquias tollendas, & præcavendam recidivam.

## CAP. XIII.

*Non esse pilulis purgantibus utendum à  
cæna.*

**N**on est novus hic error, sed à quam plurimis Medicinæ scriptoribus eleganter refutatus, quamvis quidam Medici pravam hanc consuetudinem sequantur. Putant autem plurimi cum caput purgandum est, utilius esse post cœnam pilulas assumere, sic enim illarum vires unà cum ciborum vapore ad caput commodius ferri. Quid tamen falsum est, trahi scilicet humores à capite ad ventriculum, non per venas, sed per gulam & fauces, sicque possent facile per spûm, si non omnino, saltem maxima ex parte vacuari, neque unquam talis descensus humoris tempore purgationis ab ægris sentitur, ut rectè advertit *Iulius Caesar Claudinus doctissimo, & elegantissimo libro de ingressu ad infirmos, cap. 9. lib. 2.* Revera enim tempus exhibendarum pilularum idem est quod aliorum medicamentorum, nempe matutinum tempus, absoluta demum ciborum concoctione, nam aliàs ciborum copia vis medicamenti obtunditur, & obruitur, ipsi cibi corrumpuntur, nam medicamentum prava humores trahit ad ventriculum, & cibis commiscet, præterea superius ventriculi orificium vellicat, sicque vomitum provocare potest, docente *Gal. 4. de Sanit. tuenda. & Paulus lib. 7. c. 4.* reprehendit eos qui aloem vespere exhibent, & à cibo, quia cibum corrumpit & bilem minimè vacuat; Si igitur aloë benignum adeo catharticum, post cibum tantam noxam inferre potest, quid futurum erit, si vehementiores pilulæ cibo nondum concocto assumantur? Igitur potius matutino tempore quàm noctu pilulæ exhibeantur. Scio quidem ob varias causas posse etiam aliis horis præberi, ut post meridiem, & vespere, sed semper longè à cibo. Sic *Galenus* exhibuit vespere catapotia

catapotia ex aloe, scammonio, & colocyntide, sed non post cibum, quia verisimile est ægrum tunc non cænasse, quoniam & linguam tumefactam habebat, & æger erat. Rarò autem ægri nisi coacti cibum sumunt. Plura *Fuchsius in Paradoxis* hac de re scripsit; Propterea hoc loco hæc sufficiant. Faciliùs enim & lubentiùs hac in re Medicis morem gerunt ægrotantes, quàm in aliis multis, non minùs necessariis, & utilibus.

## CAP. XIV.

*Medicas potiones non solum calidas, sed etiam frigidas sumi posse.*

**S**olent quoque plurimi cum purgatorias sumunt potiones, eas priùs calefacere, quasi eadem esset pharmacorum, & jussulorum ratio, quod quidem non improbo; sic enim citiùs videntur operationem suam incipere, & reduci ad actum. Sed tamen monendi sunt non minùs commodè frigidas hauriri posse, æstivo tempore, in stomacho fervidiori. Plurima enim purgantia, quæ subeunt harum potionum compositionem, minùs commodè ferunt coctionem, & levi calore virtus eorum exhalat, quæ si non tota perit, pars tamen saltem retunditur, sicut apparet in rhabarbaro, quod redditur ignavius, si igni admoveatur, sicuti docet ipsius extractum, quod primùm sit infusione, quæ tincturam viresque elicit, postmodum lenta exsiccatione ad extracti consistentiam reducitur, sic aliquot drachmæ quæ ad plurimas infusiones satis sunt, vix ad unicam extracti dosin sufficiunt, quia infusionem exsiccando virtus cathartica simul evanescit. *Secundò* frigida potio ori & palato minùs ingrata esse solet, quàm quæ calida est. *Tertiò* ideo faciliùs retinetur, nec tam faciliè evomitur, tepida enim omnia natura sua stomachum subvertunt, vomitumque cient, idque faciliùs si stomacho ingrata simul sint, & adversa, qua-

sa, qualia ferme solent esse omnia cathartica.

## CAP. XV.

*Die purgationis non esse piaculum frigidus  
potus sumere.*

**P**iaculum esse putant fermè omnes, eo die quo quis purgans medicamentum assumpsit, aliquid frigidum bibere, sed calidos solum potus, ut posseta sua, quæ nunc in ore omnium fermè ægrorum versantur, quam consuetudinem non improbo, promovent enim purgantis actionem, & humores à ventriculo detergent. Sic lego apud veteres aquam calidam convenire post summptionem purgantis, primò si solidum siue pharmacum, ut solvatur, secundò ad ipsius malitiam corrigendam, tertio ut detergeatur à stomachi parietibus, ne illis adhæreat; Eadem pariter utebantur, post completam purgationem, ad stomachum abluendum, reliquias pharmaci expellendas, tum ad inhibendam vim pharmaci, si nimis violenter purgârit; Eademque est ratio de possetis dictis. Sed frigidus potus semper denegare non est necessarium, possunt enim sine noxa, imò cum maxima utilitate interdum propinari. Quidam siquidem aquam frigidam imperant, si stomachus sit calidus, ut acrimonia pharmaci removeatur. Id docet Aëtius tetrab. primæ, Sermone 3. cap. 133. *Si facile purgentur, inquit, postquam biberint medicamentum, dabimus ipsis aquam frigidam absorbendam, aut colluendam.* Ægrotabat Siciliæ Prorex Iohannes de Vega. sumpto pharmaco segniter purgabatur. Medicus iusculi pulli cyathum sine sale Pro regi offerebat. Accedens doctissimus ille Medicus *Philippus Ingrassia*, aquæ frigidæ librâ unam cum pauco saccharo dedit, cessarunt statim nausea, morsusque ventriculi, & purgationem sciliciter perfecit. tunc gratias magnas egit Ingrassia, & vas argenteum in quo frigidam bibit pretii  
G aureorum

aureorum quinquaginta ipsi dedit, sicut ipse re-  
 fert libro de frigida potu post medicament. Et  
 recenset *Sanctorius com. in artem Galeni*. Non est  
 igitur quod timeamus frigidos potus, ut cerevi-  
 siam, in iis qui purgantur, maximè cibi tempore,  
 cum enim quatuor, vel quinque post sumptum  
 medicamentum horis liceat aliquid cibi sumere,  
 quare potus frigidiusculus denegaretur, præsertim  
 si qui purgatur, actu non ægrotarit, sed præcautio-  
 nis tantum gratia pharmacum sumpserit. Sed au-  
 diamus *Mesuen* gravissimæ authoritatis scripto-  
 rem. Is autem *Theoremate tertio*, agens de causis  
 quare medicamentum non vacuat, si ob naturæ  
 imbecillitatem id contingat, inter alia dato potu  
 aquæ parum frigida juvari ipsius actionem scri-  
 bit; *Si verò facultas expultrix est imbecilla, aut medi-  
 camenti actio debilis, & remissa, data aqua modicè fri-  
 gida, & hora post adstringente aliquo medicamentum  
 potenter ad inferiora detruditur.* Eodem capite: *Si  
 medicamentum non vacuaret, & molesta in corpore  
 excitet symptomata, præter dicta, inquit, auxilia  
 pharmacorum malignitatem obtundit, & acrimoniam  
 frangit, Raso auctore, potus aqua vehementer frigida;*  
 Et theoremate quarto capite quinto, Canone pri-  
 mo. Eos reprehendit qui nimis citò post sumptum  
 pharmacum jura pingua, & pulmenta mollia pro-  
 pinant, cum hæc ventriculum laxent, emolliant,  
 repleant, & propterea cibi fastidium, & nauseam  
 generent, quanquam fateatur interdum, & his esse  
 locum, unde potius roborantibus uti præcipit, in-  
 ter quæ numerat vinum tenue, odorum, leve, a-  
 qua, Sole vel igni parum cocta dilutum. Tum ad-  
 dit, vitet autem vinum dulce, crassum, turbi-  
 dum, aquam præterea tum calidam, tum exactè fri-  
 gidam. Illa enim ventriculum laxat, & virtutem  
 ejus dissipat, hæc imbecillum calorem extinguit.  
 Ex quibus patet etiam post sumptum pharmacum  
 licere interdum frigidis uri potibus non solum  
 calidis, qualia sunt in hac regione posseta dicta.

## CAP. XVI.

*De iis qui in solo Veris principio purgari volunt.*

**P**Lurimi qui anniversariis quibusdam morbis affligi solent, quibus ideo consuetudine familiaria facta sunt ejusmodi remedia; tamen solummodo in principio Veris ea adhibent, finem autem Veris tanquam Æstati nimis proximum reformidant, qui pariter etiam gravissimè decipiuntur. Hæc enim remedia ad præservationē præscribuntur iis quidem, qui adhuc sani sunt, verum ægrotaturi, nisi ejusmodi remediis succurratur. Tempore autem Veris id potissimum faciendum, quia tunc vires optimè valent, tempus anni moderatissimum est, humores omnes Hyeme sopiti, Veris calore agitantur, naturæ & medicamentis vacuantibus magis obediunt; Verum non in omnibus idem humor, sed varii in variis dominantur, sive ob peculiarem vivendi rationem, sive ob peculiare hominū naturas, sunt enim quidam biliosi, alii pituitosi: sic certū est nec eandē omnibus, nec eodem tempore convenire vacationem. Secundò vernū tempus quibusdam in locis citius, in aliis verò tardius incipit, ob varium regionum situm. Medici siquidem anni tempora, non Astrologorum more per trimestria spatia definiunt, sed ex aëris temperie æstimant. Vnde sæpe Hyems in Anglia satis est aspera, cum Sol Arietem intrat, in principio Martii, quo tempore Veris principium constituunt Astrologi. Propterea qui prædictis vacationibus opus habent, non ex mensium computatione, sed ex aëris temperie, eas sibi præscribi curent, etiamsi finis foret Maii mensis, quem mensem ad id opus tutissimum esse credo, quòd tunc aëris temperies sit maxima, naturali calori simillima, corporis vires robustissimæ sicut in regionibus Anglia multò calidioribus hunc men-

sem præferunt Medici. Sed tamen *Galenus* secundum variam corporum constitutionem quosdam in principio, alios in fine Veris purgandos existimat. Quibus pituita abundat, illi in principio Veris sunt vacuandi; Eiusmodi enim humores Hyeme collecti Veris temperie liquantur, unde nisi vacuentur, faciliè per corpus diffundi possunt, gravioresque morbos concitare. Quibus verò bilis abundat, in fine Veris purgatio commodior est, ne calidiores humores succedente æstivo calore accendantur, putrescant, & febres faciant. Id docet *Galenus commentar. ad Aphorismum 47. lib. 6.* Quidam æstivo tempore semper tertiana corripitur solitus, jam annos multos febrem non est expertus, bile pallida per nos sub finem Veris præpurgatâ. Tum enim tales vacuari multò præstat, sicut Epilepticos, Apoplecticos, Arthriticos, & Melancholicos, & quotquot denique propter humorum crassitiem ægrotant, vacuari principio Veris melius est.

## CAP. XVII.

*Purgationem non esse rejiciendam etiamsi  
ager cibos non sumat.*

**H**oc sæpissimè omnibus Medicis accidit, ut quando ægrotantibus vel clysteris usum, vel purgationem præscribunt, ut adstantes (præsertim mulieres, & ægrorum custodes, quibus nihil unquam placet, sed à Medicis cupiunt dissentire) intercedant, quoniam æger debilis est, nihilque assumit, quem tamen ad cibos clam præposterè urgent, eumque ingurgitant. Observatum tamen sæpissimè fuit, eiusmodi ægrotantes, qui adeo à cibis abhorrent, levissimi tantùm clysteris usu ex solis intestinis vacuare fœces plurimas induratas, ob magnam caloris febrilis potentiam. Et notandum est purgationem non præscribi ad alvum solùm exonerandam, sed ad humores

mores morbificos expurgandos, nam ejusmodi inappetentia, qua laborare solent ægrotantes à vitiosis humoribus proficiscitur, qui purgationem postulant, quibus vacuatis appetentia, & virtus stomachi redire solent. Nam cibi fastidium, oris amaror, & alia ejusmodi symptomata purgationem indicant esse necessariam, *Aphorif. 17. lib. 4.* Nam febricitanti cibi fastidium, cordis dolor, tenebriosa vertigo, & oris amaror, purgatione per superiora opus esse significant. Fiunt enim hæc symptomata humoribus orificium ventriculi obsidentibus. Quamvis igitur ægrotantes nihil assumant, habent tamen latentes intus in corpore plurimos humores vitiosos, qui nisi cathartico vacuentur, sponte non redit appetentia, sed morbus in dies redditur pejor, & forsan tandem etiam incurabilis.

## CAP. XVIII.

*Non esse malè sentiendum de purgatione, etiamsi vomitu interdum rejiciatur.*

**A**Vdivi interdum conquerentes ægrotantes, quod sumpto cathartico, ut per inferiora purgarentur, contrarius tamen effectus successerit, purgatos scilicet fuisse per superiora, qui sanè purgationis modus valde molestus est, cum vomitoria naturæ maximam vim inferre soleant. Sciendum autem sæpe contingere posse, ut medicamenti actio permutetur, & dejectorium fiat vomitorium, & contrà. Naturæ quidem instituto potius per dejectiones quàm per os corpus exoneratur. Ad id enim alvus constituta fuisse videtur, tum humores pondere suo ad alvum ruunt, venæque adsunt mesaraicæ quamplurimæ ad intestina humores refundentes. Dejectorium tamen medicamentum evadit vomitorium, tum ratione medicamenti, tum ratione ægri. Medicamenti quidem, *Primò* si vehemens fuerit, & ventriculi orificium magnopere irritarit. *Secundò* si sit



ingratum admodum, graveolens, foetidum, à stomacho alienum; *Tertio* si sit leve, tenue, facile supernatet, ut si cum pinguibus aut oleosis misceatur; *Quarto* si flatus plurimos pariat (ut fenna, epithymum, agaricum) qui vapores ad orificium ventriculi delati illud irritant; *Quinto* si in maxima sit quantitate, hisque de causis non solum medicamentum, sed etiam alimentum vomitum provocare potest. Ratione ægri verò, si fuerit stomacho imbecilli, & sensus acutissimi, res ingratas aspexerit, foetidas olfecerit, vehementer moveatur. nam motus vomitum concitat, ut in navigantibus apparet. Sed præterea notandum cum quis sumpsit medicamentum, si post horam unam, vel alteram illud vomuerit, nihil esse periculi; Iam enim à calore corporis pharmacum dissolutum, & in actum, ut Medici loquuntur, redactum vim suam per universum corpus diffudit, unde non minus purgat, quàm si totum in corpore fuisset retentum. Imò sæpe prodest illud evomere: secum enim humores crassos, pituitosos, aliosque ventriculo tenaciter adherentes, simul educit, quos forsitan per alvum nunquam excrevisset. Non igitur vitio vertendum est, aut Medico, aut Pharmacopœo, si medicamenti operatio contrario interdum modo contigerit; Inde enim nullum ægrotanti incommodum, sed sæpe maximum accedit emolumentum.

## CAP. XIX.

*Etiam si alvus fluat, non esse formidandam purgationem.*

**M**Iratur sæpe populus, & inutile, ac potius malè factum esse putat, cum quispiam alvum fluidam habet, quod purgantia quandoque Medici præscribunt, quæ augere fluxum possunt, viresque ægrotantium atterere, & labefactare; Verùm contrario modo se res habet, nihil enim

enim æquè alvum sistit , ac purgatio ; In secunda valetudine alvum interdum habere fluentem bonum est, modo fluxus ille nimius non sit , nec viribus noceat , modo inquit Celsus intra septimum diem conquiescat; In ægris verò sæpe bonus est alvi fluxus, sæpe malus, pro varia morbi, & ægrotantis constitutione, tempore, ut si sit criticus, si talia vacuentur qualia oportet , & fiat cum ægri euphoria, Ideo interdum sinendus , interdum sistendus ; Sed si remediis adstringendi vi præditis coërceatur , retentus in corpore humor noxius, sæpe majus damnum corpori affert , reliquos humores sui contagione inficit, & corrumpit , unde postea nobilia viscera læduntur , aut redit fluxus priore pejor, & malignior. Commune apud Medicos proverbium est. Causas morborum prius esse tollendas , antequam morbi ipsi evanescant. Vnde pariter in ejusmodi fluxu , tutissima curandi ratio est, per causæ ablationem, quod inter cætera remedia commodissimè & tutissimè purgatio præstat: unde postea aut sponte fluxus cessat , aut si non cessarit , commodius tamen & sine damno adstringentibus coërcetur. Vidi sæpe ægros , qui singulis diebus sæpissimè dejiciebant , quibus admodum invitis cum rhabarbari usum persuasissem, usu purgantis remedii minùs alvus soluta fuit, quàm vi naturæ esse solebat, & sic curati sunt. Inde vulgare est apud Medicos axioma , diarrhœam diarrhœa, vomitum vomitu curari , non quod similia similibus curentur , sed per accidens, quatenus vacuatis diarrhœæ causis, ipsa sponte cessat.

## CAP. XX.

*Clysterum usum esse innoxium.*

**C**lysteres tanquam grave aliquod , & admodum periculosum remedium , plurimi rejiciunt, qui toto cœlo aberrant, cum sint remedium benignissimum, & innocentissimum, partem siquidem nobilem non tangunt , cùm ultra crassiora intestina non pervadant , unde interdum si affectus postulet , valde acria addimus medicamenta, quæ alia pars ferre non posset , & tamen innoxie administrantur. Multò minùs nocere possunt illi quos emollientes , & refrigerantes vocamus, ad febres aliosque morbos , in quibus nihil est , ut plurimum quod ore excipi non possit, si quantitas excipiatur. Confert autem clyster quamplurimis partibus , cerebro, oculis, stomacho, internis visceribus : nam non tantum alvum solvit , sed etiam liquida sua substantia deterget plurimos crassos , viscidosque humores intestinorum tunicis adhærentes , & præterea tanquam fœtus incumbit renibus , & visceribus abdomine contentis, unde ea sæpe è corpore educit, quæ repetita purgatio non solvit. Id docet Galenus in seipso , qui cum acerbissimo coli dolore vexaretur, infuso clystere ex oleo rutaceo, pituitam crassam, tenacem , viscidamque (Medici vitream vocant) excrevit. Cum igitur tam proficius esse possit clysterum usus , non erit in posterum reformidandus , sed potius in familiarem usum revocandus. Ideo de tribus populum hîc monere volo. *Primò* ut ante venæ sectionem clystere utantur, id enim Medici omnes suadent, ne impuritas primæ illius regionis à venis vacuatis attrahatur , sicque venarum sanguis inquinetur. *Secundò* ut si alvus multum adstricta fuerit, & purgatio ore sumenda necessaria videatur, prius levi clystere emollienda erit , ut facces deturbentur. Alvus enim adstricta cathar-

cathartici vim remoratur, & cum in omni medicamento sit generalis quædam virtus deturbandi fæces, præter propriam illam quâ humores sibi familiares peculiari proprietate trahit, si alvus prius admodum adstricta fuerit, fæcesque induratae, non possunt absque magnis torminibus educi, & sæpissimè in illis exturbandis vis medicamenti elanguescit; attracti à pharmaco humores vacuari non possunt, sed in intestinis retenti tormina, colicos cruciatus, vomitus, animi deliquia, vertigines, aliaque symptomata concitant. Id videtur intellexisse *Hippocrates*, cum scribit, *Corpora si quis purgare voluerit, fluida faciat oportet Aphorif. 9. lib. 2.* Cum autem pluribus modis corpus fluidum fieri possit, hic per Clysteres prævios non est aspernandus, & hoc consilium laudat *Galenus, sect. 4. de victu acut. & Aphorismo 72. lib. 7.* Scribit *Hippocrates*, *Corpora ubi quis purgare voluerit, fluida facere oportet, & si supra velis fluida facere, sistere alvum; si verò infra, humectare.* Non potest autem alvus commodius quàm usu clysteris humectari. Sic *Galenus* libro quos purgare oportet; Inter causas quare medicamento sumpto evacuatio probè non succedit, hanc recenset. *Plerumque*, inquit, *stercus densatum, atq; in aliquo intestino exsiccatum evacuationem prohibet.* Tertiò non tantùm ante purgationem, verum etiam post eam ad reliquias humorum detergendas quæ intestinis interdum adherent, non inutile fuerit clysterem levem & detergentem pariter injicere, ut præstantissimi Medici suadent; Nam injectus clyster intestina abluit, & relictam à medicamento vehementiori noxam adimit, præsertim si ejus generis fuerit quod Scammonium recipit; Id enim intestinis acri sua facultate noxam inferre solet, & de omnibus aliis gravioribus eadem est ratio, ut rectè post alios explicat *Valleriola lib. 3. locor. comm. cap. 16.*

## CAP. XXI.

*Clysteres minùs commodè infundi per vesicas.*

**C**VM igitur tam salutaris, tam facilis, & innocens sit clysterum administratio, paucis animadvertendum est in consuetudinem illam infundendi clysteres per vesicam bubulam tubulo alligatam. Hac quidem in re non est error valdè gravis, videmus enim satis commodè hoc modo injici, & antiquissima videtur esse consuetudo: nam lego apud Galenum s. methodi, familiarem fuisse olim usum ejusmodi vesicarum. Nunc autem in pluribus regionibus ultramarinis desit, ignotusque prorsus est ille infundendi modus, sed syringe, fistula aut stannea aut aenea utuntur, majori sanè cum utilitate, nam & faciliùs injicitur, & tutiùs, & citiùs, & quod hac in re maximè proficuum est, altiùs subit, & tota crassa intestina pervadit. Cum enim naturaliter clyster ultra crassiora intestina non feratur, ob valvulam quandam in principio coli, & sine illi positam, è re ægrotum maximè foret, si saltem eò clyster pervenire posset, sic enim majus commodum ex ablutione intestinorum perciperetur. At qui per vesicam injicitur altè admodum non ascendit, sed in recto intestino, & aliqua parte coli subsistit. Optimum igitur foret, si ejusmodi syringes in usum revocarentur, quibus fermè omnes extra Londinensem civitatem Pharmacopœi carent. Contingit autem interdum, quamvis rarò, clysterem evomi, id bis tantum me vidisse meminì in duobus ægris, quando prædicta valvula ob vitiatum motum intestinorum peristalticum laxatur, & viam insolitam liquori præbet, quod tamen quomodo fieri possit, non capio. Crederem potius id fieri quod prædicta valvula ob causas aliquas præter naturam abrupta sit, & officio suo ampliùsungi non possit. Id igitur si quispiam rerum medicarum.

dicarum ignarus fieri observarit, nec Medicum, nec clysteris usum improbet, cum hæc præscire Medicus nullus possit, sed particularem ægrotantis constitutionem accuset, sciatque nihil tunc fieri, quod sæpius ante factum non fuerit, neque ejusmodi eventu admodum terreatur.

## CAP. XXII.

*De Vomitoriis, non esse statim ab Anglis  
posseta dicta post illorum assumptionem  
bibenda.*

**Q**uam utilis sit humano corpori vomitus, hoc capite non explicabo; Id tantum monebo circa illius usum, quædam esse Vomitoria quæ ventriculum solum expurgant, alia verò quæ trahunt ab universo corpore, quæ in variis morbis prioribus utiliora esse solent. Quando igitur quispiam vomitorium sumpsit, non statim, ut multi faciunt, ad usum possetorum confugiendum, stomachum enim replendo, citius quam par est, Vomitorii actionem promovent, quod è stomacho prius vacuatur, quàm vires suas in universum corpus diffundat, sicque humores noxios minùs attrahit, stomachum tamen ipsum non minùs perturbat. Quiescendum igitur potius est aliquantulum, donec in actum reducatur, aut bis terve nullo assumpto potu operetur. Sic erimus certi solùm ea quæ in stomacho & corpore noxia sunt, vacuatum iri. Vbi notandum potus ejusmodi non præscribi à Medicis, ut vomitorii vires promoveant, potius enim illas in principio reterunt, & diluunt, sed tantum ad radia vomitionis tollenda, ut scilicet facilius ægri stomachus repletus subvertatur, cum sæpe repletio sola vomitum concitet, aliàs utilius foret, ut nihil omnino assumendo, medicamentum nullius cibi potusve permissione alteratum, nil, nisi quod noxium est, in stomachum attraheret, Sed diceret

forſan quiſpiam, Paulum, & Aëtium Medicos celeberrimos, vomitum præſcribere poſt cibum, ubi febris in vetuſtatem incidit. *Avicennas pariter 4. Canon. tract. 2. cap. 40. de cura tertiana non pura.* Et ſcias, inquit, quod non eſt res magis juvans eos, quàm vomitus poſt cibum. Galenus pariter vomitum præſcribit à cibo; Sed *Alexander Trallianus Galenum* reprehendit, quia vomitus melius provocetur ante cibum, quod etiam verum eſt ob prædictas rationes. Vomitus enim à cibo, ventriculum tantùm, humoresque in eo contentos evacuat, non autem eos qui ſunt in venis, niſi maximo naturæ conatu. Dicendum igitur à cibo faciliùs quidem ægrum vomere, ſed minori cum fructu; Si verò æger ad vomitum ſit propenſus, melius eſt jejuno & ante cibum potumve vomitum cière, ſic enim meliùs attrahuntur humores ex venis. Id docent Gentilis & Arculanus excellentiſſimi interpretes *Avicennæ*, capite de cura febris quartanæ. *Si corpus de ſacili vomat, ſine præmiſſione cibi concedi poteſt. ad trahendam melancholiam à ſplene ad ſtomachum: Si autem veniat difficulter, melius eſt cibum præmittere, ut vomitus facilitetur.* Quæ etiam applicari poſſunt potui ſtatim poſt aſſumpto. Si igitur vomitus inſtituatur ad ventriculum ſolùm ab humoribus craſſis evacuandum, utile erit, aut cibum, aut potum præmittere, aut ſtatim poſt aſſumere. Si verò ab univerſo corpore vacuandum ſit, utile erit jejuno ventriculo aſſumere, nihilque poſtea aut edere, aut bibere, donec vomitorii virtus in actum reducta corpus penetrarit, quia potu ſtatim exhibitò obtunditur attractiva virtus remedii. Poſſeta igitur hæc ſic vocata, non ante debent exhiberi, quàm ſemel biſve remedium vomitum concitarit; Poſtea ærò ut æger deinceps facilius vomat, humoresque quidam craſſiores diluantur, præberi poſſunt. Idem obſervavit recentior quidam ſcriptor *Chymicus Hartmannus* notis ſuis ad *Crolliũ*, qui vetat ne cereviſia exhibetur,

tur, mox ab assumpto vomitorio, sed demum ubi æger bis terve vomuerit, aliàs enim vim vomitorii obtundit, sed cum materia probè est commota, concedit copiosorem haustum, & sub finem, ad stomachum eluendum, & reliquias vacuandas.

## CAP. XXIII.

*Venam in Senibus sine periculo secari posse.*

**Q**Voniam sapissimè vulgus Medicis cupit refragari, videre licet quamplurimos, si quispiam febre laboret, in qua venam secare commodum est & forsan necessarium, ætatem accusare declinantem, quæ huic remedio ferendo non sit satis, idque sæpe etiam audiui ab iis qui nondum erant quinquagenarii, atque aliàs valde robusti & alacres. Sanè in omnium remediorum administratione vires esse attendendas verissimum est, unde si deficient, etiam puero & juveni à magnis remediis erit abstinendum, qualia sunt venæ sectio, & purgatio. At quoniam virium constantia omnibus non est eadem, sed quidam septuagenarii alacriores sunt, & robustiores quibusdam quinquagenariis, non annorum numerum, sed virium robur Medicus considerat. Si igitur validus senex pleuritide, peripneumonia, febre ardenti, aut ejusmodi morbis affligatur, dubium non est illi posse & debere mitti sanguinem, cum vix absque illis remediis ejusmodi morbi unquam curari possint: quod si ad remedia perferenda vires ægrotanti non suppetunt, necessariò illi fuerit pereundum, sicque morbi omnes in senibus lethales forent. *Galenus ipse libro de Phlebotomia*, etiam septuagenariis mittit sanguinẽ, vidique hominem cui annum agenti septuagesimum tertium, quater intra triduum vena secta fuit, & vacuatæ fuerunt sanguinis uncia ad minimum triginta. *Rhazes* quoque in ætate decrepita,



quæ gravi pleuritide torquebatur, sanguinem emisit. Ætas igitur non ex annorum numero metienda, sed ex virium robore, quæ si valentes fuerint in valde senibus, cur remedia morbis quibus affliguntur necessaria ipsis denegabuntur? Certum quidem est, senem quemlibet seipso juvene esse imbecillior, & propterea parcius illi mittendum sanguinem, quàm si juvenis adhuc foret; fieri tamen potest, ut ad alium juvenem comparatus, ipso sit robustior, & ad remedia perferenda alacrior. Nulla igitur ætas est, præter decrepitam, quæ aliquam vacationem ferre non possit. Decrepita autem quoniam paucum sanguinem habet, crudosque humores quamplurimos, huic remedio est impar. Reliquæ verò ætates, inter primam & ultimam mediæ, suos habent virium gradus; & propterea aliquem vacationis modum ferunt. Id rectè docuit *Cornelius Celsus lib. 2. cap. 10.* *Interest, inquit, non quæ ætas sit, neque quid in-  
tus in corpore geratur, sed quæ vires sint.* Hoc cum apud Medicos minime sit dubium, non debet repugnare æger, si quando cuidam ætate provecto phlebotomiam Medicus imperat. Idem dicendum est de pueris ante annum decimumquartum; suis enim viribus, iisque validis prædita est puerorum ætas, ad quorum proportionem cur vacuare non licebit, præsertim si *ἰσχυρὸς* sit puer, amplis venis liberè, & liberaliter educatus. Cathartica illi ferunt, quidni phlebotomiam? Solent illi vulnerari interdum, & hæmorrhagias pati largiores, absque incommodo, cur non etiam artificiosam sanguinis missionem? Nulla igitur est ætas quæ aliquem vacationis modum non ferat. Itaque cum propriè morbus & vires sint scopi necessarii ad hoc remedium, hi tantum sunt considerandi, non autem ætas, nisi quatenus prædictis conjungitur.

## CAP. XXIV.

*Venarum in brachio delectum esse inutilem.*

**C**UM venæ in brachio aut ad præservationem, aut ad curationem aperiuntur, sæpe quarunt ægri, quænam vena aperienda sit. Audierunt scilicet aliquid de distributione venarum in brachio, quarum unam capiti, aliam jecori destinant, tertiam faciunt ancipitem, utrique corporis cavitati proficuum, quam opinionem non *Galenus*, & *Hippocrates*, sed recentiores Medici, ante claram Anatomæ cognitionem, invexerunt, quam hodie populus etiam sequitur, nec tantum populus, sed etiam plurimi, qui Medicinam profitentur, in eodem adhuc errore versantur, ex mera Anatomæ ignoratione. Certum autem est venas omnes brachii, cum ab eodem ramo prodeant, ab iisdem partibus vacuare, & quæ cephalica dicta capiti dicatur, non minus de jecore vacuat, quàm quæ basilica dicitur, & jecoraria, quamvis hæc eadem cephalica quia ramulum aliquando à capite recipit, capitis affectibus magis prodesse credatur, utraque tamen æquè internorum viscerum morbis opitulatur, & æque de vena cava detrahit sanguinem. Et revera nomina hæc basilicæ, & cephalicæ quamvis sint Græca, veteribus tamen *Galeno*, *Hippocrati*, aliisque erant ignota, à recentioribus inventa, qui malè hanc de delectu venarum opinionem invexerunt. Quod ut plenius innotescat, breviter venarum in brachio originem describemus. Vena cava è jecore ad superiores partes ascendens ubi ad claves pervenit, in duos insignes ramos dividitur, qui à situ partis vocantur subclavii, quoniam sub jugulo, & claviculis siti sunt. Horum ramorum pars una intra thoracem plures emittit venas, pars altera è thorace exiliens fertur ad axillas, & dicitur axillaris, & in initio brachii dividitur in duos ramos infi-

insignes , cephalicam , & basilicam , illa in brutis quidem oritur à jugulari , sed in hominibus semper ab axillari , quamvis à jugulari externa ramulum quendam valde exiguum recipiat. Ab his duobus ramis omnes brachii venæ oriuntur , quæ ad extremam usque manum feruntur , quas describere non est opus , cum sufficiat nostro instituto illarum ortum indicasse. Cum igitur omnes venæ quæ sunt in brachio , ab uno eodemque trunco venæ cavæ in jugulo procedant , frustra hæc potius quàm illa eligitur , sanguinem enim omnes ab eodem fonte hauriunt. Et ne gratis hæc dixisse videamur , placuit hæc opinio præstantissimis Anatomicis. *Vesalius* Anatomicorum qui unquam hætenus fuerunt princeps , Anatomes suæ *Lib. 3. cap. 8.* quamvis cephalicam ab externa jugulari videatur deducere , nostros , si Diis placet , *Æsculapios* ridiculè ait contendere , num humeraria , aut communis , aut axillaris in manu dividenda sit , quasi peculiaris quædam vena à singulis partibus affectis in brachium duceretur , cum tamen ab uno trunco , ex venæ cavæ in jugulo partitione educto , omnes brachii venæ pullulent , ut fusius loco citato explicat. *Vesalio* assentiuntur *Bauhinus* in Theatro Anatomico , ubi asserit , inutilem esse curiosum delectum , cum utriusque venæ idem sit exortus , unde magis conspicuam eligendam suadet. Idem sentit etiam *Riolanus* in *Anthropographia*. *Gabriel Fallopius* in institutionibus Anatomicis , *Bartholinus* , alique Anatomes cognitione præstantes Medici.

## CAP. XXV.

*Minus commodè sanguinis quantitatem unciis, libris, & ponderibus potius quàm mensuris aestimari.*

**F**Amiliare est non solùm populo, sed etiam Medicis, cum sanguinem mitti volunt, ejus quantitatem unciis & libris definire, quod etiam frequens erat Galeno, qui ad plures libras sanguinem interdum emittebat. Sanè si bona est hæc consuetudo, pondera semper præsto esse deberent, ut sanguinis emissi pondus cognoscere-  
tur, quod tamen non solet fieri, sed tantum conjectura quadam tum medici, tum adstantes id conjiciunt. Sanguinis missio *Hippocrati, 2. aphorismo libri primi*, sub vasorum inanitione continetur, debeturque sanguini peccanti; peccat autem sanguis non pondere, sed quantitate, aut qualitate. Et quamvis gravitatem habeat, non tamen ratione illius educitur, sed tantum ratione quantitatis, aut alterius vitii: quantitas autem liquidorum commodius mensuris, quàm ponderibus cognoscitur. Vnus enim sanguis alio gravior est. Supponamus igitur Titio plethoram ad vasa patienti sanguinem esse gravio-  
rem, Sempronio autem tantum laboranti plethora ad vires, sanguinem esse levio-  
rem: si utrique, verbi gratia, sanguinis uncias sex detrahas, prioris sanguis paucioribus vasis continebitur, quia gravior; posterioris verò plura vasa occupabit, quia levior. Quamvis igitur utrique idem sanguinis pondus eductum fuit, posteriori tamen plus sanguinis emissum fuit quàm priori. Sanguis in venis & arteriis continetur tanquam in vase, ad vasa autem refertur repletio vel inanitio. Amphora quæ ad dimidium tantum, aut ferro, aut gravissimis lapidibus repleta foret, minus tamen plena est, quàm si levissimo vini spiritu ad orificium usque repleretur, quamvis

quamvis prioris pondus sit gravius; Sic deplendo vasa plus adimit, qui ab uno vase amphoram educit spiritus vini, quàm qui ab alio detrahit lapidum amphoram semis, quamvis forsitan major adsit gravitas. Cum igitur eadem sit ratio in sanguine, quia unus alio gravior est, si tantum pondus in vacuando consideremus, nunquam probè quantitatem illius definiemus, cum in venis contineatur, non qua gravis, sed qua replens est, nisi quispiam supponat in omnibus hominibus eandem semper esse sanguinis gravitatem, quod opinor nemo audebit asserere. Sanguinis quantitas secundum *Galenum*, à magnitudine vitii, & virium robore indicatur, & prout hæc duo sese habent, sic vel copiosius, vel parcius sanguis erit mittendus. Hinc in magno sanguinis vitio, & viribus constantibus, uberior vacuatio instituenda, in minori vitio, aut viribus imbecillioribus, parcior. At si ex pondere æstimes illius quantitatem, fieri poterit ut viribus debilioribus, copiosius quàm in validis sanguis mittatur, quod grave est peccatum adversus regulas artis Medicæ. Nam si cum viribus debilioribus sanguis sit levior, cum validis verò gravior, si huic ad *℥.℥.* sanguinem detrahas, illi verò ad *℥.iii.* tantum quatuor; Vasa quibus quatuor hæc uncie excipiuntur, non minùs plena erunt ob levitatem, quàm quæ excipiunt alterius gravioris libram semis. sic utrique eadem sanguinis quantitas vacuata fuit, quod tamen non fuerat faciendum. Nec video rationem, quare sanguinis missio, potius quam alvi dejectio ejusmodi pondere definiatur, cum sæpe humores etiam ex vasis expurgentur, unde sub vasorum inanitione purgatio etiam continetur *aphorismo. 2. lib. primi.* Cum igitur vasa non repleantur ullis rebus qua graves sunt, nam capacitas vasorum non mutatur, quamvis rerum contentarum pondus varium sit; certumque est, majorem olei quem mellis copiam respon-

respondere uni unciz, melius erit in posterum, si vasis, non uncis aut libris sanguinis quantitas æstimetur, cum fallax esse possit ejusmodi ratio. Scio quidem apud veteres fuisse libras mensurales, non minùs quàm ponderales. erant autem vasa lineis circumscripta, quibus designabant libras & uncias, & quæcunque hoc modo metiebantur, vocabantur mensuralia, ut exempli gratia, olei vel vini libra mensuralis, quas forsan intellexit Galenus, cum sanguinem secundum uncias, & libras vacuabat. Verùm quia varium fuit pondus rerum mensuratorum, rarò libra ponderalis mensurali respondebat: nam olei, vini, & mellis quamvis eadem possit esse mensura, tamen non est idem pondus, ideo valde incerta fuit ejusmodi mensurandi ratio, & nos hodie ejusmodi vasis caremus, quæ uncias, & libras designant, nec si eorum esset copia, ob varium sanguinis ipsius pondus commodè absque errore aliquo iis uteremur. Quamvis igitur receptum morem non improbem, tamen tutius esse puto vasculorum capacitatem, quàm librarum pondere sanguinem metiri.

## CAP. XXVI.

*Post venæ Sectionem malè somnum & potum omnino prohiberi.*

**I**Nter plurimas populi observationes hæc non est minima, ut caveant ne post venam sectam, statim æger dormiat, aut potum, vel cibum sumat, quæ etiam Medicorum quorundam fuit sententia, quia scilicet credunt sanguinem redire ad cor, quod tamen non est perpetuò verum, nisi forsan immodica fuerit sanguinis vacuatio, aut timiditas, quæ syncopen inducere possit. Deinde reditum illum sanguinis esse perniciosum nulla ratio persuadet. Et primò somnum quod spectat, solet in somno sanguis redire in præcordia, non sine maxi-

maxima naturæ recreatione; In ægris autem qui insomnes noctes duxerunt, quanto cum beneficio somnus accedat, omnes norunt, vires enim reparat, humores morbificos concoquit, & domat, unde sæpe remediis uti cogimur ad illum provocandum. Igitur si statim, aut paulò post venæ sectionem contingat, bonus esse poterit, & ut signum, & ut causa. Ut signum quidem, quia indicat naturam humoribus morbificis oppressam, jam recreatam fuisse, & sic naturales suas functiones perficere. Ut causa verò, quia somno succedente, quod reliquum est humoris morbifici, natura concoquit. Scio in quibusdam morbis somnum nocere, ut in viscerum internorum inflammationibus, in accessionum principiis, in pestilentibus morbis. Propterea in ejusmodi affectibus à Phlebotomia non est statim dormiendum, sed in aliis morbis, cur non liceat, non video. Scribit *Galenus* somnos accedentes qui priùs deerant criseos firmitatem indicare, nam contingit interdum, ex 2. *Præhætic.* ægrum post crisin integrum diem dormire, præcipuè ubi per plures antea dies insomnis fuerit, idque maximo naturæ solatio. Imò & in ipsa crisi contingit interdum ægrum dormire. Si igitur post alias vacuationes somnus succedens juvat, quidni etiam post venæ sectionem? Sed præterea contingit interdum in febribus quibusdam somnum adesse præternaturalem, qui vix excitari potest, & tamen sæpe in ejusmodi febribus sanguinem mittere utilissimum est, sicut me fecisse nuper memini in muliere quadam acutè febricitante, cum gravi sopore, quæ aliàs vix convaluisset, & ab omnibus moribunda credebatur. Si igitur actus dormienti salutariter sanguis mitti potest, quid nocebit somnus statim post sanguinis missionem succedens. *Galenus* 9. *methodi cap. 4.* videtur in bonis habere, quod post Phlebotomiam æger in somnum profundum delapsus sit, Post duas, inquit, à sanguinis missione horas, paucos

*pauco nutrimento dato , ac iusso quiescere , discessi. Quinta verò hora reversus, cum profundo somno detentum inveni , ut tangentem me prorsus non sentiret; Reversus autem decima rursus hora , etiam tunc dormientem inveni; Egressus autem iterum ad alios agros visendos , redeo hora noctis prima, non tamen ut ante tacens, sed voce de industria elata , ut agrum à somno excitarem. Sed dicet forsitan quispiam , Galenum post duas tantum à sectione horas somnum impetasse; Respondeo optimum fuisse, si æger statim à missione sanguinis potuisset quiescere , & nullibi locorum Galenus id improbat. scimus enim somnum non ad arbitrium nostrum sæpe succedere. Sed cum dormire æger ille non posset, reversus post horas duas, iussit quiescere , ut somno se traderet, quod non fecisset , si somnum à venæ sectione noxium iudicasset; Si dicat quispiam prohiberi somnum ne fascia solvatur, id nihil est, nam diligenti adstantium cura , & probè facta deligatione id præcaveri potest. Potum verò quod attinet, statim à venæ sectione illum non esse noxium , sed salutarem probat Amatus Lusitanus, qui jubet statim aliquid aquæ frigidæ hauriri ; Ob venas enim inanitas statim in corpus distribuitur, & facilius, citius, ac tutius corpus refrigerat.*

## CAP. XXVII.

*Gravidis vena sectionem & purgationem  
non esse noxiam.*

**E**st etiam hic error non minimus , quod muliere gravida laborante , non patiuntur ipsi ministrari medicamenta , nec venam secari, metu abortus , cum tamen id repugnet rationi, veterum authoritatari, & experientiæ. Rationi quidem, quia mulier acuto morbo, ut febre, aut pleuritide laborans, periclitatur maximè, *si quidem mulierem acuto morbo corripere lethale, aphorismo 30. lib. 5.* Ideo in remediorum usu festinandum est; Deinde  
cūm



cum foetus materno sanguine alatur, si ipsa tunc ægrotet, periculum erit ne foetus ex eadem ægritudine, & sanguinis corruptione pereat, quod si contingat, ut sæpius solet, tunc matri ex morbo, & foetu mortuo impendet periculum, ne scilicet morbo debilior facta, accedente putredine foetus intereat, eumque excludere non possit, saltem nunquam sine periculo contingit abortus. Ea autem mala non nisi causæ subtractione præcaveri posse certum est, cum nullus morbus aliter sanari queat. causa autem non nisi venæ sectione, aut purgatione subtrahi potest. Qui autem ejusmodi remedia adeo periculosa in gravidis esse censent, nec ea lubenter admittunt, id præterea considerent, si prægnantem mulierem febre putrida laborantem, absque venæ sectione, aut purgatione curare potest Medicus, multò facilius eandem eodem morbo decumbentem, & non prægnantem curare absque prædictis remediis posset, sicque illorum usus omnino foret abolendus. Quod si non prægnantem absque illorum usu curare nequit, ergo neque prægnantem si eodem morbo laboret. Idem enim morbus idem remedium indicat, nec foetus præsentia indicationem morbi tollit, sed quantitatem remediorum, & utendi modum quodammodo permutat. Imò multò magis hæc remedia prægnantibus adhibenda, quò magis opis indigent. Persuasum autem illi habent venæ sectione adimi foetui nutrimentum, purgatione, & aliis remediis abortum provocari; At non advertunt majus impendere foetui ex corrupto sanguine periculum, ne scilicet intereat, & postea matrem perimat morbo jam afflictam, & majus periculum est abortus à morbo quam à remedio. Et primò sanguis nunquam tanta copia mittendus est, ut foetui alimentum subtrahatur, sed potius observamus, adempto pravo sanguine fatum alacriorem sentire, remanet enim sanguinis satis ut matri & foetui sufficiat. Purgatio quoque, præ-

fertim

fertimlevior, & repetita si opus videbitur, non potest nocere, sed potius prodesse: vis enim medicamenti ad foetum vix pervenit, aut saltem in longa viarum ambage vis illius noxia amittitur. Quod si ad foetum usque perveniret, non posset tamen illum interimere, si moderata quantitate exhibeatur. Solus sanguis ad foetum accedit, qui ab humoribus noxiis vi medicamenti depuratur. In gravidis quoque uterus magis resistit ad foetus custodiam, plus enim in iis agit retentrix, quam expultrix. Authoritati quoque repugnat hic error, nam Hippocrates 4. aphor. 1. gravidas purgare jubet à quarto mense ad septimum. *Utero gerentes, inquit, sunt medicanda, si materia turget, à quarto mense, usque ad septimum, sed ha minùs; à juniore autem, & seniore foetu abstinere oportet.* Quæ si Hippocrates de medicamentis suis quæ vehementia erant, protulit, multò magis vera sunt de nostris quæ sunt multò benigniora; Erant enim veterum purgationes multò periculosiores nostris. Experientia demum id suadet sæpe, non posse tam facile excuti foetum usu remediorum, sicut ostendit historia Sororis Harpalidæ 7. Epidemion, quæ quatuor mensium gravida, laborans hydrope, & asthmate, cum embryone tam debili, ut diu immobilis manserit, sumpsit cuminum Æthiopicum, cum melle & vino, quod cum sit valdè amarum, diureticum, mensesque ideo movendi vim habeat, bono tamen consilio adhibitum profuit, nec foetum enecavit, nec menses provocavit, indicio non semper perimi foetum usu medicamentorum, nisi valdè vehementia sint, & usus illorum diuturnior. Notabilis est historia cujus alibi meminimus ex Avenzoare, qui uxori suæ validissima dedit remedia, cum ignoraret eam esse gravidam, & tamen foetus incolumis permanfit. *Volo, inquit, dicere hoc loco, quid mihi successerit, cum essem in carceribus de Haly, uxor mea erat pragnans, & hoc ignorabam, & ipsa infirmata fuit tali passione, quod necesse mihi*

*mihi fuit dare ei Medicinam laxativam, qua fuit talis, quod nullus possit astimare, quod aliqua pragnans etiam ex assumptione modica quantitatis foetus in ea possit remanere, & ipsa recepit eam absque laesione sui, & foetus, & postea declarata fuit impragnatio ejus, & me poenituit valde de errore quem feceram, quare misericordiam quasi vi ab altissimo creatore, de eodem, & peperit filium, quem hodie mecum habeo. Hæc Avenzoar inter Arabes primariæ notæ Medicus. Scribit Hercules Saxonia cum adhuc in utero matris esset, eamque mola laborare Medici putarent, fortissima exhibuerunt medicamenta ad molam ejiciendam, sed irritq; conatu, nam infans incolumis mansit, & factus postea fuit egregius Medicinæ interpreter. Idem sæpius contingit, quia scilicet vis remediorum non nisi valde labefactata ad foetum pervenit, uterus ipse retinet quantum potest, nec nisi magna vi foetum immaturum elabi finit. Alia ratio est de partu, nam cum foetum jam maturum excutere nititur uterus, tunc ejusmodi remedia conatum adjuvant, non autem quando retinere uterus gessit. Sæpe mulieribus ex morbo acuto graviter laborantibus, & venæ sectionem, & purgationem foelicissimo cum successu etiam octavo mense præscriptam vidi.*

## C A P. X X V I I I.

*Puerperis etiam remedia convenire.*

**Q**UOD de gravidis jam diximus, etiam puerperis convenire potest, si morbis acutis, ut febre, pleuritide, aliisque ejusmodi confluentur: solent enim variis morbis affligi, eo ipso quod sunt puerperæ, sed diversa est illarum, & gravidarum ratio. nam gravidis menses supprimuntur, nec sine foetus incommodo fluere solent. Puerperis verò fluunt lochia, nec unquam nisi cum pernicie supprimuntur, & inde in graves incidunt morbos, quibus remedia sunt adhibenda,

bibenda, eoque citius quo in illis omnia sunt maximè periculosa; Nam præterquam quod secundina interdum subsistit, lochia copiosius fluunt aut supprimuntur, aut pauciora sunt, unde varii morbi graves & periculosi pullulant, ut febres continuæ, ardentes, deliria, vomitus, nausæ, epilepsiæ, viscerum inflammationes, pleuritides, alique morbi. Sed etiam fieri potest, ut ex solo morbo appa- ratu, cacochymia intus latente, & in partu commota, aut etiam ex victus erroribus, etiamsi nec lochia supprimantur, nec immoderatiùs fluant, ejusmodi morbi contingant. Hi casus diffi- ciles sunt, & periculosi, qui naturæ solo ro- bore vix possunt emendari. Si enim suppressis lochiis fiant, gravissima pariunt symptomata, & febres, cum vigiliis, & delirio, si verò ex morbo appa- ratu oriantur, eò redduntur in puerperis pe- riculosiores, quod indicent magnam intus laten- tem cacochymiam, quam lochiorum expurgatio tollere non potuit, nec emendare. Sanè quando hæc contingunt, omnium Medicorum consensu, necesse est aliquid moliri, venæ sectione, purga- tione, alterantibus remediis aliisque quæ Medi- cus utilia fore judicabit. Quænam autem vena secanda sit, quando, quomodo, quibus medica- mentis sit purgandum, non est hujus loci explica- re, qui medicinam hîc non doceo, sed tantum po- puli errores insinuo. Id tantum addam, temera- rium esse superiores venas incidere, ne lochia supprimantur, & revocentur in corpus.

## CAP. XXIX.

*Mercurium ore sumptum non esse nocivum.*

**C**ondonandus hic error est quamplurimis, quoniam veterum Medicorum suffragio comprobatur; *Dioscorides libro quinto cap 7.* Hydrargyrum potum, inquit, vim perniciosam habet, suo enim pondere interna exedit, & *lib. 6.*

cap. 28. eadem symptomata inferre scribit, quæ argenti spuma: Cui etiam consentit *Aëtius tetrab. 4. Serm. I. cap. 79.* Galenus ipse inter venena numeravit. Avicenna pariter inter venena recenset, quamvis de ipsius qualitatibus sibi ipsi non consentiat, nam frigidum & humidum esse scribit, *lib. 2. tract. 2. cap. 47. at Fen. 6. lib. 4. tractatu. I. cap. 3.* inter venena calida, & acria numerat hydrargyrum. Quidam volunt naturale esse frigidum, factitium verò calidum. Sed hanc litem hoc loco nostram non facimus. Recentiores etiam quidam Medici volunt esse venenum. Si largius sumatur, congelare sanguinem, testatur *Conciliator*, exemplo cujusdam seplasiarii, qui febre ardenti laborans, cum ad sitim sedandam, imprudens aquæ vice vasculum argento vivo plenum invenisset, illiusque magnam copiam ebibisset, congelatus interiit. Aperto cadavere sanguinem circa cor concretum Medici invenerunt. *Fernelius* quoque illius usum maximè averfatur. Verumtamen rectius alii experientiâ docente, non adeo noxium esse prædicant. *Dioscorides* siquidem solo pondere nocere scribit, quod non nisi magna quantitate exhibitum facere potest. *Galenus 9. Simpl.* testatur se nullum hujus medicamenti fecisse periculum, num interimat ore devoratum, aut foris admotum, unde si quando exempli gratia inter venena recensuit, ex aliorum opinione, non ex propria sententia loquutus videtur. Et sanè recentiores Medici innoxie præberi posse experti sunt, si modum non excesserit. Nullum enim medicamentum excedenti quantitate absque damno sumitur. Et propterea si congelavit sanguinem, sicuti refert *Conciliator*, id tantum largius sumptum præstitit, & propterea non magis noxia illius virtus censeretur debet, quàm aliorum medicamentorum. Contrariam tamen historiam refert *Rorarius in contradiçt. Galeni 20. Virum*, inquit *cognovi Germanum, qui dum ebrius in Aurificis domo dormi-*

dormiret, si vexatus surrexit, tentansque manibus, ac quarens potum, vas in quo argenti vivi libra tres reposita erant, in ejus manus sorte devenit, humoremque hauriens liquidum, ac frigidum, semidormiens totum absorpsit hydrargyrum, atque denuo se in lectum demisit. Experges factus manè, frigidum humorem propè se in linteis sentiens, argentum vivum reperit. Sic scribit *Avicennas* cap. 2. de venenis, plurimos ex his qui bibunt ipsum, non ladi, quoniam egreditur cum dispositione sua per inferiorem regionem. Venenum itaque nullo pacto esse potest, nisi fortasse gravitate sua, non aliqua lethali qualitate. *Rorarius* loco citato refert se cognovisse plurimas mulieres, quæ ad difficilem partum, aut ad secundinam rejiciendam, absque ullo corporis incommodo ipso usæ fuerunt. Aliqui etiam semimortuis vi vermium infantibus, hydrargyrum se exhibuisse testantur, atque protinus sanitati restitutos esse. Idem scribit *Brassavolus*, Medicus insignis in examine simplicium, se pueris dedisse ad scrupulum unum: si pueris, multò tutius etiam adultis. *Brassavolo* assentiuntur plurimi: Refert idem *Rorarius Contrad. decima Avicenna*, naturale argentum vivum non modo nullam veneni vim habere, sed sola gravitate interficere, ut etiam pueris vi vermium semimortuis, atque mulieribus quibus vel partus difficilis erat, vel secundina non ejiciebatur, tutò à Medicis quibusdam, ac mulieribus exhibitum fuisse, non tantum audiverit, sed etiam viderit. *Amatus Lusitanus* in Dioscoridem, praxis ignorantes vocat omnes qui illud vituperant, quia suo tantum pondere lethale est, ut vult Dioscorides, & potius, tanquam præstantissimum antidoton, pueris fascinatis, & à vermibus infectis cum optimo successu, sine ullo malo symptomate, à Medicis Hispaniarum præscribi, & refert historiam cujusdam pueri decem annorum, qui plus libra una hydrargyri loco vini deglutivit, qui nullum symptoma præter pondus inde percepit,

clysteribus adjutus totum cacavit, & liber absque ulla noxa permansit. *Matthiolus* quoque *Medicus* insignis idem variis in locis sentire videtur. *cap. 28. lib. 6.* *Nisi copiosius bibatur, non interficit, quod ob sui tum pondus, tum fluxilem substantiam, facile per inferna secedat, nulla in ventriculo, & intestinis protrahenda mora.* Ex quo nil mirum, quod scripserit *Avicenna*, non deesse qui bibant argentum vivum, & nullam inde sentiant noxam, quod facile labatur è corpore, dummodo qui hauserint, continue huc atque illuc deambulent. *Goritienses mulieres* agrè parturientibus ultimo remedio argentum vivum potandum præbent scrupuli pondere; Nec desunt qui ad interimendas alvi tineas, pueris etiam propinent, ad duorum granorum milii quantitatem, citra ullam molestiam. Et *cap. 70. lib. 5.* ob similia exempla, scribit facile se persuaderi argentum vivum potantes haud necare, nisi pondus, vel mensuram exceßerit. Sed clarissimè *Lib. 4. Epist. ad Stephanum Laureum*, in qua pueris concedit argentum vivum, cum nulla alia lethifera facultate, quàm quòd sua gravitate intestina lædat, quæ apud illum copiosius descripta inveniri possunt. Hæ variorum, & præstantium Medicorum autoritates sufficere possent, sed præterea etiam nostrorum seculorum Medici quamplurimi idem sunt experti; Ipse ego qui hæc scribo sæpe dedi, nec unquam nisi cum bono & foelici successu, maximè in pituitosis, in quibus multò meliùs quàm in aliis effectus suos prodit. Quæcunque igitur mala symptomata *Fernelius, Palmarius*, alique proficisci dicunt, ut stupores, convulsions, tremores, lethargos, tormina ventris, & alia, ejusmodi, aut vera tantum sunt de malè præparato, aut de nimia ipsius quantitate, nihil enim est ex omni parte beatum, non foret medicamentum, si in qualibet dosi nunquam noceret. Experientia sola vires medicamentorum ostendit, quæ pariter indicavit non esse in hydrargyro eam quam veteres noxam attribuerunt.

## CAP. XXX.

*Mercurium etiam absque ulla preparatione  
esse innoxium.*

**P**Rædictis autoritatibus victus quispiam, exactam tamen & diligentem præparationem adhibendam esse censebit, & sanè verbum illud præparationis insigne aliquid præ se ferre videtur. Sed tamen certum est, quæ superius diximus de non præparato, seu de mercurio crudo esse intelligenda, qualem *Brassavolus*, *Matthiolus*, *Amatus Lusitanus*, aliique pueris, & ægrè parturientibus mulieribus exhibebant. *Datur vivum*, inquit *Matthiolus* Epist. ad Laureum, *non extinctum*, ut quidam putant, *Quod enim extinctum est, ventriculo hæret, & intestinis; & sæva excitat symptomata.* Vbi notandum præparari quidem hydrargyrum vario modo, tum ad purgandum, tum ad sudores provocandos. Verum in omnibus illis præparationibus natura mercurii non tollitur, sed occultatur; & quamvis varia illi admisceantur, tamen integer manet, brevi faciliq; artificio ad naturam suam redit. Præcipuè autem fixatur per admissionem spirituum salinorum in sublimato, & præcipitato, sic quod antea satis innoxium erat, venenum fit potentissimum, quia cum summx sit activitatis, spiritus illi acres, quorum unica guttula urit, eam adjuget. Scio quosdam adeo fuisse audaces, qui pilulis granum unum aut alterum. admiscuerunt, in pilulis dictis *Barbarossæ*, quæ audacia est temeritatis plena. Sed tamen inde constare potest crudum quod vocant, minùs noxium esse, quàm hoc modo præparatum, quia vivum sibi cohæret, mobile est, & ideo statim per alvum excernitur. Ideo alii mercurium quendam dulcem dictum ingeniosè excogitarunt, quòd innoxie præberi posse profitentur, quod etiam certa experientia novi esse verum,



ficque populus qui aliàs solo mercurii nomine terretur, sub albi cuiusdam pulveris lenocinio, utili fraude decipitur. Non tamen credo esse crudo tutiorem: Siquidem Mercurius ejusmodi dulcis dictus, fit ex sublimato quod potentissimum venenum est, cui additur mercurius crudus, qui iterum sublimatur, sicque illius missione corrosiva virtus spirituum salis, & vitrioli elanguescit, pulvisque redditur dulcis, qui antea erat valde acris. Hic nullam præparationem video, sed missionem quandam & additionem mercurii, cujus nihilominus integra manet natura, levi que artificio ad pristinum ingenium revertitur. Sed si sublimatum adeo perniciosum est venenum, sequens additio mercurii vivi non tollit vim ejusmodi, sed tantum diluit. sic vis dispersa imbecillior est unita. Et hâc ratione patet, quia rerum naturalium ejusdem generis eadem est ratio. Cum primum fit sublimatum, permixtio spirituum salinorum mercurium noxium effecit, mercurius verò ipse his spiritibus vim non adimit, sed potius amicè illis sociatur. Quando postea ut dulcescat, mercurius novus additur, cum sit ejusdem naturæ cum priori, pariter amicè cum prædictis spiritibus conjungitur, nec magis quam prior mercurius illorum vim consopire potest. Verum quia major quam prius mercurii quantitas adest, etsi non minus natura sua efficaces sint prædicti spiritus, minus tamen nocere possunt; quia diluuntur, sicut ebibi guttulæ aliquot spiritus vitrioli aqua immixtæ possunt, aliàs septicum est medicamentum. Propterea mercurius ejusmodi minus tutus est, quam qui nondem fuit sublimatus. Quod si mercurius crudus, mercurio sublimato admixtus, illius venenum aufert, illumque reddit innoxium, multò magis ipse erit innoxius. *Nil dat quod non habet.* Si igitur gratiam & dulcedinem veneno periculosissimo tribuit, eam haud dubiè in se possidet. Nam propter quod unum-  
quodque

*quodque est tale, illud est magis tale.* Si sola igitur mistio mercurii crudi, sublimatum facit salutarem, & utilem humano corpori, multò magis ipse erit salutaris, & utilis. Idem ostendunt historiae præcedenti capite recensitæ, ex quibus patet mercurium etiam non præparatum, fuisse summa cum utilitate exhibitum. Fatendum quidem est, si aut nimia copia sumatur, aut pravi humores non adfuerint in corpore, posse nocere, biliosis quoque & melancholicis minùs prodesse quàm pituitosis. Sed si propterea rejiciendus foret mercurius, pariter omnia fermè remedia ab usu medico essent ableganda. Nunquam enim uni adeo profunt, quin alteri noceant, & etiam omnibus, si nimia copia, & intempestivè sumantur. Adde-  
mus hic scriptoris novitii, Chymici expertissimi testimonium, *Hartmanni* scilicet. Is qui varias mercurii præparationes edocuit, tamen de curatione lumbricorum agens, *Præstantissimus*, inquit, *est mercurius vivus, vel per se crudus, a scrupulo uno ad drachmas aliquot devoratus, vel cum succo Limonum prius mortificatus, sed dosis sit minor, quia mortificatus in corpore diutius manet.* Vbi præferre videtur crudum mortificato, ut jam supra satis diximus.

## CAP. XXXI.

*De suffitu Nicotiana, sive tabaci.*

**Q**Uoniam suffitus tabaci adeo familiaris est omnibus, ut pauci ab eo abstineant, quædam de eo nobis dicenda sunt, & primo de ejus natura. Putant autem plurimi, & ita scriptum reliquere quidam, esse narcoticum hunc fumum: & propterea hyoscyamum Peruvianum vocant, quibus favere videtur experientia, nam somnum conciliat, & dolores consopit. Hæc opinio quamvis etiam viros doctos habeat auctores, non prorsus tamen mihi videtur vero consentanea. Nam quod somnum conciliat, id præstat

vapore vel excitato in cerebro, vel illuc delato, vel cibi coctionem adjuvando, tunc enim suavius dormimus, cum stomachus cibo non gravatur. Dolores autem tollit, quia causas illorum vel adimit, vel alterat, non autem narcosi consopit, sicut graves & vetustos capitis dolores hoc fumo curatos vidi. Non habere autem vim narcoticam ex variis cognosci potest. *Primò* quia fatentur tabacum esse calidum siccum, attenuare, penetrare, humores resolvere. quod verum esse experientia docet. At hæc omnia narcoticorum naturæ repugnant, non quod narcotica omnia putem esse frigida, calida enim plurima sunt, sed quod narcotica quæcunque demum sint, humores increasant, unde si à crassis humoribus dolor fiat, maximum damnum inferunt, quia crassiores reddunt humores, sicque curatu difficilior affectus redditur. At tabaci fumus frigidis naturis, humoribusque magis competit, contra naturam narcoticorum. *Secundò* si vacuatio quæpiam aut alvi, aut sanguinis, exuperet, nec adstringentibus remediis sisti possit, narcoticis & stuporem inducentibus utimur tanquam summo præsidio ad humorum motus sistendos. At herba hæc corpus sursum, deorsumque purgat, instar hellebori, aut antimonii; Æque facile helleborum esse narcoticum probabit quispiam, quam mihi persuadebit eam vim inesse Nicotianæ. Fieri quidem potest ut vomitum compescat, sed quoniam illius causam adimit, sicut vomitus vomitum sedat. *Tertiò* stupefacientia extrinsecus apposita, parti sensum adimunt, eamque admodum refrigerant: at nihil tale herba hæc facit, sicut experiri quilibet potest.

## CAP. XXXII.

*De recto usu Tobaci.*

**Q**Uamvis hoc fumo nunquam haftenus usus fuerim, nec uti velim, observavi tamen plurimos omnis generis homines qui eo utuntur, tenues, crassos, biliosos, pituitosos, aliosque nihil incommodi inde percipientes, unde illorum non possum probare sententiam, qui valde noxium esse censent, nisi forsitan ob immoderatum usum. sic omne nimium vertitur in vitium. Tota Indorum regio de ejusmodi herba tam sentit reverenter, ut saluberrimam esse credant, & sanctissimam, multisque illam commendavi, qui illius usu multò facilius convaluerunt. *Ludovicus Mercatus* inter Hispaniarum Medicos celeberrimus, variis in locis eam summis extollit laudibus, & in variis morbis commendat; Sed multa perniciosum esse illius usum ostendere videntur. *Primò* quia naturæ contraria est, nam suffoque deque purgat violenter: Purgantia autem omnia naturæ sunt quodammodo inimica. *Secundò* cum quis primùm illa utitur, vertigines, animi defectiones, sudores frigidos patitur, quæ sunt malignæ qualitatis indicia. Hæc quidem vera sunt cum in corpus ingeritur, sed quando sola suffitu assumitur, nec ultra fauces pervadit, cerebro prodest caliditate sua, humoresque pituitosos vacuando, nec stomachum turbat, sed potius roborat, & coctionem juvat. Sic Auripigmentum lethiferum venenum, suffitum tamen probant auctores quam plurimi ad pulmones infarctu liberandos. Ipsi Turcæ opio assumpto tam familiariter uti dicuntur, quàm nos tobacco nostro. Natura enim tandem ejusmodi remediis assuefit, nec illorum malignitate perturbatur. Cum igitur ostendat experientia, sine noxa à quamplurimis assumi, cur illi repugnandum sit, rationem non

video: Censendum tamen est. *Primò* moderatum esse debere illius usum, quod sicut in aliis omnibus, ita etiam hic verum est, quamvis etiam ex immodico usu parum mali contigisse observaverim. *Secundò* magis convenit crassis, pituitosis, illisque quos defluxiones fatigant, ob caletaciendi, & exsiccandi vim qua pollet. Verum etiam si tennes, calidi, melancholici, moderatè utantur, non multum nocere solet, vix enim quispiam adeo emundæ naris est, qui sapissimè plurimis ad cerebrum ascendentibus vaporibus non infestetur. Nec vidi quenquam magnoperè illius usu exsiccatum. Et miror eos qui scripserunt esse narcoticum, denegare tamen illius usum calidis & biliosis, cum tamen illis narcotica magis quàm pituitosis conveniant. *Tertiò* quamvis multis consumptis & extenuatis profuisse sciam, minùs tamen illis convenire credo, quibus tabes ex rheumate in pulmones delabentem contigit. Quamvis enim humorem pituitosum è cerebro eliciat, naturam tamen inclinat ad humores in pectus etiam quovis alio tempore dimittendos. Quoniam igitur ex regulis Medicorum ad partem affectam nunquam trahendum est, sed ab eà potius revellendum, aut derivandum, non videntur ex usu caput per os purgantia, potius convenit vacuatio per nares. Sic Galenus hoc in casu fortissimum emplastrum, & metasyncriticum capiti raso applicabat, ut humorum descensum prohiberet, & revelleret. *Quartò* notandum, in illius usu à quamplurimis graviter peccari, quod simul cum hoc fumo assiduè potent, multi etiam inebrientur, & sic per reciproca pocula illius beneficia prohibent. Quamvis enim humores resolvere, cerebrum calescere & siccare videatur, cerebrum autem calidum siccumque pauciora generet excrementa, ex *Galeno in arte Medica cap. de signis calidi & siccì cerebri*. Cerebrum tamen calidum siccum potentiùs attrahit, faciliusque repletur vaporibus ab inferioribus

rioribus partibus sursum expirantibus, unde postea assidue repletum exsiccationis illius beneficia minùs percipit, ut docet Galenus loco citato. *Cum eu, inquit, caput repletur (continuò enim ac tum præsertim cum nullam servaverint victus rationem, tale quid eu accidit) plura quidem in ipsis excrementa, sed non incocta generantur, implenturquè atque aggravantur eorum capita, à calidis cibis, potibus, odoribus, atque hisce omnibus qua extrinsecus occurrant.* Et hoc rationi valdè est consentaneum, ad partem enim calidiorè redditam facilè ascendunt vapores. Cum igitur usu tobaci cerebrum incalescat, si prava victus ratio servetur, & vinum, cerevisia, potusque ejusmodi vaporosi (sicut nimis frequenter fieri solet) ingerantur, facilè iterum caput repletur, unde plus excrementorum per os & palatum expuere illos observatum est, qui hoc fumo utuntur, quam qui illo abstinent, ob crapulam & ingluviem quamplurimis nimium familiarem. Quintò, qui hoc fumo jampridem usi sunt, illique assueverunt, curiosè observare debent, ne temere postea illo abstineant, nisi simul valdè temperatam observant vivendi rationem, aliàs sentiunt sibi ex humorum abundantia caput, corpusque gravari, quos scilicet quotidiana fumi hujus assumptio vacuare solebat, tum somnos breviores, & implacidos contingere, vaporum defectu quos hic fumus excitabat, concoctiones pariter in ventriculo minùs feliciter obiri, plurimaque inde vitia pullulare, unde senibus, aliisque quibus naturà frigidior ventriculus est, consulendum, ut ejusmodi fumo utantur, etiamsi prius non fuerint assueti; Eos enim à podagra, variisque affectibus frigidis præservare potest.

## CAP. XXXIII.

*Fumum tobaci non pervadere ad cerebrum.*

**V**Tilem esse hunc tobaci fumum, minimeque noxium jam supra ostendimus, & tota gens Indorum occidentalium idem docet, inter quos vix è miliebus unus est qui eo abstinereat, & tamen vivitur illic diutissimè. Quando autem ore assumitur, non minorem fumi quantitatem rejici quam assumpta fuerit, observatu facilissimum est, totum enim illud ore contineri solet, quod excipitur. Vnde falsum id crediderim quod plurimi autumant, ad cerebrum usque pervadere. Neque necessarium est eò usque ferri, Masticatoria enim, & gargarismata, quæ ad humores è capite eliciendos præscribuntur, etiamsi ore continentur, vim tamen suam ad cerebrum usque diffundere solent; Non est absurdum idem fumum hunc attenuantem & exsiccantem efficere. Sed præterea facile probari potest fumum hunc ore assumptum ad cerebrum non ferri. *Primo* quod illius solummodo saporem, non odorem percipimus. *Secundo* quod fumum recipimus inspirando, cohibita respiratione continemus, expirando excludimus: Inspirando quidem per nares, pertingit aër ad cerebrum, sed per os inspirando solummodo ad pulmones, & ventriculum; Cum igitur fumi prædicti una cum aëre inspirando per os attrahantur, ad cerebrum non pertingunt. Expirando vel spiritum retinendo nunquam olfacimus, inquit *Galenus*, etiamsi odor foret in ipsis naribus, nam expirando odorem cum aëre repellimus. Spiritum retinendo non admittimus, quia retento spiritu nulluc aër ad cerebrum sponte pervenit, cum jam cerebrum aëre inspirato plenum sit. Ex hac ratio est, quare eorum quæ ore, & stomacho continentur, odores non percipiuntur, aliter seipsum homo ferre non posset, quia perceptio

ceptio odorum fit per inspirationem; Per os autem non inspiramus in cerebrum. Inde necessario patet fumum tobaci ore assumptum eò non ferri. Deinde si eòusque penetraret, cum ejusmodi vapores sint admodum acres, cerebrum percellerent, & vellicarent, sternutationem aliosve affectus commoverent, quod tamen non solet fieri; Sicut videmus eodem fumo per nares attracto statim elici sternutationem, quod tunc revera ad cerebrum feratur. Maneat igitur ratum, sola illius virtute caput affici, substantiam autem illius eò non pervenire. Sed objiciet quispiam, longo illius usu caput gravari, vertigines commoveri, & cerebrum quasi inebriari. Sed respondendum longo & assiduo solùm usu id fieri, quod tamen citò admodum contingeret, si fumus hic cerebri ventriculos repleret. Vertigines autem non semper à vaporibus fiunt, sed etiam à nimium calefactis, & concitatis spiritibus, aut etiam ab humorum vaporibus, immoderato fumi illius calore excitatis, aliisque variis de causis, quæ hîc non sunt recensendæ. Imò etiam quidam capite adeo sunt imbecillo, ut facilè vertigine tententur, ob levè quamlibet externam causam, unde etiam ex fumo Tobaci idem facilè pati possunt, quamvis illuc non perveniat, commota scilicet interiori quapiam causa. Quin etiam sæpe purgatio gravior vertiginem facere potest, ex *Galeno 2. aphorif. 37. & libro quos purgare oporteat*. Quare non mirum si usu immoderato cerebrum nimis purgatum, spiritusque accensi, & impendio calefacti, humores pravorum ex infernis alliciant, qui gravitatem capitis, vertiginesque inducant, quamvis fumi hujus substantia eo usque non pertingat.



## CAP. XXXIV.

*Num fumus Tabaci à Peste præservet.*

**A**Udivi præterea quosdam asseverantes etiam à Peste præservare. *Monardes* quidem adversus venena commendat, sed maximè adversus vulnera vel à telis venenatis, vel à feris venenum jaculantibus illata. Quæ tamen intelliguntur ab ejusmodi Scriptoribus, de herba virente, aut ejus succo applicato, non autem de fumo assumpto. Fieri tamen potest ut fumus iste adversus pestem profit, verum non ut plurimi putant ulla vi alexiteria, sed aliis de causis. Quæ enim Pestem avertunt, vel corpus excrementis liberant, & exsiccant, unde pestilens venenum minùs facile recipit; Fumum autem hunc cerebrum & corpus exsiccare, humores per os, interdumque etiam per vomitum vacuare, certum est; Sic forsitan à peste tuetur. At hoc modo nulla peculiaris id efficiendi virtus in hoc fumo reperitur, nam vacuantia, per accidens tantùm à Peste præservant, ut purgatio, venæ sectio, &c. Ideo nulla ratio cogit, ut peculiarem præservandi vim huic fumo tribuamus. Sed præterea observant plurimi à validis purgantibus in peste abstinendum, quia facile humores levi de causa conturbantur. Scio plurimos vomitoriis ex Antimonio curationem pestis, & prævationem promississe, qui etiam ipsi forsitan satis tuti non sunt; Sicut refert *Platerius* in observationibus, *Adamum à Bodenstein* præstantissimæ notæ Chymicum, cum pestis curandæ & præcavendæ certissimam rationem scriptis divulgasset, eâ tamen correptum, cum penitus ferme Basileæ cessaret, periisse. Adeo infida sunt & incerta omnia quæ adversus hoc veneni genus præscribuntur, sed maximè vomitoria, quæ partem nobilem debilitant, maximamque vim corpori inferunt! Alia præservandi ratio est per Alexiphar-

xipharmaca, quæ etiam curandi vim habent, eadem enim ferè imminentibus, & præsentibus morbis conveniunt. At huic fumo ejusmodi vim inesse nondum experientia constat. nam tot hominum milia, quos magna illa pestis, tum Londini, tum in aliis regni partibus abstulit, quorum tamen haud dubiè pars maxima hoc fumo utebatur, nullam vim illi inesse ostendunt, & eorum, qui revaluerunt, nullus huic fumo sanitatem acceptam referre potest. Quod si curandi vim non habet, nec etiam præservandi. Sed præterea sciendum reliquorum venenorum propria esse Alexipharmaca, pestis autem nullum, sed tantum remediis cardiacis utuntur Medici, quibus non ipsum venenum extinguatur, sed natura solum roboretur adversus veneni vim, quod postea expellit per sudores, aut alia corporis emunctoria. At vim cardiacam fumo tobaci non inesse, ostendunt vertigines, lipothymia, sudores frigidi, vomitus, aliaque symptomata, quæ potius adversam, quàm corpori beneficam vim ostendunt. Quamvis igitur non nocere credam, multum tamen prodesse posse non videtur. Quam etiam cerebrum, docente Galeno in *Arte Medica cap. de signis calidi cerebri*, faciliè ambientis aëris occursum offenditur. Facile, inquit, gravantur eorum capita à calidis cibis, & potibus, odoribus, atque hisce omnibus quæ extrinsecus occurrunt, in quorum numero est qui nobis circumfunditur aer. Propterea cum usu tobaci maximè cerebrum incalescat, periculum est ne ab aëre pestilenti offendantur. Vnde videmus frigida fenum corpora peste minùs affici, quam juvenum, ob corporis frigiditatem, ut etiam Plinius annotavit. Quod autem vulneribus, moribusque venenatis idonea hæc herba perhibetur, vim tamen habere Alexipharmacam non ostendit, nam sublimato prinum utebantur Hispani ad ejusmodi vulnera, & nos quoque varia præscribere solemus, quæ natura sua non sunt alexiteria,

teria, sed vel venenum foras attrahentia, vel extinguentia, ut cauterium actuale, aliaque similia. Fieri que potest ut ad id etiam valeat Nicotiana, etiamsi nulla propria & peculiari virtute venenis advesetur.

## CAP. XXXV.

*De Importuno remediorum cordialium usu.*

**Q**Uoniam in omnibus morbis maxima virium ratio semper est habenda, non mirum est si ægri eas sibi conservari postulent, unde tam frequens cardiacorum remediorum usus. Ideo sæpe quidam Medicis vitio vertunt: quod Cardiacæ, & Alexipharmaca minùs frequenter ipsis præscribant, maximè sub noctem, & horam somni sumenda. Importunus tamén illorum usus sæpissimè potiùs nocet, quàm prodest, ut theriaca, mithridatium, & similia. Non enim quicquid cardiacum dicitur, statim naturam roborat, potest enim illam destruere, sicut febricitantem magis juvat aquæ frigidæ potus, quam aquæ cœlestis, imperialis, theriacalis, & similium. Observandum autem imbecillitatem tum cordis, tum virium quæ ab eo dependent, variis de causis fieri posse, causis autem tam diversis non qualibet remedia convenire. Quod si quodam remedio, quantumvis cardiacum esse dicatur, morbifica causa augeatur, ex cardiaco fit ægrotanti venenum, ut si calido affectui calidum medicamentum præscribatur, morbus increscit, æger non roboratur, sed fit imbecillior. Vnde malè faciunt qui absque iudicio ejusmodi roborantia præscribunt. Sed præterea notandum theriacam, mithridatium, aliaque similia, quæ in frequentissimo sunt usu, posse esse valdè noxia, nam docente *Galeno s. Simpl.* Media sunt inter corpora, & venena, ita ut eadem sit proportio corporis ad alexitherium, quæ hujus ad deleterium, unde vult omnia ejusmodi,

modi, quæ sunt de natura theriacæ, & mithridatii, corpus animalis lædere copiosius sumpta, & nisi intus noxium sit aliquod venenum in quod agant. Scio comparationem hanc non placere *Averrhoi, subtilissimo Medico, & Philosopho, §. Colliget. cap. 23.* qui tamen fatetur non prodesse nisi à venenato corpore fumantur; nam sanis nocent, inquit, ac ipsis fiunt venena, ut sunt omnia bezoardica dicta. Ob magnam enim agendi vim nisi rectè administrentur, ab iis tanquam à veneno corpus læditur, unde etiam *Galenus* prohibet theriacam calidis siccis, aut etiam pueris. Quamvis igitur absolute horum medicamentorum usum non improbem, nec ea venenata esse iudicem, & perniciofa, tamen cautè iis utendum inde patet, qualitates enim habent sapissimè corpori noxias, nisi in corpore invéniant objectum in quod agant. Igitur roborantia, & cardiaca pro morborum varietate varia esse debent, unde quædam sunt frigida, quædam calida, quædam temperata, quædam occulta & inexplicabili proprietate corroborantia, quædam venenis adversantia, quæ non possunt omnibus causis vires lædentibus competere. Vnde etiam inter cardiaca numerari optimè possunt, ea quæ causas morbificas evacuando, & alterando juvant, quod sæpe multa cardiaca dicta non perficiunt, & ejusmodi remedia per accedens tantum cardiaca dici debent, sunt tamen omnium certissima. Ideo rectè *Avicennas lib. de viribus Cordis*, docet septem modis Medicinam dici cardiacam. *Primò* quia reficit spiritus, ut vinum, ova, juscula, & alimenta eupepta, & euchyma, & sanè vires alimentis maximè roborantur, eodem tamen intempestivè exhibito easdem lædi, supra suo loco docuimus. *Secundò* quia eosdem illustrat, ut Margaritæ, & sericum. *Tertiò* quia substantiam cordis congregat, spirituum resolutionem prohibendo, ut carabæ, terra sigillata, bolus armena, at hæc omnibus

bus non profunt, quia sunt adstringentia, quæ interdum nocere possunt. *Quartò* quia cordi est amica, ut sunt dulcia, & odorifera, aqua coelestis, imperialis Mariæ. *Quintò* quia roborat per qualitates manifestas, ut quæ est temperata, borrago, buglossum, aurum. *Sextò* quia evacuat depurando humorem melancholicum & evacuando quod cordi nocet, ut sunt, myrobalani. *Septimò* quia proprietate occulta roborat cor ut hyacinthus; Hæc autem varia omnibus omnino causis convenire nequeunt. Nunc autem cum roborantia vulgus postulat, intelligit non juscula, aut venæ sectionem, purgationemve, sed theriacam, mithridatium, aquas stillatitias generosiores, fortio- rem cerevisiam, vinum cum aromatibus coctum, aliaque ejusmodi, quæ sæpe non solum ægris, sed etiam sanis nocere possunt.

## CAP. XXXVI.

*De erroribus circa Lapidem BeZaar.*

**Q**uia de cardiacis sermo fuit superiori capite, aliquid dicendum est de Lapide Bezaar, cujus admodum familiaris est usus, quem multi putant esse maxima roborandi vi præditum, cardiacum potentissimum, ad quem, tanquam ad sacram quandam anchoram, reliquis irritis confugiunt. Peccant tamen errantque in tribus. Primò quod de lapide isto nimis benè sentiunt. Secundo quod qualitatem ipsius ignorant. Tertio quod quantitatem benè non metiuntur. Quod ad primum spectat, nomen istius lapidis deducunt quidam à vocabulo *Pasar*, quod apud Indos orientales hirci genus significare dicitur in quo lapis iste reperitur. Alii dicunt esse belzaar, quod vocabulum Mauritanorum lingua veneni dominum significat, estque apud illos commune nomen omnibus remediis quæ Græci alexipharmaca, & alexiteria vocant. Sic Averrhoes *op. 23. lib. 5.*

lib. 5. colligit, postquam de venenis capite præcedenti egisset, agit tandem de bezaar, quod idem est ac antidotum. *Medicina*, inquit, *quæ dicuntur bezaahar, quæ curant à venenis*. Avicen. lib. 2. fen. 1. cap. 4. *Albezaar*, inquit, *est remedium, quod sua proprietate conservat sanitatem, & virtutem in spiritu, ut veneni noxam à se expellat*. Vbi patet esse nomen generale omnibus ejusmodi remediis. Sed peculiariter apud nos intelligitur lapis ille adeo usitatus ex animalibus erutus, & ex India ad nos delatus. Præstantia autem hujus lapidis à quibusdam tanta esse creditur, ut omnibus aliis præferatur, nam Arabes adversus venena, pestem, iæterum, corporis & viscerum obstructions valde commendant. *Avenzoar in libro Theisir*, dicit se liberasse quendam qui perniciosissimum venenum sumpserat, exhibitis tribus granis lapidis bezaar, in unciis quinque aquæ cucurbitæ. Verum si consideremus quæ de isto lapide scribit Avenzoar, inveniemus non esse nostrum lapidem, qui ab Indiis advehitur, sed lachrymam Cervi de quo ita fabulatur. Cervus, quod etiam testatur Plinius, Serpentes narium spiritu extrahit ex cavernis, eosdem mandit, tunc maxima infestatur siti, ad cujus levamen aquas stagnantes petit, in quibus immergit sese collo tenus, sed ita docente natura non bibit, aliàs illicò concideret mortuus. Tunc ad ejus oculos humor quidam defluit, qui paulatim crassescit, cogitur, & ad glandis magnitudinem excrescit, quem postquam ex aquis Cervus exiit, deciduum quarunt homines, lapidemque bezaar quidam vocant, qui dicitur esse latus, in pyramidem tendens; coloris mellei, quem se vidisse scribit *Amatus Lusitanus, comment. in Dioscorid. cap. 39 lib. 2.* eandemque fabulam sequitur *Scaliger exercitat. 112. ad Cardanum*, eumque etiam se habere scribit, sed fides sit penes authores. Sed tamen lapis hic noster non est lachryma Cervi, quæ nimium rara est, si unquam talis fuit.

fuit. At lapis hic noster est admodum frequens. Est autem, ut scriptores testantur, variorum generum, flavus, pulverulentus, ex albo virescens, præstantissimus flavus, dein pulverulentus, de quo sic scribit *Rhazes*: lapis est mollis, colore flavo, sapore nullo, quo adversus vim napelli foeliciter usum esse testatur. Erat autem colore flavo, albicante, levis, & luminis modo splendens. Aliter tamen eum describit *Garcias* ab Horto Proregis Indiarum Medicus, qui tamen fatetur se tantum audivisse quosdam illius usu à deploratis morbis fuisse servatos, vultque esse coloris ex viridi nigricantis, aitque necesse esse omnes ad Regem illius regionis deferri, nec sine difficultate inde haberi possunt, unde cum sint jam adeo familiares, & frequentes, de bonitate illorum maximè dubitandum. Hic rectè monet *Matthiolus* multos esse adulterinos ejusmodi lapides, facie tantum similes, nullis autem viribus præditos. Et libro *Epistolar. tertio*, in *Epistola ad Quacelbenum*, *Lapidem quem Mauritanii bezohar vocant, accepit in sui commodum serenissimus Princeps. Ego jamdum plures illi similes vidi lapides, sed an veri vel adulterini sint profectò nescio. Atqui si Serapionem, & Rhazem consulamus, non video cur probem lapidem hunc legitimum esse.* Vbi ingenuè ignorare se fatetur, an lapis bezoardicus Imperatoris verus sit, creditque potius esse adulterinum. Duplex autem est hic lapis, unus orientalis ex Persia, vicinisque regionibus allatus, in quodam Hirci genere repertus, alius occidentalis ex America advectus, qui in variis animalibus reperitur. De quo ex *Iosepho Acosta* notandum est reperiri hunc lapidem in animalibus quæ vicugnas vocant, suntque caprarum genus quoddam, tum in tarugis dictis omnibusque animalibus quæ Peruviano solo propria sunt, reperiturque in stomacho & ventre, interdum unicus, interdum duplex, triplexve, interdumque etiam majori numero. Differunt autem hi lapides inter se, figura,

se, figura, magnitudine, & colore; Quidam enim non excedunt Avellanæ magnitudinem, quidam verò luglandes, ova columbarum, & gallinarum æquant, interdum etiam malum Arantium, qualem se vidisse refert idem Acoſta. Figura quoque diverſa eſt, & admodum varia; Colore quidam ſunt nigri, alii virides, albi, aurei, grifei. Vnde nec color nec figura ſigna certa eſſe poſſunt bonitatis illorum. In Peruvia ex variis animalium generibus eruuntur, ſeris & cicuribus, in ganacis, pacis, vicugnis, tarugis, quæ animalia ille deſcribit; Ganaci, & Paci arietum genus quoddam, lapides habent minores, & nigricantes, reliquis ad uſum Melicum inferiores. Majores & meliores eximuntur ex vicugnis, & ſunt virides, aut ſubalbi; Optimi verò ex Tarugis, ſunt craſſi, albicantes ad griſeum colorem tendentes, habentque cortices cæteris craſſiores; In nova Hiſpania in cervis etiam reperiuntur. Qui ex India orientali aſſeruntur, ſunt præſtantioreſ, ſuntque coloris olivacei. Secundum locum obtinent Peruviani, tertium quos nova Hiſpania mittit. Indi autem eleganti artificio eos adulterant, ut pluribus explicat idem *Acoſta libro quarto cap. 42.*

Ex prædictis patet non eſſe admodum fidentium huic lapidi. Primò quia noſtrorum lapidum effectus non reſpondent iis quos auctores ſcribunt. Volunt enim ſudores potentè movere, interdum quoque & vomitum, quod tamen ſiquis in noſtris experiatur, non ſemper verum eſſe comperiet. Dedi ſapiffimè hunc lapidem variis ægrotantibus, nihilque animadverti illorum quæ de ipſo perhibentur. Idem obſervârunt quamplurimi recentioreſ; Hercules Saxonia inter Italos maximæ famæ præcticus, ingenuè confitetur, ſe, quamvis etiam lapides illos habuerit, qui præſtantiffimi Venetiis credebantur, nullum tamen inſignem effectum obſervâſſe. Ego, inquit, *ut ingenuè dicam, dum Venetiis præticarer, maximam hujus copiam*



*copiam consumpsi, nec egregiam operam sensi. Scio plurimos quibus exhibui fuisse sanatos, sed non retuli in lapidem. Causa, quia reperio apud scriptores quod eo sumpto sudor copiosus excitetur, post quem statim sublevantur; Ego tamen non vidi sudorem prorumpentem, vel si apparebat, erat sudor imperfectus. Itaque quantum ad me, abjeci omnem spem hujus lapidis in his febribus. Fieri potest ut ego inciderim in Sophisticum, adulterinum. Sed cum Venetiis Medicinam facerem, in Primatum adibus, persuadebant esse omnium excellentissimos. Capite de febribus pestiferis. Matthiolus tamen, aliique hunc lapidem laudant, sed credendum est eos habuisse quosdam veros, qui apud nos sunt rarissimi, ipseque in Epistola jam citata fateatur lapides Imperatoris non fuisse genuinos. Vallesius Medicus doctissimus Philippi Secundi Hispaniarum Regis Medicus primarius credit libro 4. methodi nullum verum esse lapidem Bezoar, etiam in ipsa Hispania. quod si Rex Hispanorum nullum habuit verum hunc lapidem, multò minùs apud nos prostabit venalis. Secundò lapides nostros ut plurimum esse adulterinos non minima suspicio est, quod ex animalibus eruantur evisceratis, & occisis, vixque fieri potest ut unica regio tot suppeditet animalia, quin tandem rarior fiat species. Tanta enim istorum lapidum quantitas in sola Anglia reperitur, ut miraculi instar mihi esse videatur, quod non fiant rariores. Quod si reliquas simul Europæ regiones consideremus, ubique pariter abundant. Fatentur tamen Medici qui apud Indos fecerunt Medicinam, illic esse rarissimos ejusmodi lapides, & admodum caros, ab Indis ipsis curiosè in proprium usum asservari, unde ergo nobis tanta illorum copia suppedietur, si non sunt adulterini? Tertiò difficillimum est, & quantum conjicio, prorsus impossibile, genuinum à factitio certo discernere, tam artificiosa est quorundam impostorum solertia. Vidi ego Lutetiæ Parisiorum quendam, qui eos tam affabrè*  
*confi-*

conficiebat, ut eos ab aliis ipse qui fecerat dignoscere nisi appposito signo non posset. Ipse Saxonia faretur se nunquam indicium certum lapidis scire potuisse. Dicunt quidam in medio esse festucam, vel arenam, vidi ego in medio aciculam. Acoſta vidit ſtrobylum, ſed hæc & alia ejusmodi impoſtores factitiis ſuiſ addere nōrunt. *Rodericus à caſtro lib. 2. de morbis mulierum* ita dignoſcere docet: *Præfertur, inquit, orientalis, laviuſ, pelluciduſ, luminuſ, coloruſ ex viridi nigri, inſpiduſ, cujuſ pulverem ſi calce & aqua miſceas, coloreſ refert ex pallido viridem, quique ſuper accenſoſ carboneſ injectuſ in auram penituſ evaneſcit.* Sed pariter hæc non ſunt admodum certa. Scribunt authoreſ lapideſ hoſ eſſe variuſ coloruſ, at noſtri fermè omneſ ſunt ejuſdem coloruſ ſubnigri, optimi dicuntur eſſe flavi, raro igitur præſtantiffimi nobiſ adſunt, qui raro flavi reperiuntur. Fatetur Acoſta Indoſ eoſ adulterare, quod veriſimile eſt, quum in minoruſ pretii medicamentuſ id ſæpiſſimè fieri ſoleat. Si quiſpiam igitur lapidem habeat, quem verum eſſe & genuinum certò noverit, non improbo quin eo utatur, ſi illiuſ vires ſemel fuerit expertuſ. Id tantum hoc capite monere volui, non eſſe quibuſlibet lapidibuſ adhibendam fidem, veroſ eſſe rariſſimoſ, & quod peſſimum eſt nulla eſſe certa indicia, quibuſ veri à falſiſ diſtingui poſſunt. Suntque in variuſ animalibuſ, ut equiſ, porciſ, aliſque interdum lapideſ bezoarticiſ omnino ſimileſ, qui tamen nulliuſ ſunt efficaciuſ.

## CAP. XXXVII.

*De temperie, & dosi Lapidis Bezoar. 1*

**S**upponam hoc capite verum lapidem bezoar familiariter reperiri, quia obstinatè populus in illo confidit. Solent tamen plurimi illius quantitatem reformidare, quasi sit medicamentum calidissimum, & potentissimè efficax, videntque sæpe mulierculas, quæ calida remedia agris propinant ad roborandum, ut aquam cinnamomi, vinum cum aromatibus coctum, aliaque ejusmodi, reformidare tamen hujus lapidis quantitatem, & repugnare siquando ad plura quàm duo, aut quatuor grana ad summum exhibeatur. Videtur autem ipsis quodammodo favere ratio, nam dicitur movere sudores. Sudorifica autem calida esse videntur, quia humores attenuant, secant, in cutem expellunt. Ideo tantò calidior videtur esse hic lapis, quò in minori dosi exhibitus id præstat. Sed *Primò* notandum est, sudores hodie hujus lapidis usu rarò provocari, ut experientia quotidiana fidem facere potest. *Secundo*, si quispiam quam maximam hujus lapidis quantitatem assumpserit, non sentiet unquam se factum esse inde calidior, quod sanus quilibet in seipso potest experiri. *Tertiò* qui de hoc lapide scripserunt, hætenus quidam voluerunt esse temperatum, alii frigidum, nemo autem calidum, nullum enim saporem habet, nullumque odorem, quod mirum foret, si adeo calidus esset hic lapis. Verisimilius igitur est agere proprietate occulta, non manifesta, cor scilicet roborando, & muniendo adversus malignam vim, unde obiter infero inutilem esse hunc lapidem ad roborandum, nisi maligni, venenatique in corpore humores adfuerint, unde quamvis datus non noceat, frustra tamen exhibetur. *Quartò* qui de hoc lapide scripserunt, in ejus dosi non consentiunt, dedit

dedit Avenzoar ad grana tria, quæ dosis est vulgaris, verum illius lapis non erat Bezaardicus hic noster. Sed Matthiolus præscribit ad grana ad minimum septem, Garcias ab Horto ad grana triginta, fateturque posse etiam innoxie ad plura sumi. Audivi celebres quosdam Medicos huic lapidi multum confidentes, hanc tamen causam afferre quare minus efficax lapis hic deprehendatur, quia scilicet nimis exigua quantitate sumitur. Sed præterea legi alicubi Edvardo Regi datum fuisse lapidem bezaar ad drachmæ pondus, quæ sunt grana sexaginta, ut pluribus legi potest apud Monardem Fumanellum, Abra Conciliatorem. Quia autem, ut diximus, raro bonus invenitur hic lapis, atque etiam ille quem habemus nimis caro vānit, suadeo ut tantum divitibus præbeatur, non autem aliis qui ejusmodi impensas sustinere nequeunt, semperque dosi satis magna præbeatur, aliàs erit inutilis. Imò firmiter credo posse ad drachmam unam innoxie assumi, tam benignum, atque innocens est remedium. Fumanellus lib. de peste commendat ad drachmam unam, & Garcias ab Horto refert solere *in India ad 30. grana assumi nimis*, inquit ille, *magna quantitate, nam tamen si nullas noxias facultates contineat hic lapis, tutior tamen est ejus exigua quantitas.* Sed si lapis hic est innoxius, pariter magna quantitas est innoxia, ut alii observârunt. Propterea non erit formidandum pueris aliquot illius grana tria, quatuorve dare. Quamvis enim Galenus pueris veter dare theriacam, diversa tamen prorsus est ratio de lapide bezaar, nam theriaca calidissimum est medicamentum, variisque constat simplicibus quæ calori puerorum vim inferre possunt, Bezaar autem non calet, sed tantum roborat, qualitate occulta, non autem manifesta,

## CAP. XXXVIII.

*De Cornu Unicornis.*

**V**ix dici potest cuinam majores vires aut lapidi Bezoar, aut Cornu Monocerotis vulgus attribuat, maxima enim omnium Alexipharmaca hæc esse censentur, quamvis cornu hoc lapide bezoartico minùs vulgare sit. Plurimi tamen satis magna illius frustra se habere jactant. Sed dubitatur à multis non sine magna ratione, an ejusmodi cornu reperiatur. Esse quidem varia animalium genera, quæ unicum tantum in capite cornu gerunt, tum veterum, tum recentiorum scripta testantur. Quatuor autem ex *Aristotele*, *Æliano*, & *Plinio* recensentur; Ab *Aristotele* quidem tantum oryx, & asinus Indicus, sed ab aliis additur rhinoceros, & qui proprio nomine dicitur monoceros, de quo hic potissimum agimus. Sed quid propriè sit hic monoceros nondum satis liquet, cum hætenus navigationibus Indicis nondum potuerit certò explorari. Et qui ejusmodi animal se vidisse referunt, tam parum consentiunt in illius descriptione, ut fabulæ fermè videantur quæcunque illi referunt. *Plinius* & *Solinus* qui nunquam viderunt ejusmodi animal, ita tamen describunt, haud dubiè ex aliorum sententia. Describit *Plinius*, *asperrimam feram monocerotem, reliquo corpore equo similem, capite cervo, pedibus elephanto, cauda apro, mugitu gravi, uno cornu nigro, media fronte, subitorum duum eminente, hanc feram vivam negant capi.* *Solinus* autem c. 60. sic describit. *Sed atrocissimum est monstrum monoceros mugitu horrendo, equino corpore, elephantinis pedibus, cauda suilla, capite cervino, cornu è media ejus fronte protenditur, splendore mirifico ad longitudinem pedum quatuor, ita acutum, ut quicquid impetât, faciliè ictu ejus perforetur. Vivus non venit in hominum potestatem, & interim quidem potest, capi non potest.* Sed *Ludovicus Vartmannus*

mannus, scriptor ingenuus, duos in peregrinatione suâ se vidisse refert, sicut recenset *Scaliger exercit. 205*. Unicornibus, inquit, equi magnitudo, crura, pedes, caput cervi, pili color balius, equi juba rarior, brevior, coxæ villosæ, cornu unum integrum Niceæ videmus, alia alibi, subfulvum unum, unum subluteum accedens maximè ad buxum, unum suppuniceum, habemus etiam frustum candidum. Et hic à Pliniana descriptione discrepat, nam mitem, minimeque ferocem esse ait, pedes & crura cervi ipsi attribuit. Plinius autem pedes elephanti, & in descriptionibus suis alii alia addunt. Fatetur tamen *Amatus Lusitanus Enarra. 52. In librum secundum Dioscoridis*, Medicos Lusitanos, & alios qui interiora Indiæ penetrarunt, de ejusmodi animali nihil referre, nisi quod in maximo pretio sit apud Indos adversus venena, & febres pestilentes. Monet autem *Idem Amatus* verum cornu esse coloris subnigri, aut saltem subcineritii. Item nimis vetus esse invalidum, sicut & in aliis medicamentis contingit; Item plura esse adulterata ex calce, & aliis rebus ad formam cornu efficta, alios verò balanzæ os pro eo vendere, audivi etiam & equi marini, & Elephantorum dentes pro eo fuisse suppositos. Hæc quidem videntur in dubium revocare ejusmodi cornua. Sed dicet quispiam, sacram scripturam variis in locis meminisse istius animalis tanquam ferocissimi. Sed forsan ignotum est propriè nomē illud quod interpretes unicornu transtulerunt: nam, ut advertit Morinus Blesensis, oratorii Presbyter doctissimus, fatentur Iudæi se ignorare nomina plurimarum avium, quarum meminit Moses in Levitico, quid ni pariter fieri potest ut nomen istud ignotum sit, quod tamen unicornu Interpres transtulit, & forsan aut Asinum Indicum, aut Rhinocerata, aut in genere quamlibet unicornem feram significat. Rhinocerotem quidem non fuisse verisimile est, est enim fera hæc bicornis potius

quàm unicornis, fera minimè agilis, sed pigra, cuius cornu etiam brevissimum est, cum tamen quæ circumferuntur Monocerotis cornua, ut plurimum sint valdè longa, atque ab eo animali extracta, quod agile admodum scriptura prædicat, unde Cardanum reprehendit Scaliger, qui monocerota sub Rhinocerotis nomine descripserat, cuius picturam se vidisse refert idem Scaliger, illius scilicet *cujus cadaver eiectum est in Tyrrhenum littus, capite suillo, tergore scutulato, cornu gemino, altero pussillo in fronte, altero in nare robustissimo, quo audacissimè pugnat & vincit Elephantum*. Videturque esse hæc eadem fera cuius meminit Amatus Lusitanus, quam Emmanuel Rex Lusitaniæ Romam mittebat, sed naufragio prope Massiliam amissa navis, in mari fera periit, cuius corium ad Franciscum Regem Galliarum, accolæ attulere. Sed an sub nomine Monocerotis Asinus Indicus intelligi debeat, forsitan foret dubium, nisi utrumque distinxisset Ælianus. Propterea non assero monocerotem animal esse fictitium, sed valde rarum est, nondumque certò cognitum. Sed præterea etiam Cæsar libro 6. de bello Gallico, meminit Bovis unicornis, suntque etiam tales apud Indos ut volunt Historiographi. Nec tantum terra, sed etiam aqua sua habet monstra unicornia, quæ forsitan amphibia sunt, ut refert Garcias ab Horto, de quodam monstro amphibio circa Promontorium bonæ spei, quod unicum cornu in fronte habet, quo adversus Elephantem ferociter pugnat, sed etiam ex Borealibus regionibus, ut ex Islandia & Groenlandia afferuntur cornua, quæ unicornium marinorum esse dicuntur. Fuerunt ante annos non ita multos in hanc urbem Hullam, in qua hæc describo, allata ex Groenlandia animalium marinorum unicornium capita duo in littore reperta, cum cornibus in fronte maximis, quorum particulas quasdam vidi. Ex quibus patet plurima esse animalia tam terrestria quam aquatica unicornia.

cornia. Sed præterea meminit recentior quidam Scriptor, Daniel Sennertus libro 5. suæ naturalis Philosophiæ, cornu cuiusdam fossilis, quod in Thuringia, Bohemia aliisque Germaniæ locis invenitur, quod etiam pro monocerotis cornu habetur, cui etiam vim tribuit adversus Epilepsiam, & morbos malignos, & à genuino distinguere docet, quod verum sit admodum durum, at fossile durum non est, sed facile frangitur, teritur, & linguæ admodum adhærescit, instar terræ sigillatæ, aut alicujus margæ. Eiusdem quoque meminerunt Gesnerus, Fallopius, Agricola, aliique rerum mineralium scriptores. Cum igitur varia sint Unicornium genera, vires tamen adversus venena omnibus non competunt. Et Ælianus qui describit monocerota, vim tamen alexiteriam nullam illi attribuit, sed tantum Asino Indico, scribit enim potentiores apud Indos ex eornubus his bibere solere, atque ex hoc cornu bibentem ab insanabilibus morbis tutum fieri, neque convulsionibus corripi, neque sacro morbo, neque venenis ullis ferunt. Quin etiam si quid pestilens biberit, tum id vomere, tum ad sanitatem redire. Idemque scribit Philostratus in vita Apollonii Thyanei, lib. 3. Sed Cornu asini Indici rarissimum est, superius inquit Ælianus, est puniceum, inferius album, medium verò nigrum, at cornu monocerotis ex eodem Æliano est nigrum. Ambrosius Paræus aliique præstantissimi Medici nullum istius Cornu effectum invenere, minusque probat consuetudinem illam imponendi regiæ patetæ frustulum cornu Monocerotis, quam audio sustulisse illum qui hodie primarius Regis Galliarum Medicus est. Sed & pariter Cornu equi Indici vim adversus venena tribuit Ælianus, idemque refert de cornu Rhinocerotis Garcias ab Horto, estque breve, validissimum, nigrum, ab aliis dicitur intus obscure flavescere, & lingua madefactum exhibere odorem exustæ cuiusdam



materia. Refert quoque Garcias de monstro suo Amphibio equi formam referente juxta promontorium bonæ spei, cujus cornu adversus venena laudari, facto in duobus canibus experimento, quorum alter cui dupla quantitate propinatum erat venenum, sumpto hujus cornu pulvere convaleuit. Alius verò cui non datus fuit, statim mortuus est; etiam minori quantitate venenum ipsi fuisset exhibitum. Sic pariter quæ ex Borealibus regionibus afferuntur cornua, & quæ fossilia sunt, non exiguam adversus venena vim habere dicuntur, quamvis etiam id quidam negent, suntque ut plurimum hæc cornua quæ plurimi pro Monocerotis cornu ostendunt, quamvis color non respondeat, qui in vero Monocerate niger est. Sed fossilia omnes qui de iis scripserunt, præferunt, ut Gesnerus, Cæsalpinus, alique, vim enim habent alexipharmacam, & sudores potenter movent, instar terræ Lemniæ. Igitur ut caput istud concludam, cum ejusmodi medicamentorum vires sola experientia cognoscantur, facile erit cuilibet qui ejusmodi cornuum frustula aut habet, aut experiri cupit, vel catulo, vel pullo venenum exhibere, qui si hujus pulveris assumptione liberetur, optimum hoc medicamentum servabit. Quamvis enim ignorentur animalia ex quibus eruuntur, non deneganda tamen est virtus horum cornuum, cum omnium exotericorum origo nondum plenè innotuerit. Si cornu cervi probamus, cur facultas eadem reliquis cornibus adimetur, imò volunt quidam omnibus cornibus, etiam Boum, vim adesse quandam salutarem, ideo ex cornibus bibebant veteres, unde deductum nomen *κεράσιον, κεράριον*. Cum igitur quæ circumferuntur cornua, varia sint colore, magnitudine, & figura, à diversis prodire animalibus verisimile est. Sive igitur cornu sit aut Asini Indici, quod Ælianus comprobat, sive Rhinocerotis, sive animalis cujuscumque aquatici, perinde est, dummodo

vires

vires experientia respondeant. Non-igitur morose inquirerem, sintne Monocerotis, aut alterius animalis cornua, dummodo bona sint, & efficacia: imò quoque parum refert sitne animal bicorne, vel unicorne. Certissimum tamen est, ut supra diximus & elephantorum dentes, & ossa balanarum, & equi marini dentes, & adusta communia cornua, & fossilia quæ diximus, atque alia fascitia pro vero Monocerotis cornu venditari sæpissimè. Vult Cardanus Elephantum ossa ita arte sequacia reddi posse, ut instar cornuum extendi queant, & sic pro unicornu exponantur. *Nec aures*, inquit Amatus Lusitanus, *præbeat illis, qui cum cornu unicornis probare nituntur, in aquam ramentum, aut scobem infundunt, quam illicò sudare, aut in ebullitionem venire distant, quum illud ex quacunque ossis scobe in aqua infusa evenite percipere possint, ut in ebore experiri poterint.* Pariter advertendum est, non esse fidendum aliis ejusmodi experimentis, quibus utuntur quidam ad probandam bonitatem cornu Monocerotis. dicunt enim præfente veneno aut venenato animali sudare, quasi à veneno pateretur, tum circulum jubent fieri ex ejus pulvere, in cujus medio, aut in cornu excavato araneam imponunt, quæ si transiliat, fictum esse cornu volunt, si autem crepat, & moriatur, genuinum: quæ omnia sunt falsa. Et de his satis.

## CAP. XXXIX.

*De aquis quibusdam distillatis ad febres abigendas male institutis.*

**Q**uoniam familiare admodum hic est in Anglia, tam viris quàm mulieribus remedia ad varios morbos colligere, & sibi invicem communicare, secretorum instar pauca dicemus de aquis quibusdam alexipyretis, quibus plurimè utuntur ad febres intermittentes, quas *agues* vocant, quarum usus etsi interdum utilis esse possit,

sapius tamen perniciosus est & temerarius. Apud quosdam Medicinæ scriptores ejusmodi aquæ etiam descriptæ reperiuntur; *Quercetanus in Pharmacopœa sua* quam vocat restitutam, duas recenset, quas ait esse específicas ad omnis generis febres, intermittentes potissimum, sed maximè tertianas nothas, & exquisitas, adeo audacter sanitatem nobis isti chymici pollicentur. Ipse *Galenus* absinthium medicamentum calidissimum præscribit ad febres tertianas 1. *ad Glaucon* & 3. *de simplicib. medicament.* chamamelum ad idem commendat. Sunt quidam qui ejusmodi calidis sudores movere volunt. In genere autem aquæ omnes illæ quas vidi ex simplicibus calidis erant distillatæ, quibus in qualibet febre intermittente statim uti volunt, sæpe cum agrotantium pernicie. *Primò* igitur notandum est, intermittentes febres à variis humoribus concitari, calidis, & frigidis, quibus non potest unum idemque remedium, quolibet tempore commodè administrari. *Secundò* cum unumquodque contrario suo curetur, certum est usu ejusmodi calidorum remediorum inflammari, & augeri humores biliosos, sic potest febris ex intermittente fieri continua. *Tertiò* febris intermittens causa sæpissimè latet in mesenterio, pancreate, aliisque primis viis; quam saburræ usu medicamentorum istorum deducere in habitum corporis est nimium periculosum, ne venarum sanguis inquinetur, maximè in biliosis febribus, quarum causa ut plurimum tenuis est, & facile mobilis. *Quartò* *Galenus* vetat in quartana febre quam humor melancholicus frigidus siccusque parit, usum vehementiorum & calidiorum in principio, refertque historiam Eudemi Philosophi, qui cum intempestivè usus fuisset theriaca ad quartanam febrem, ex simplici facta est duplex, quem tamen *Galenus* eodem remedio tempestivè exhibito curavit. Conveniunt igitur ejusmodi calida tantum in febribus iis quas humores

mores frigidi procreant, aut in tertiana notha, in quâ humoris pituitosi cum bilioso magna adest copia, aut quando obstructions sunt maximæ & contumaces, viscera valde imbecillia, & labefactata, sed non ante humoris coctionem, sic præscribit *Galenus* ad quartanam medicamentum ex succo cyrenaico, sed tantum post humoris coctionem. Sic absinthium in febre tertiana commendat, sed ante coctionem improbat. Pariter eadem ratione rejiciendæ sunt ejusmodi aquæ calidæ, sed post coctionem humoris morbifici in malo contumaci utiles esse possunt. Propterea non sunt temerè ejusmodi calida in febribus exhibenda, nam qui temere illis usus erat in febre quartana, ex simplici duplicem fecit, ut prius diximus. Verendum pariter ne ex hujusmodi aquarum usu idem contingat. Ideo adhibeatur semper in consilium Medicus prudens, doctus & fidelis, qui tempora omnibus remediis destinet. Nec temere confidat populus suis, ut vocant, receptis: sunt enim & manus Dei, quando à perito Medico administrantur, & quasi gladius in manu furiosi, quando iis utitur qui Medicinam probè non novit.

## CAP. XL.

*Iulepos, aliosque refrigerantes potus in febribus magna dosi esse exhibendos.*

**O**bservavi sæpe quando apozemata, Iulepos, aliosve potus refrigerantes Medici febricitantibus præscribunt, solere ab adstantibus exigua tantum dosi exhiberi, ad duo triave cochlearia. Sed hic notandum est ejusmodi remedia, quæ ad humores præparandos exhibentur non esse de natura eorum quæ in minima dosi vires possident maximas, sed contrà cum agant quali-

tatibus primis, & secundis, nisi in quantitate proportio adfuerit inter humorem alterandum, & medicamentum, frustra illud præscribi, siquidem si non superant humorem, ab ipso superantur, & corrumpuntur. In febre ardentissima si prædicti julepi aut denegentur, aut parcius exhibeantur, corpus à calore febrili exsiccatur, & arescit, unde non parum damni ægrotantibus imminet. Talibus ergo laborantibus copiosius & sæpius præberi debent, ad calorem febrilem temperandum, naturam recreandam, eoque audacius si coctio præcessit, naturales enim vacationes críticas per sudorem, alvum vomitumque adjuvat, unde etiam *Galenus* in hoc casu aquam frigidam præbet usque ad satietatem, quantum scilicet ægro bibere libuerit; *Avicenna* verò donec æger fiat viridis, & rigeat. In principio tamen paroxysmorum in febribus intermittentibus, nihil sumendum censent post *Hippocratem* Medici præstantissimi, nam *Hippoc. l. 1. acut. Cum frigidi pedes fuerint, à sorbitione exhibenda, tum maxime à potu abstinendum, sed cum calor ad pedes descenderit, tum dare convenit*, tunc enim calor qui in principio ab humore morbifico quasi suffocatus erat, habet *ἐκλαμψιν* & in universum corpus diffunditur, frigidique potus occursum commodius ferre potest, imò tunc potus vacationem per sudorem in fine paroxysmi fieri solitam promover. *Hollerius lib. 2. cap. de siti* paucis verbis totum id explicat. *Non permittendum est, inquit, ut diutius sitiant, maxime in febribus, atque ubi siccitas est. Quin & in declinatione cogendi sunt ut bibant in accessionis principio & augmento potus prohibendus, ne veluti in fornacibus fabrorum suffusa aqua, aut alio liquore febrilis calor vehementius incendatur. In vigore collutionibus utendum & gargarismis, qui ubi inclinat, & vehementer sitiunt, largiter ac confertim bibendum, quantum videlicet haurire possint. sic enim fit ut subito motu & contrarietate potus excitatus calor foras dissipetur. Rectè quoque scribit *Mercurialis comm. ad aphor. 9.**

*aphor. 9. lib. 2.* Plerique putant sat esse si syrupi vocati ad summum sex unciarum pondere sumantur, verum ipse & ratione & experientia didici, præstare semper si & syrupi in majori mensura capiantur, pro capiti tamen, & proprietate agri, & in ipsorum usu diutius pergatur. Sic enim vasa humidiora reddita, attractione humorum melius obsequuntur, & ipsimet humores magis præparati facilius exeunt. Scio quidem Aristotelem 1. Problem. 57. quærere, cur febricitantibus potio paulatim, & sæpe danda sit, Quia inquit, potio exigua & sæpe data illabitur, & sese magis insinuat, quàm larga confertim irruens. Verùm vult hoc loco Philosophus frequentiam potus magnæ illius copiam semel datæ respondere, aliàs Hippocrates aquam parcè potam bilescere scribit, & libro de locis in homine, In febribus inquit exhibenda calida, aqua mulsa, & acetum cum aqua, eaque quamplurima propinanda. Sed præterea Julii, de quibus agimus, non sunt simplex potus, sed etiam medicam vim habent, aperientem, roborantem, aliamve, pro Medici præscribentis varia intentione. Tantum igitur propinandum, quantum ad coctionem & sitim extinguendam conferre potest, non tamen ad morborum causas augendas, quâ in re maximè errant illi, qui vel pariori potu ægrotantes eneeant, quod Galenus variis in locis in *libris Epidem.* in Medicis sui temporis improbat, aut nimia humiditate corpus gravant, humoresque accumulunt. Scribit Galenus 1. *acutor.* 43. si aqua ad sitim sedandam exhibeatur, tantum ejus sumendum, quantum unica inspiratione æger haurire potest, si ad extinguendum calorem, ad ægrotantis satietatem, ut etiam ait 9. *methodi* 8. idque confertim, ut plenius docet Amatus Lusitanus, curat. 11. *centur. prima.* Sic Gal. 10. *meth.* Iuveni ex irâ febricitanti, sub caniculæ fervoribus, henninas duas aquas in prima accessione dedit.

## CAP. XLI.

*Calculus Vesicæ remediis ore sumptis non  
posse dissolvi.*

**I**llud etiam indicandum est illis quos gravissimus ille affectus vesicæ calculus torquet, ne quamplurimis qui multa pollicentur facile credant. Scio enim non tantum circulatores, sed etiam Medicos quosdam ad calculum vesicæ frangendum remedia non pauca præscribere. Et sanè *Monardes*, *Augenius*, alique calculum vesicæ sanatum referunt; *Augenius* quidem remedium ex præparatis millepedibus commendat, quo se sanatum peculiari tractatu refert *Laurembergius*. Alii tamen qui ejusdem periculum fecere, nihil opis perceperunt. *Quercetanus* quoque in Pharmacopœa sua restituta aquam describit ad calculum in vesica etiam sine dolore frangendum; Sed polliceri solent ejusmodi chymici plura quam præstare possunt. Nam si difficile admodum renum lapis comminuitur, multò difficilius vesicæ calculus, cum remotior sit, & renali durior, tum periculum adest ne validiora ejusmodi remedia partes alias lædant per quas transeunt; Quin etiam si confringi posse lapidem remediorum usu concederemus, nisi ita comminuat ut in pulverem ferme abeat, aut in ea frustula quæ commodè excerni possint, nihil aliud consequemur, nisi quod ex uno lapide plures eosque angulares remedia fecerunt, vesicæ cruciatum majorem inferentes, quique etiam forsitan paulatim additione mucosæ materiæ augebuntur. *Galenus* capite de *Lapide Judaico* ridet *Dioscoridem*, qui ad calculum vesicæ hunc lapidem commendat. *Medicamentum*, inquit, integrum viribus ad vesicam pervenire non potest, atque ut concedamus pervenire posse, infringitur vis medicamenti tum amplitudine vesicæ, tum urina qua natat, tum calculi duritie, tum involucri & pituita multa

*ta multa qua circumvolvitur.* Hippocrates ipse in juramento quamvis aliàs chirurgiam exerceret, *Non secabo, inquit, calculosos, sed illius artis operariis relinquam.* Non habebat enim remedium quo frangi calculus posset. Non est igitur credendum iis qui remedia ad id præscribunt. Refert Duretus in Hollerium se yidisse ejusmodi remediis exulceratam vesicam, & mortem sequutam, nequaquam detricto calculo. Quidam ut idem narrat, veritus sectionis crudelitatem, quorundam consilio bibit succum limonum per menses tres, interiit aphtis ab eo succo in ventriculo excitatis. Necesse est enim acria medicamenta partes per quas transeunt, vi ea qua pollent afficere, & exulcerare. Refert Sanctorius commentariis in artem parvâ Galeni, quendam Medicum Italum, dum ad frangendum vesicæ calculum uteretur electuario de vitro, loco comminutionis calculi, lethalem induxisse dysenteriam. Narrat quoque alium quendam qui valentissimis diureticis usus erat ex consilio cujusdam circulatoris, quæ cum pituitam plurimam abstergendo vacuassent, ægerque melius habere videretur, calculus tamen factus asperior, cepit vesicam acrius pungere, & facto ulcere eoque gangrænofo, sicut secto cadavere apparuit, miserrimè periit ægrotans. Capi vaccius quoque fatetur se nescire quænam medicamenta calculum vesicæ frangant. Et Galenus in arte parva cap. 94. textu 3. solam sectionem inter remedia calculi vesicæ recenset, ubi rectè advertit Argenterius, hinc refelli eorum opinionem, qui calculum medicamentis ore assumptis curari posse credunt.



## CAP. XLII.

*Lumbricos in febribus non esse statim occidendos.*

**L**umbricis tum pueros, tum adultos gravissimè interdum laborare contingit, & varia in corpore excitare symptomata, inter quæ non spernenda febris est, quæ duplicis est naturæ: vel enim fit ab ipsis vermibus, estque lenta, nec admodum valida, vel fit ab aliis causis, & cum vermibus conjungitur, soletque sæpe esse maligna, quæ ab Hippocrate interdum creditur fuisse dicta *Ἰνερσιδης*. In curatione horum vermium sæpe errat populus; Primo quod credunt quando cum febre adsunt lumbrici, febrem illam semper esse à lumbricis, cum potius sæpe lumbrici à materia febrili proficiuntur. Nam ut docet *Aetius cap. 39. lib. 1. tetra. 3. circa morbi principia geniti, substantiã ex subjecta recipiunt corruptione, circa vigorem ex morbi malitia, circa declinationem ex transmutatione ad melius, qui & celeriter excernuntur*. In principio igitur acutorum morborum excreti morbi malignitatem indicant; lumbrici enim quando febris causa sunt, nunquam ea valida & acuta est, sed sapissimè in febre maligna apparent, quod est notandum. nam in priori casu curatio lumbricorum est curatio febris, in hoc verò posteriori, curata febre lumbrici à natura excerni solent eunte ad judicationem morbo, quod scribit *Hippocrates* variis in locis, ut in *Prognosticis & libro de crasibus*. Secundo errant quod in hoc casu tantum lumbricos considerant, statimque ad illos curationem dirigunt, morbumque à quo pendent, negligunt, aut remediis importunè adhibitis deteriorem reddunt, nam quæ lumbricos necant, febrem sæpe augent. Cum igitur lumbrici, quia toto genere sunt præter naturam, enecandi sint, & expellendi, id quibuslibet remediis fieri non debet, sed natura morbi cum illis conjuncta spectanda

spe&anda est , cui remedia potissimùm adhibenda, eo enim curato à natura sub declinationem sponte deiciuntur. Vnde quia in febribus malignis sunt satis familiares , quæ curant febres malignas illis etiam profunt , qualia sunt cardiaca plurima, cornu cervi, unicornu, corallum, theriaca, mithridat. semen citri, &c. & fermè nulla sunt cardiaca quæ vermibus non adversentur, quamvis non semper; unde sæpe videmus plurima ejusmodi remedia quæ adversus lumbricos utilia dicuntur, nihil tamen prodesse, quia scilicet empiricorum more solent adhiberi , absque causarum distinctione , & animadversione reliquarum circumstantiarum quæ spectari debent. Audiamus Rondeletium egregiè hac de re differentem, cap de vermibus. *Quando autem vermes rejiciuntur in morbu acutu, ut in febribus ardentissimis, & aliis morbu senum & puerorum, non statim debemus nos ad illos totam nostram intentionem convertere, ut muliercula faciant, & Medici mulieribus inservientes, quod facit ut agri intereant neglecto morbo, aut cum magis ad vermes curationem convertunt quam ad morbum, ut si febris continua, aut alius morbus biliosus, aut fluxus ventris aliquem occupat, aut in morbu acutu in principio vermes rejecerit, semen contra dare solent, quod febrem magis accendit, vel corallum, & alia qua adstringunt ad vermes occidendos opportuna solent administrare, qua omnia affectibus præcipuis adversantur, ut multum amara febri & fluxui ventris, adstringentia, & siccantia febribus. Quare oportet Medicum diligenter distinguere num febris à vermibus dependeat, vel utrum vermes rejiciantur ob aliam causam qui semper continentur in ventre; Quod si cognoverimus febrem aliunde fieri, quia quartana, vel tertiana vel vera quotidiana est, nullumque quod urgeat symptoma ostendit, negligendi sunt, vel ea tantum medicamenta præscribenda, qua affectui præcipuo & vermibus conveniunt. Quæ fusiùs descripsimus, quia totam hanc rem probè explicant. Idem etiam animadvertunt Forestus in*  
obser

208 DE VULGI ERRORIBUS  
observat, & Mercatus capite de lumbricis aliis-  
que.

CAP. XLIII.

*Ad adstringenda mulierum profluvia male  
cinnamomum præscribi.*

**M**ulieres sæpe contingit aut lochiorum, aut  
mensium, aut aliorum humorum immo-  
derato profluvio vexari, ad cujus curatio-  
nem sæpe vidi ab aliis mulierculis usum cinna-  
momi tanquam valde adstringentis remedii præ-  
scribi solere. In diarrhœâ quidem & alvi fluxibus  
interdum prodesse posse non dubito, roborat e-  
nim ventriculum & viscera, quorum imbecillitas  
sæpe alvi fluxus causa est, sed tamen ad menses  
sistendos, adhibere nefas est, solet enim potius  
eos validius promovere. Est enim aroma calidum  
siccum, aperientis virtutis, ideoque mensibus ci-  
endis aptissimum, idque scribit *Dioscorides cap. de  
Cassia*, quæ judicio Matthioli, & Dodonæi est no-  
strum cinnamomum, canella à Gallis vocatum;  
vim, inquit, obtinet calefaciendi, urinam ciendi,  
siccandi, & leviter adstringendi, menses trahit, &  
postea addit eosdem effectus facere cum cinna-  
momo, de quo capite sequenti ita scribit. Cinna-  
momum omne excalescit, concoquit, emollit, u-  
rinam ciet, tam menses quàm partus potum aut  
ex myrrha impositum pellit. Si hæc ita se habent,  
in maximo errore versari illos necesse est qui cin-  
namomum ad muliebres fluxus adstringendos  
præscribunt. Sed hæc res non est magni momenti.

Idem dicendum est de quibusdam sciolis qui  
medicinam faciunt, & remediorum vires igno-  
rant, meliores se lacesunt, nec doctiores fieri cu-  
rant. Quidam sunt adeo periti, ut credant syrupum  
de artemesia esse tantum mulieribus dicatum, sy-  
rupum de stœchade cephalicum tantum medica-  
mentum, Philonium tantum ad somnum concil-  
lian-

liandum præscribi debere, variaque ejusmodi interdum occurrunt quæ ipsi ignorant; Attamen si quis simplicia ex quibus prædicta componuntur exactè consideret, ad alia quamplurima non minus utilia censerì debent. in syrupo verbi gratia de artemisia multa sunt simplicia ad varios affectus utilissima. Ipsa artemisia non solum menses & partum movet, sed etiam calefacit, exsiccat, obstructions aperit, renum calculis prodest. Externuat, inquit Rondeletius, & calefacit pituitam, partesque nervosas, uterumque exsiccat, cathartici antiquis prodest, & idem præstat quod syrupus de prasio pollicetur. Idem dicendum de syrupo de stœchade qui ad plurimos viscerum affectus conducit, sicut & Philonis antidotus, quam Philo & Mesues ad varios frigidos affectus utilem esse dicunt. Et sic de aliis quamplurimis.

## CAP. XLIV.

*Opium rectè præparatum non esse reformidandum.*

**C**VM somnus sit viscerum robur, & ad vires reparandas, humorumque coctiones promovendas, nihil suavius, & efficacius somno deprehendatur, sanè in ægris quamplurimis, qui insomnes noctes plurimas degunt, omni arte eum provocare utile est & necessarium. id autem sæpissimè non adeo facile est: sunt enim interdum adeo graves morborum causæ, ut somnifero etiam graviori corpus consopiri non sinant. Ad eum autem provocandum varia adhibentur remedium genera, interna & externa. Interna quidem varia præscribuntur, sæpissimè admodum inefficacia, ut lac amygdalinum, semen papaveris, quod in pluribus locis ab incolis editur, ejusque oleum defectu olei olivarum usurpatur ad obsonia. Sed in usum cæteris irritis venit opium. Illud populus exhorrescit, & quasi præsentaneum venenum

venenum rejicit, cum tamen rectè præparatum, & conveniente dosi exhibitum innoxium sit, & salutare medicamentum. Venenum quidem esse veteres scriptis tradiderunt, sed tantum quando nimia quantitate assumitur. At sic nihil est adeo salutare quod pravo usu noxium non evadat, nihil adeo noxium, quod non fieri possit salutare. Venenorum autem varia sunt genera, quædam tota sua substantia venena sunt, quæ quocunque demum modo assumantur, nullam corpori utilitatem præstare possunt, quamvis tam exigua dosi præberi etiam possint, ut non interimant, ut arsenicum; Aliorum verò contra hæc est natura, ut non nisi certa quantitate noceant, aliàs prodesse possunt, qualia sunt fermè omnia medicamenta, præsertim purgantia. Quæcunque enim eâ quantitate exhibentur, ut naturam superent, venenorum naturam induunt, sic lac in ventriculo concretum, succus lactucæ, venena esse creduntur, quæ tamen prodesse possunt humano corpori, si mediocris illorum sit usus. Quin etiam napello & cicuta nutritas fuisse puellas quasdam historiis proditum est. Sed præterea notandum est inter ea quæ somnifera dicuntur, opium esse innocentissimum, variis de causis. *Primo* opium illud, quod habemus, ut plurimum meconium Dioscoridis, quod fit ex succo foliorum & capitum papaveris expresso, opium verò est lacryma. Est autem meconium opio longè inefficacius ex Dioscoride, estque eadem sententia Matthioli in Epist. Vnde ut noceat majore dosi quam opium exhiberi debet. Scribit autem Dioscorides opium sumptum ervi magnitudine dolorem finire, concoquere, somnum allicere; sed si copiosius fumatur, nocere: Scribitque quendam Mnesidemum solum illius usum in olfactu probare, quoniam ad conciliandum somnum conveniret, alioqui ut noxium prohibuisse, sed addit Dioscorides, *Quæ commentitia esse experimento deprehenduntur, si quidem effectus virium hujusce medi-*

*medicamenti fidem faciunt.* Secundo notandum ex Galeno narcoticorum varia esse genera, quædam enim humectant, alia siccant, quæ humida sunt ut cicutæ, mandragoræ noxia sunt, sicut & quæ tota substantia nobis infesta sunt, ut solanum somniferum, quæ in usum adhiberi nunquam solent à Medicis ad somnum conciliandum. Sed quæ innoxie intus sumuntur siccandi potestatem debent habere, id docet *Galenus* 5. *Simplie.* 18. ubi scribit hypnotica refrigerare corpus, & ad id aptissima esse quæ desiccant. Et primo de symptomatum causis scribit ea quæ refrigerant & humectant, non somnum, sed comam, stuporem & caron facere. Quæ verò exsiccant ut opium, minus noxia esse. Igitur ex sententia Dioscoridis & Galeni non est adeo formidandum opium moderatè sumptum. Plurima quoque medicamenta in officinis servata opium recipiunt, ut theriaca, mithridatium, diascordium, philonium, veteresque Medici omnibus ferme antidotis illud admiscere solebant, ipsoque admodum familiariter utebantur in variis morbis, imò etiam interdum pejora usurpabant. *Hippocrates* 2. *de morbis* utitur hyosciamo & mandragoræ ad febrem quartanam. *Aetius* ad eandem præscribit opium cum myrrhæ, piperis & castorei æquis partibus. Nos autem hoc tempore securius utimur opio rectius præparato & correcto per extractiones chymicas, ut laudano, cujus grana duo triave, & ad summum quatuor sufficiunt, ubi tamen non adest opii, illiusque rectè præparati granum unum. Cum igitur nostrum opium sit ut plurimum meconium Dioscoridis, quod opio longè ignavius est, & propterea majori quantitate præscribi possit, dosis illa grani unius vel alterius nocere nequit. Dioscorides opium ad ervi magnitudinem præscribit. At nos pilulam Laudani damus ervi magnitudine, cujus tertia pars non est meconium. Rationem sanè non video cur adeo sit formidabile opium, modo rite præparetur, & cætera omnia

curiosè attendantur, quæ in narcoticorum exhibitione *Galenus* observari vult. alias haud dubiè nocere potest. Hic obiter notandum est varias esse descriptiones istius laudani, plurimas valde ineptas; In quodam laudano opium lento ignis calore exsiccat; In alio præter opium alia insunt narcotica, ut hyoscyamus, & similia opio periculosiora. In alio adduntur plurima correctiva dicta, ut salia perlarum, corallorum, tinctura auri, & plurima ejusmodi inutilia, quæ pretium remedio, non autem vires addunt. Vt in laudani operosâ descriptione quam *Quercetan. sine judicio* scriptis tradidit. Laudanum autem illud, de quo loquutus sum, præparatum intelligo secundum Pharmacopœæ Londinensis descriptionem, quæ & minùs operosa est & optima.

## CAP. XLV.

*De somniferis capiti applicatis.*

**Q**ui opium reformidant, satis esse putat, si ad somnum conciliandum externis utantur remediis capiti & naribus admotis, ut frontalibus, & unguentis. *Mnesidemus apud Dioscoridem*, ut supra diximus, opium tantùm probabat olfaciendum, non sumendum. Sed hic monendum ejusmodi externa remedia non semper optatum effectum consequi, quia vires suas ad cerebrum vix transmittere possunt frõti admota. *Primò* quia sæpius ut oportet non renovantur, unde in fronte incalescunt, sic postea caput magis calefaciunt, & somnos potius prohibent quàm alliciunt, unde rectè monet *Galen.* in libris methodi variis in locis, ut ejusmodi refrigerantia topica sæpius renoventur, ne ubi semel à corpore incaluerint, illud iterum magis calefaciant. *Secundò* quoniam os frontis solidum est, densum, & à cerebro ipsiusque ventriculis longius semotum quàm reliqua capitis ossa, unde difficiliùs topicorum vires per ejus-

ejusmodi os ad cerebrum permeant, unde *Galenus* rectius topica non ossi frontis, sed futura coronali quæ capillo tegitur applicare jubet, siue refrigerandum sit, siue calefaciendum, quia ossa syncipitis rariora sunt, laxiorque est illorum compages, & synarthrosis, *ex lib. 2. de Medic. secundum locos.*

## CAP. XLVI.

*Fomentationes factas per vesicas esse minus efficaces.*

**I**Nter topica remedia apud Medicos satis celebris est usus fomentationum, quæ fiunt ex liquore quodam partibus applicato ad varias intentiones, ad partes calefaciendas, obstructions solvendas, dura emollienda, dolores sedandos, humores digerendos & discutiendos. Fiunt autem ex liquore idoneo, præsertim ex decocto multorum simplicium, aut ex oleo, lacte, & similibus; Quos liquores plurimi vesica includunt, ne lintamina, & syndones lecti humectentur, quod postea ægris admodum tædiosum est. At sic inutilis redditur prædictus apparatus, variorum scilicet simplicium permixtio, & decoctio; Virtus enim illorum per vesicam in corpus non subit, sed solus calor operatur, unde si pars quæpiam solummodo calefacienda sit, potest ejusmodi fons fieri ex vesica quicumque demum liquor includatur. Sicut & si demulcendus sit dolor, humoresque digerendi, calor enim virtute sua hæc operatur, sed si obstructions sint solvendæ, aut aliquid in corpore molliendum, vesica minus est utilis, sed vel linteis, vel filtris, vel pannis laneis, vel spongiis liquore idoneo imbutis utendum, sic remedii vis parti applicata per cutis poros in corpus altius sese insinuat, illicque vires suas expromit, interdumque humores ex alto ad superficiem allicit, sicut qui Balneo tepido lavantur, sentiunt etiam in partibus internis illius effectum. Quamquam igitur  
vesica-



214 DE VULGI ERRORIBUS  
vesicarum applicationem ad fotum corporis non  
improbem, minùs utilem tamen ob causas præ-  
dictas esse crediderim.

CAP. XLVII.

*De applicatione Catulorum & Columba-  
rum plantis pedum.*

**N**on solum populus sed etiam Medicorum  
quamplurimi columbas juniores, catulos-  
ve per medium dissectos pedibus applicare  
consueverunt, quem morem hoc loco non impro-  
bo, scio enim cum maxima ægrotantium utilita-  
te sæpe id factum fuisse. Sed quoniam paucissimi  
capiti applicari solent, hac de re hoc capite age-  
mus. Veteres enim atque etiam recentiores sæpius  
capiti applicare jubent, rarò aut nunquam pedi-  
bus. Solet hujusmodi remedium in cerebri mor-  
bis, phrenitide & delirio usurpari. Est autem phre-  
nitis inflammatio Cerebri vel membranarum e-  
jus, cujus hæc est omnium Medicorum consensu  
curandi ratio, ut in principio omni revulsio-  
num genere Medicus utatur, & capiti ipsi repellentia  
admoveat ut humores fervidi à capite retroce-  
dant. Verum si his artibus prohiberi morbus non  
potest; In augmento & statu morbi ad resollen-  
tia veniendum, quæ in augmento repellentibus  
primum admisceantur, sed in statu morbi mera  
sint resolventia. Cui indicationi ut satisfiat Gale-  
nus 13. *methodi cap 2.* utitur spondylis, thymo, ser-  
pillo, & aliis ejusmodi calidis in oleo decoctis,  
docetque phrenitidem in statu, & lethargum ean-  
dem habere curandi rationem, quoniam in utro-  
que affectu iisdem resolventibus remediis est u-  
tendum, ubi etiam sinapi, & castoreum, quæ ad-  
modum calida sunt, probat. Et ejusmodi calida in  
statu & declinatione non calefaciunt, sed resol-  
vunt. Est enim hæc omnis inflammationis recta  
curandi ratio, ut in statu & declinatione digeren-  
tibus

tibus & discutientibus utamur, nam ut docet *Gal. 1. Simplic. cap. 4. Refrigerant digerentia ex accidente inflammationem.* Vnde *1. ad Glauconem cap. 15.* in dolore capitis in febribus, & *2. de Medic. 2. locos,* ejusmodi digerentibus utitur, post universales scilicet vacuationes. Recentiores autem pullos columbinos, & catulos dissectos, & pulmones Arietis recentem calentis usurpant, quæ remedia etsi veteres ignorârunt, idem tamen indicatione aliis simili virtute respondentibus medicamentis satisfaciebant. Iam verò quando catuli, aut columbæ plantis pedum applicantur, id fit vel ad revulsionem, vel ad resolutionem materiæ morbificæ. Non quidem ad revulsionem, quia vix unquam iis utitur populus præterquam in statu, aut declinatione morbi: revulsio autem in principio fieri debet, tum quia horum calor blandus est admodum, nec satis potenter ad sese attrahit, nam quæ revulsionem ad distantissimas partes faciunt, debent esse calidissima, & ferventissima, ideo *Galenus lib. de revulsione* docet acria esse debere, quæ succos ad caput & viscera vergentes revellunt. *Oribasius 8. collect. cap. 19.* idem dicit. Nam attrahunt calore & dolore. Pulli autem columbini resolvunt absque magno calore, quapropter etsi attrahere credam, id tamen leviter tantum, & non à longinquis partibus, ob blandum calorem. Nec faciunt etiam ad resolutionem, nam topica quæ id præstare debent, parti affectæ sunt applicanda. quis enim credet ad humores cerebro impactos resolvendos pedibus applicanda esse remedia. Et hæc est sententia omnium authorum ad unum, qui de morbis capitis scripserunt. Non tamen improbo hanc applicationem plantis pedum, quia juvare aliquantulum potest, nocere autem non potest. Familiare est apud Monspelienses, ejusmodi pullos columbinos per medium discissos, cum pulveribus cardiacis cordi epithematis instar admoveere, ad robur cordi conciliandum, &

vires

216 DE VULGI ERRORIBUS  
vires recreandas, quia calorem habent blandum,  
& nostro calori familiarem & amicum.

CAP. XLVIII.

*De unguentis Armariis.*

**Q**Voniam à quibusdam magno est in pretio  
unguentum dictum *Armarium*, *sympathium*,  
*magneticum*, *stellatum*, quod non parti affe-  
ctæ, sed telo vulneranti admotum vulnere cu-  
rationem perficere creditur, de eo paucis age-  
mus, quoniam non pauci nunc eo-uti incipiunt.  
Fuit hoc inventum quorundam Germanorum,  
maximè Theophrasti Paracelsi, quem sequuti sunt  
Goclenius quidam, Crollius quoque qui diversam  
à Paracelsica hujus unguenti descriptionem attu-  
lit, aliq; quorum pars Paracelsi, pars altera Crol-  
lii descriptiones sequuntur. Volunt autem qui-  
dam hoc esse Dei-donum quam maximum, ut  
tanta cum facilitate vulnera curentur, estque tan-  
tùm artis chyrurgicæ compendium, ut deinceps  
chirurgica ars negligi debeat, cum unico remedio  
vulnera & ulcera curari possunt. Sed tamen con-  
querendum videtur de natura, quæ tam elegans  
remedium hætenus occultum esse voluit, & igno-  
tum Adamo, Patriarchis sanctis viris, Iudæis, pri-  
mis Christianis, & viris doctissimis. Sed revelave-  
rit ebriosis, temulentis, scortatoribus, aleatoribus,  
Magis, qualem fuisse istum *Paracelsum* fama est,  
ipsius popularibus ita scribentibus, & confitenti-  
bus. Reliqui meo judicio tam obscure sese expli-  
cant, ut quid voluerint ipsos nescivisse admodum  
verisimile sit, nec movere quenquam debet, quod  
*Goclenius* scribit se nominare posse Imperatores,  
Reges, Principes, qui huic unguento testimonium  
perhibeant: nam forsitan fucum fecerunt hujus-  
modi Principibus quidam nebulones, quod non  
est impossibile, sed ipsum *Goclenium* ignotum fuisse  
Regibus, & Imperatoribus certissimè credo. Sed  
his

missis primò notandum componi istud unguentum ex musco (quem usneam vocant) in cranio hominis efflorescente, quia hæc est quædam cranii quasi essentia quinta purior, magisque spirituosâ substantia, ut quidam reliquis doctior sibi persuasit. Violentâ morte peremptum hominem elegit *Crollius*: quem suspensum præfert ipsius commentator *Hartmannus*; Quia cum strangulantur spiritus naturales & vitales sursum feruntur, & cum ob cranii duritiem exire non possint, simul cum animalibus coercentur, & temporis progressu in unum coalescunt, & foras ad cranii circumferentiam erumpunt, deinde accedente mercurio seu spiritu Mundi, per pluvias, rorem, nivem, pruinas, tanquam vehicula in hac inferiora effuso, fit usnea, quæ in se continet omnes virtutes naturales, vitales, animales, quas postea unguento communicat. Quis non admiretur in *Hartmanno* tam supinam naturalis Philosophiæ ignorationem? Male siquidem scripsit in strangulatis spiritus naturales & vitales sursum ferri, cum tamen suspensi patiantur interceptiones vasorum, venarum scilicet & arteriarum, per quas spiritus hi sursum feruntur, ut omnes norunt. Quin etiam, quamvis copiosius quam alias tunc ad cerebrum ferrentur, cur potius in suspenso, quàm in vivo animali coercerentur, in quo tam facilis sit spirituum jactura, sed quomodo antequam cranium muscum hunc sive situm contrahat, non dissipantur & pereunt? Sed unde novit spiritus hos in strangulatis ad cerebrum delatos in cranio potius quàm in cerebri substantia contineri? Nam in vivo animali ut plurimum sunt in ipso cerebro; Spiritus hi vel sunt influentes, vel insiti. Si sunt influentes tantum, certissimum est levi occasione omnes post mortem dissipari, quia non sunt partes corporis, nec à viribus corporis viventis quæ perierunt, retinentur; Hinc perpetuo in vivente nova spirituum reparatio necessaria est, quia absumentur copiosi. Multò magis quando cadaver corrumpitur, per annos forsitan aliquot,

antequam cranium omnino denudetur, & ad lig-  
 tum contrahendum aptum sit. Non esse insiros  
 patet, quia insiti sunt immobiles, at hi spiritus in  
 ipso suffocationis actu celeriter ad cerebrum fe-  
 runtur. Nec credendum est post mortem, aut mo-  
 riente animali fieri insiros (quod videtur intelle-  
 xisse Hartmannus, cum dicit temporis progressu  
 in unum coalescere) nam ex influentibus sunt  
 aut reparantur insiti, per nutritionis actionem,  
 quæ non est in strangulatis, quæ etiamsi foret, po-  
 tius fieret in cerebro, quàm in cranio. Præterea  
 spirituum substantia admodum tenuis est, & dis-  
 sipabilis, quomodo igitur, quando ad cranii cir-  
 cumferentiam erumpunt, nec ipsius duritie am-  
 plius concluduntur, non evanescunt in auras, sed  
 in crassissimum putidumq; muscum concresecunt?  
 Id spirituosam ipsorum substantiam non patitur. Un-  
 de temere ipsum addidisse patet, hanc usneam  
 continere omnes corporis virtutes, mirum quo-  
 que si non nutriatur, sentiat, ac ratiocinetur. Mitto  
 quod de spiritu Mundi blaterat, quem Mercurium  
 Mundi vocat. At si datur ejusmodi Mundi spiri-  
 tus, per universum Mundum diffusum illum esse  
 necesse est, non autem per pluviarum, nivium,  
 imbrium incertas vicissitudines ad nos influere.  
 His absurdis basis istius medicamenti concutitur.  
 Sed fermè exciderat, quod istius usneæ, basis scili-  
 cet tam salutaris remedii, Crollius tantum dua-  
 rum avellanarum pondus, hoc est, interprete *Hart-*  
*manno*, drachmam unam, unguento suo admiscet,  
 sed Paracelsus uncias duas necessarias judicavit,  
 quamvis Paracelsi descriptio sit tantum unciarum  
 novem; Crolliana verò sit unciarum tredecim,  
 tanta moles tam exiguæ basi innititur. *Secundo* no-  
 tandum, præterea in unguento secundum *Para-*  
*celsi* descriptionem adesse sanguinem & adipem  
 humanum, sed Crollius hæc omisit & rectè, si sola  
 usnea omnes vires possidet, quod non tamen cre-  
 didisse videtur *Paracelsus*, qui hæc addidit, sed  
 horum

horum loco imponit adipem verris, apri, & urfi. Cur autem sanguinem addiderit Paracelsus, rationem reddit *Hartmannus* ipse, quia etsi spiritus volatiles evanescant, illi tamen qui sali sanguinis fixo inhaerent, retinentur. At antea spiritus hos volatiles ad cranium delatos expetebat. Sed revera ipse *Crollius* inutiles esse putavit. Præterea *Paracelsus* & *Crollius* mumiam addunt, per quam author meus *Hartmannus* Ægyptiacam intelligendam censet. Quæ tamen ineptissimum esse medicamentum, cum ab impostoribus fiat in Ægypto ex elephantiorum, lue venerea, aliisque pessimis morbis laborantium, & fervorum quos emunt carne condita cum pice & asphalto. At *Paracelsus* sapissimè magni facit mumiam quam vocat patibuli, id est hominis suspensi carnem, quam *Crollius* intellexisse probabile est, quia pinguedinem hominis & sanguinem omisit, quæ tamen *Paracelsus* habet. Demum alia adduntur simplicia, qualia reliquis possunt inseri unguentis & emplastris, nam *Paracelsus* adjecit oleum lini, rosarum, bolum armenum, *Crollius* verò lumbricos lotos, cerebrum apri, santalum rubrum, hamatitem. Hic considerare debet lector, hæc revera esse duo unguentorum genera omnino discrepantia, nihilque habere commune præter usneam, quam tamen *Crollius* exigua admodum quantitate addidit, & tamen duo hæc unguenta idem præstare dicuntur, quamvis *Crollius* ea omiserit, à quibus *Paracelsi* totam vim magneticam repetere solent. Imò alii etiam ipsam usneam omiserunt. Tertiò quidam in unguenti compositione observant syderum aspectus, variosque concursus. Usneam abradit *Crollius* Luna crescente, & in domo Veneris aut alia bona domo existente, non autem Martis & Saturni, vultque unguentum parari, quando Sol est in Libra. Alii verò rectius hæc negligunt: Si enim virtus unguenti magnetica est, id est eadem vi curat vulnera, quæ magnes trahit ferrum, siderum con-

curfus opus non est, cum insit à natura, sicut magnes quolibet tempore, & sub quolibet sydere ferrum trahit, & polum spectat. *Quarto* quidam telum inungunt, illudque postea accurate ligant, calidum servant à pulvere & vento intactum, alias inquit doloribus torquentur agri si refrigeratum, nec deligatum telum jaceat. Quidam tamen sola immersione teli in pixidem unguentariam, absque ulla deligatura curationem se perfecisse asserunt, quod *Paracelsus* tantummodo requirit. *Quinto* si telum quod vulneravit defuerit, vel lignum maxime salignum ex Crollio, aut festucam, aut aliud quippiam sanguine ex vulnere manante perfundunt, illique adhibent remedium. *Sexto* jubent ut quotidie vulnus aegrotantis urina lavetur. *Septimo* considerari vult *Crollius* an punctum vulnus sit factum, tunc enim ungi debet telum superius non inferius descendendo, quod tamen non curasse videtur *Paracelsus*, qui solam immersionem teli in unguentum commendavit. *Octavo* notandum est, omnia ferme curationum exempla quæ afferri solent, esse tantummodo vulnorum simplicium in carne, in quibus nulla est substantiæ deperditio, sed unica solum indicatio, scilicet unio. *Nono* hanc hujus effectus rationem quidam reddunt, spiritus scilicet esse in sanguine, & propter familiaritatem ac sympathiam spirituum humanorum inter sese fieri unguentum ex hominis sanguine, adipe, carne, & cranii musco, in quibus spiritus continentur. Hinc fieri ut quando vulnerati sanguis unguento admoveatur, propter sympathiam spiritus sanguini insiti, junguntur cum spiritibus unguenti ipsis homogeneis, sicque vires unguenti suscipiunt, ac vehunt ad ipsam vulneratum. Nec tantum unguenti vires, sed & affectiones quæ sequuntur unguentorum administrationem, quales sunt quæ ex deligatura aut arcta nimis, aut laxiori contingere possunt, tum eas quæ sequi possent si in loco frigido, aut nimium calido

aper.

apertum vulnus relinquatur. Estque tanta vis horum spirituum, ut ab oriente in occidentem, à meridie in Septentrionem vim unguenti deferre possint. *Crollius* verò fatuos vocat omnes qui curam hanc magicam esse putant, eamque fieri vult per vim magneticam, attractivam, à syderibus causatam, quæ mediante aëre vulnere conjungitur, idq; propter sympathiam naturæ, balsamum sanguinis, quod est in quolibet homine, & influentiam corporum cœlestium. Et sic explicat *Hartmannus*, cum telum inungitur, sal fixus sanguinis in telo attrahit vi magnetica spiritum animale ex unguento, qui duo spiritus interveniente spiritu Mundi, amicabili nexu & copula uniuntur. At si non potest spiritus qui est in sanguine teli, attrahere spiritum unguenti, absque inunctione, id est contactu corporeo, quomodo magnetica vi illum attrahere dicitur? Vult autem spiritum hunc Mundi esse per cuncta diffusum, omnium idealium seminum, & rationum vectorem, omnia complexu suo conciliare, activa passivis applicare. Hinc fit ut quicquid commodi vel incommodi spiritus ille extra venas coagulatus sentit, idem statim congeneri suo in venis residenti sympathicè communicat. Inde fit cur æger doleat si telum igni admoveatur aut aëri frigido exponatur; & vice versâ si æger capas, sinapi, aut allium comederit, id statim in telo observeretur, quia scilicet hi spiritus suas passiones sibi invicem communicant. Ex prædictis facillimum erit demonstrare vanitatem istius curationis, cujus me nullum unquam fecisse periculum, nec cupere, confiteor. Vanam tamen esse ex eorum principiis spero me demonstraturum. Nam fundamenti loco multa ponunt admodum dubia & incerta, ut quæ de spiritu Mundi fabulatur *Hartmannus*, quem adesse nullus hactenus potuit demonstrare, quem esse per omnia diffusum scribit, cum tamen paulò antea scripsisset cum per pluvias, rores, pruinas, tanquam



vehicula in hac inferiora effundi, & sic tempore admodum sereno abesse potest hic spiritus, quando forsitan ipsum adesse maximè oportebat. Et nã spiritalem & incorpoream substantiam intelligamus, *Mercurium Mundi* illum vocat, & sanè corporeus esse debet qui corporeo vehiculo indiget. Supponit quoque spiritus in sanguine etiam corrupto esse perpetuos, & inalterabiles, cum tamen sanguis etiam in ipso corpore & in venis, ita corrumpi possit ut formam suam amittat, multo magis extra venas, & haud dubiè qui in unguento sanguis est, formam suam omnino amisit, & spirituum suorum efficaciam, & sic analogia illa & sympathia spirituum vulnerati & unguenti, multum est labefactata. Quod autem magicam hanc curationem quidam vocant, non est improbabile, quandoquidem ejusmodi virtus sanandi, quæ in unguento esse dicitur, spiritu Mundi, id est Dæmone, qui princeps Mundi dicitur, vectore indiget. At ego potiùs falsam hanc curandi rationem esse crediderim, quàm magicam; quoniam plurimi eam sequuntur, qui ab ejusmodi scelesto crimine sunt valde alieni; Nec obstat experientiam veritatem hujusce curationis adstruere, nam tantum vulnera sanata sunt quæ sponte naturæ absq; ulla artis ope potuissent sanari, & proinde adhuc dubium esse potest, utrum virtute unguenti curatione perfecta fuerit, ut dicemus inferius.

Primò igitur falsum est, ejusmodi unguentum esse donum Dei magis peculiariter, quàm alia unguenta & remedia esse solent, cum ex illorum confessione tota hæc curatio fiat per agentia naturaliter operantia. Fatendum quidem est, omnia esse dona Dei, quæcunque edimus, bibimus, ad humani corporis sanitatem adhibemus. Verum hoc sensu illi non vocant unguentum istud donum Dei, sed *αἶμα θεοῦ*, quia Deus miraculosè illud homines docuit quasi omnis scientia & disciplina remediorumque cognitio non sit à Deo, qui

ui ex terra creavit Medicinam. Sed videamus  
 orro an curatio hæc sit possibilis. Magnas quidem  
 & varias esse rerum sympathias, & antipathias o-  
 lendit experientia, quarum rationes reddere est  
 impossibile. Verum omnes intra quandam acti-  
 vitatis sphaeram continentur, & terminantur. Vi-  
 demus quotidie magnetem non nisi intra certam  
 distantiam trahere ferrum. Quidam felium præ-  
 sentiam ferre non poterat, etiamsi eos minimè vi-  
 deret, expulsus è cubiculo felibus objectu parietis,  
 vel ostii redibat ad sese. Et sic de aliis omnibus.  
 Nulla efficacior sympathia est, quam quæ est in-  
 ter coelum & inferiora; quoniam omnia circum-  
 flexu suo continet, summaque agendi vi prædi-  
 tum qualitates virtutesque suas quoquoersum  
 diffundere potest, ita ut inferior hic orbis, & quæ-  
 libet illius particula, sit intra sphaeram activitatis  
 corporum coelestium. Videmus tamen elangue-  
 scere istam sympathiam distantia locorum. Ma-  
 gnes spectat polum arcticum, quo autem longius  
 à polo removeretur, ab eo magis declinat, ita ut  
 sensim non polos Mundi; sed Zodiaci spectet, &  
 forsitan aliam potius cœli partem, quam ipsum  
 Boream. Si id verum est de coelestibus, verius erit  
 de inferioribus. Quomodo ergo potest vis istius  
 unguenti interdum tam procul deferri, nec obje-  
 ctu adium, marium, montium, murorum, vento-  
 um, arcæ in quâ cum telo ipso sæpe concluditur,  
 interturbari, maximè cum devehentes spiritus  
 sint corporei, qui objectu aliorum corporum pos-  
 sunt impediri, aut saltem quo magis distat obje-  
 ctum, eo magis ipsius virtus imminuitur, verè-  
 dum summa cum ratione in longiore locorum  
 intervallo, unguenti vires penitus evanescent.  
 Scribit *Hartmannus* fieri communicationem hanc  
 per vim magneticam, eodem modo quo cadave-  
 ris odor vulturibus communicatur per multa mil-  
 liaria. Attamen odores in quolibet spatio non  
 diffunduntur, & variarum rerum præsentia possunt

interturbari, ut à ventis, pluviis, aliisque ejusmodi rebus. Malè quoque *Göclenius* exempla plurimum sympathiarum adduxit: non sequitur enim, si in variis rebus dantur sympathiz, ergo & in unguento. Deinde sympathia quæ dicitur esse in hoc unguento, longè diversa est à sympathia rerum aliarum, quæ vires suas per insensiles affluxus in aërem diffundunt, nec spiritu Mundi tanquam vectore indigent, & nunquam nisi objecto præse sente fiunt, & intra certum spatium finiuntur. Esse autem certas quasdam ἀποπόλας ostendit magnes, qui alio perunctus ferrum non allicit, indicio non solius qualitatis, sed etiam substantiæ alicujus tenuissimæ fieri effluvium. *Secundò* non fit legitimus contactus agentis & patientis, non enim vulnus ipsum attingit, sed telum tantum absens, quod nec morbi, nec sanitatis est subiectum, & quod curari non postulat. Vnde non absurdè dixit quidam, illum qui telum ligat ut vulnus sanetur, idem facere ac si quis lapidem frigidum qui manum refrigeraverit, operiat, ut eadem manus calefiat. Nec dicat quispiam fieri contactum virtutis deferente spiritu Mundi vim unguenti ad vulneratum. nam spiritus hic Mundi, si talis datur, communis est omnibus rebus quæ Mundo continentur. Aliter spiritus Mundi non foret. Et tamen in aliarum rerum sympathiis non operatur, nam absente objecto nullæ sunt. Et præterea virtus hæc unguenti sympathica, quæ cum spiritu Mundi tam amica societate connectitur, non sita est in re artificiali quā talis, sed in quapiam re naturali, dicere deberent quænam in unguento sit res illa naturalis, cui peculiariter cum spiritu Mundi tanta est familiaritas. Sicut nos Galenici dicimus in quolibet organo esse quandam partem peculiarem, quæ est sedes facultatis, & à qua præcipuè pendet actio: haud dubiè idem fieri debet in hoc unguento, nam omnia simplicia quæ illius compositionem ingrediuntur, non possunt æquè primò

cum

cum spiritu Mundi ita consentire, ut illorum vires de loco in locum transferat ad arbitrium inungentis. Curatio igitur fiet vel à similitudine teli ad vulnus obligandum, at in relationibus nulla est agendi efficacia, quin potius inter telum, & vulneratū antipathia esse deberet; Aut virtus quædam dimanat ab unguento ad vulnus, (nam secundum Crollium unguentum est glutinantis & suppurantis naturæ) at non se tangunt. Nec sufficit ista sympathia naturæ quam curationis causam cum balsamo naturali constituit Crollius: Nam si ulla est ejusmodi sympathia, inunctio erit supervacanea, virtutes enim quæ per tanta locorum intervalla deferuntur magnetico more, non egent corporea applicatione. At in hoc unguento fit contrarium, quoniam sine armorū inunctione nihil præstat; Igitur ejus actio est materialis, & reliquorum unguentorum more, operari non potest absq; contactu corporeo, ut apparet ex inunctione. Si enim operari posset magneticè contactu corporeo, frustra est inunctio; Imò frustra observat Crollius modum inungendi in parte superiori vel inferiori teli, nam posset vis ejusmodi vulneraria ex pixide unguentaria ad omnes demum vulneratos diffundi, nam cum omnibus habet sympathiam. Cum igitur non operetur absq; applicatione corporea & certum inungendi modo, certum est reliquorum remediorum more tantum agere posse in rem cui admoveatur, non autem ulterius. Tertiò, cur in unguento admiscantur sanguis, adeps, & muscus ossium humanorum; An propter spiritus qui rebus hisce etiam corruptis inesse creduntur. At plures sunt in corpore ejusmodi spiritus, quam in unguento, aut in effuso sanguine vulnerati. Igitur vel vis unguenti sanat, vel vis spiritus deferentis. Si vis unguenti curationis causa est, vel sita erit præcipuè in adipe, sanguine, & usnea, vel in aliis remediis naturalibus unguento additis, oleis scilicet, & pulveribus. Si à prioribus pendet vis

unguenti, inutile erit unguentum, quia in ægrotantis corpore, jam hæc antea insunt multò & copiosiora, & efficaciora. Si verò pendet ab aliis simplicibus, quæ subeunt unguenti compositionem, frustra adduntur priora, sanguis scilicet, adeps, & usnea, quia nullas dant vires unguento. Sic quodlibet remedium vulnerarium, si vulnerati sanguis ipsi admoveatur, poterit curare vulnus magneticè, deferente scilicet spiritu vim unguenti ad partem affectam. Et revera nulla ratio est, si hæc sympathica curatio est naturaliter possibilis, cur omnibus unguentis non conveniat, & sanguis & usnea non propter vim curandi, sed propter sympathiam tantum unguento admiscantur. Sicut, si detergendum vulnus est, sumatur sanguis patientis, cui admoveatur detergens unguentum, spiritus qui sunt in sanguine, propter sympathiam, mediante spiritu mundi, vim illius unguenti deferent ad vulneratum, sic fiet curatio. Potest pariter quodlibet remedium fieri sympathicum, sic poterunt purgationes institui, aliæve Medicorum intentiones perfici, admoto ægrotantis sanguine cuilibet convenienti remedio, cujus virtus postea ad ægrum devehatur, mediante spiritu Mundi. Quod si vis spirituum ipsorum sanandi vim habet, cum plures in corpore remaneant, frustra vis unguenti imploratur. *Quartò* apparet ex circumstantiis inutilem esse ejusmodi curandi rationem. Dicunt enim ex ligatura vel laxa nimium vel compressa, eadem in ægris contingere symptomata, quæ ex ejusmodi deligatione accidunt, quando corpori adhibetur. Symptomata autem hæc vel proveniunt ab unguento, vel à deligatione. Non ab unguento, quia vim sanandi habet, non autem nocendi; nec à deligatione, quia res artificialis non habet vim operandi ad distans, & in aliud subiectum quàm cui admovetur. Vnde quia *Crollius* varias applicandi formulas præscribit, suspectum esse debet ejusmodi unguentum, nam in rebus naturali-

ruralibus ejusmodi artificiosa ungendi ratio vim immutare non potest, & ex benefica noxiam facere, sicut pariter in magnete apparet. Nec etiam ab utroque dependet, quia vis unguenti magnetica, cum statuatur esse prorsus naturalis, & unguento insita, provenit ab agentibus naturaliter operantibus, qualia sunt simplicia ex quibus componitur, non autem ab artificialibus, quæ à mero inungentis arbitrio pendent. Præterea dicunt, quicquid commodi vel incommodi spiritus ille qui est in sanguine teli sentit, idem congeneri suo in venis sympathicè communicare, inde fit ut æger doleat, si telum igni, aut aëri frigido exponatur. At sic non solum unguenti virtus vulneraria, sed etiam frigus externum habebit vim magneticam, quod est absurdum. Posset sic noxia illa refrigeratio, à telo refrigerato ad ægrum deferri, per medium fervidum ut in summis æstatis ardoribus. Si igitur in Boreali regione telum inungeretur, patiens verò esset in Africa regione fervida, telo ex suppositione refrigerato, æger in Africa etiam forsitan juxta ignem refrigerabitur. Id autem cum non possit fieri nisi per ærem, ut facetur *Crollius*, aër Borealis habebit vim refrigerandi aërem Africanum, quod quis non videt esse absurdissimum? Sed quærerem præterea, cum mutua sit spirituum sympathia, & scribant assertores curationis magneticæ, vice versa si æger pravam observaverit vivendi rationem, & allium, capas, sinapi comederit, id statim in telo observari. Si juxta ignem in Africa æger decumbat probè calens, telum autem inunctum aëri frigido exponatur in Boreali regione, cur potius æger refrigerabitur, quàm telum incalescet, quia volunt illi spiritus suas passiones sibi invicem communicare. Externæ istæ affectiones ut refrigeratio, vel calefactio spiritibus accidunt, vel ab unguento, vel non. Si non, ægrum non afficiunt, quia unguentum necessarium est propter vim magneticam quæ ipsi inest,

est, non autem in ambiente aëre, ut aliis rebus externis, & propter solum unguentum à telo ad ægrum sit virtutum communicatio. Nec ab unguento, quia nec refrigerandi, nec calefaciendi virtutem habet. sunt igitur hæc externum quid, nec *κρυμνόν*, & pro ambientis alteratione permutantur, nam in calido aëre, probè deligato telo & operto, tum spiritus, tum unguentum incallescunt, & contra. Tunc quæro, quomodo in via ab aëre iterum non refrigerantur, possunt enim transferri per ejusmodi medium quod frigidum est, sicut venti natura frigidi per plagas calidas transeuntes ipsi calefiunt, ut sunt meridionales. Pariter si quispiam vulnere, vel venæ sectione, vel hæmorrhagia, aut alio modo plures sanguinis uncias amittat, mirum est quomodo alterato, & refrigerato illo sanguine, varia non patiatur æger symptomata, si tanta est spirituum inter sese sympathia, ut quæ commoda vel incommoda ab externis causis patiuntur, congeneri suo in venis communicent. sic spiritus illi refrigerati corpus illud à quo effluerunt iterum refrigerare possunt. Si effusi sanguinis gutta una vel altera quæ in telo remanet, inunctione unguenti, corpus vulneratum calefacere potest, si in calido loco servetur, quia scilicet ipsi spiritus incalescunt, mirum est cum reliquis sanguis effusus, qui plures & copiosos spiritus possidet, relinquatur, rejiciatur, aëri exponatur, corpus pariter eodem tempore non refrigerent, cum in majori quanto semper major sit virtus, si idem sanguis uratur, quidni æger ignis ardorem sentiet, aut si sanguis ille putrescat, quomodo corpus ipsum quoque non putrescit, si tanta est affinitas inter effusos spiritus, & corpus à quo profecti sunt? Quæro pariter si telum desit, sufficiet secundum illos aliud telum, aut lignum salignum guttula una sanguinis, ex vulnere profusi inungere. Si igitur quo tempore vicario huic telo curiosè inunctio admoveatur, prius illud telum

telum quod vulnus inflixit, aut in ignem, aut in aquam projiciatur, cur æger non indoleſcet, refrigerabitur, aut ardebit. Nulla enim eſt ratio cur ab una particula ſpirituum patiatur potiùs quàm ab alia. Abſurdum ergo eſt, ejuſmodi calefactionem, vel refrigerationem magneticè communicatam conſingere. Obſervabit igitur Lector quæcunque illi dicunt de ſympathia ſpirituum inter ſeſe, vera tantum eſſe apud illos de particula illa ſpirituum, quam fingunt uniri cum ſpiritus unguenti per inunctionem, & omnia quæ corpori vulnerato accidere dicunt ſymptomata ſive bona, ſive mala, inde omnia proficiſci. Sed Spiritus qui ſunt in reliquo ſanguine effuſo nec nocere, nec prodeſſe, ſic illorum ſympathia evanuit, cum tamen ſint ejuſdem ſpeciei cum reliquis ſpiritus. Et quis hæc credet non eſſe Magica, maximè ſi majorum actiones cum iſtis comparentur. Quis non legit familiare eſſe Magis cereas effigies facere, quarum ope multa damna intulerunt, & præcipue quod calefactionem hanc ad diſtans ſpectat, ſcribit Virgilius in Pharmaceutria, *Limus ut hic dureſcit, & hæc ut cera liqueſcit, Vno eodemque igni, ſic noſtro Daphnis amore.* Referunt etiam hiſtoriæ apud Hætorè Boëtium, & alios quorſdam in imagine cerea ad ignem plus ſatis incaleſcente, fuiſſe lento quodam igne aſſatos, ut Duſſum Regem Scotorum? Sic in abſentes calorem, frigus aliasque affectiones ad lubitum inducunt, quæ naturaliter fieri non poſſe omnes conſitentur. Quis non audivit ſagas unguento Magico delibutas per aërem vehi? Sed clariſſimè ad rem noſtram facit quod ſcribit Paraceluſus de morbis inviſibilibus, ſi quiſpiam ſit læſus, eſſe effingendum pedem, vel manum, aut aliud membrum ad formam ejus quod ægrotat, vel etiam imaginem totius corporis, atque illam eſſe inungendam, & obligandam, non dolentem hominem, imò & aliis morbis decumbentes pari modo eſſe ſanandos ſcribit. Quis hæc naturaliter fieri credat,



& tamen non minus facile est hic recurrere ad virtutes magneticas, & sympathias, spiritumque Mundi, quam in unguento armario. Hic sunt exempla curationum Magicarum ad distans, quæ omnino similes sunt inunctioni teli, nam sicut imago inungitur & obligatur ad curandum vulnus, sic & telum; & sicut imago igni admotæ, aut gelu imposita absentem urere, aut congelare solet, sic & unguentum telo illitum; & sicut Rex Scotorum apud Boëtium in cerea imagine ferme consumptus fuit, facile idem vulnerato ex inuncto telo accidere potest, si qui inungit malitiosè telum ad ignem aut eo loco collocet ut damna sua agrotanti communicet, quis non videt idem esse posse maleficii genus? Si qui ope imaginis hæc præstat diabolo vectore utitur, qui est spiritus huius Mundi, verisimile est eundem esse autorem istius curationis, quam magneticam vocavere, ut scilicet virus suum occultarent specie naturalium actionum. Et meritò ob authores Magiæ suspectos ipsum remedium suspectum esse debet. Nam *Paracelsus* & *Crollius* variis in locis magiam laudant, & Medico necessariam esse volunt. Supponamus autem nihil hic adesse Magicum, curationem tamen falsam esse & inanem ulterius probabimus. Quintò igitur, si spiritus sanguinis operatur omnia, & unguentum analogiam habet & familiaritatem cum spiritu qui est in sanguine, cur pariter alii morbi curari non possunt, roboratis spiritibus, & balsamo sanguinis: nam fatetur *Crollius* fieri curationem à balsamo sanguinis, spiritus enim & balsami virtutes in corpore omnia perficiunt. Sextò si secundum *Hartmannum* sal sanguinis fixus absque inunctione non attraheret spiritum ex unguento, sequitur nullam hic adesse vim magneticam, quia contactus corporeus necessarius est, & hinc pariter sequetur absque simili contactu corporeo non posse ad distans operari, nec vires suas usque ad vulneratum diffundere. Sanguis vel vi-

res habet in seipſo, vel ab unguento. Si in ſeipſo, fruſtra eſt unguentum. Nec ab unguento, quoniam ipſum unguentum ſympathiam cum ſpiritibus agrotantis, quam habere dicitur, obtinet à ſanguine, carne, adipe, & uſnea, quæ illius compoſitionem ſubeunt, ratione ſpirituum, qui in illis rebus remanere creduntur, ſequitur unguentum nullas habere vires, quæ non antea in ſpiritibus laterent, & ſic quoque fruſtra eſſe unguentum concluditur. *Septimò* ſpiritus in ſanguine, adipe, uſnea vel diverſæ ſunt, vel ejuſdem naturæ. Si diverſæ ſunt inter ſe naturæ, haud dubiè diverſas quoque habent vires, nec eandem cum omnibus ſympathiæ rationem, ſed ſpiritus ſanguinis cum ſanguine, ſpiritus carnis cum carne, ſpiritus uſneæ cum cranio majorem habent affinitatem. Propterea ut rectius curatio ſuccedat, & ſympathia ſervetur, præter ægri ſanguinem, & adeps, & oſſa illius deberent cum telo unguento imbui, ut completa curatio fieret, & magnetica virtus abſque errore ad partes affectas deferretur, ſiquidem non eadem eſt in prædictis ſpiritibus. Si verò ſpiritus hi omnes ejuſdem ſunt inter ſe naturæ, fruſtra tam curioſè ſanguis, adeps, caro, & uſnea admilcentur, cum ſolus ſanguis qui omnes iſtos ſpiritus complectitur, ſufficere poſſit. *Oſtavò* legi hitoriã equi cujus pedes clavo læſi fuerant, ad curationem clavis prædicto unguento fuit inunctus, ſicque equus convaluit, idemque etiam *Crollius* fatetur. Vnde ſequitur eſſe quandam ſympathiam & familiaritatem inter unguentum iſtud & ſpiritus equi, fateturque vir quidam doctiſſimus, eandem virtutem baſſamicam eſſe in homine, & in equo. Quæ ſi vera ſunt, fruſtra præfertur ſanguis humanus equino, quæ erim ſunt eadem uni tertio, ſunt eadem inter ſe. imo vult *Crollius*, non equum ſolum, ſed & omnia animalia carnem & oſſa habentia, hoc unguento poſſe ſanari. Et revera ſi curatio hæc certa eſſet, etiam quodlibet unguentum vul-

nerarium non minùs idoneum foret, quoniam illius virès ad agrum, mediante spiritu pariter deferri possent. Nonò cum vulnerum curatio non tantùm simplicium, sed etiam maximorum & inter-  
 norum à natura sola sèpius perficiatur: nam unire, carnem generare, opera sunt naturæ non artis, & fateatur *Crollius* in hâc curâ magneticâ etiam balsamum naturale operari, mirum est cur non ipsi ægrotanti linimentum istud applicetur, cur ulcera non curet, cum omne vulnus tandem fiat ulcus, cum ex ulceribus etiam sanguis exire possit, cum præcipuæ indicationes vulneris, etiam in ulcere reperiantur. Cur ad vulnera sclopetorum & cum jactura substantiæ partium curanda non adhibeatur? Cur *Crollius* vulnera nervorum, arteriarum, & membrorum principalium exceperit? Scilicet valet tantùm ad simplicia, & solitaria in carne vulnera, quæ natura sola deligatione, vi balsami naturalis, id est calidi innati, conglutinat, inde facile est, cum quotidie vulnus & linteis mundis, & recenti lotio detergeatur, illud sponte coalescere absq; ulla unguenti alicujus administratione. Inutile igitur istud unguentum erit. Non est ergo quod experientiam nobis obtrudant, nam haud dubiè absque unguento ejusmodi vulnera curari potuissent. Unguentum enim istud nec vulnerum excrementa discutit, aut expurgat, nec partium temperiem conservat, corporis enim partes quæ pssunt vulnerari, variz sunt: sanguineæ, spermaticæ, nervosæ, membranosæ, carnosæ, homines ipsi biliosi esse possunt, aut sanguinei, melancholici, pituitosi, plethorici, cacochymi, & quibusdam aliis morbis etiam laborare, quibus omnibus non potest unicum unguentum esse accommodatum. Et de his satis.

## CAP. XLIX.

*De curatione Strumarum quæ dicitur fieri per  
contactum septimi fœtus.*

**Q**Uoniam mihi innotuit nuperrimè quosdam qui se septimos fœtus masculinos esse prædicant, mira polliceri circa sanationem strumarum, quam solo contactu se perficere profitentur, sicque populo nimium credulo fraudem faciunt, pauca de his dicenda sunt. Rogatus autem à quibusdam primariæ notæ Medicis hoc caput addidi; Et quidem morbos quosdam solo remedium quorundam contactu interdum sanari, præstantissimorum Medicorum autoritas suadet. Talia sunt amuleta, & periapta quædam, sicut *Galenus* appensam pœoniam probat ad Epilepsiam, alii lapidem ætitem fœmori alligatum ad partus difficultatem, variaque ejusmodi exempla apud authores reperiuntur, quæ plurimi se observasse dicunt, quanquam prædicta exempla de pœonia, & ætite lapide mihi periculum interdum facienti nunquam successerint; Non nego tamen occultos plurimarum rerum consensus & dissensus, nec experientiæ, præstantiumque Medicorum autoritati repugnare cupio. Verùm longè majus est, quod se posse isti profitentur, scilicet solo contactu strumas sanare, idque quia septimi fœtus sunt. Id autem naturale esse vix quisquam crederet. Quod enim naturale est, ab intimis pendet principiis, omnique individuo illius speciei, si incolumne illud sit, & naturaliter sese habeat, convenit, ut omne Rhabarbarum purgat bilem, omnis homo risibilis est. Nec pendet à numero, si quidem numerus nullam habet agendi vim secundum Philosophos: actiones enim sunt suppositorum, & à forma rerum dependent. Verùm septimus iste fœtus vim habere dicitur peculiarem, quæ sex fratribus prioribus denegata est, quia sci-

liceat seprimus est. Necesse igitur ejusmodi vim aliunde dependere; cum neq̃ à forma, nec à numero proficiatur. Non quidem à contactu, quoniam tactus quā tactus vim solam habet tangendi. Quod si virtus quædam vel noxia vel salutaris inest corpori, ea per tactum quidem communicatur. Verum ipse tactus eam vim non possidet. Præterea cum omnium morborum curatio solius causæ depulsionem perficiatur, strumas pariter isti thaurmurgi non nisi sublata causa tollunt. Cum autem strumarum causa secundum Medicos pituita sit, in glandulis confirmata, quæ in aliis partibus alios morbos parit, eodem contactu, eadem virtute aliis morbis ab eadem causâ profectis posset opitulari. Quod cum non fiat, necesse est vel miraculosam esse curationem, vel ægrotantis imaginatione totam inniti. At cum ægrotantium imago variè sese habeat, in quibusdam fortior, in aliis imbecillior sit, incertus haud dubiè ex incerta causa eventus sperari debet. Miraculosam igitur esse necesse est, aut falsam, & Dæmoniacam. Miraculosam esse non facile credendum est. Contactu olim sanabant Apostoli, & primi Christiani, ad majorem Dei gloriam, & Christianæ religionis incrementum. Verum non temere ad cuiuslibet arbitrium miracula fieri vult Deus, sic quod olim fecerunt Apostoli, non propria virtute, sed Domini nostri Iesu Christi nomine se perfecisse docuerunt. Ideo septem illi fratres filii Scevæ Iudæi, qui pariter eodem nomine adjurare voluerunt. Dæmones, temerariæ audaciæ poenas dederunt vim à Dæmone passi. Sic non licet temere miraculorum effectum aggredi. Pariter Galliæ & Magnæ Britanniæ Regibus ex gratia Dei, concessa est vis hæc strumas sanandi, quæ aliis Regibus Christianis denegata est, sicut etiam sanctus Edvardus. Rex ob singularem pietatem non solum strumas (quod privilegium ad successores dimanavit) sed etiam alia ulcera solo contactu sanabat,

nabat, quod tamen successores non possunt. Cum igitur ejusmodi gratia solis prædictis Regibus concessa sit, & tota in nomine Domini nostri Iesu Christi perficiatur, si idem alii Reges conarentur temeraria ea foret, atque audax nimium divini numinis tentatio, qui hanc potestatem ipsis noluit concedere. Vnde in Hispania ipsa, ubi morbus hic scrophulorum quasi endemius est, & popularis: Franciscus primus Gallorum Rex captivus, eas contactu suo ut in Gallia solebat, curavit: quæ de re extat Epigramma Marulli:

*Hispanos inter sanat Rex Chæradas, estq;*

*Captivus superis gratus ut ante fuit.*

*Indicio tali, Regum Sanctissime, qui*

*Arcent, invisos suspicor esse Deo.*

Notandum præterea prædictos Reges, quibus Deus id concessit, non habere id donum nisi cum certa conditione, nec transire vim istam ad successores, nisi sint legitimi, & in Christianâ fide permaneant. Nam si prædator quispiam (ut fuerunt olim, Deusque novit qualia futura sint regnorum fata) legitimum principem imperio deiceret, unâ cum regno virtutem hanc sibi non acquireret: Nec pariter si Regum legitimè sibi succedentium quispiam (ut varia sunt hominum ingenia) abnegata religione Christiana, ad aliam deficeret, jus istud retineret. Beatus enim Remigius, cum cujus unctiōe ad Reges Gallorum potestas hæc dimanavit, optimus haud dubiè hujusce rei Interpretis vim hanc concessam Regibus edixit, quamdiu in Catholiâ fide sint permansuri, insinuans cessaturam eam si quando ab hac fide deficerent. Hæc cum ita sese habeant, quis credet quibuslibet hominibus, similem vim datam esse simpliciter & absolutè à nativitate perpetuam, quam soli Reges, solummodo cum unctiōe consequuntur, atque sub conditione, si, sint in fide Christianâ constanter, cum Deus miracula non faciat, nisi ad majorem

rem sui gloriam, & fidei confirmationem; Nec probabile est Deum donum hoc jam ejusmodi viris prius concessum, & propterea satis vulgare, (cum septimus foetus non sit rarissimus) Regibus in pietatis testimonium, & tesseram indulsisse, quod pariter alii possident, quibus interdum nulla religio est. Quod igitur Deus Regibus largitus est, tale esse debuit, ut ob raritatem & singulare privilegium, Dei gloriam magis patefaceret, quod non foret, si jam simile quibusdam aliis natalium jure tribuisset. Nec reperitur ulla promissio à Deo facta septimo foetui, nec ante religionis Christianæ prima incunabula, nec postea, & mirum nullos fuisse Apostolorum tempore septimos fatus qui cum ipsis de virtute patrandi miracula concertarent, cum tamen haud dubiè plurimæ familiæ numerosissima sobole luxuriarint. Propterea certius est Diabolicam esse ejusmodi curationem, si ulla est. Scimus enim Diabolum Dei æmulum, ut illius cultum minuat, eadem imitari quæ Deus fecit, sicut virgas Magorum arte fallaci vertit in Serpentes, & ex confessione quorundam Magorum recentiorum in conventibus Magicis, venerandos Ecclesiæ ritus mimicè representari curat; Sic pariter ut virtus hæc eximia, quam Regibus concessit Deus, veniat in contemptum per nefarios suos emissarios idem tentare audet. Verum Deus gloriam suam non dat alteri, non patitur vera à Dæmone fieri miracula, sed fallacia tantum & adumbrata. Ideo haud dubiè hunc Strumarum morbum aut nullo modo curant isti homines, quod facile experientia duceri potest, aut Dæmon ut in aliis morbis solet, per agentia naturalia, quorum vires habet cognitæ, morbum hunc citissimè sanat, quod idem facere possint Medici, si omnis naturæ virtus ipsis foret explorata. Notandum tamen est morbum hunc pueris esse magis familiarem, atque fieri à pituita, quæ  
ætatium

ætatum successione ex caloris incremento dissipatur, morbusque sponte cessat, quod multis etiam puerorum morbis est familiare; quod si contingat, non tangentis cujuslibet incertæ virtuti, sed naturæ tribuendum, quæ morborum medicatrix ab *Hippocrate* vocatur.

F I N I S.





1. 1. 1. 1. 1.





